

ZALENNA RAM



Mizoram State Library
IXG991



Siamkima

DATE LABEL

MIZORAM STATE LIBRARY


The book taken from the Library is to be returned within 7 days. A fine will be charged under the rules of the Library for each day the book is kept beyond that time.

Date of Issue	Due Date	Date of Issue	Due Date
<u>3858</u> <u>X1/74</u> <u>-4271</u> <u>1286-2714</u>	<u>4/5/09</u>		

N.B. :- Book lost, defaced or injured in any way shall have to be replaced by the borrower.

ZALËNNA RAM

Essay on Life and Letters



If I have freedom in my love
And in my soul am free
Angels alone, that soar above,
Enjoy such liberty.

- Richard Lovelace

MZ . 808 . 84
SIA



SAP UPA
(Rev. F.W.Swidge)
(1862 - 1935)

PU BUANGA
(J.H.Lorrain)
(1871 - 1944)

MIZORAM STATE LIBRARY

Acc No 100-991
Acc by Sh
Class by Msa
Cata by SLD
Sub Heading by _____
Transcribed by _____
Location No _____

We were the first unarmed white men the Lushais had seen, and very quickly they adopted us as their own, giving us the name of "Zo Sap," which signifies "The Lushais, White Men" - a term which has since become the appellation of all missionaries. Then, to distinguish between Savidge and myself, they added to his name "Upa" (the elder), and to mine "Naupang" (the younger). These were our Lushai names for got changed to "Pu Buanga" on account of my fair hair, but Savidge's remained "Zo Sap Upa" or "Sap Upa" to the end. Very few of the Lushais even now know what our English names are.

A FEW DATES WHICH MAY INTEREST YOU

Savidge and I first arrived in the Lushai Hill (Sairang)	11 Jan. 1894
Opened first school with two pupils	1 April 1894
Commenced translating Scriptures (St. Luke's Gospel)	21 Aug. 1895
I preached my first sermon in Lushai	16 Sept. 1895
Begun regular Lushai services	2 Oct. 1895
The first Lushai convert (mentioned in letter dated 30.3.1896)	30. Mar. 1896
Built first Lushai Church (Took nearly 20 days to build & cost £ 1-10-0 on spot where memorial now stands)	6 Oct. 1896
Our Lushai written vocabulary reached approximately 5000 words.	10 April 1897
Rev. D.E. Jones arrived in Aijal (to be started in the language by us and to take over our work)	10 Sept. 1897
Savidge and I handed over our work to Rev. Jones of the Welsh Mission and left the Lushai Hills (Sairang) for furlough in England, followed by pioneering work for the Abor & Miri Tribes around Sadiya, Upper Assam.	31 Dec. 1897
Savidge and I arrived in Lumleah for work in the South Lushai Hills under the B.M.S. (Baptist Missionary Society)	13 Mar. 1903

J.H. Lorrain
8.5.1934

ZALÊNNA RAM

Essays on Life and Letter

By

SIAMKIMA KHAWLHRING

Mizoram State Library
DG991



Publisher

**M.C. LALRINTHANGA
KHATLA, AIZAWL,
MIZORAM**

ZALĒNNA RAM

ZALĒNNA RAM

by Siamkima Khawlhring

**Copyright Reserved
by F. Rengchhawni**

First Edition - 1986

Second Edition - 1992 Copies - 2000

Third Edition - 2002 Copies - 2000

**MANUFACTURED IN INDIA
PRINTED BY V.L.RUATA AT THE GILZOM OFFSET,
A/54, ELECTRIC VENG, AIZAWL: MIZORAM.
Ph. 321950/320853**

**Dedicated
To
The Memmory of
UPA LALRAMMAWIA LUNGEN
(1930 - 1985)
Who Encouraged Me
To Write
This Book**

*Twilight and evening bell,
And After that the dark!
And may there be no sadness of farewell,
When I embark.*

Tennyson

A CHHUNGA THU AWM

	Phek
1. Chhut hnihna chungchang	11
2. Introduction	13
3. Thuhmahruai	19
4. Literature Kan Tih Hi	31
5. Eng Thu Nge Ziah Tur	34
6. Rih Dil leh Mizoram	45
7. Hla Pahnih	48
8. Thawnthu Pahnih	55
9. Hla Pakhat	69
10. R.L. Kamlala	76
11. Thil Nung Pathum	86
12. Mi Hrâng Chhûra	100
13. Zawlpala Thlân Tlâng	109
14. Pi Pu Chhuatlâng	116
15. Hun Hi	123
16. Krismas Hla	129
17. Bethlehem Dai	140
18. Thlalêr Ram Ro	145
19. Book Review	166
20. Hrawva	176
21. Poets' Corner	191
22. Stratford-Upon-Avon	210
23. Siboleth leh Shibleth	221

CHHUT HNIHNA CHUNGCHANG

ZALÉNNA RAM chhut khatna kha miin an hlutin, fak a hlawh hle a. Thu thenkhat phei chu College leh High School zir atan thlan an ni. Lehkhabu tha tak lei tur awm ta lo chu chhut nawn leh tula hriain, kan chhu nawn ta a ni.

Prof. Siamkima'n ngun takin a ziak nawn leh a, thu tam tak tidanglamin, paih leh siamrem a nei bawk 'Pi' leh 'Pu' tih a paih deuh vek a, hman loh theih loh ang maia kan hriat thenkhat; chhiartute buai loh nan a paih lo, 'Pu Chhuana' tih te.

Chhut dan tur kan sawi dunin, ka thian Siamkima chuan 'Shendu Shendoo' tih leh 'Siboleth leh Shiboleth' tih paih a duh a. 'Public Opinion,' 'Isua Ropuzia' leh 'Sakawl' tih thupui hmanga ziak belh a duh thu a sawi thin. A bul tanin, a ziak zo hman ta lo va. Chuvangin a duhthusam ang chuan kan puitlin thei ta lo a ni.

Prof. Siamkima'n a tawp lama mi, 'Poets' Corner,' leh 'Statford-Upon-Avon,' te hi a ziak tha hman lo va, a ngai ngain kan chhu nawn leh a. Chhut tel tawh loh ni se a tih, 'Shendu Shendoo,' chu amah ngeiin a paih hman a, telh loh tura a tih pakhat 'Siboleth leh Shiboleth' chu kan rawn telh leh ta mai a ni.

Introduction ziak turin Pu L. Keivom IFS, Italy rama awm mēk a sawm a, sawm angin a rawn ziak a. Kan thian L. Keivom hian fak lutuk deuhin a hria a, chuvangin telh loh nmai ni se a ti thin a. A bu peih fel a nih hmaa min boralsan tāk avangin telh ngei tha hriain ka telh ta zawk a ni. Fak phū, fak leh chawimawi hi a jūl a, ka thian L. Keivoma'n Introduction-a a ziak pawh hi Prof. Siamkima hian a phūin tha pawh ka ti hle. ZALÉNNA RAM chhiartuten hlawkuina an neih ka duh a, ka beisei bawk.

INTRODUCTION

Siamkima'n a ngaihtuahna thûk tak aṭanga thu tak a rawn khawrh chhuah, kum eng emaw chhunga thusep hrang hrang a lo ziak tawh zinga a then chauh lâwr khawm, lehkhabu a buatsaih ZALÉNNA RAM hi Zo ḥawnga literechar pulpit kan hun chhuah tawh zawng zawng zingah a la sâng ber âwm e.

ZALÉNNA RAM hi Sapṭawnga 'literacy criticism' an tih, Tahana thu leh hlaa zawlpuiten '*fak-selna*' an tih bawk, literechar tāngpui pawimawhte zinga chi khat, enlenna (dūrbin) hmanga thu leh hla leh khawvel leh mihring nun awmzia chik taka bihna a ni. A ziaktuin, "Mizo rilru leh ngaihtuahna khawvel tihzauna tur leh kan ḥawnga literacy criticism bul ḥan nan heng thute hi ziakin he lehkhabu hi a lo chhuah" a ni tih min hrilh. He a thil tum pahnihte hi a thu ziak hian a phur chhuak hneh hle. Chumi kawngah chuan he lehkhabu, kumhlun tling tur hi Zofate literechara hmahruaitu leh hnârkaitu, pholēng hmasa ber, mi hrâng Shakespeare-a kutchhuak thu leh hlate anga hlutna chuai ngai lo tur chu a ni.

ZALÉNNA RAM hi chhimbâl zam ang a ni a, a mawiin rilru a tixlim a, a mawizia erawh chu ḥawngkaa sawi fiah thiam a ni lo. Essayist hmasa ber leh hmingthang, French pachal, Michel E. Montaigne (1533 - 99) hun aṭanga kum zabi sawmhnhnihna thlenga thusep ziak thiam avanga mi hmingthang, entir nan John Dryden te, Joseph Addison te, Charles Lamb te, William Hazlitt te, Max Beerbohm te, James Baldwin te, J.B.S. Haldane te, D.H. Lawrence te, H.L. Mancken te, Virginia Woolf te leh mai dang tam tak hlawhtlinna bul ber chu, Montaigne-a ang bawkin (a) an thu ziakah an chêng a (intimacy); (b) mawi leh luang takin an sawi chhuak thiam a (informality); (c) huai leh zalēn takin an hmuh dan an sawi ngam bawk a ni (independence), Sanhedrin ho hmaa Peteran,

"Keini zawng thil kan hmuh leh hriat hi sawi lovin kan awm thei lo," a tih ang khan an thil thiè dat, hriat dan leh hmuh dante huai takin an sawi mai a ni. English essayist leh critic, William Hazlitt-a chuan, hetianga thu ziak mi thu ziakte chu "filawsawfar tan emaw, mi fing tan emaw, thu sawi thiam tan leh zirtir nei sermon mi tan emawa a duan ni lo mahse a rirua lo lang thu huai taka a sawi chhuah ngam avang mai khan chung mite mamawh phuhrûksaku chu a lo-ni ta zawk a ni," a ti a. Chu dinhmun chiah chiah chu mi hrâng leh ril Siamkima hijan a rawn luah a ni.

ZALÉNNA RAM han chhiar hi chuan a ziaktu hi a thu ziakah a chéng tak tak tih kan hre nghâl a. A thil chhui chhuah tumte chu râl atangin a bih hmasa phawt a, hmun danga a thil hmuhte nen a khaikhin a, an rih dan a bûk tawn a. Chumi zawk chuan a pan hnai a, a luhchilh a, mit láwng khawpin a bih a, kut ngeiin a han khetwi a, a hriatna hnar fing tak mai chuan a hnim a. Chung a thil hmuh leh hriatte chu huai tak leh simkhur takin, mawl leh mawi eltiang, tluang leh fiah êm êmin a ziak a. A ngaihtuahna thlalak chu a fiah êm avangin lehkhas a nemkai hnu pawhin a lak fuh loh emaw, phe ruai emaw, a thusepah hian hmuh tur a awm lo,

Literacy criticism hi thu leh hla thékna, rilna, mawina leh histna hai chhuash tum a chik taka bikhna a ni. A tehna fung erawh chu kap agaik bluttawng a zirin a danglam thei a ni. Tuhant leh favah chuanne puanzar, hnutia lengten literatechar thi a, tehna fung chu Karl Marx-a khatte a ni. Chutiang bewkin, silai piakhing hmanga pawlitiks solfa iunifewen hiting bahovin an vaint tantoh te leh puithiamten ini vok nes, kraws tahtum ai lehna horuna ait telisfang chin a danglam daih ang. Chu hñun chep tak leh chaukhthinti piakhing chuan Prof. Siamkima ini uien takin a zin kual a, 'role' hrang hrâng 'play' leh, thaam hrang hrang hñin kien hñu a. Literacy critic leh essayist uenik buktah poet, dramatist leh novelist angin tan

hmu. A changin filawsawfar a ni a, a chang leh historian a ni. A chang erawh chuan theologian leh thuhrlitu ropuitak angin kan hmu leh a. Scientist angin thil a chhût a; ukil thiam tak angin a thu phuh chhuahte chu a kîm phui zel a. Chuvangin, a hming ‘Siamkima’ hi pu âwm rêng a ni.

Kum 1889 - 1894 inkarah Zoramin rûntu chi hnih a tâwk a. Rûntu hmasate chu Kumpinu sipai rual ralhuam cheleka tharum hmangtu an ni. Rûntu dangte chu, amah Siamkima khabe hawhin, “Khawvela literechar huai ber, Hebrai Baibul” phaw hmanga rawn beitu, English misawnari pahnih, Savidge (Sap Upa) leh a thian Lorrain (Pu Buanga) an ni. Zofate awpbehna tur kulh saa Kumpinu sipaiho an hmanhlelai chuan Hebrai Baibul sipai pahnihte erawh chu Zofate chhanchhuah leh zaléntirna tur lekhha hmanrua tukin an lo hmanhlel ve thung a. “Hebrai literechar chu innghah nân hmangin kan Mizo literechar bul min rawn tansak ta a. Tichuan, kan Mizo tawng leh ziarâng (literary form) chu Grik leh Roman literecharah kan chhui lut ve thei a ni” tiin ZALÈNNA RAM ziaktu hian min hrilh.

Hebrai Baibulin Zoram khawvelah chhungpui fa chan a chan tak hnu chuan Mizoram dîl hmingthang ber leh lian ber - Rih dîl, Burma rama awm leh rinnaa Zofate lui thar, Jordan lui chu hmun inchuhin Zofate rilruah nasa takin an insual a. “Jordan lui chu Mizorama lui lian ber leh sei ber a lo ni ta a ni” tiin min hrilh bawk. Rih dîl leh Jordan lui tekhina Zofate khawvel hlui leh thar chuang êm êma min hmuhtir thei hian a ziaktu chungchuanzia a tilang chiang hle a ni.

Tichuan, Hebrai Baibul aṭanga kan ram thar chhar aṭangin hrâng hlui hla phuah thiamte hla phuah tan daq, an hla kalhmang, an chenna khawvel, an nun ram leh an rilru put dan hrang hrang chu chiang êm êmin min hmuhtir a. Patea “tlâng thienghlim” leh a “pangpâr huan” mawi, êng ropui

leh chatuan arsi de chiai maiin a bawh vel hmunah te; Sainuna lei ram, “*lungngaia tahna*” khawhar leh lungleng em ema a kiu vawng vawngna hmunah te; leh Kamlala khawvel, pik churh mai, lungngaihna leh buaina chhumin chhah em ema a tuam, chhem kiangtu tur van thli ngaia a rûmna hmunahte chuan min hruai a. Lei Bethlehem dai, “dai zawng zawnga dai hmingthang ber” a tih hial, Zofate khawvel thar intanna hmunahte pawh min hruaiin, chutah Lal thar lo piang chu chawimawi nan Zofate ir-fwm ngei atanga hla leh rimawi lo pût chhuakte chu min rempu a. Chumi daiah chuan a ziaktuin “*Father of Mizo Poetry*” taitlil a pêk Hrawva te, Zofate zinga Krismas hla phuah tam ber Rokunga te, hla phuah thiam dang Vankhama te, Zasiama te, Suakliana te, C.Z. Huala te leh mi hrang hrang kan hmu a. Zofate zinga hla phuah thiam zawng zawng deuhthaw Bethlehem daia an tawh bakah Zofate bi he khawvel thara kan lo pêm luu thûk tâkziate min ngaihtuahtir a ni.

Zofate khawvel hiui, ral ta riai riai, mahse kan hnam pum nuna a ziarâng bet tlat Liandala hla phuah, PIPU CHHURAHTLANG film-a hmangin min entir a. Hnam nun inthlak chho zel ruale haam dang nun leh rikru kan kawpi chak lunuk avanga hnam nuna thil insikswi theite chu min hrilh a. Tin, kan hnam nuna kan ngaihsen ber pahnih huaisenna leh tlawmngaihna ropuzia pawh “Mihring hmelma, thimna chunga noreltu Phungpunu” hnehtu MI HRANG CHHURA chanchin atangin sermon ropui tak min ngaiinthlaktir a. Chhura huaisenzia, finzia, tlawmngaihzia leh thatzia chiang em emin min hmühtir a. Ram leh ram indawi nana himanraw chak bera sawi ro, chacka dinhmun atanga mi dawr tangkaizia international diplomacy zir mish lo Chhura'n a hris a ni tih Phungpunu neñ ‘negotiations’ an siam dan kan chhiar chuan min ngaihtuahtir a. A ziaktuin, “Mizo naupang zawng zawng

pawh Chhura hnehnaah hian an lawm a, an ngaih a tha a ni,” a tih chu duh tawk lovin, “Super Power ho dâwr tur pawhin Zofaten Chhura hi kan thlang a ni,” tih hial kan duh mai awm e.

Literechar tling, thu tha ber ber zinga tam tak chu ziaktu jhenkhatin ziaktu dangte thu ziak chik taka an bihna a ni a. He ZALÉNNA RAM-ah pawh hian Khawlungi thawnthu ziak pahnih, chik taka thlirna a awm bakah Mizorama chengten Book Review an tih dan kalhmang leh tih dan duhawm zawka a hriatte chu tlang takin a sawi a. A ni rēng tak a, Zo tawnga ‘Book Review’ ka chhiar tawh zaa sawmriat chuang chu a riviautu khan riviau lehkhabu ziaktu chungah arpa chan chan tum rānin a thu ziak derthawnna leh thāwpna chauh a zawng a, chu chu a hmuh veleh in chung chhip atangin a ziaktu kha a khuan khum thin niin ka hmu. Inbuk tawka thil thlir dan zir tur leh kan zalēnna hi intiphur nana hmang zawk turin he lehkhabu ziaktu hian min duh a ni.

Siamkima hi literechar ram chang ni lo, khawvel dung leh vang pawh pal tlang tawh a ni a. Chung a zinnaa a thil hmuh a ziak (travelogue) zinga pahnih, literechar khawvela mi ropuite an phūmna, Wesminster Abbey, Londona awm leh ‘literechar lama khawvela a mi ngaihsan ber’ Shakespeare-a pian leh murna leh a thlān awmna khua Stratfort-Upon-Avon a tlawh thu ngaihnawm taka a ziak chu he lehkhabuah hian a chuang a. Mahni ngei kalin a takin hmu ve pawh ni ila, a ngaihna kan bariat loh tur tam tak chu chiang em ema min entirin min hrilhfiyah zel a. England rama Saplawng an hman dan hrang hrang leh tawng kalhmang a inthlak chhoh zel dan, tawng dik ber leh ziak daa dik ber a awm bik loh dan te leh Zofate pawhin an dinhmaun hi kan tawng chho ve zel a ni tih min hrilh bawk.

Bawngbante leh khawizu luanna rama sawi, Kanaan ram pawh ehhung larn leh pawn lama indona ram leh thlaler hual vel a ni ve tho ang bawkin khawvela ram hnianghnar ber leh

bu-rip bera sawi America ram ngei pawh chutiang êm chuan a lo bring jha vak bik lo va. Mi tam tak nun ramah khua a khengin mau a tám a; sum leh pai lama hma an sawn nasat poh leh an nun ram thlaler, khawharna ram chuan hma a zauh ve zel a. Chumi THLALER RAM RÖ chu a ziaktu hian chiang takin min entir a; Zofate nun ram hausak bikzia leh churni ram thlakhlelhawmzia chu min hriat zualtir a ni.

Siamkima nen hian kum li pumhlíum (1959-63) D.M. College, Imphal-ah English Honours sabzek la dün a, literechar ram fang dun a. Romantic poets-ho ziak fung atanga thu leh hla fir thlum, pút thla te chu ruihpui a, Shakespeare-a khawvelah zin dün tawh thin kan ni a. Mahni tlatna mual hrang hrangah thiamna leh dinhpun úma thang hnih leh a chanve lai kan inhmuh tawh loh hnuin, kum 1989 March khan a bu záwlah ka va thåwng a; literechar luhkapuiah Bethel kan hùng thar a; chumi thlarau chuan ZÓRAM KHAWVEL, ka biakzinna chanchin ziakna lehkhabu chu a hring chhuak ta a ni. Tunah a ZALÉNNARAM chhut hnihilna atan INTRODUCTION ziak tura min sawm avangin ka lawm hle a; Zofate zinga 'introduce' ngai miah lo lehkhabuah INTRODUCTION ka ziak a ni.

Grik-ho mitthi vüp dahna bêl British Museum-a an dah John Keats-an a hmuh chuan mi en liam mai mai bêlah thu tak, mawi leh ropui a chbar a, ngawilapui thei lovin hla ropui ODE ON A GRECIAN URN a phuab ta hial a. Chutah chuan,

*"Beauty is truth, truth beauty; "—that is all
We know on earth, and all ye need to know."*

tin a khar a. Chumi bhediction chit he lehkhabu pawh hian a pha'ni. Phartak leh mawma zawng tute tan chuan he lehkhabu hi chhiar makmawh niin ka ngai.

Mihir (Ranji)

L. Kevem

November 3, 1991

THUHMAHRUAI


*....then wilt thou not be loath
 To leave this paradise, but shalt posses
 A paradise within thee, happier far.*

Milton's Paradise Lost

He lehkhabu chhiartute rilrua zawhna lo chhuak tur chu,
Zalēnna Ram hian eng lam thu nge thlür a tum? Zalēnna ram
 chu khawiah nge a awm? Engtia zau nge? Engtianga hmuh
 chhuah theih tur nge ni ang? tih te hi a ni ngei ang.

Khawvel mihringte hian kan buaipui leh duh ber chu
 zalēnna hi a ni a, mi tin hian kan hriat loh hlan leh ngaihtuah
 loh lai pawh hian kan zawng reng a ni. Bungrua anga lei theih
 emaw hrakh theih emaw ni ta ang phei sela chuan zalēnna
 tluka man tam tur hi thil dang a awm lo vang. Tirhkok Paula
 chuan "*Lalpa Thlarau awmna apiangah zalēnna a awm thin*"
 (II Kor. 3:17) a ti a. Amaherawhchu hetia ngaih ngawt ai hian
 he thu hi tihhlawhtlin awlai lo tak a ni ang.

Zalēnna kan tih hian mihring nun leh rilru tichēp thei,
 thil eng pawh lak ata fihlimna nun tihna a ni. Thenkhat natna
 lak ata mihring nun zalēnna turin an finna leh thiamna an
 hmang a, thenkhatin rilpam leh tuihālna lak ata mihring nun
 zalēnna turin hna an thawk a; thenkhat thung chuan awlsam
 tak leh nuam taka vah zung zung theihna tur leh van sang
 thiawh theihna tur himanrus an ngaihtuah chhuak reng bawk
 a. A then leh chuan lungngaih, rūm leh jahtna ramah hian
 mihring rilru tihhlimma leh tihzalēnna turin thru leh hla chhiar
 tur feit himawi ngaihtihlak nuam tak tak fūrte an siam chhuak
 reng bawk a. Tichuan, he zalēnna ram kan sawi hi a awmna
 che mihring rilru leh ngaihtuahnaah a ni.



Mihring kut chhuak, mita kan hmuh leh benga kan hriat zawn zawngtē hi a taktak leh bul (original) chu rilruah a awm a, mihring kutchhuak a lo ni tate hi chu a lem leh a hlimthla mai chauh a ni. Chutiang ngaihtuahna hlimthla thenkhat chu he lehkhabu phekah hian hmuh turin a awm a; literature chi khat, literary criticism kan tih, zalēn taka rilru leh ngaihtuahna hmanga literature chik taka zirna leh thlirna a ni.

Khawvel hnam sing hmasa leh literature lama hmahruaitute chu Greek mi an ni a. Aristotle, Greek philosopher chuan *Poetics* (c.335-322 B.C.) a lo ziak atangin khawvelah hian literary criticism hi kan lo nei tan a, a lo pung ta zel a ni. Aristotle-a hma pawh hian literary criticism tih tling lo, mahse a riuang anga ngaih theih tur, Plato-a kut chhuak, *Ion* (c.390 B.C.) leh *The Republic Book X* (c. 373 B.C.) te chu a lo awm tawh a; amaherawhchu Aristotle-a rilru leh kut chhuak atangin literary criticism tluantling chu khawvelah hian a lo piang ta a ni.

Aristotle-a *Poetics* hian, a ziak hun lai ata vawiin thiengin, literature khawvelah hian pawimawhna neiin, mi rilru a lo kaihruai reng a, xir pawh a la hlawh reng a ni. Aristotle-a hian Greek poet ropui ber, Homer-a poetry leh Greek poetry chi hrang hrang a hmuh atangin, poetry nihphung, kalhmang leh hnathawh dan a sawi a, a subject chu a hre chiang hle tih pawh kan hria. Science zir min thil awm tawh sa, mihring taksa pianhmang leh fuke chanchin leh hna thawh dan (human physiology) min hrilh ang hian, Aristotle-a chuan poetry ziarang leh kalhmang, pianhmang leh hnathawh dante nén lam *Poetics*-ah chuan min hrilh a. Thil awmphyung leh awmze nei nghet tawh angah poetry chu ngaiin, a nihphung leh ziarang chu a nirlang mai a ni. *Poetics*-a thu ziak chu, thil a nihphung, (as it is) tluantling taka sawi chhuahna a ni a. Tun hnusah poetry chi hrang dang a lo awm theih dan tur emaw, ziak dan tur

emaw, a ngaihtuah tel lo. Khawvela ngaihdan thar leh thil hriat dan thar lo pung zelah hian Aristotle-a thu ziak leh Greek literature kalhmang te chu mi rilru rem zâwng ni vek lo mah se, *Poetics* hian mi rilru a la kaihuai reng a, ngaihsan a hlawh lo thei lo a ni.

Greek poetry kan thlir chuan, poetry hi mihring ngaihtuah chhuah ni lo, chunglam aṭanga petu awm, chu mi hnen aṭanga dawn chu niin kan hmu a. Chung lam aṭanga rawn petu chu Greek-ho chuan ‘muse’ tiin an sawi a, poetry chi khat tan ‘muse’ pakua an nei a ni. Keini chuan ‘muse’ chu ‘pathian’ emaw ‘thlarau’ emaw kan tihsak mai thei ang. Homer-a pawhin *Iliad* leh *Odyssey* bul ḥannaah chuan ‘muse’ hnenah ḥanpuina leh thu tak sawi theihna dilin a ḥawngtai a. Greek poet dang Hesiod-a phei chuan ‘muse’-in a poetry chu a thâwkhum avangin thu mawi leh finna thu sâng ber a fûn tih *Theogony* thuhmlsruiah a sawi bawk a ni. He ngaihdân, poetry hi chung lam aṭanga petu awmin a pêk a ni tih ngaihdân hi, hnam fing hmasa ber leh literature-a khawvel hmlsruaitu Greek mite ngaihdan a ni tih kan sawi tawh a. He ngaihdan hi English romantic poet-te pawhin an ḥawmpui a, Shelley-a phei chuan, “Miin poetry ka ziak teh ang a ti ngawt thei lo,” a ti hial nghe nghe a. Ngaihtuahna tinungtu leh a petu thlarau awm lo vin, duhna leh tumna avang ngawtin poetry hi ziak rual a nih lohzia Shelley-a chuan a sawi uar hle a ni.

Homer-a chuan poetry *tangkaina* chu *rilru hlimna thlentu a nih vang* tiin a sawi a. Hesiod-a erawh chuan *mi zirtir nei thuchah a ken vang* niin a sawi thung a. Plato-a ngaihdan Ion aṭanga kan hmuah chuan poetry hi chung lam aṭanga rilru tinungtu hna thawh ni a lang siin, hmun dangah thu dang deuh a ziak kan hmu. Chutah chuan, “Poet rēng rēngin mipui vantlang rilrem loh zawngin thu an ziak tur a ni lo va, mihring dan dung zuiin, a mawi leh a ḥha zâwngin an ziak tur a ni; a endiktute leh dan thiamten an pawm thlap hma

phei chuan mi dang pawh lo entir mai mai tur a ni lo," tiin a sawi. (*Laws*, VII, 801.)

Literature lo pian chhuah dan leh than chhoh dan kan chhui hian, drama te, novel te leh short story te ai hian Poetry hi a piang hmasa zawk tih kan hria a; chutiang bawkin literary criticism hmasa ber pawh poetry zirna *Poetics* hi lo ni awm rēng a ni. Kan sawi tawh angin Aristotle-a chuan a poetry hriat leh hmuu chu ngun taka enin a *nih angin* a ziak a. Longinus-a te, Horace-a leh Demetrius-a te erawh chuan poetry *ziak dan tur* (how to write) an sawi thung a; *On the Sublime* tih, Longinus-a kut chhuak te, Demetrius-a kut chhuak *On Style* tihte leh Horace-a kut chhuak *Ars Poetica* te chu a ziak dan tur sawina a ni tih kan hmu.

Plato-a hun lai aṭang tawhin poetry nge sāng zawk philosophy tih thuah iñhnialna nasa tak a lo awm tan a. Chuvangin poetry thiavang hauhna thu, uar taka ziak pawh a lo awm tan tawh bawk a ni. Greek poet, Pinder-a chuan poetry leh philosophy danglanna sawiin, pakhat chu *pianpui thiامن nei mi* tha phuah chhuah tiin, pakhat zawk chuzir aṭanga thiامن nei mi thu phuah chhuah, tiin a sawi hrang a. Aristotle-a erawh chuan mihring kut chhuak thu ziak chi rēng rēngah hian poetry thu ken a ri ber tiin a sawi.

Hetianga poetry thiavang hauhna thu (defence) ziak fo a jūna ohhan hi a dotu an lo awm thin Gang a ni. Roreltute leh dan siamtute zingah poetry hlutna hmu lo leh, a siamtute pawh thi pangai lo buaipuitua ngai, thi thi tithei tak tak leh thu sawi thi tithei tak tak an lo awm thin a. Tichuan poetry siamtute thiavang hauhna leh minishni patna thu ziak chuan literature pawh a thiawue leh ta zoñ a ni.

Renaissance hun laia an buaipui em em thu pahnih poetry tanhkhana ni enz nge ni? tih leh poetry hi Greek leh Latin

ṭawng kher lo pawh hian ziak ve theih a ni em? tih thu zawnha hi Sir Phillip Sidney-a chuan hneh takin a chhâng a. Poetry siamtute chu zalen taka an duh duh sawi thei an nihzia nemnghehna thu a ziak tel bawk a. Phillip Sidney-a kut chhuak *An Apologie for poetries* (1583) chu poetry zalênnna thu ziak (document) pawimawh “The Magna Carta for poetry in England” tih hial a lo ni bawk.

French critic Du Balley-a leh English critic Sir Phillip Sidney-a te chu poetry thlavâng hauhna thu ziaktu hming lang hmasa an ni.

Amaherawhchu Greek leh Roman literature entawn lo chuan English poet-te pawhin kal ngaihna an lo hre mai lo va. Spenser-a chuan Virgil-a leh Theocritus-a tih dan a lâk lutuk avangin sawisel a hlawh a; English tragedy hmasa ber *Gorboduc* chu Italian dramatic Seneca kut chhuak nen khaikhin leh Aristotle-a dan siam (classical rules) ena sawisel a ni ḡthin bawk a. Mahse hman lai Greek leh Roman literature chu khawvel finna tuikhur a nih miau si avangin Du Balley-a chuan French literature tih hausak nan hman lai literature-te chuan an ṭawnga lehlin a, an ziarâng leh kalhmang zir a ḡlzia a sawi uar hle a. English literature than chhohna atan a ṭangkai dawn avangin Homer-a kut chhuak chu George Chapman'a'n a letling bawk a; chu chu Greek thiam lo John Keats-a chuan a lo chhiarin ropui a ti em em a, sonnet ḡha leh hmingthang *On First Looking into Chapman's Homer* tih hi a lo ziah phah nghe nghe a ni.

Shakespeare-a pawhin Greek tragedy ziarâng leh kalhmangte chu a hre ngei ang tih English critic A.C.Bradley-a chuan a sawi a. Elizabethan dramatist kut chhuak dang tam tak kan bih chian chuan Italian dramatist-te tih dan an la tih kan hmu bawk a. Milton-a kut chhuak *Paradise Lost* leh *Samson Agonistes* te pawh Greek literature thlah bawk an ni a, an thlahtute ziarâng zir lo tan phei chuan hriat thiam ngaihna

pawh a awm lo. Tin, 18th century English literature pawh hman lai Geek leh Roman literature (classical tradition) entawna ziak deuh vek a ni bawk a; hetih hun laia English poetry ziaktute chuan Greek leh Roman literature dâna inphuartir leh, khaidiat inbun chawptir chungin an poetry chu an ziak a. A langsâr berte chu Dryden-a leh Pope-a kut chhuak, poetry hmêl pawh pu mang lo, thufing phuahkhawm ang mai hlir, chhiar ninawm tak a ni.

Amaherawhchu literary criticism lamah chuan 18th century hun chhunga kut chhuak, pawimawh leh chhinchhiah reng tlak tur, John Dryden-a kut chhuak *An Essay of Dramatic Poesy* (1668) leh *Preface to Fables, Ancient and Modern*, (1700) te, Alexander Pope-a kut chhuak *An Essay on Criticism* (1711) te kan hmu a. Heng bakah hian Dr. Samuel Johnson-a kut chhuak *Preface to Shakespeare* (1765) leh *Lives of the English Poet* (1779-81) te kan hmuh hian an thawh hlawkzia kan hria. Anni thu ziak aṭang hian mi mal kutchhuak pawimawh zir dan leh a thu awmzia khaikhawm chîn ḥanna kan hmu a. Heng a hmuh aṭang hian a ni ngei ang. Matthew Arnold-a chuan 19th century-ah mi mal kut chhuak zirna *Essays in Criticism* a rawn chhuah ta tih a rin theih; chutiang chu a lo kal chhó zel a, 20th century-ah A.C. Bradley-a te, T.S. Eliot-a te, L.C. Knight-a leh critic dang kut chhuakah te leh, American critic Cleanth Brooks, Northrop Frye, Wayne C. Booth, Lionel Trilling leh mi dang ziakte kan thlir chuan mi mal kutchhuak kan lo hmu ta zel a ni.

Amaherawhchu 18th century a lo ral rual rual chuan a poetry chu rorelsakin a lo awm ta a; a rawn dawtu 19th century chuan chutiang poetry chu hnawlin, a rilru mil zâwng leh duh zâwng, poetry chi dang leh thar chu a rawn ngaihtuah chhuak ta a. Tin, 19th century-ah chuan poetry nihphung leh awmzia sawitute chu poet bawk an lo ni ta bawk. Hetah hian Wordsworth-a chuan hrusitu chani a chang a, poetry ziarâng

chungchangah theory thar leh a ziak dan thuah pawh theory thar *Preface to the Lyrical Ballads* (1800)-ah chuan a rawn sawi chhuak ta a. Ama sawi ngei theory chu hmangin poetry a rawn siam chhuak ta bawk a. Amah aṭang hian *romantic movement* a lo intan ta a ni. Tin, poet dang, Coleridge-a te, Keats-a te, Shelley-a te, Matthew Arnold-a te pawhin poetry awmzia leh a ḥangkaina an rawn sawi chhuak bawk a. Shelley-a chuan poetry chu ‘finna leh hriatna tin reng bul leh inhlāwm khawmna’ tia sawiin, poet te chu ‘thurūk puang chhuaktu leh mihring dan siamtu’ nihna a pe a. A kut chhuak *A Defence of Poetry* (1821) leh a poetry dang kan enin Greek literature leh Plato-a philosophy chu a ngaihtuahna kaihruaitu ber a ni tih kan hmu.

Edgar Allan Poe, American poet tan pawh, anmahni thlahtu bul, Greek leh Roman literature chu a lunglēnna leh a rilru kalna a ni tih a hla pakhat *To Helen* aṭangin kan hmu :

*Thy hyacinth hair, thy classic face,
Thy Naiad airs have brought me home
To the glory that was Greece
And the grandeur that was Rome.*

Keats-a pawhin a dam chhung rei lo te chhūṅga a poetry ziakah Greek literature chu a lunglēnna leh a hmanraw lākna ber a ni tih kan hria. Matthew Arnold phei chuan a thu ziak pakhat *The study of Poetry*-ah chuan poetry hi philosophy leh sakhaw thlākna tur hialah a sawi a; ngaihtuahna fel tak, tha taka sawi chhuah bawk chu kan ke atan khāwnvār, kan kawng atan ēng ni thei turah a ngai a. He a thu sawi dikna erawh hi chu kan la tawng chho rih lo a ni.

Tichuan, 19th century a lo ral dawn hnaih chuan khawvela literature huai ber, Hebrew Bible, ḥawng chi hrang hranga lehlin tawh, chutiang lehkhabu chu a awm ngai tih pawh kan lo hriat loh chuan Mizoram hi a lo thleng hlawl mai



a. A rawn kengtu, Greek leh Roman literature aṭāṅga finna chhar leh lo zir thiam tawh, English mi pahnih Savidge-a leh Lorrain-a te thian dun chuan chu Hebrai literature chu innghah nan hmangin kan Mizo literature bul min rawn ḥansak ta nghal a. Tichuan, kan Mizo ṭawng leh literature ziarāng (literary forms) bul chu Greek leh Roman literature-ah kan chhui lut ve thei a ni. Heng English mi thiam pahnih te hi min zirtir tura rawn inpe an ni a, a lo dawngtu lam pawhin kan lo dawng thiam tha hle kan ti thei ang. A thawhsaktuate leh a thawhsakte tan nasa taka lawmna tur a awm ve ve a ni.

Sap upa leh Pu Buanga'n Mizo ṭawng ziak nan Roman hawrawp hmanga A AW an siam hlim chuan a zir tur mi an zawng a, mahse an hmu thei mai lo: "Keini Mizote hi chu Zāwng ang mai kan nia, hetiang thil har hi kan thiam chi a ni lo ve," tih chu an chhanna hmuh a ni ḥhin tih Pu Buanga chuan a sawi. Chutih hun lai kan thlir kir chuan vawiina kan subject ngaihtuah laite chu a dang hman ta hle tih kan hria. Hmasāwnna rahbi thar pakhatah kan chuangkai a ni.

Khawvel literature huai ber tiin Hebrai Bible hi kan sawi tawh a. A huai ber chang ni lovin lehkhabu dang chu ngeih a nei thei rēng rēng lo bawk. Greek leh Latin ṭawng hman tlāng lāwn a lo nih tāk avanga an literature pawhin chhiar zau a lo hlawh tak loh hnu hian Bible chu khawvela lehkhabu lehlin tam ber a lo ni a; a lehlinna ṭawng leh literature apiang chu a tihausa zel bawk a ni. English literature tihausatu ber pawh Bible a ni a, literature duan chhuahna hmanrua leh thu tam tak lakna a ni rēng. Chaucer-a kut chhuak *Canterbury Tales* te chuan Bible boruak leh thu zirtir zulzuia ziak a ni a; Shakespeare-a kut chhuak zawng zawng pawh chutiang chu a ni. Milton-a *Paradise Lost* leh *Paradise regained* te pawh Bible thu ṭanchhana ziak a ni. Tunlai khawvel hi han thlir ila Bible chhiar tam lohna ram apiang chu literature-ah an hniam ti ila kan sawi sual lo vang. He lehkhabu hi che lovin a awm hlē

hlê thei lo va; do nei reng (offensive) dinhmunah a ding a, a khingpui Koran te, Gita te chu chet hmasak tum lo vin lo inveng ringawt (defensive) angin an awm thung a ni. He Hebrew literature bawk hi Rome sawrkar ropui tak leh an lal Constantine-a chawpa hnehtu a ni a, Rome sawrkar hmang hian a ni, British-ho pawh hi a thu hnuaiyah a lo dah bawk a ni.

Khawvel khawchhak lam thlir ila Buddhism leh Muslim sakhaw biakna ramah literature ropui a chhuak miah lo va; Middle East-ah pawh literature a chhuak lo. India ram thlir ila *Mahabharata* leh *Ramayana* te hian literature tihausa zâwngin hna an thawk lo. Tun lai India ramin literature-a hma a lo sawnna pawh hi Greek leh Roman literature leh finna zir thiam tawh, English mite hnen atang bawka dawn a ni.

Mizo literature kan thlir pawh hian he Hebrew lehkhabu leh a chhung thu hian tunah hian Mizo rilruah ro a rel a. A lo thlen tirh phat atangin thu leh hla, he rama lo leng tawhte chu a ngeih lo va; kawng laiah ngat lo chuan a kal duh bawk lo va, tichuan he rama thil̄o, thu leh hla lo awm sa te chuan an ngam lo va, kawng kianin kawng sir an chuh ta rawk rawk a, pun chu sawi loh ngai pawh awh hlei thei lo vin a thu hnuaiyah chép tak leh thaw-i-pik takin an awm ta zawk a ni. Tichuan, Lianchhiari zai te, Laltheri zai te, Darpawngi zai te, Saikuti zai te leh Tlanglam zaite chuan thâwm an nei ngam ta lo va. Awithangpa, a hun laia hla phuah thiama sawi pawh a tlâwm nghal a, tunah phei chuan hla nei lo ang der mai a lo ni ta; a mit la men lai ngeiin a zaite chu rah beh leh vui liam a lo ni a. Zirlai bua tuna kan dahte pawh hi thlan lung ziak ang chauh, amah hriat reng nan mai a lo ni ta a ni.

Hebrew literature kan rama lo lut hi a dawng thiam kan mi puitling hmasate zingah kan lo nei hi kan hnam vanneihna ropui tak a ni. Lehkhabu malah chuan he Hebrew ang tluka literature tipung thei tur leh ngaihtuahna thûk, sang leh zau mi neihtir thei lehkhabu dang a awm lo va. Tichuan

Mizoram a lo luh aṭang hian kan literature chu namēn lovin a tipungin a tihausa ta a ni.

Hrawva, Mizo zinga B.A. zir hmasa ber chuan a college kal laiin Greek leh English literature meichher ēngah Hebrai Bible kalk si lovin, kum 1920-24 khan Mizo poetry min lo ziahsak a; Mizo rilruin a ngaihsan, unau inhmangaihna thu te, inthian thatna thute leh mihring inlaichinna nghehziate a puang chhuak a. Tin, chutih hun lai vel bawk chuan, amah Zikpuii Pa tih dan takin, khi-ah khi-ah, kâwlvalēn chhamah, thim leh ēng inrinaah leh māwina ramah, Patea chuan hriat sual hauh loh tura chiang leh flahin, sakhaw thar boruak chu hip leh chēnin.

*Hmanah pi leh puten an hmuh phâk loh,
Saron par tlanin kan leng e.*

a lo ti der der a. Chutih lai vēk chuan R.L. Kamlala kan tih hi a awm bawk a; ani pawh ngawijh bopui mai theih loh, thu tam tak pai mi a ni. Patea chu a taksa seilenna hmuna lo puak chhuak rawih a ni a, Kamlala erawh chuan Hrawva ziakna ang meichher ēngah khan a ziak pha a. Leng Lal Saihnūna pawh Patea nen tual khat an ni. Kan hla lēnglāwng thenkhat chu, pawnlāng taka Pathian hming lamna keng ve, mahse Biak In chhung lut miah lo turte an ni bawk a. Chutiang hla chu Rokuniga kut chhuakah pawh a awm nual. Liandala erawh chuan Pathian hming lam tel kher lovin Mizo tān hla thiaghlim leh tuang tha em em, *Pipu chhuah Tlang leh Kan Tlang Ram Par Vulna* tihte a siam thei a ni.

Literature hian thil a va tithei ēm! Ram a la thei a, sawrkar a hnēh thei a, hnam a siam thei bawk a. Chu chauh ni lo vin mihring riṛu a hnēh hñiasakna aṭangin zawi zawiin nunphung (culture) thar a siam thei bawk a ni. Bible pawhin a hnēh tawh hnam literature aṭiangte chu a ching chau' zel a, literature thar siam chiuahna kawng a hawng zel a. A

chin chauh tawha mi, ze mawi chi hrang hrangte chu literature tharah chuan zeh mawi atan a hmang leh a. Tun lai European literature pawh hi hetiang vek hi a ni.

Kan sawi tak aṭang hian, kei chuan tun lai Mizo culture kan tih pawh hi European culture litengsâwl pakhat a ni e, tiin ka sawi a ni; a bul tak chu Bible a ni bawk. Hei hi kan tun lai literature hian a nemnghet a ni.

Aristotle-a chu poet a ni lo va, amah aṭangin poetry pawh a chhuak hek lo. Mahse Greek poetry chungchang leh a awmzia sawisiahtu (interpreter) a nih avangin a kut chhuak *Poetics* chuan Greek literature-ah chauh lo pawh, khawvel literature-ah hian hmun nghet leh pawimawh a luah a. He *Zalēnna Ram* ziaktu pawh hian, Mizo rilru leh ngaihtuahna khawvel tihzauna tur leh, kan ṭawnga literary criticism bul ṭan nan, heng thute hi ziakin he lehkhabu hi a lo chhuah a. A hlawhtlin leh hlawhtlin loh erawh chu hun leh kumin a la rawn hril dawn a ni.

August 22, 1986
Venghlui, Aizawl.

Siamkima Khawlring

LITERATURE KAN TIH HI

Mizote hi mahni zir loh lam thil intihre fahrana sawi ching tak kan ni âwm e. Pathian thu lam zir ngai hauh si lo, a zirate ai maha intihria leh thu ngam taka sawi chîngte kan awm a. Politics lam ni se, mahni tâwka inti politician viau leh mahni âtchilh lam leh ̄tan lam zâwng chu thu dik sawia sawi bawrh bawrh chîngte pawh kan ni bawk.

Chutiang bawkin, "Mizote hi literature lamah kan pachhe lutuk," han tih mai pawh kan awlsam hle hlawm a. Kan ̄tawnga thu leh hla ziak, tam tâwk leh ̄tha tâwk kan nei lo te pawh hi kan vei tlang hle niin a lang. Literature han sawiho nikhua phei hi chuan, kan tuina ber theuh emaw tih mai turin, kan hnathawh leh eizawnnate nen pawha inmawi lo khawpin kan insawi tui thei phian ̄thin.

Tin, mi ̄thenkhat, hman lai thil intihre deuhte chuan, "Tun lai ̄thangtharho hi Mizo literature hre hlei lo, college-a literature zirtirtute pawh hi naupang an ni a, M.A. te ni mah se, engmah an hre lo," an tih kan hre ̄thin. Chûng mite chu han kawm nikhuain an literature tih chu Mizo history te, hman lai pi pu nun leh nula leh tlangval inzailêmna thu te a lo ni lek fang a. Tîti thiam tak leh ̄tawng hmang thiam takten an han sawi te hi chu ngaihnawm zawng a ngaihnawm ngiang rêng a ni. Mahse heng hi literature kan tih tur tak chu a ni lo. Hetiang thil leh thu te hi literature-a chantir leh siam âwm leh siam theih turte a ni zâwk, hman lai nun chauh ni lovin, kan tun lai nun leh hun lo kal tura nun zel dan tura kan duhthusamte pawh.

̄Tawngkaa inhrilh chhâwn leh vawn ̄that, (oral literature) phei hi chu Sapho pawhin awm ngeiin an pawm

a. Mahse, keini Mizote hian tlachhama kan insawi leh 'literature' kan tih ḥin hi chuan a ziaka ziak a kawk deuh bik a ni.

Literature hi eng nge a nih sawi leh hrilhfiah hi a hale. A zir mi leh ṭawng haus a zawkte literature siamtu leh tiphusuitute ngei pawhin fel taka hrilhfiah an harsat a ni. Chung mite sawi dan leh, literature subject anga kan lo zir ḥinté hi enin hetiang hian hrilhfiah i lo tum teh ang.

Literature chu thu engpawh, mihring nun nena inlaichinna nei chi, hun rei tak chhung hlutna nei tura fel fai leh tha taka ziak hi a ni. Fel fai leh tha taka ziak ni tur chuan ṭawng hman pawh a tha thei ang ber a ni tur a ni a; a ziak dan kalhmang pawhin a zir tur a ni. Mihring tan hun rei tak chhung hlutna nei tur chuan, mihring nun sawi chhuahna, mihring ngaihnawm tihzawng, hriat reng duhzawng, thufing, suangtuahna thu leh duhthusam te pawh a ni tur a ni. Chu chu mihring nuna awm engpawh tihna a ni a. Dåwt thu a nih chuan ngaihnawm hle mah se, mihring tan hlutna a nei rei lo vang. Thu dik tak (true to life) ni mah se, a ziak dan hmangin a zir loh chuan ngaihhlut rei tlak a ni lo vang.

Literature chu mihring ngaihtuah chhuah leh siam chhuah, thil mawi (man-made beauty) zinga pakhat a ni. Chutiang chu mihring nun leh ziarang, thuruk puan chhuahna a ni bawk ḥin a ni. Literature chuan thu leh hla, kan sawi leh a lang bâka awm, ngaihruatna khawvel, (where more is meant than meets the eye : Milton) a zau zawng sawi theih loh leh teh theih loh khawvelah min lêntir a; chu khawvel siam thara ziarang leh mawina chi tñrenge chu ngaihruatnain min hmuhtir a. Mihring nun hi a siam thar a, beiseina pein a tihilim bawk a ni.

Mihring nuna thu dik awm sa, literature-a kan lo hmuuh dan hi, a puang' chhuaktu nun leh 'miziain a hril ḥin. Mi

pakhat, hla siamtum emaw, ziaktu emaw phênah hian hnam pakhat leh nunphung (culture) pakhat a awm zel thin a. A ziaktu nun leh mizia pawh hi hnam pakhat leh nunphung pakhat darthlalang a ni thei bawk a ni.

Literature kan zirna chhan hi a phena awm mihring, hnam rilru leh nunphung hriat fiah nan a ni. Kan mihring nun hian lang thei lam leh lang thei lo lam a nei a. A lang thei lam nun chauh ni lovin, a lang thei baka la awm, ngaihtuahna leh ngaihruatna khawvel, a taka la thlen phâk loh leh hmuh theih loh chu literature atangin kan chhui thei a. Mihring nun leh hnam nuna awm, hmangaihna te, rinna te, tlawmngaihna te, inthianna nun te, zalênnna leh ram hmangaihna nunte leh, mihring leh mihring inzahtawnna nunte hi literature hian a fun tel vek a; heng hi mihring nih tinuamtu leh kan nuna kan vawn reng duhte a ni. Heng thu ngaihtuahna leh zirna hian finna leh thil hriat thiam theihna min pe a, chuvang chuan a ni, literature hi kan zir ni.

John Keats-a chuan literature awmzia hrilhfiah tum hranpa lovin, "Thil mawi tak chu chatuan lawmna a ni," (A thing of beauty is a joy forever) a lo ti bawk a; literature tha chuan ramri pawh nei lo va darh zauvin mihring nun a tihiim a, a nung reng thei a ni. Chung chu, novel te, poetry chi hrang hrang te, play te, short story-te leh essay chi hrang hrang, mihring nun tilang zawnga fel fai leh mawi taka ziakte hi a ni. Mihringte hi ei leh in neia lungawi tawk mai kan ni lo va. Thu leh hla tha hlimpui thin leh, thu leh hla thaai inchâwm ngai kan ni. Literature tha zir hian min tihiimin, nun a ti nuam a, ngaihtuahna zau zawk leh finna min pe bawk a ni, tawng thiam lehzualma nen.

Mizote hi literature lamah kan pachhia kan tih thin hian, hetiang taka thu leh hla ziak, chhiar tur leh zir tur tha kan la nei fumfe lo kan tihna a ni.

ENG THU NGE ZIAH TUR

English poet leh critic pawimawh tak Matthew Arnold-a chuan Wordsworth-a chu British hnam tiropuitu berte zingah a tel thu a sawi pahin, "England hi a poetry neihte hian a tiropui ang tluka tiropuitu thil dang engmah a nei lo,"* tiin a lo sawi hial a.

Hemi kawngah hian keini Mizote hian Saphote hi anna kawng kan neih theihna lai a awm. Hnam tlem leh rethei tak kan ni a, mahse han hawi vel ila kan chheh vel - Manipur leh Tripura ram te, Burma ram leh Bangladesh-a tlâng mi kan anpuite nena kan inkhaikhin chuan, insitna leh induhthawhna hi la lian hle mah se, thu leh hla nei tha leh nei tam ber pawl kan ni awm e. Mihring tam lamah keini Mizote aia tam zawk, Naga hnam te, Burma rama Kachin hnam, mi maktaduai hnih dawn laite leh, keini aia tam zawk ngei, Kayah hnamte pawh hi literature lamah chuan Mizote ai hian an la pachhe zawk tih kan hria a ni.

Sawrkar hna lian leh nihna hrang hrangte hi chu mahni ram theuhvah a ropui thei ang zawng ber pawhin siam leh invuah chawp theih mai zel a ni a, Mizoramah pawh hian tun hmaa la awm ngai lo thil thar, kawng thar, hna thar leh in thar tam tak tun hnaiah a lo awm ta teuh mai. Mahse thil dang zawng aiin Mizoram pâwnah, tun hma atang tawhin, Mizote hi min thanmawitartu ber chu kan thu leh hla (literature) hi a ni, ti ila kan sawi sual kher lo vang.

Kum eng emaw zat ral ta atang khan, Mizoram pawh la hmu ngai lo leh kan rame sawrkar hna pawimawh thawktute

* Arnold, *Essay in Criticism (Second Series)*, Macmillan & Co., London, 1964, p. 96

leh mi pawimawha kan neihte hming pawh hre ngai lo, hriat tumna pawh nei lêm lo, mi tam tak Burma tlang ram leh Bangladesh tlang rama chêng, kan tlang mipuite chuan All India Radio Mizo programme hi ngaihnawm ti takin an lo ngaithla tawh thin a. Tichuan kan ɣawnga hla thar chi hrang hrang kan zai thiamten an sakte hian kan chhehvela tlang mite rilru leh ngaihtuahna a tuam vêl a. Chu bâkah tun hma Chanchin Tha dâk hun lai ata tawh, tun thieng hian, kan ɣawnga lehkhabu leh chanchin bu chi hrang hrangte hian kan ram thenawma kan ɣawng chhiar thiam vete hnenah kan Mizo nun leh ngaihtuahna te hi a puang chhuak reng thin a ni.

Kan hnam rilru leh duhthusam sawi chhuaktu Rokunga'n kan hming thanmawinain khawvel hial pawh a den chhuah theihna tur kawng a sawite chu hnam dangte hmusit mai lo va ɡhiana siam zel zawk a ni a, a tha ngawt mai. Amaherawhchu mi mala an pawh phâk lohte ɡhiana siam theihna tur leh kan hming thanmawi zau theina tur ber chu thu leh hla tha sak tur leh chhiar tur neih tam hi a ni, ti ila kan sawi sual lo vang.

Hei hi atakin, kan nitin nunah pawh, a dikna kan hmu; hla tha leh thlûk mawi tak phuahtute leh zai thiam hmingthang leh lehkhabu chhiar nuam leh ngaihnawm tak ziaktute chuan ram dang, hla taka mi pawh nise, mi tam tak hriat an hlawh a; chung mite chuan anmahni mi mal hmingthanna bakah, an hnam leh an ɣawng pawh an chawimawiin an tihmingthang a; an thu ziakte chu ram danga mite pawhin hmusit leh er mai lovin, rilruin a ziaktu chu an ɡhian kawm theih nan, an chhiar thin a ni. Entir nan : Tagore-an Bengali ɣawng a tihropuizia leh chawimawi zia te hi! Bengali ɣawnga a hla phuah pakhat *Jana Gana Mana* hi India rama mi tam tak, Bengali ɣawng awmzia a mik a mak hre lote pawhin, sa thei turin, kan mitdel hla vawn ta mai a nih hi.

Keini Mizote ang bawka Bengali ɻawng thiam lo India ramah hian mi tam tak, ɻawng chi hrang hrang hmang an tam tih kan hria a. Chung mite pawh chuan he Bengali hla châng khat na nâ nâ hi chu an mitdel hla vawn ve a ngai ta mai a ni. Bangladesh hi sawrkar hranga a lo din veleh khan hnam hlaah Tagore-a hla bawk. *Amar Sonar Bangla* tih chu thlan a ni bawk a; an ramah Bengali ɻawng thiam lo an awm a nih pawhin chung mite chuan an mitdel hla vawn tal a lo ngai ta bawk a ni.

Keini Mizote hi tuna kan dinhmunah hian kan la induh tâwk lo va, literature lamah hmasâwn dan kawng i dap reng ang u, tia ɻahnemngaihna aw pawh kan chanchin buah te hian a lang reng a; a lawmawmin infuih reng hi kan tih tur pawh a ni.

Mi tam tak, literature kan neih sa belhchhah nan thu leh hla siam leh ziak tumna nei ɻhinte rilruah chuan thu zaghna pakhat a awm fo mai. Eng thu nge kan han zir ve ang aw? Mi la ziak loh lam thil, eng thu nge ka han khawrh ve ang? tih te a ni ɻhin.

Mi ɻhenkhat chuan Mizo history leh hmân lai pi pute nun leh khawsak dan emaw, kan tun lai nun leh ngaihtuahna lam thu ziak emaw hi kan literature belhchhahna a ni ber ang kan ti a. Tichuan kan lehkhabu neih hmasak ber berte chu a hmingah pawh "Zo" ti tel deuh zêlin, "Zo Nun" "Mizo Ziarâng" "Mizo Titi" "Mizo mi leh sakhua" "Mizo Chanchin" "Hmasang Mizo awm dan" tiim, lehkhabu chi hrang hrang ziak kan nei ta a, a lawmawm hle. Ngun takin chhiar chhuasik peih vek phei ila chuan kan lehkhabu neih sa atang mai pawh hian kan munphung pengngai leh kan hnam chanchin hi chu hriat theih fêna tur a ni tawh a ni. Kan history-ah erawh hi chuan hmasawma kan la nei vak lo hle, a hrampa ngata zir leh chhuina (research work) anga kan neihte pawh han en hian, thawnthu bu kan neih thina mi, a awm ang deuh deuh lâwr khawm a ang hle a, thil thar la hriat ngai loh

hriat belh tur a la awm thei lo a ni.

Tuna kan lehkhabu neih sa, a nihna takah chuan literature tling mang lo, mahse keini chuan literature anga kan neihte hi thawnthu leh tîti lam ziakna phawk chhuak thei zawnga thu leh hla siam tur leh ziak tur hre ve loté chuan engmah ziak tur kan nei ve lo a nih hi, tih mai pawh a awl viau ang. Amaherawhchu nunphung emaw, history lam phawk chhuak thei zawng thu emaw ziak tur hre lo tan pawh, literature lamah hma kan sawn deuh deuh theih nan thu dang ziak tur zau zawka ngaihtuah theih a ni tih hriain i hawi zau ang u.

Sapho lehkha zir dan hian min kaihruai hneh hle mai a, min lo zirtir hmasatute pawh an ni bawk rēng a; mahse an literature lo hausak ṭan dan leh ṭhan chhoh zel dan kan en chuan English literature hian Sapho history leh an pi leh pute nun ngawr ngawr a thlûr lo tih kan hmu a ni. English literature ṭhanna bulte chu Greek literature leh thawnthu (mythology) te, Latin ṭawnga thu leh hla ziak leh Bible te hi a ni tih chiang takin kan hmu a ni. Eng thu (subject or theme) pawh ni se, a ziakna chu English hla thu emaw, ṭawng ṭha tak emaw a nih phawt chuan English literature ṭha a ni zel mai.

Caedmon-a chuan Pahthianin lei leh van a siam thu Genesis-a a lan dan hi hlaah a phuah a, English poetry hmasa ber pawl a lo ni a, mahse Genesis-ah hian Sapho nun engmah a lang lo, Milton-a pawh in Adama leh Evi tlûk chhiat thu leh an thlahte chhandam nan Pathianin a fapa pêk a tiam thu Bible-a a lan dan leh ama ngaihruatnate chawhpawlhin *Paradise Lost* leh *Paradise Regained* tih, epic poetry ropui tak mai a lo phuah a. Thuthlung Hluia mi chak Samsona chu hmeichhe pakhatin a lo bum chhiat dan leh a tawpah Pathianin chakna thar a pêk hmangin, a hmelma, a mitmu kher chhuahsaktute chungah phuba a lâk dante chu *Samson Agonistes*, hla thu (poetic tragedy)-ah a lo chantir a, Sapho

nun phung leh ziarâng sawina rêng rêng a tel lo. Mahse *Paradise Lost* leh *Paradise Regained* te, *Samson Agonistes* te hi English literature-a a pawimawh ber pawl an tling pha si a ni.

Bible hi English-ho hnam nun phung leh rilru sawina a ni bik lo vin leh, a tira ziakna tawng pawh English a ni hauh lo nain, English-a lehlin a lo nih hnu chuan, an literature-ah chhiar tel a ni chauh pawh ni lo vin, lehkhabu malah chuan an tawng leh literature tiphuisuitu ber leh, tawng hman dan nghet an neihna bul a lo ni tih English literature chanchin ziaktu zawng zawngten an sawi a ni.

Shakespeare-a thu ziakte pawh hi en leh ta zel ila; English-ho nun leh rilru ngawr ngawr ziak tumna rilru zim tak a pu lo tih a lang : *Julius Caesar*-ah hian Sapho nun dan a tilang miah lo, mahse a tawngkam hman thenkhatte chu English literature-a thu langsar ber ber a tling; *Hamlet, Prince of Denmark*-ah te pawh hian a changtu ber chu Denmark lal fapa Hamlet-a a ni ngei mai; mahse mihring nun leh rilru sawi chhuahna thu fing tawi tam tak English literature-a thu lâr ber ber kan hmu a.

Chutiang bawkin *Romeo and Juliet* te, *Measure for Measure* te, *The Merchant of Venice*-ah te leh *Othello*-ah te, *The Two Gentlemen of Verona*-ahte leh drama dang dangah pawh, a changtute leh an hmingte pawh English niin Shakespeare-a chuan a tilang hauh lo va, an chenna ram pawh England niin a ziak bawk lo. Mahse heng bâk hi English literature tia han sawi tur chuang a awm hauh si lo a ni. Shakespeare-a'n *Antony and Cleopatra*-ah Antony a tawngtirin -

Let Rome in Tiber melt, and the wide arch
Of the rang'd empire fall! Here is my space
Kingdoms are clay; our dungy earth alike
Feeds beast as man; the nobleness of life
Is to do thus (embracing) when such a mutual pair
And such a twain can do!*

tih thu a han sawitir hian, hmeichhia leh mipa induhna leh inngaihzawnna hi a thûk theihzia, ram ropui leh nihna sâng takte ai pawha thlan theih a lo nihzia a târlang a; hmeichhia leh mipa induhna leh inngaihzawnna thu, 'love literature' ropui tak a siam a lo ni reng mai. Antony leh Cleopatra-te chu he drama-ah hian English mi angin lantir an ni lo va, history-ah pawh an ni hek lo, mahse a ɻawng hman leh ziak dan te avang hian English literature ropui a tlin phah zawk a ni.

Shakespeare-a drama-a a thawnthu ruangâm (plot) te hi ama phuahchawp ngat chu pakhat mah a awm lo; thawnthu hlui leh history-a thu awm sa, a thuam that leh a duh ang zawnga a kaih kual te, hnam dang thawnthu a hriat a hman te an ni vek a ni.

Chuvangin, a ziak thiam chuan *The Two Gentlemen of Chittagong* emaw, *The Merchant of Mandalay* emaw Mizoten kan tlawh phâk china mi chêngte chanchin leh an thawnthu hluite emaw thuam ɻain, kan ɻawngin ziak ta ila, Mizo literature a ni thei a ni. Heng bakah hman lai Mizoram chhim leh hmar indo lai thu te pawh kha novel ang deuhvin chhiar ngaihnawm taka ziak tur tam tak a awm ngei ang.

Hun ɬha emaw kan hla duhzawng emaw kan sawi ɬhin a, "A thu nge pawimawh zawk, a thlûk?" tih zaghna awm ɬhin ang hi, literature-ah pawh hian "A thawnthu nge pawimawh zawk a ziakna ɻawng?" tih zaghna hi lo chhang dawn ta ila, a thawnthu (plot or background) hi literature tlintir theitu ni lovin, a ziak dan that leh that loh (quality) hi literature tlintir theitu a ni zawk mah tih tur a ni.

Miin Mizo pi pu nun leh Zawlûk nunte chu hre hlei hlui mah se, kawngkal fel ɬha taka a ziak lohva chhum bung ruma a chhuah chuan literature a tling lo. Amaherawhchu miin Manipur nula leh tlangval inngaizawng tak, an nu leh paten inneih an phal loh avanga rilru hrehawm taka an awm

chanchin, ngaihruatnain Mizo ɣawng chhiar nuam takin ziak ta sela, kan ɣawngin novel tha tak kan lo nei dawn tihna a ni mai. Chuvangin, Capt. C. Khuma ziak *Maymyo Sanapui*, indopui laia Mizo sipai leh Kâwl nula pakhat inngaihzawn dan thawnthu chhiar nuam taka a ziakte pawh hi kan ɣawnga novel hmasa ber pawla chhiar tur a ni.

English-ho pawh hian, an chénna ram thliarkar hi a zim êm avangin, anmahni thawnthu ngawt chuan a daih sêng lo a ni ang, a thliarkar pawni mi chêngte chanchin, Greek literature leh hman lai thawnthu (mythology) te chu, an thu leh hla ziak nan subject-ah an hmang nasa êm êm a. Marlowe-a ziak *Doctor Faustus* te, Milton-a poetry, *Paradise Lost* te, Shelley-a thu ziak *Prometheus Unbound* te, Keats-a kut chhuak, *Ode on a Grecian Urn* te, Tennyson-a siak *Ulysses* te, Jame Joyce-a ziak *Ulysses* te leh, Shakespeare-a kut chhuak tam takah Greek-ho thawnthu leh an literature lam thil chhuidawn tur tam tak kan hmu a; English literature hi Greek thawnthu leh literature-in a chiah hneh nasatzia hi hriat sên leh chhuichhuah sén loh khawp a ni.

Chu bakah chuan a taktaka thil lo thleng (historical events) pawh ni se, a ziak danin a zir chuan, ram dang chanchin pawh ni se, literature a ni thei bawk. Thomas Carlyle-a chuan lehkhabu pakhat *French Revolution* tih, dawt ni miah lo, historian-ten an ziak ang chi hi telh veikin a ziak a, English literature pawimawh taka chhiar a ni tho mai. Chutiang bawkin E.M. Forster-a ziak *A Passage to India* tih te, Pearl Buck-i novel *The three Daughters of Madame Liang* (a novel of China today) te pawh Sapho nun leh chanchin a ni hauh lo nain English ɣawnga literature pawimawh an tiing tih kan hria.

Chu lo lehah chuan thu ziak dan kalhmang (literary forms)-ah hian hnam upa zawkte tih dan entawn a nihna lang mah sela, a ziaktuin ama pianpui ɣawnga a ziak chuan a thiamna (originality) chu a tilang thei em em tho a ni. Mahni

chhehvela chêngte ɻawng leh thu malte pawh hi a hmanna tur dik leh a inhmehma turah hman thiam hi ɻawng tihhauseakna a ni bawk.

Mi thenkhat chuan hre chiang uk lovin, “Sapɻawngte chu hnam dang ɻawng lak khawm leh belh khawm mai alawm,” an ti mai thin niin ka hria. Mahse hnam dang ɻawng an hman leh an ɻawnga an lâk luhte tam viau angin lang mah se, an ɻawng a pawlh dal pha lo hle a ni. Hnam dang ɻawng an hmante hian hman tlanglawn reng a hlawh avang hian a lâr mai zawk a ni. Hnam dang ɻawng an hmante hian an literature-ah eng ang hmun nge a luah tih hriat theihna Prof. Emerson-a chuan lehkhabu pawimawh leh ziaktu ropui deuh deuhte thu mal hman a lo chhui a, a hmuu dan pawh hetiang hian a sawi.

Bible (KJV)-ah hian thu mal 94% chu Sapɻawng ziding leh fir ngat a ni a; Shakespeare-a thu ziakah hian 90% chu Sapɻawng fir a ni bawk. Ziaktu pawimawh zual leh an ɻawng zidinga mi, thu mal an hman zat: Spenser 86%; Milton 81%; Addison 82% Tennyson 88% *

Mizote hian sumdawnna lam thu sawi nan chuan Hindi leh Bengali ɻawngte hi lâk kan sam viau a; a leh lamah chuan kan ram chhunga thu mal thenkhat a hmangtuten an naupan lai ata an lo hman reng thinte chu kan nuihzat lek lek zawk lawi si a. He mi kawngah pawh hian kan mên kan tihzau deuh deuh zel pawh a tha hle ang.

Eng thu nge ziah tur? tih bakah hian tuten nge ziak ang? tih thu pawh hi sawi nghal ila a tha ang e.

Kan lehkhabu neih sate hi kan thlir chuan, tun laia kan sawi dana lehkha thiam kan tihte kutchhuak a vâng hle mai. Mi lo ziak sa lo thlirtu (critics) kan pung tain a ziaktu tur erawh chu kan la pung sâwt lo niin a lang. He mi kawngah hian lehkha thiama inchhâl leh lehkha thiam awma awmte hi

kan duai hle a ni.

Kan ram chanchin hi sawi nuam ka tihna lam chu India ramah pawh ziak thei leh chhiar thiam tamna tih a ni thin. Lehkha thiam leh University Degree nei pawh kan tamin kan pung zel a; Union Territory-a kan lo awm a, officer tenau deuh hna þau a lo þeh achin phei kha chuan officer hming pu pawh an tam ta viau a. Tun hma atang khan MZP chanchin bu leh chanchin bu dangah chuan Mizo zinga I.A.S. leh Central Services-a awmte leh army officer-te hming kan chhuah thin a, a list pawh a sei sáwt hle; kum tin University-a lang tham result þha tak tak hriat tur a awm bawk, thil lawmawm tak a ni vek mai.

Amaherawhchu kan tawng leh literature zirna, school leh college-a text book hei lehchen kan lo hman tawh leh la hman laite hi kan han thlir a, kan han sawi ho nikhuate hian kan sawisel thiam hle thin a. Mahse, amah Lalzuia Colney tihdan takah, "Heng aia þha zawk leh iaiawm lo chu khawiah nge?" tih zighthna awm se, chhán a har thin. Mizo lehkha zir sang leh thiama inhriate hi kan thawnthua chaichim rorel tura kal khawm an sawi, "Tuin nge zawhté chu dár awrhtir ang le?" titute ang deuh khan, tuin nge tuna kan neihte aia þha zawk hian ziak ang le? tih zighthna hi, chhângtu tur kan nei thei rih lo a ang hle rih a ni.

"....Ka buai êm atin ni...."

Mi tam tak chhuanlam nia lang chu, "Ngawi teh, ka buai êm atin a ni, engnah ka ngaiantuah hman lo...." tih a ni thin. Buai chhuanlamte hian office hna tam leh hun ñwi neih loh hi an tih chhan a ni ñwm hle mai. Mahse, khawvela ziaktu tam zawkte hi zan reh lamah mahni inah hmun fianrialia ziak thin an ni fo mai. Milton-a pawhin a midel tawh hnuin *Paradise Lost* chu zan laiakte a phuah a; Keats-a pawhin zanah hla a phuah thin a. Leng Lal Sainnuna leh Patea te, R.L. Kamlalate

pawhin hmun fianrialah hla an phuah thin a ni. Mizo lehkha thiamte hian titi leh inkawm hi kan hrât lutuk a, kan tawng chau va, mahni inah hmun fianrialah thil han ngaihtuah leh tur awm tawh lo khawp hian chhûnah kan vâkin kan leng chau thin a ni mai âwm mang e, tih awl a ni.

Mi thenkhat rilru chu vawi khat ziaknaah tha taka chhuah nghal theih dawn loh chuan tih loh mai, a ni âwm e; Sapho ziak lehkhabu tha tha leh hmingthangte kan han chhiar lâwr a. Ziak ve tumna rilru neite pawh hian a lo ziak thang tawhte kutchhuak leh kan ziak theih chin âwmte kan han khaikhin a, kan zâm thin a ni. Mahse, ziaktu hmingthangte pawh hi vawi hnih khat ziaka hlawhtling nghal mai chu mi tlêm tê chauh an ni. Thu ziak hi zir chi leh zir thiam theih a nihzia a taka lo hre chiangtu Alexander Pope-a chuan heti hian a sawi :

True case in writing comes from art, not chance,
As those move easiest who have learn'd to dance.
(*On Criticism*, lies 362-363).

Chuvangin, keini Mizo, Sap ngaisang êm êmtute leh kan rama Sap lo chhuakte thawh ang thawk ve thei zel tate hian kan entawn ber Sap-ho tih ang kan la tih loh a awm. Hei hi lehkhabu ziakah a ni. Sap-ho kan ramah min awp tura lo kalte pawh khan, buai hlein hna ngah hle mah se, lehkhabu ziak tumna rilru an nei tlat a; chuvangin kan hnam chanchin an hun laia an hriat dan leh hmuh dan an ziak a, kan hnam tan thil hlu tak a ni. Chu bakah an rama mi tam tak, zin chhuak thei lote tân ram dang chanchin chhiar tur an siamsak a, khawvel chanchin an hnamin a hriat zau phah thin a ni.

Chutiang bawkin, Mizo officer, Mizoram pawnaw sawrkar hna thawkte pawhin, an awmna lam mite thawnthu leh an khawtlâng nun te, an tawng kalhmangte hi Mizo tawngin ziak thin ta sela, kan hnam hian kan tangkaipui ngei ngei ang a, literature-ah hmasawnna kawng tha tak a ni thei nghal bawk

ang. Chhuna ei zawnna pangngai, sawrkar hna kan thawh hun
bahak hian kan lehkha thiamte hian, “Ka buai êm atin a ni.....”
an tihna chhan hi lehkhabu an buatsaih vang ni zawk sela
chuan, hma kan sawn nasa lehzual ngei dawn a ni.

RIH DIL LEH MIZORAM

“Mizorama dîl hmingthang ber leh lian ber chu Rih dîl a ni a, amaherawhchu Burma rama awm a ni,” tiin, mi tam takin fiamthu sawiin kan sawi thin. He fiamthuah hian thu dik a tel a, he fiamthuah vêk hian Mizo rilru leh ngaihtuahna ril tak hi a chêng reng a ni.

Mizote hian Rih dîl hi kan ram pawnah kan dah phal lo va, dah thei pawh kan ni lo. Burma rama awm a ni, kan tih hian Mizoram chu Burma rama awm a ni kan tihna erawh chu a ni lo. Mizorama awmah kan sawi pawh hian a ni chuang lo. Mizo rilru leh ngaihtuahna chhungril takah chuan Vairam kan tih leh Rih dîl ram chu inhlat tak, inzawmna emaw inlaichinna emaw pawh nei hauh lo an ni.

Rih dîl hian eng tik hun lai aṭang tawh khan nge Mizo rilru leh ngaihtuahnaah hian ram a lo neih ṭan tih hi hriat a ni lo. Amaherawhchu a tel lo chuan kan pi pute nun leh an beiseina khawvel hi hriat theih emaw chhui theih emaw pawh a ni lo. Rih dîl hian Mizo pi pute sakhua, rilru kalna leh lunglēnna tawp a entir a. Kan pi pute nun leh ngaihtuahna ram chuan lang thei lam leh lang thei lo lam a nei a, a lang thei lam ram chuan pian aṭanga thih ni thleng hi a huam a; a lang thei lo lam chu Rih dîl piaha ram la awm chu a ni. Chumi Rih dîl piaha ram la awm chu a zau zawng hriat loh, hringlang tiāng leh lungloh tui awmna, hawilo par vulna ram a ni. A lang thei lam rama an chen laia an nunchan chuan a lang thei lo lam ram an thlen huna an khawsak dan tur a hril avangin, rilru inpeih sa thlapa chu ram chu pan thei an tam thei lo hle a ni.

He rilru leh ngaihtuahna, Rih dîl rama tualṭo hian amah

tih bo leh ûm bo tumtu, hmelman chi hrang hrang a nei a. Chung zinga a lian ber chu Jordan lui a ni. Rih dîl rama chêngte chuan a awm ve tih pawh an lo hriat ngai hauh loh, Jordan lui, ram hla taka a awm chu Mizoramah hian a lo luang thleng phut mai a. Tichuan Mizo rilruah hian hmun inchuhin nasa takin an insual ta a. An insual tan atang phatin Rih dîl chu a bet zawkah a tang ta mai a. Ram hla tak atanga lo kal zawk chuan, hmanraw chi hrang hrang, Rih dîl ram finnain a la hriat ngai lohte chu hmangin, ram a rawn la duai duai mai a. Rih dîl ram boruaka sei lian, mi hrâng leh pasalha zawng zawngte chu an tu leh an fate zingah hian anmahni lam tang leh an kalna lam kawng zawh tum pawh kan lo awm ta mang lo va. Kan pi pute chênnra ram chu hawisanin ram thar, Jordan lui lam chu kan hawi ta fur a, a lui kamahte chuan dingin a râl ram lam chu kan thlir ta thup mai a; amaherawhchu kan tukkhumah hi chuan Rih dîl ram chu a la bet tlat a ni. Chumi kan pi pute lo chênnra ramah chuan zin leh vah vêl châk châng pawh kan la nei deuh reng a. Ngaih tur bik sawi tur pawh hre si lovin, a ram hming lam ringawt pawh hian kan lung a la lêng thei em em si a ni.

Mizo rilru leh ngaihtuahna ramah hian Jordan lui chuan len lam a lo pan deuh deuh ang bawkin Rih dîl chuan têt lam a lo pan ve tial tial a. Amaherawhchu kan rilrua Rih dîl bo hun hun chu kan nîhna leh pianna ram hloh hun tur a nih si avangin ral hlentir chu phal chi a ni lo. Hei vang hi a ni ang chu, Jordan lui ram rilru leh boruakin min chîm nasat hle hnu pawh hian Rih dîl piah ram chu kan la theihngihlh thei bik lo va, kan mitthlaah hian a la châm reng tho a ni. Kan lusûn leh lunglén tâwpâ kan hlate pawh:

*Hringhniang an liamna thlafam khua chu e,
Ka thlir ngam lo hawilo par thliaka,
Lungloh tui an dawn tur ka ngai ngam lo ve.*

tih a la ni reng a. Chu chauh ni lovin, Jordan lui ral ram chu Rih dîl piah ram ngaihuatin kan la ngaihuat reng bawk a. Kan pi pute thisen zawmpui leh thlah kan nihna a la bo si loh avangin Jordan lui râl ram leh Rih dîl piah ram chu kan rilruah hian a la lang kawp reng a, an pahniha hming pawh hi kan lam kawp lo thei lo a ni.

*Lo kir leh la chunnu lungmawl,
Rih sang mual liam kan la tiām lo ve.*

*Hnutiang an chhawn ta a,
He khawvel thlalér hi;
Thangvan sangah Zion Lalpa
Hlim thla an bêl ang maw!*

Rih dîl hi a zau zawng engti chiah nge la ni a, Jordan lui dung pawh hi engti chiaha sei nge tih hi sawi theih chu a ni lo. Mizorama lui lian ber leh hmingthang ber, à'rama luang tlang þin, Rûn lui lah chu kan hriat loh hlânin ram pawn lam hawiin a luang ta daih mai a; tunah chuan a lui hming pawh kan lam khâtin kan theihnghilh lo chauh a ni. A lui ram finna pawh kan hre tlem hle. A kamah kan pi pute an chén laia Liandovan ‘a thai Chawngi’ dai kaipui a tum a, tui lianin a laksak laite chu kan mitthlaa kan hmuu theih chhun a lo ni ta deuh mai. Chumi þuma Liandova þah hla chu kan hla neihte zinga upa ber pawl a ni tih erawh chu kan la hria. Tunah hi chuan Rûn lui chu Mizo rilru leh ngaihuatnaah chuan kâwlva lén chhamah a awm ta a; ramri lui ang mai a lo ni ta. Jordan lui chu Mizorama lui lian ber leh sei ber a lo ni ta a ni.

Rih dîl erawh chu dotu leh hmelma tam tak kârah a awmna ngaiah khan a la awm a; Mizorama dîl hmingthang ber leh lian ber nihna pawh a la chang zel rih a ni.

HLA PAHNIH

KA RILRUA AWM THIN

Our sweetest songs are those that tell of saddest thought

- Shelley

Mizovin hla lâr tak pahnih, “**Hnuchham hla**” tia sawi theih tur ve ve kan nei; pakhat chu Vankhama phuah a ni a, a hla hming (title)-ah “**Khawngai Hnuchham**” tih vuahin, Thalai Hla Bu nambar 47-naah a chuang a. Pakhat chu Rokunga phuah a ni a, a hmingah “*Hrai tê khaw nge i chun ve kha?*” tih vuahin Thalai Hla Bu number 48-naah a chuang bawk. He hla tha tak pahnih, ka rilrua awm thinte hi, an kalhmang leh an thu ken sawi chhuah dan i lo thlir teh ang.

Hnuchham hla Vankhama phuahtirtu chu tun hmaa Hnuchham in, Salvation Army-in Aizawla Dawrpui Bungkawn bula an siam a ni a. Rokunga erawh chuan hnuchham a pain a enkawl lai hmuin a phuah chhan ta niin a lang.

Phuah chhan bik a neih ang ngeiin Vankhama hian Aizawla hnuchham chawmna in awmna laite pawh sawi langin, Mizoram khawpui bera mi lunna leh hmun laili ber hmunah, nausên hnute hne lai an nuten an thihsante chuan tlawmngai tak leh khawngaih taka anmahni enkawltu *chün lem fâng an bêl* tih a hla châng khatnaah a sawi phawt a. Thihsain hetiang hian an nute chu lak bosak suh sela chuan duat takin anmahni hringtu an nute chuan an fate hi an pawm ngei tur hi a ni; mahse an fate tap ri hre tawh miah lovin leilungah an luangral ta a. An tuite a lo hâl a, an han tâh chuan nautê hnute pêkna saidawumin anmahni enkawltute chuan

hnuchham chawm nana an hman ḫin hnute tui an pe a, an awi mu ḫin tih a châng hnihilnaah chuan a sawi leh a. A châng thumnaah chuan hnuchhamte chu ṭawngtirin, "Ka nu kha thi ta lo sela chuan hetiang hian ka awm bîk lo tur," tiin, Vankhamma chuan an dinhmun anmahni a sawitir a. A châng tawp ber chu anmahni chawmna leh enkawlna tura ṭanpuina pe turin a chhiartute a sawmna a ni.

Rokunga hlaah hi chuan nau hnuchham chu mi dang, a enkawl tura inpete kutah awm lovin, nausen hringtu, a pain a enkawl a ni. Hla rēng rēng hian phuah chhan bîk a nei duh viau a, a chhan a lo inṭan chhuah dan erawh chu a inang kher lo fo. Rokunga pawh hian he hla a phuah chhan leh phuahtirtu, a ngaihtuahna kaihruaitu bik, pa pakhatin a fa nausen tê a enkawl lai, a rilru mita a hmuh reng ḫin chu, a awm ngei ang tih a rin theih a ni.

A phuahtu leh a phuah chhan nausen hi inhmatawna awm angin a ngaihruat theih bawk a; a phuahtu hian nautê vanduai leh khawngaihthlâk tak mai chu en reng chungin a dinhmuna a han sawi chhuak ta a ni:

*Hrinhniang hrai chawi te, i lo piang a,
Mi zawng laiah i riang hluan e;
Mim ang i pianna chûn ngei kha,
Rih tlangpui zamual a liam ta e*

tiin.

A châng hnihilnaah chuan he nausen dinhmun leh nausen dang nu neite dinhmun inan lohnate a sawi chhuak a; nau dangte chu anmahni hringtu leh hmangaih em emtu, an nuten duat taka puain an awi mu ḫin a. He nau erawh hi chuan han paw mutu tur, nu a nei ve lo tih a phuahtu hian a hre reng nain, amah chauhva a mu a han hmuh chuan, a chhiartu zawng zawngte tan a hla thu hman awmzia pawh hrilhfiah leh chuan ngai lo khawpa mawl leh chiangin, he hlaa hnuk tiulh thei lai

ber, nausen pa leh a chhiartute tan pawh chhān kher ngai lo thu zawhna (rhetorical question) a han siam ta nghe nghe a ni:

*Hrai te, khaw nge i chun ve kha,
Mah te'n laikhuma i lo zâl le?*

A châng thumnaah chuan zan laiah a pain a fa nausen tê chu a buaipuiziate a sawi zel a; nuin a pêk theih hnute chu a pain a neih ve si loh avangin hnute châk avanga zan laiah nausen an han thawh hi chuan Mizo pa tan hi zawng tih ngaihna hriat a harzia leh rilru a nat theihzia a sawi chiang hle a ni. Ram changkang leh haus a zawka miten nau chaw chi hrang hrang an neih ang chite chu Mizo in chhungah chuan a awm ve loh avangin Mizo pa tan hian intihpachan pawh a har hle a ni. Hetih hun lai bawk, zan rei tawh takah hian khawvel hmun hrang hrang, Hollywood, New York, Paris, Hongkong, Tokyo-ah te chuan ei leh in lamah nawm chenna a la kal tluang zel a; thil rimawi rui leh remin nula leh tlangvalte chu inpawnchilhin an lâm hep hep reng a; Zo pa in chhung zîm leh thim takah, chhuna hna hah taka thawh hnuin, zanlaiah pain nausen tap han tihtlei tuma a buaipui laite mitthlaa han hmuu hian, mihringa lo piang theuh theuhte hian khawvel kan hman dan a inang lo hle thin tih pawh kan hre nawn leh thin a ni.

*Nu-hnûntui ngai a lo tap e,
Zua lualithli tui ang a lo hnâm e*

tih lai han chhiar phei hi chuan, ngaihuatna bengin nausen tap ri pawh kan hre thei hial a, zua lualithli chu sawi loh, a chhiartute *lualithli* pawh *tui* ang a lo hnâm thei hial a ni. A châng linsah hian nausen hringtupa rilru sawi chhuakin Pathian tanpuina a mamawhzia a sawi a. A châng nganaah chuan Kokung a chuan hnuchhamite hi Pathianin a ensan ngai lohzia sawiin, nu neih loh avanga zâm mai lo turin hnuchham chu a hinêm a; thil tha tih leh kawng dik zawn hi din chhuanna bul a

nihziate a sawi tel bawk a. A châng tawp berah chuan hnuchham ḥanpu hi Pathian duhzawng leh a malsawm dawnna a nih thu sawiin, ḥanpuina pe turin a thiante leh mi dangte hnenah ngenna a siam nghal a ni.

Vankhama hian thawnthu sawi dan kalhmang ang deuhvin hnuchham châwmna an siamna lai hmunte a sawi aṭang hian, Aizawl la hmu ngai lo tan pawh ngaihruat theih turin thil a sawi chipchiar a. He mi “*Hnuchham rairah rûn*” a tiha nausen an dahte hi, a ṭawngkam hman aṭang hi chuan, anmahni duh thua awm anga ngaih theih lek lek a ni, “*Tah chuan an fuan e, chun tawng lo rairah riang chuang,*” a tih avangin. Mahse a châng hnihnaah hian chutiang chu a ni lo tih a lang chiang thuai. A thu hman ḥenkhāt *laihâng* tih te, *hnun ûm dar dawi lêng* tihte hi ka chhiar hmasak ber ḥum chuan eng a tihna nge ni ang aw! tiin, ka han ngaihtuah a; a sawi tum hrīaa ka inhriat hnu chuan, “Um, Vankhama nge nge, ṭawng bungrua a ngah hi le,” ti rilru chungin, ṭawngkam dang chher thar a nei em tia ngaihtuah deuh zel chungin ka chhiar zawm zel a.

Ka chhiar chhuah hnuah ka han ennawn leh chuan Vankhama hian hnuchham enkawltute chu *chun lem* tiin a châng khatnaah a sawi nain a châng hnihnaah erawh chuan mutmu pawh tuah theih loh phaha *laina tlawm māk chūnnun* a ti leh a. A châng tawp berah phei chuan hnuchham ḥanputui apiangte chu an *chun leh zuə* kan ni tih a sawi leh bawk si avangin, a châng khatnaa an hringtu nu chan changte pawh *chun lem* tia a sawi hi chu ka duh aiin a sawi pawn lâng lam deuh a ni. Chutiang chuan han ti zawk sela ka rilru a hmin deuh zawk ngei ang tih turin rawtna erawh chu ka siam dang lo.

Heng kan Mizo hla phuah thiamte pahnih hian Kristian kan nih hmaa kan Mizo pi pu ngaih dan (pagan imagery) hmangin thihna hi *rih sang mual liam, rih tlangpui zamual liam* tia an sawi leh, Pathian hming lam na *Van pui, Siamtu,*

Chung Khua nu tih ṭawng kamte hi, tuna Kristianna boruakin min chîm tawh hle hnu at̄anga han ngaihtuah pawhin, a la inhmeħ thei tho a ni.

Rokunga hla hian rilru a khawih dan a dang hle. Sap hla phuah thiam pakhat Alexander Pope-a ṭawngkam takin, "Rilrua lo awm fo, mahse la sawi chhuah fiah ngai si loh thil," a rawn sawi chhuak ni ber hian ka hria. Châng khatna, tlar 4 lek mai pawh han chhiar chhuah hian, hnuchham chēnna khawvel boruak min hîptir nghal a:

*Hrai te, khaw nge i chûn ve kha,
Mahte'n laikhuma i lo zâl le?*

tih lai chiah phei hi chu rilru na tak leh hnuk ulh ṭeuh chunga chhiar lo chu mi tlêm tê chauh an awm ka ring ḫin a ni. Vankhama'n lungchhiatthalak thei âwm zâwng berin hnuchhamte dinhmun sawi chhuah a tumna,

*Awmlai lung lian kha chu hrâng ta lo sela,
Duhte'n a chûn ngei khan a tânglaiah...
Awi maw! a zâlsan ta Piallei thuah riat karah*

tih thuin ka rilru chhungril a zuk den dan leh, khi mi a chunga Rokunga hla tlar tawi tê pahnih khian ka rilru a khawih dan chu a inang lo blein ka hria. Rokunga hlaah hian hla thu, a awmzia hriat har deuh tur a vâng hle a, chang 5-naa *chûn lo hian i thlâ a lêng em ni?* tih hi eng a tihna chiah nge ni ang aw? tiin zirlai þhenkhat chuan an rilruin an zawt mai thei.

He hla pahnihte hian hnuchham dinhmun an sawi chhuah mai bâkah mi zirtir tumna leh thil tihtir tum (motive) a tawpah an tilang ve ve; Vankhama'n *Hai bil lo ula...Kan ba e*, a tih avang leh, Rokunga pawhin *Khawngaih thil pêk rawn hlân ve la a tih avangin*, hnuchham tan an kampein (campaign) emaw, hlain vebbur an khawnsak tih theih rum rum a ni. Hla rēng rēng, mi kaihruai tumna lam bik (palpable designs) nei rûn chi duh ngai lo, John Keats-a leh a ngaih dan thlawppuitu, hla phuah thiam dang hmingthang tak takte

chuan, hetianga a tlangkawmna siam hi an thil nin zâwng ber leh ngaihsan loh zâwng tak a ni. Mizo rilru leh ngaihtuahna khawvelah erawh chuan “mi zirtir nei chi” thu ziakin hmun sâng deuh a la chang rih, a thu zirtir zawm lamah kan sân leh sân loh chu thu dang.

Hla ropui leh ḥha tehna pakhat ni fo chu, a phuah chhan (theme) a sawi chian tho bâkah thu mâwl leh vawn awlsam, a sawi bâkah ngaihruat zawm tur thu tam tak fun tel la nei a ni em tih hi a ni. Chuvangin, Sapṭawnga hla ḥha leh lâr ber ber-*Silent Night, Oh Come all ye faithful, Amazing Grace, We shall overcome* etc. tih hlaah te pawh hian hla thu ni deuh bika ngaih ṭawngkam (poetical words or diction) a awm hran lo. Mahse hla nung leh lâr rei ber ber an tling a ni. Zir thiamna leh tum hrim hrimna aṭang pawhin hla ḥha tak tak phuah theih a ni; amaherawhchu ṭawngkam mawl leh mi tin hriat sa hmanga mi tam tak rilru leh ngaihtuahna sawi chhuak ḥhinte chu pianpui thiamna nei mi (genius) an ni fo ḥthin a ni. Kan duh thu leh rilru a sawi chhuah kim phawt chuan eng ṭawngkam mah hi a mawl lutuk e tia ngaihnêp tur a awm lo.

Vankhama hla leh Rokunga hla hian, an sawi tum leh phuah chhan inang viau angin lang mah se, an kalhmangte hian inan lohna tam tak a nei ta a ni. Vankhama hlaah hian châng khatah tlar 8 zel a awm a, Rokunga hlaah tlar 4 a awm thung a; Vankhama hla tlar hi Rokunga hla tlar aiin a sei zel bawk. Vankhama hla hian a phuahtu hi mi ṭawng thei deuh tak leh thu sawi thei deuh tak ni angin a lantir a; a thu kalhmang leh inthleh dan (flow) hi a ḥthat mang loh avang leh, ṭawngkam chher chawp, hla thu anga hmante a awm nual bawk avangin, han chhiar lai pawhin a awmzia tur ngaihtuah buai deuh a lo ngai bawk nêñ, a chhiar pawh a harsa deuh a ni. Chuvangin, Vankhama hla leh Rokunga hla hi a chhiar a innawm hleih dan chu, kawng bumboh deuhva kal leh kawng rualrem deuhva kal a innawm hleih ang hi a ni kan ti thei ang.

Anih leh, Vankhama ṭawngkam (expressions) ḥthenkhat

- *chün lem, laihâng, hnûn um dâr dawi lêng, kirtiang* tihte hian Mizo hla thu (poetic diction) an tihhausak phah kan ti thei ang em?

Vankhama hian he hla hi a lo phuah avang hian hla tha tak pakhat kan lo neih belh ngei mai, phuah ta lo sela chuan he hnuchham hla hi kan nei dawn lo a ni. Amaherawhchu hla phuahtu dangten heng a thu hmante hi an hman lârpui a, hman tlânlawn (usage) atan kan neih tak tak hma chuan mi mal (Vankhama) ɻawngkam bik (idiolect) a ni reng ang a, kan ɻawng (expression) a tihhausakna a awm hran lo vang. Sap hla phuah thiam hmingthang thenkhatte pawhin hetiang hian ɻawngkam chher thar an lo ching ɻhin a, mahse tam tak chu hman tlânlawn hlawh lovin theihnghilh leh mai a ni. Entir nan : Spenser-a'n *mercify* tih a han chher thar a, Carlyle-a'n *beautifuller, beatifullest* etc. tihte a hmang lui bawk a. Tun thlengin an lehkhabuah heng thu malte hi chuang zel mah se mi dangin an hmanpui si loh avangin Sapɻawng (usage) an tihhausakna a awm ta chuang lo va, mi mal ɻawng kauchheh ah an chang satliah ta mai a ni.

Vankhama hla kan chhiar hian thil chik tak leh fim taka kan ngaihtuah theihna (intellect) lam hi a khawih (appeal) a, Rokunga hla hi chuan thinlung (heart) lam a khawih thung a ni. A phuah nan hun an hman rei zâwng pawh, a hla tlar intam hleih hi chu sawi lohva lum ni se, a inang lo hie thei ang. Vankhama hian phuah luih tum hrim hrim leh riiku ngaihtuahna nasa tak hmang hmîl a pu deuh va, a hla pawh hi a ennawn zing viau mai thei a ni. Rokunga erawh hi chuan a thiniunga awmsa leh khat liam a ziak chhuak niin a lang thei thung a ni.

Zirtirtuin, "Zan inah in duh zawk zawk hi in lamah rawn vawng thiap ula, a mal malin naktukah ka sawitir ang che u," ti ta ang sela, Rokunga hla hi ka thian ka ring. Mi dang pawh thlang ve an awm ka ring.

THAWNTHU PAHNIH

Thu leh Hla December, 1979-a chhuakah khan C. Lalkhawliana'n Khawlungi thawnthu ziak, A Tlai Lutuk Ta tih a review khan a titluangtlam thiam hle a. Amaherawhchu thawnthu emaw, poetry emaw play emawte hi han review hian thlir tel tur leh ngaihtuah zau tur, sir tin aṭangin thlir tur a awm a; chung zinga pakhat chu a thawnthu kal hmang leh a chhung thuin mi dangte ziak nen inlaichinna emaw, inanna emaw a nei em tih leh, chutiang chu a lo awm chuan chhui tel hi a ni.

Chutiang lama han chhui chuan Khawlungi thawnthu "A Tlai Lutuk Ta" tih chhiar ṣintute chuan English novelis Thomas Hardy-a thawnthu "Tess of d' Urberville" hi Mizo ṣawngin kan chhiar ta emaw tih mai turin, he thawnthu pahnih hi a inang hle a; thawnthu pahnih nge kan chhiar thawnthu pakhat tih zawhna pawh rilruah a lo awm thei hial a ni. He thawnthu pahnih hi a tawi thei ang berin an ruangām (plot) i lo thlir teh ang.

Thomas Hardy-a novel "Tess of d' Urberville" hi November, 1891 kuma chhuah a ni a, tuna kan en hi Macmillan & Co. London, 1965 edition a ni a, a phek number pawh hi hemi edition hi a ni a; Khawlungi thawnthu "A Tlai Lutuk Ta" tih hi Zoram Writers Club-in an chhuah, kum 1979-a chhut a ni.

Thomas Hardy-a thawnthua a changtu ber (heroine) hi a hming chu Tess-i a ni a, thingtlâng khua kan tih ang, khaw tê deuh Marlott khuaa chēng niin, sikul pawh pawl 6 a pass thleng chauhva zir a ni, (p. 28;) Khawlungi thawnthua a changtu ber chu Thanpari a ni a, thingtlâng khua - Zote khuaa chēng, sikul a luh thu chu sawi awm lo, mahse ziak leh chhiar

thiam niin a lang. Tess-i leh Thanpari hi nula hmel tha tak, chhungkaw rethei tak vea lo sei lian an ni a; Thanpari phei chu hmethai fa niin Khawlungi chuan a sawi (p. 6).

Thomas Hardy-a thawnthuah chuan Tess-i chu a nu leh paten an chhungkhat hla deuh nia an ngaih, khaw danga awmte hnenah awm turin an kaltir a; chuta a awm lai chuan an chhungkhat nia an ngaih tlangval pakhat mi awm duhdah deuh mai Alec d' Urberville-a chuan a lo mutpui a (p. 90-91); mahse nupuia neih a tum si loh avangin Tess-i chu an in lamah chuan a haw leh ta a. A hawn hnu chuan nau a lo pai ta a, rilru hrehawrn takin a awm ta a. A va zinna khaw hming chu Trantridge a ni.

Khawlungi thawnthuah pawh Thanpari chu a nuteii te hnenah awm turin a nuin a tir a, a nuteii te awmna chu Aizawl a ni. Aizawlah chutia a nuteii te hnenah a awm lai chuan Thanpari chuan a nuteii te chhung mitmei tha a hmu vak lo va. Ni khat chu Thanpari leh a nuteii pasala nau tlangval, Lalhmingthanga chu huan sām turin Chite lui kamah an kal a. A hmun an thlen chuan Lalhmingthanga chuan ama zu pai rūk chu a in a, thlāmah Thanpari chu a pâwngsual a. A hnu rei vak lovah nau a pai tih a hriat veleh Lalhmingthanga chuan Thanpari chu an khaw lamah tirh haw thuai dan kawng dapin, a hawntir ta a.

Hardy-a thawnthu a Tess-i chuan a sāwn pai chu a lo hring a (p. 112); a hmingah chuan Sorrow a sa a, a fa chu rei pawh dam lovin a thi a. A thihi dawn tēpah chuan baptisma chantirtu tur pastor an awm loh avangin Tess-i chuan a laizawnte hmuh laiin a fa nausen lu chungah chuan tui thlawrin a baptis a, a tawngtai bawk a (p. 114). A fa chu a thihi chuan pastor hnenah kalin vuisak turin a ngen a; mahse sāwn a nih avangin pastor chuan a vuisak thei dawn lo tih a hrilh a, tichuan Tess-i chuan aina tih tihin a ti ta a. (p. 117).

Thanpari pawhin a sâwn pai chu a hring a, a hminga chuan, Tess-i fa hming nena awmze anpui nei, Rianghleia a sa a. A fa chu kum khat mi niin pneumonia natnain a thi a; Thanpari chuan a fa chu vuisak turin an khuaah kohhran upa a ngêñ a, mahse ani chuan kohhran dan angin a vui duh ta tlat lo mai a. Chutah Thanpari chuan, "Keimahin ḥawngtaina ka nei mai ang e," tiin, thlân ko tlangah chuan a ḥawngtai ta a ni. (p. 17).

Hardy-a thawnthuah chuan Tess-i fa thih hnu chuan a nuin ḥian lehkha thawn a hmuh aṭangin bâwng vulhna hmunah inhlawhfakna remchang a awm tih a hria a; chumi hmunah chuan Tess-i chu a tir ta a. Hemi bâwng vulhna leh bawngnute siam chhuahna hmun hi Talbothays Dairy a ni a, a neitu chu Mr. Crick a ni (p. 135). Khawlungi thawnthuah pawh Thanpari fa thih hnu chuan Thanpari nu chu a ḥian Pi Rovi, Hmuifang-a awm chuan inhlawhfakna an nei tih hrilhin Thanpari chu an hnena tir turin a chah a; tichuan Thanpari chu Hmuifangah chuan a kal ta a; a va panate chhung Pi Rovi chhungte chuan bâwng an vulh ve bawk (p. 18). Hardy-a novel-ah chuan Tess-i inhlawhfakna hmun chu an khua aṭanga mel 20 emaw lek a ni a; mahse mi an intlawh pawh tawn vak loh avangin Tess-i chu sâwn pai tawh a nih rēng tuman an hre lo va; Khawlungi thawnthua Thanpari te khua Zote aṭang pawhin a inhlawhfakna khua Hmuifang chu a hla vak lo nain, Thanpari chu sâwn pai tawh a nih rēng tuman an hre lo bawk. Hardy-a thawnthuah chuan hetianga Tess-i chu bawng vulhna hmunah bawngnute sâwra a inhlawhfaknaah hian tlangval pakhat lehkha thiam (a degree sawi a awm lo), bawng vulh dan leh lo neih dan zira lo kal a awm a. Chu tlangval hming chu Angel Clare a ni. Angel Clare-a chuan Tess-i chu a ngaizâwng ta êm êm mai a; inneih an tum ta hial a, chumi hmunah chuan a mipa lam leh a hmeichhe lam chhungte pawh tel miah lo vin inneih chu an puitlin ta a (p. 243).

Khawlungi thawnthuah pawh hetia Thanpari hi bawng vulh nei chhungkuaa a inhlawhfak lai hianAizawl atangin tlangval pakhat sawrkar hna thawk Biakmawia B.Sc. (Agri.) chu sawrkar hna pawimawhah Sialsuk tlangdungah a zin a. Chutia a zinnaah chuan Thanpari chu a hruihin a ngaizâwng ta nghal mai a, inneih an puahchah ta chûk chûk a. Aizawla Biakmawia te chhung pawh, a tuate mah tel lo vin, an innei ta a ni.

Hardy-a chuan Tess-i leh Angel Clare-a chu khaw fêm deuhva Wellbridge Farmhouse, huana thlâmah an inneih zân chu hmang turin a thawnthuah chuan a kaltir a. Khawlungi pawhin Thanpari leh Biakmawia chu an induh zân hmang turin Sialsuk khaw fêma awm, Sialsuk bangla-ah a awmtir bawk a ni.

Hardy-a thawnthuah chuan an inneih zânah a pasal nen an pahnih chauhva an awm lai chuan, eng tizia kher emaw ni, Tess-i chuan an tun hma nun inhrilh tawn ve ve a rawt a. Angel Clare-a chuan a sawi hnuin Tess-i chuan tlangval a lo ngaih tawh dan leh vawi khat an inpawlnaah a lo rai tâk thu leh, a tlangval pâwl chu a ngaihzawn vâng leh a duh ve rêng vang a nih lohzia thlengin a sawi ta a; a fa chu a thihi dante chenin a sawi ta vek a (p. 257). A pasal chuan chûng thil kal tawhte chu a pawisak rêng Tess-i chuan a ring lo va. Mahse a pasal chuan chu tlangval chu a la dam tih a hriat chuan a rilru a ni ta hauh lo mai a (p. 258-261). Khum khat leh pindan khatah riah pawh a pasal chuan a duh ta lo va, chu chauh ni lovin, awm hran a rawt nghal a. A nupui Tess-i chu an in lamah hawntir a tum a, pawisa a pe bawk a; a mamawh hunah chuan Angel Clare-a chuan a pa te chu pawisa dil turin a hrilh bawk a. Rilru na taka an inthen dawn lai chuan Tess-i chuan a mittui chu han titkin a pasal cihi pawni ta tlat sela chuan a pasal rilru chu hnien mai thei tur hi a ni a; mahse Tess-i chu chutiang han ti mi chu a lo ni si lo va. An inthen dawn chuan Angel Clare-a chuan, "Ka le rawn lam leh ang che," tiin, a tawng tiam a, an inthen ta a ni (p. 288).

Khawlungi thawnthuah pawh, Mizo hmeichhiaten an tih ngai hauh loh, Thanpari chuan hum sual a lo dai tawh dan leh, tlangvalin vawi khat a pâwlnaah nau a lo pai thu leh a fa chu a thih dan te chu an induh zanah chuan a pasal Biakmawia chu hrilh tûlin a hre ta tlat mai a, a hrilh ta nghe nghe a. Hardy-a thawnthua Tess-i pasal ang chiah khan, a nupui Thanpari tun hma chanchin chuan Biakmawia thin chu a thawng NASA hle mai a; a rilru lamlêt nghalin, "Zan inah pawh hian kan mu dûn lo vang a, a hrang ve vein kan mu bawk ang. Pindan lehlama sâwn kei chu ka riak mai ang," a ti ta a (p. 35). Tichuan pindan lehlama mu tur chuan Biakmawia chu a chhuak ta a. Thanpari chuan han ûm zui mai chu a duh a, mahse a ûm zui ngam si lo a ni. A hnuah Thanpari ɔap zawih zawih lai a kalsan kha, Biakmawia chuan nuam a ti bik lo hle mai a, mahse a va pan lêt lehtu nih chu a duh hauh bawk si lo. Thanpari hian tun lai Mizo hmeichhe tam takten an tih ngam em em tur, ani tan phei chuan a tih âwm hliah hliah ni bawk si, khawngaihna va dil tura Biakmawia chu va pan a, va pawm chu a tih ngam si loh avang leh, amah Biakmawia lah chuan va pan lehtu nih chu a duh lo va inti-mipa taka a lo inseh ruh tlat bawk si avangin, nupa mutin an mu dûn ta lo a ni.

Biakmawia chuan Thanpari chu a nu hrisel loh chhuanlamin an khaw lamah hawntir a tum a, ani chu thil zirna kal bona tur neiin a insawi a; Hardy-a thawnthua Angel Clare-an Tess-i a chah ang chiah khan, "Pawisa lamah te harsatna i neih chuan ka nu leh pa te lo dil mai thin ang che...annmahni pawh ka lo chah diam ang," tiin, Thanpari chu a hrilh a (p. 35). Chu bâkah chuan Angel Clare-a'n Tess-i ɔawng tiam ang chiah bawk khan, Biakmawia chuan, "Pari, ka lo kir leh ang a, ka la rawn lam leh ang che," tih ringawt hi lehkha themah ziakin thawn bâwm hmangin Thanpari chu a thawn a, an riahna Sialsuk bangla chawkidar chu a tûk zingah chuan a pêktir a. Chumi tûk zingah bawk chuan pindan lehlam

maia awm, Thanpari chu chibai pawh chibai ta lo leh, a hmel pawh hmu leh ta lo chuan Biakmawia chu Aizawl lam panin a chhuak ta a.

Tess-i leh Thanpari chu, an in an thlen ve ve lai takin an chhungte ve ve chu, an pasal neih thu phûr taka sawi leh hlim em em in an lo titî a; chu tih lai tak chuan an chhungte mak tih êm êm tur leh ngaih that lohna turin inchhung an lut ta a ni.

Hardy-a novel-ah chuan Angel Clare-a chu, a nupui Tess-i nen vawi khat pawh mu dûn lo va an inthen tâk hnu chuan, Brazil ramah a kal ta a (p. 293); Khawlungi thawnthuah pawh Biakmawia chu, a nupui Thanpari nen vawi khat mah mu dûn lo va an inthen tâk hnu chuan, Mysore-ah a hna thawnna lam thil zir turin a kal bawk a.

Tess-i chu a lo rethei ta hle mai a; a hmua a lo inhlawhfâk tawhna, bawng vulhna hrunga khan inhlawhfâkna zawngin a kal leh a, mahse a neitute dinhmun chu a lo chhe hman tawh a, engmah thawnna tur an lo nei tawh lo va. Thanpari pawh Tess-i ang bawk chuan a lo rethei ta hle a, a nuin a lo thihsan ta bawk nen, a baihvai ta hle mai a. Tichuan hmania a inhlawhfâkna, bawng vulh nei ñin, Pi Rovi te hnena khan inhlawhfâkna hrui beiseiin Hmuifang a pan a, mahse an dinhmun a lo tlak hniam tawh avangin inhlawhfâkna tur takngial pawh an lo neih sak thei tawh lo va, tichuan, Pari chu a hrilhhai hle a ni (p. 47).

Tess-i chuan inhlawhfâkna takngial pawh a hmuh zawk tâk loh avangin a pasala tawngkam tha kha ûm mai loh theih niin a hre ta lo va; hreh tak chung leh inzuam lo deuh maiin, a pasala nu leh pa, an hmêl pawh a la hmuh miah lohte awmnaah chuan kai a, tanpuina dil a tum ta a. A pasal Angel Clare-a pate in a va thiên chuan biak inah an lo inkhawm vek lai a ni a; biak in hungna kawngka (gate) lam chu panin inkhawm ban bun chu Tess-i chuan a nghak ta rân mai a. Inkawm bâng

an lo chhuah chuan a pasal Angel Clare-a unaute ni ngeia a hriatte chuan, an unaupain thingtlâng lam mi nula, a hmel pawh an la hmu ve loh lehngthal, nupua a nei ta mai chu an iai-sak thu leh, an thenawm nula fel tak leh hmel tha tak, Mercy Chant chu lo nei ta zâwk se tha tur, tih an sawi chu, Tess-i chuan a hre ta a (p. 338). A pasal Angel Clare-a te unau rilru a hriat tâk aṭang chuan an nu leh an pa te hmêl hmu ngam lo leh ṭanpuina pawh dil ngam ta lo chuan Tess-i chu a lêt leh ta hnê hnê mai a (p. 340).

Khawlungi thawnthuah pawh, Biakmawia'n Thanpari chu a kalsan dawn khan, "Pawisa lamah te harsatna i neih phawt chuan ka nu leh ka pate lo dil mai thin ang che, anmahni pawh ka chah diam ang," (p. 35) a tih kha hre rengin, a mangan tawpah leh a lo baihvai tâk êm hnu chuan, zah pawh dawn lovin, Aizawl-ah Biakmawia nu leh pate ṭanpuina dil turin Thanpari chu a kal ta a. Aizawl Dawrpui veng biak in hungna kawngka (gate) bulah thing buk hnuia a din reng lai chuan, a pasal Biakmawia nu ni ngeia a rin leh Biakmawia-te thenawm nu inkhawm tur titî chu a hre ta a. Biakmawia nu leh a thenawm nu chuan thingtlâng nula an hmuhsitzia leh ngaihnêpzia chu sawiin, an rin thua Biakmawia nupui, a hmêl pawh an la hmu hawt loh chu, ṭawng hlâwk pui puia an sâwtname chu Thanpari chuan a lo hre kiau mai a. Biakmawia nu thian chuan a fanu Zârbawihi chu Biakmawia nupui atan khan lo nei ta zawk ni ula, ti tein, ama fanu ngei chu a sawi mawi a, chu chu a han hriatin Tess-i ang bawk khan, Thanpari chuan ṭanpuina dil tura Biakmawia nu leh pate han pawh chu a ngam ta lo va, an in awmna pawh zawn chhuah a tum ta lo va.

Hardy-a thawnthuah chuan Tess-i chuan a pasala pate chu a pawh ngam tâk lohva a kir leh hnu chuan, kalkawngah rin loh takin, hmâna a fa neihna pa Alec-a nen khan an inhmua, an phu zawk ve ve a (p. 344). Alec-a chuan a nun hlui sual chu lo sim tawhin Pathian thute a lo sawi a. Tess-i nena an

inbiak chuan a chunga thil a lo tih tawhah khan Alec-a chuan ngaihdam a dil nghal ruai a. Tess-i khan fa a pai thu leh a fa chu a thih thu pawh Alec-a chuan a lo la hre lo va; chung thu chu Tess-i chuan a hrilh pahin, pasal pawh a nei leh tawh tih a sawi nghal a.

Khawlungi thawnthua Thanpari pawh chu a pasala nu leh pa pawh ngam ta lo va a lêt lehna kawngah chuan a rilṭam avangin thingpui dawrah lutin thingpui leh chhang ei a tum a; chutia thingpui dawra a lo ḡħut lai tak chuan hmana amah pâwl luitu a nuteii pasala nau Lalhmingthanga kha thingpui dawr kawtah chuan motor aṭangga thil hlâng thlain a lo awm a; an inhmu a, an phu zawk ve ve a. Lalhmingthanga chuan, Tess-i raitu Alec-a ang bawkin, a nun hlui sual a lo sim tawh a, "Ka lo sualzia ḡħinte kha Pathian hnенah pawh vawi tam tak ngaihdam dilin ka ḥawngħtai thin," tiin, Pari chu a hrilh nghe nghe a.

Thanpari nen an inbiak lai chuan Lala chuan a rilru tē tēin, "Nau pai khan a insawi si a, a nautē chu khawiah nge a dah ang le aw!" a ti neuh neuh a (p. 52), Lalhmingthanga hian Thanpari chanchin hi a hre zui ta lo hle mai kha a mak hle, a u nupui Pari nute-i hnен aṭang pawhin engmah a hre lo a ni tur a ni. An han inbiak rei deuh hnu chuan thil awmzia chu Thanpari chuan a sawi vek a, pasal a neih thu leh, a pasal nen chuan an awm hrän leh dan chenin Lalhmingthanga chu a hrilh nghal vek a. Thanpari chuan kal tumna bik pawh hre lo va a insawi avangin Lalhmingthanga chuan a u te (Pari nutei te) in lamah kad turin a sawm a. Belh tur dang tumah hre si hek lo, hreh tak chungin a nute-i te in lam chu Pari chuan panin, Lalhmingthanga chu a zui haw ta nge nge a (p. 53).

'Hardy-a thawnthuah chuan, Tess-i chu a nu leh a pa in a tilen hnunah pawh, a fa neih tawħna Alec-a khan a rawn zawng chħuak a, a hnathawħna hnun apiąg mai deuhħawħah a lo lang chħen mai a. Tess-i chuan pasal a nei tawh tih a sawi

reng nāin, a pasal nēn chuan an awm tlān si loh avangin, Alec-a chuan a rilru hneh tumin a hēl reng mai a. Tess-i chuan hnawh bo a tum eltiang ḫin, mahse a lo lang leh ḫin a, (p. 351) tlan bosanna tur a hre ngang ta si lo.

Thanpari pawh Lalhmingthanga nen in chhung hmun khata lo chēng ta chu, Lalhmingthanga nen chuan inbiak fo loh theih a lo ni lo va; Lalhmingthanga lahin Pari chu tihlāwm a tum hle a, thil eng emawte a leisak fo va; motor-te an nei bawk a, Silchar-a a kalte hian ‘Pari tān’ tiin thil a rawn hawn ḫin a. Mahse, Pari chuan Lalhmingthanga chu duhna rilru a nei chuang miah lo.

Hardy-a chuan Tess-i te chhungkua chu an khawsak harsa zual deuh deuhin a sawi a, an retheihna chu Alec-a chuan remchangah hmangin a neihte sēngin Tess-i nu leh a unaute chu tihlāwm a tum deuh deuh a. An chhungkaw pa ber John Durberville-a chu a lo thi tawh vei nen, ḫanpuitu pawh an mamawh hle a ni. Mahse, Tess-i chuan a pasal Angel Clare-a khan a la rawn lam leh dawn tih ringin a rilru a siam nghet tlat a; a dinhmun chu a han ngaihtuah chuan a inkhawnggaih êm êm ḫin a ni.

Thanpari chungchang thuah chuan mi dang han tlük luhna tur leh belh tur nei hek lo, a pasal Biakmawia chu ngai hle mah se a ute chhūng tihlāwm chu ḫulin a hre bawk si a, rilrua thawipik tak mai chungin, “Biakmawia chu pasal dang ka lo neihsan ngawt thei lo vang,” tiin, a rilru a siam nghet ve tlat bawk a ni (p. 57).

Hardy-a thawnthuah chuan Alec-a chuan Tess-i te chhung chu pawisa a ḫanpui nasat tâk êm avangin Tess-i rilru pawh chu a tawp a tawpah chuan a hneh ta a, an innei ta a. An inneih zawh veleh Alec-a leh Tess-i chu khaw dang, The Herons an tihah chuan an kal nghal a, chumi khuaah chuan mi in luahin an awm a.

Thanpari pawh chu, a pasal a lo hawn tâk lawk si loh avangin, a nute-ite nupa chuan amah Thanpari tihlawm tuma thil tam tak leisak ɻhintu Lalhmingthanga chu nei turin an tir lui ta a. Pari chuan ama dinhmun a han ngaihtuah chianin tuma hriatpui lohva inneih chu remchang a ti zâwk a; Lalhmingthanga chu dân zawk kim a lo la ni lo bawk nêñ, an awmna Venghlui biak inah chuan vestry pawh a la awm lo va, kohhran upa inah an innei a, a tûkah chuan khaw dang, Bilkhawthlir-ah Chemphai leilet enkawl turin an liam thla ta nghai a (p. 71).

Hardy-a thawnthuah chuan Tess-i pasal Angel Clare-a chu Brazil-ah kum khat a awm hnuin England-ah a lo haw leh ta a. A rilru hrehawm leh lunglên avangin a hmêl pawh a dâng nasa hle hman a; in a thlen veleh Tess-i chanchin chu a nu leh a pa a zawt var a. Anni chuan chanchin engmah an hriat loh thu an hrilh a; Tess-i lehkha nia an rin, a hma lawka an hmuh, Brazil lama an lo thawn chhâwn hman loh chu an han pe a. Angel Clare-a chuan a han chhiar chuan Tess-i chuan a tlai lutuk hnaain, amah chu rawn lam thuai tura a chahna a lo ni a. Brazil-a a address a hriat loh avangin Tess-i chuan a nu leh a pate hnenah chuan a thawn a lo ni a. Chu lehkha chu a chhiar zawk veleh Angel Clare-a chuan Tess-i awmna chu a zawng ta vut vut mai a.

Khawlungi thawnthuah pawh Biakmawia, thla 6 chhung Mysore-a awm tur kha, hna sâng zawk zirin kum khat zet mai a awm chhunzawm hnuah a ɻhianpa Lalkhuma nen an tîti dun atangin a nupui a kalsan tâk Thanpari chu khawngaih leh lainatna a nei thar ta that a, Aizawlah a lo haw ta a. In a thlen chuan ɻhu hle hle thei lovin, "Ka nu, Pari chanchin in hre hauh lo a ni maw?" a han ti hmasa ber a (p. 73). A nuin chaw ei a han siamsak diam hnuah pawh Biakmawia chuan, "Ka nupui ka hmuh hma loh chuan chaw ka ei dawn lo." a ti ta mai a, zawng turin a chhuak ta daih mai a.

Hardy-a thawnthuah chuan Angel Clare-a chuan Tess-i nu leh a unaute chu a zawng chhuak a; an hnen aṭang chuan Tess-i chu The Herons khuaah a awm tih a hre nghal a, tichuan chu khua chu a pan ta nghal a, Tess-i te in luah pawh chu zing khawvar hlimah a zawng hmu ta a.

Khawlungi thawnthuah pawh Biakmawia chuan Thanpari nute-i te in chu a zawng chhuak a, an hnen aṭang chuan Thanpari chu Bilkhawthlir khuaa an chhungte hnenah a awm tih a hre nghal a. Tichuan Biakmawia chuan Bawngkawn-ah motor a châng ta nghal a, Bilkhawthlir lam a pan ta a. Pari chu engti tura Bilkhawthlirah chuan kal nge ni ang aw? ti rilru chung leh, nuthlawi a nih avanga lungtenna neih hauh lohna rilru pu chungin a kal a. Bilkhawthlir chu zing khawvar tirh velah a thleng a, Pari awmna in pawh chu khua a var chiang ta tih hun velah hian a zawng hmu a (p. 86).

Hardy-a thawnthuah chuan Tess-i te in luah neitunu chu Angel Clare-a chuan a hmu hmasa a, Tess-i chu a koh chhuah tir a; a lo chhuah chuan Tess-i chu a mut kawr mawi tak leh man tam tak mai ha chungin a lo chhuak a. Khawlungi thawnthuah erawh chuan Thanpari chu zing mei chhem turin mit nuai chawt chawt chungin a tho va, pâwn kawngka hawngin a lo chhuak a ni.

Hardy-a thawnthuah chuan Tess-i lo chhuak chu Angel Clare-a chuan a lo hmuh veleh pawm tumin a bân a lo dawh a, mahse Tess-i chu a chechâng ta hauh lo mai a; Angel Clare-a chuan ngaihdam a han dil chuan Tess-i chuan, “A tlai lutuk tawh....*Its is too late,*” tiin, aw ring zet mai hian a chhang a; Angel Clare-a chuan thu dang a han sawi leh pawh chuan, “*Too late, too late - A tlai lutuk tawh, a tlai lutuk tawh-*” tiin, Tess-i chuan a chhang zel a. Angel Clare-a chuan, “Min hmangaih ve na nge?” tia a zawh chuan Tess-i chuan, “Hmangaih che e, mahse a tlai lutuk ta a ni...*Yes-O,*

yes, yes! But I say, it is too late," tiin a chhang a (p. 424).

Khawlungi thawnthuah pawh zing khawvar hlimah chutia kawngkhar bulu Biakmawia a lo ding reng chu Thanpari'n a han hmuh thut chuan a tawlh kîr dâwrh a, a khûr nghal zawih zawih mai a. A hma zânahte chuan Biakmawia chu a la ngaihtuah nasat leh ngaih êm avangin a mu hlei thei lo va; hemi tûk pawh hian a thawh zin phah hial nghe nghe a ni. Mahse, Biakmawia chuan amah a zawn hahzia leh kalsan a tum tawh lohzia sawi chungin duat taka pawma han tum chuan Pari chuan a kut chu a lo nam kiang dâwrh a, "Min hnaih suh! Min khawih rêng rêng suh. *A tlai tawh! A tlai lutuk tawh,*" a ti a, a tawngte chu a selh chilh deuh nawk nawk a. Biakmawia chuan ngaihdam a han dil pawh chuan Pari chuan vin zet mai hian, "Kal bo rawh! Kal bo thuai rawh, ka thusawi chu i hria em? *A tlai tawh! A tlai lutuk tawh,*" tiin a hmai a hup a, a inhñit ta hlawp hlawp mai a (p. 86-87). Hemi þuma Thanpari'n "*A tlai lutuk ta*" a tih hi Khawlungi chuan a thawnthu bu hmingah a hmang ta a ni.

Khawlungi hian Thanpari hi, Biakmawia nena an inhmuh hian, "*A tlai lutuk ta,*" tih leh a tlukpui thu hi vawi 4 a sawitir a, (p. 86-87); Hardy-a pawhin Tess-i chu "*A tlai lutuk ta - It is too late...*" tih leh a tlukpui thu hi vawi 3 a sawitir bawk a ni (p. 424). Hemi thleng hi Thomas Hardy-a thawnthu leh Khawlungi thawnthu inanna chin chu a ni.

Thomas Hardy-a thawnthuah chuan Tess-i chuan a pasal hmasa Angel Clare-an rilru na tak maia a kal bosan leh mai har chu a againgam ta lo va; in chhungah chuan a va lut a, a pasal neih thaor Alco-a, khurma la ñau shu chawhmeh channa cheunte kawmin a hrawkah, a thihpui ngei turin a zai a; a lo chhuak leh thuai a, Angel Clare-a chu a ûm ta nghal a. A va ûm phak chuan blim takin khawpui pawna thlâm rusakah an biru a, chuta an bihrauknaah chuan Tess-i hah lutuk chu Angel Clare-a malchungah a muhil a, chutih lai tak chuan police-in

an rawn hual a. Police an lo lan chuan Angel Clare-a chuan, "I tiharh rih lovang u, a hah êm mai a, tui takin muhil rih rawh se," a lo ti a. Anni pawh chuan remtihpuiin a harh hun chu an nghak ta a (p. 443).

Khawlzungi thawnthuah chuan Thanpari'n Biakmawia a hnar thâwm chu a pasal Lalhmingthanga chuan a lo hriatin aw vîn zetin khum aṭangin a rawn hrâwk a. Biakmawia kal hnuah a va thawha Pari tap zawih zawih a va hmuh phei chuan a thinur zual sauh va. Chemtêa vih a tum a, Pari hlau lutuk chu kailawnah a zuang thla dâwrh a, Biakmawia kha ûmin a tlan ta chiam mai a. Lala ûm tum chuan kailawn chu rap pelhin a thlu a, a chemtê chhip zum chuan a bânah a tai a, a thi ta zawih zawih mai a. A han intuam vel chhung chuan Pari chuan Biakmawia chu thaw hlawp hlawpin a han um pha a. Kein an kal zel a, lamlian bula thlâm ruakah chuan chawlh zai an rôl ta a. A hma zân khan mut a hmuh mang loh avangin Pari chuan, "Han muthilh lawk ka va duh êm!" a ti a; Biakmawia chuan a muthilhtir a, a lo vêng reng a. Chutih lai chuan Lalhmingthanga leh a thiante chuan thlâm chu an rawn hual a, an thâwmah chuan Pari chu a lo harh ta a. Pari chuan pasal dang a lo neih hman thu leh anmahni rawn ûmtute chu a pasal neih thar leh a thiante a ni tih a han hrilh chuan Biakmawia chu a ngawi ta reng a (p. 92).

Lalhmingthanga chuan Pari chu, "Uirenu," tia kovin hmusit leh diriam takin a ân khum a, "Tikhan iuirena-pa kha zui la, nang ang mi tenawmte chu a nei zui duh bik âwm si lo che a, i chawh dâwn teh a nih hi....!" tiin, a kalsan leh ta mai a.

Thomas Hardy-a thawnthuah chuan, Sapho rilru nena inhmeñ tur zâwngin, thil sual titu, pasal thattu Tess-i chu dâñin thiameñ loh a chantir a; diknaa rorel a nih lantir nan khaihlum a ni a; an khaihlum lai chu Tess-i nau nula leh Angel Clare-a chuan rilru na êm êm chungin an thlir a (p. 446). Khawlzungi thawnthuah erawh chuan Pari chu Lalhmingthanga'n a kalsan

hnu chuan Biakmawia chuan Aizawla hawnpuiah a sawm a, mahse Pari chuan inthlahrunna neiin a duh ngam chiah thei lo va, a hnial ta a. Aizawl lam pan motor a lo kal chuan Biakmawia chuan lo phar dingin chuan a lo dil a, Pari chu kawng lakah chuan a kalsan ta a.

Khawlkungi chuan a thawnthu tihtawp nan hian a ziak hun laiah Mizoten an sawi uar em em, mahse a tiba tih lamah erawh chuan a rah hmuh tur awm mang lo, Pathian thu leh piantharna lam kawng zawk tum ta ber angin Pari chu a sawi a; Biakmawian a kalsan ta si, chhungkhat pan tur mumal nei bawk si lo, Kolasib-a Pastor a hmel hriat hnen lam Pari chuan a pan ta ringawt mai a ni (p. 98).

A panna kawngah Thanpari chuan a rilru lo la pêng leh theitu a tâwk nge tâwk lo, Pastor hnen chu a thleng nge thleng lo tih leh, thlen a tum tak tak nge tum tak tak lo, tih te, lâwmna thurûk chu hmu tain leh sim hming pu tlâk rah neiin a awm ta nge awm ta chuang lo tih pawh hriat a ni ta lo a ni.

.....

HLA PAKHAT

KA RILRU TIBUAI THINTU

1. *Lêntupui kai vel leh romei chhûmin,
A bâwm kan Zoram mawi leh duhawm;
Awmhar tin kim dâwna han thlir vêlin,
A mawi zual Zofate kan lênnna.*

*Chung Pathianin min hualhim zêl rawh se,
Hawihkawm lenrual zawngte nêñ hianin;
Suihlung rualtea kan lênnna pâr mawi,
Vul reng rawh, ka pianna Zoram nuam.*

2. *Suihlung rual têa kan lênnna hun mawi,
Châm reng rawh, zamual chu liam lul suh;
Engtik nge Sappui nun ngai lo rêngin,
Ka nghâkhlel, kan lênnna hun tûr chu?*

He hla hi kan Mizo hlate zingah hian a lâr ber pâwl leh sak nuam ber pâwl niin ka ring thin a. Pachhunga College-ah zirtirtu hna kum 10 chuang ka thawh chhungin Fresher's Social leh inkhawm dang rêng rêngah he hla hian, hla dang zawng aiin programme-ah hmun a luah zing berin ka hria a. Hemi College Silver Jubilee lawmna inkhawm hnuhnung ber (May 26, 1984)-ah pawh he hla bawk hian hmun a chang leh nghe nghe a ni. He hla siamtu Rokunga hi Mizo thalaite hla sak tur petu, mi malah chuan amah tluka thalaite lungreal tak leh hlim taka zaitir theitu hi kan hla phuahtute zingah hian an awm lo vang. A hla thenkhatah chuan hnam dangte hmusit chuang lo leh thiana siam chung siin Rokunga hian Mizo rilruah impumkhatna leh ihmangaih tawnna tihngheh a tumzia kan hmu a. A hla thenkhatah erawh chuan Mizote hi hnam

dang lakah simkhur tur leh intēlruh tlat tura fuihnate pawh kan hmu bawk a; hnam dang a tihte chu, ‘*hriat loh chhingkhuala mi*’ ti tein a sawi a, zâwlaidi neitein a sawi a ni.

Rokunga hlate hi Patea hla te, Saihnuna hlate leh Kamlala hlate anga ngaihtuahna hlâwm khat puan chhuahna a ni ve lo va, khawtlâng nun leh politics boruak lêng velte hian a phuahtu hi chéttirin, phênglawng an tumtir mai zel niin a lang zawk a ni. He hla, *Lentupui kai vel* tih pawh hi hemi nun dârthlalang hi niin, he hla lâr taka thu sawite pawh hi a tâi darh hle a ni.

Eng lam thu sawina nge tih lo en ta ila : A châng khatna leh thunawn hian Mizoram mawizia leh nawmzia a sawi a. A châng hnihnaah hi chuan hnam fing zawkte leh nun sâng zawkte nun awhna thu kan hmu a, chu chuan, “Kan Zoram nuam leh duhawm,” hi a la nawm famkim lohzia a kâwk a. A châng thumna leh châng lina hian a phuah hun lai nun leh riiru a tarlang a, chu chu Indopui pahnihna, kum 1943 leh 1944 kum vel, Mizorama Japan râl hlauh lai hun kha a ni. Tichuan a châng thumna leh châng linaa duhthusam a sawinate hi tunah hian thil thleng kim tawh nge an nih la thleng kim lo tih i lo thlir teh ang :

3. *Tûnah dorâl lian chhûm ang zing mah se,
A la kiang ang hnam tin rûmna hi;
Hnam tin lungruat dâr ang lénna tûr ni,
A herchhuak ang chung Pathian zârah.*
4. *Dorâl lian chhûmpui zing a kian hun chuan,
Rual duh kan shen tâkte nén khânin;
Hlîm leh läwmin kan insuihkâwm leh ang,
Zoram nuam kram pianna ram ngeiah.*

Hêng hla châng hnihte hian a phuah lai huna “Zoram nuam” chu a nawm famkim loh dan a tarlang chiang hle a. Tichuan, he kan hla ngaihtuah mèk hi a pum puia thlirin a thu

ken chu, Mizoram mawizia leh nawmzia sawina leh a nawm famkim loh dan puan chhuahna a ni kan ti thei ang. Mizoram tana harsatna siarmtu chu kan hre ta, tichuan he hla hi kum 40 aia upa a lo nih tâk hnu hian Rokunga hian a phuah laia Mizote tân beiseina hma lam thil a lo thlirte kha lo thleng tain kan hria em tih hi zawhna pakhat awm thei chu a lo ni ta a ni. Chu lo lehah chuan a thute hi kan la tâwmpui thei thlapin kan tân beiseina hla a la ni reng thei tho vem tih pawh hi ngaihtuah tel tur a ni bawk. Tin, chu bâk lehah chuan he hla hi eng vanga la vawrh lâr hle nge kan nih, kan nun leh rilruah hian eng thu nge a la sawi? He hla hi hla kum hlun a tling em? tihte hi rilrua zawhna awm fo theite chu a ni.

Hêng thu zawnate hi ngaihtuah chik tak chunga kan chhân dawn chuan harsatna a awm tlat a, chhânnna fel leh dik pawh pêk a harsa hle a ni. Hla tling kan tihte hi mihring rilru leh nun huapzo, a dikna leh a thuchah ken pawh ni leh thla leh kumten an tih hlui theih lohte hi a ni thin. Chutiang hlate chu mihring tawng hrang hranga puan chhuah ni thin mah se, a awmze tlukpuin tawng danga lehlin theih a nih chuan, mihring nun a khawih dan a dang chuang lo.

Amaherawhchu hemi tuna kan hla sawi hi chu kan sak apiangin ka rilru hian âr bo a zawng thin hian ka hria. Châng khatna leh a thunawn han sak hi chuan Mizoram nuam tihna leh inngaihtuah lungawina, rilru thar min neihtir leh thin a. Ngaihuatnain Mizoram dung leh vâng hi min fantir thin a; kan sakna hmun atanga rilru thlawh chhuahfirin, Phawngpui tlâng te, Chawngleripuanthin tlâng te, Champhai zawl te, Hmuifang tlâng te, Mawnrâng tlâng te, Lurh leh Tân tlângte leh Mat leh Tuichâng luite kan rilru mitin a hmu nghal thin a. America ramah lehkha ka zir laia rilru taka ka sak ve theih loh *America the Beautiful* tih hla a,

*God shed His grace on thee
From sea to shining sea*

tih laite ka ngaihtuah chhuak a; Mizoram mawizia sawi nan hian *from hills to shining hills* tih hi a rem ve ang em aw? titein ka lo ngaihtuah hman thin. Hla kan sak rēng rēng hian kan sakna hmun chēp tak atang hian, a hla innghahna ram, a zau zawng tiām chin nei lo ram chu, ngaihruatnain kan fang vēl thin a ni.

Kan sawi tawh angin he kan hla ngaihtuah lai hi, a châng hnihna chu, hmasawnna kawng zawh tura fuihna thu a ni a. “*Eng tik nge Sappui nun ngai lo réngin/Ka nghakhlel kan lēnna hun tur chu?*” tih angte hi chu fuihna thu, tum sâng tur leh tum ruhna nei tura chona (rhetorical question) a ni a. Han sak lai pawhin rilru min neihtir leh thin.

Heta ṭang hian he hla hian ram dang daihah min zintir ta a, Indopui pahnihna hun laia mi rilru chi-ai, lunggaih leh rûmnna ramah khan. Indopui lai hre phâk lo chu sawi loh, tun hnai kan ram buai kum pawha la piang hman lote tân chuan he hlaa a tiāngkawrnna hi ngaihruat thiam theih pawh a ni lo vang. Chuvangin, “*Tunah doral lian chhûm ang zîng mah se, a la kiang ang hnam tir rûmna hi,*” han tih ṭan tâk maite hi a râpthlâk ta êm êm mai a; a phuah chhan, kum 1943 vela khawvela thil thleng, hriat loh chuan, “Eng lam thu nge kan sak tâk hi?” tih loh rual a ni lo. Inhrilh hriat chian hnua inngaihtuah thînrim phei chuan, “Tu nge Indopui chu chawk chhuak?” “Mizo tiangväl eng zât nge râl ram pana liam?” “Tun thleng pawh hian an lo la haw na cheu nge?” tih zawhna pawh rilruah a lo chhuak thei a ni.

He hla phuah hun laia Mizoram chhûnga mite insingsak dante chu Khawlkhangi thawnthu *Zawipala Thlan Tlang*-ah kan hmu a; Nula Vanlairemi te, Biakkungite leh nu leh pa tam tak leh mi dangte pawhin indo reh hun ciu an nghahhlelh êm êm lai a ni a. Hla phuah hian ‘*hnam tin rûmna*’ a tih arigin America ram Vanlairemi te, British nula Lalkhawthangite pawh rilru hah taka an awmlai a ni a; Germany leh Japan

rama mite pawh an bâng bik lo. Hetia Indopui boruakin Mizoram a tuam lai hian beiseina leh inhinemna awm chhun chu indo reha hlimna ni lawmawm lo thleng tur chu a ni. Chu chu châng thumna hian a sawi a; chu thu bawk chu châng lina hian a sawi nawn leh mai a ni. Tichuan, a bul lam leh a tawp lam kan thlirin he hlaah hian kan Zoram hmêl êng lai leh, thimin a khuh lai hmêl kan hmu ta a ni. Châng khatnaah “*Léntupui kai vêl leh romei chhûmin*” a bawm chiai lai kan hmu a; a châng thumna leh châng tawp rak thlengin, “*Doral lian chhûmpui zing, hnam tin rûmna*” tlentu chuan a bâwm lûk ta si a. A thehvenna thu a lan tel tâk si loh avangin, âwkin ni a lem zo vek a, a la chhâk chhuak leh si lo lai ang hian, he hlaah hian Zoram mawi leh duhawm hi âwkin a lem lai kan hmu ta a ni. *Renaissance* hun laia lem ziak thiam Michelangelo emaw Leonardo da Vinci emaw khan, hetih hun lai, âwkin Zoram a lem lai thla hi lian pui maiin han ziak ta sela a hmu a hrehawm duh hle ang. Han ngaihtuah chian phei chuan hetih hun lai Mizoram dinhmun hi hlaa la sak la sak chi em ni ang? tih hial tur a ni.

Amaherawhchu hetianga a tlângkawmna thu siam tak mai chu, he hla lâr tak leh sak nuam tak si en hian, a lainatawm hle si a ni. Chuvangin engti kawngin nge he hla hi kan chhan (defend) theih ang tih hi kan ngaihtuah tur chu a lo ni ta a ni.

Hnial rual loh leh phat rual lohvin Rokunga hian a taka thil lo thleng (historical events), a lo thlen kumte pawh hriat leh sawi theih (dated events) te chu he hla châng hnuhnung pahnihah hian a lo sawi ngei a ni. Chuti chu a nih avangin, a nihna takah chuan, a phuah hun lai leh nun boruak hip pha ve lote nunah chuan he hla hian thu sawi a nei ve lo va; chung mite tan chuan “hla” a tling thei bawk lo a ni. An sak pawhin ri mawi leh thlûk mawi (musical composition) an tichhuak mai chauh a ni. Tichuan he hla hi mihring nunah a dikna a lan reng theihna tur te, hun leh kumte hian a thu kente hi

an la tihhlui lohzia te leh, hla kumhluna kan lo pawm theihna tur chuan a thuchahte hi engti kawngin nge kan thlir tâk ang le?

Kan hriat tur pakhat chu *poet* kan tihte thu phuh chhuahah pawh hian hrilhlâwkna aw (prophetic voice) a tel fo thin. Hetiang aw hi khawvel literature zawng-zawngah a awm vek a ni. Tin, hla phuahtute hi, hun kal tawhahte leh hun kal mëkahte hian lêng kawp theiin, anmahni pawhin, an hriat loh hlânin, an hlaahte hian hun lo kal zêlah pawh dikna nei thei tur, thu awmze nei an lo zep tel fo thin a ni. Hla an siamin an hmanrua chu hla thu (poetical words) emaw, tawng upa emaw chauh a ni kher thin lo bawk. Mihring tawng leh thu mal, an riiru leh ngaihtuahna hlâwm phawk leh aiawh zo hman tur an hmuit theih loh chuan hinanraw thar an nei thin. T.S. Eliot chuan chutiang hmanrua chu “*objective correlative*” tiin a sawi a, Rokunga’n mi la sawi ngai loh dän anga Mizoram mawizia a sawina “*chhawrpial rûn i iang e*” a tihte pawh hi hetiang chi hi a ni kán ti thei ang.

Chutiang bawkin kum 40 aia tam kal taa Rokunga’n “*dor39_l_lîan chhûmpui zing, hnam tin rûmna*” a lo tih hi literature-a “*objective correlative*” anga pawm theih chuan harsatna kan nei tawh lo ang a, a anpui chiah, kan tun lai huna kan nun (social and moral life) tichéptu leh tihrehawmtua puh theih tûr pawh kan hre thei mai ang. Keini thangthar hunah chuan kan ram tuamta’boruak tha lo, phûng leh sakei aia hlauhawm zawk thil chi hrang hrang, thalai nun suattu, ruih hlo leb netne hlauhawm, chhungkua leh shian min inthenirtu leh kan retheih phahna te, râlpitnate leh hûsânnâ thlen thintute hi, kan ‘*dor39_lîan*’ tiin kan sawi thei dawn ta a ni. Chutichuan he hla hian awmze thar leb thuchath thar a lo nei ang a, “*dor39_lîan*” chei engpawh mihring aun tichépta leh tizalén lotu, mihring hñóelma ti pawhin kan sawi thei ang. Mihring hian hñóelma chi hñóelma kan nei a, chi khát chei mita kmuk theih a ni

a, chi khat chu mita hmuh theih loh chi. Chi khat chu tharum thawha beih chi, chi khat chu tharum thawh lo va beih chi. Mihring kan nih chhûng zawng heng hmêlma chi hnîhte hi kan hneh famkim ta tih ni hi kan nei ngai dawn rêng rêng lo va. Harsatna eng chi emaw chu tâwk reng chungin hun kal tawhte ngaih châng kan nei reng dawn a. Chuti chung bawk chuan kan hmuh tak tak ngai loh tur chu beiseinain -

*Hnam tin lungrial dâr ang lênnna tûr ni,
A her chhuak ang chung Pathian zârah*

tih hi, kan duhthusâm chham chhuahna, kan kumkhaw hla tur chu a ni reng mai dawn a ni.

*Hope springs eternal in the human breast,
Man never is, but always to be blest.*

-Alexander Pope

R.L. KAMLALA KUT CHHUAK

*Chu ram mawia han lêngte zawng,
Khuavel nun hnutiang chhawnin,
An zua chung Pathian rûn an lûm,
An lwaithli a far ngai lo.*

*Fiara tui ang an thiang kim ngei;
An sakhmel a vul reng e;
Chung turni a sa an tuar lo,
Duh te'n tualah an lêng thin.*

R.L. Kâmlala hla châng khat heta kan han târlan hian a hla phuah dân ze-pui leh hla phuahtir thintu, a ngaihtuahna leh a rilru luah reng thin chu a tilang a; Fiara tui awmna rama chêngte hian kan nunphung leh ngaihruat thiam dân atanga Vanram kan beisei thin hi kan hla thu mawi taka a han sawi chhuah theih avâng hian Vanram pawh hi a Mizo reih a ni.

Mizote hi Kristian kan lo nih hnu hian kan Mizo tawng leh hla thu ngei hmanga Pathian hla lo siam hmasa ber chu Patea nia hriat a ni a, a dawttu chu C.Z. Huala a ni a, a pathumna chu R.L. Kamlala hi a ni. Hêng kan hla siamtu hmasaten kan Mizo hla thiük leh thute hmanga Pathian fakna hla an lo phuah hmaa kan hla neihte chu Sapho phuah leh a thiük siam sa, kan tawnga lehlin chawp a ni thin a. Amaherawbchu Mizo rilru leh ngaihtuahna hmanga kan Mizo hla phuah thiam hmasaten kan hla thu ngeia Pathian hla an lo siamte hi chuan kan rilru a hneh dân hi a dang hlein a sak pawh nuam kan lo ti bik hle a ni.

C.Z. Huala chuan hêng anni pathum, Mizo tawnga Pathian hla phuah hmasa bertute zingah hian Kamlala hi chu

hla phuah thiam taktak (born poet) an tih ang hi niin a hria a¹. Pastor Liangkhaia pawhin Kamlala hlate hi a duh êm êm mai a, a ngaihsânzia a sawinaah pawh, “Hêng kan hla phuahtute zingah hian Kamlala hian thilpêk chu a dawng zual a ang,” a ti ve bawk². Thanpui Pa pawhin, “Ka hla Duhzâwng,” a tihte zingah leh hla sak nuam leh thu kalhmang (flow) tha tia a sawi thinte entir nân Kamlala hla châng khat,

*Tunah a thar hmangaihna êng nuamah,
Kan Lalpa hmun ropui;
Lawmna pangpar rimbui a vul - tah chuan,
A chul leh tawh lo vang*

tih hi a thlang chhuak a, “A chhiara han chhiar ngawt pawhin hnâng tah thiam kutchhuak ang maiin a dakin a dak thlarh mai a ni,” tiin a sawi bawk.³

C.Z. Huala pawhin Kamlala thih (May 25, 1965) hnu lawkah a chanchin Mizo Zirlai Pâwl Chanchin Buah a ziakin hetiang hian Kristian hla phuah kan lo chin tan dän a sawi : “Kristian hla thar phuah rêng rêng hi, ka hriat dän a dik chuan, kum 1922 vêla kan chin tan hi a ni a. A hma chuan Sâp hla atanga kan lehlin a ni ber a. Kei chuan, ‘Ram ropui chu ka thlen hun chuan,’ tih hi ka letling a. Kamlala’n, ‘Lui râl ram nuamah,’ tih hi a letling bawk a. Chutia hla kan lehlin lai chuan, Patea’n ‘Ka ropuina leh ka himna hmun’ tih hi a han phuah a. Miin an duh êm êm a, chuvangin ‘Lei lal puan ropui chu a tlawm ang’ tih hi ka siam ve ta a. Tah chuan Kamlala’n ‘Rinin thlir thiam ila’ tih hi a rawn phuah ta a. Chumi kum

-
1. C.Z.Huala, *Mizo Hla Phuahtute* : Thu leh Hla, March, 1979 phek 13-na.
 2. Pastor Liangkhaia, *Mizoram chhim leh Hmar Kohhran Mizo Missionary-te leh Hla Phuahtu hmasate* (Buatsaihtu - Upa V. Hawla) phek 8-na.
 3. Thanpui Pa, *Ka Hla Duhzâwng* : Thu leh Hla, June, 1978 phek 6-na.

vêk chu niin ka hria, Good Friday lai vêlin, 'Tuna a thar hmangaihna êng nuamah' tih hi a han siam leh a, chu zet chuan ram a dêng chhuak nasa a ni," tiin a sawi.¹

Hêng ațangte hian Kamlala hi Kristian hla kan tawnga siam chhuaktute zinga mi, hla ȳha leh lâr ng het tûr siamtu a ni tih kan hmu a ni.

Kamlala hi mi thil chik mi tak, a hla phuahte pawh fel tak leh chiang taka vawng ȳha dîm diam mi, a kutchhuak ang chiaha miten an chhuah duh dâwn loh phei chuan, "Lalpain mi kawltir ve hlate hi chu chhuah tel ve lo law law se ka duh zawk," ti hial khawpa ngaihdân sawi chhuak ngam a ni a. Hla Thar Bu-ah a hla an chhuah dawn pawhin turman an rawn âwm rēng a hriat loh thu sawiin, "Ka hnem ațanga chhuak ve hlate hi a dik leh dik loh hre hauh lovin, an hriat angin an chhu mai ni âwmin ka hria, a dik lo a tam êm êm. Hlate hi mi hnem chuan an serhin an zah êm êm a, a phuahtute rawn lo leh an phalna hmu hmasa tê tê lo phei chuan a bu siam emaw, chanchin bua chhuah emaw, tihdanglam emaw chu an ngam ngai lo tih ka hria," tiin, a phuah loh anga miin an chhuah a hmuh ȳhin chuan a ritru a tihnatzia a sawi chhuak nghe nghe a. Kristian hla kan Mizo hla phuahtute hnem ațanga kan lo neihte hi Sap hla Mizo tawnga lehlin chhawn lehte aiin ngaihnep tur a nih chuan lohzia a sawinaah pawh, "A chhandamna hla, Saphote phuahtirtu Pathian bawk kha a ni, Mizote phuahtirtu pawh hi," tiin a sawi. ngâhl bawk a ni.²

Kan bla thute hi Pathian hla phuah nân tim miah lo va hman tur a nihzia leh chutianga phuah chu kan ritru leh ngaihtuhma nân pawh a inrem turzia Pastor Liangkhiai pawh

1. C.Z.Huala, *Hla Phuah Thiam Pu R.L.Kamlala* : M.Z.P. Chanchin Bu, July 1965 phek 5-na
2. R.L.Kamlala, *Editor hnena lehtha thawn* : Tunlai, March, 1962.

khân a swi uar hle thin : "Kan Kristian hla hi a siam hmasatu missionary-te khân Mizovin hla thu bik an nei tih hre lovin thu pangngai (prose) mai mai hi a thiûk remin hla angin an ziak a, kan sa ta mai a. Tuna keini upaho, Mizo hmasate lah khan Pathian lam hla chu heti tur rêng hi a ni kan ti a, kan hla thu pangngai chu khawvel zai emaw kan ti ta a,

Chutah romei a kai vela,

Vanco thianghlimte zai vawrna chu

tihte pawh kha an sa hreh hle mai a; chu chu kan lo dik lo a ni tih tûnah chuan kan hre tawh hlawm âwm e. Kan hla thu, kan hla țawng thlum tak mai khân Kalvari-te phuah ila, Lal Isua leh a hmangaihnate phuah ila, kan hla chu a țha zâwk êm êm ang tih a rinawm ta a ni. Kan Hla Thar Bua Kamlala hlate kha chu a țha tawh hle hlawm mai," tiin a sawi¹.

Kamlala hian a hla phuahte chu a lo vawn that zel avâng leh a bua chhuah theih hunte pawh a la awm ngei ang tihna rilru nei râna a thuhmahruaite nen lam a lo ziak diam avângin, a duh ang leh a kutchhuak ang ngeiin, hawrawp pakhat pawh tidanglam lovin kan chhuah thei a ni.

Kamlala hian a hla phuahte hi chi hnihad a țhen a, 'Kristian hla' leh 'Mihrinna hla' tiin a vuah hrang a. 'Mihrinna hla' a tihte hi a mihring mihrinna rilru leh ngaihtuahna hmanga a inpuan chhuahna, a tuina lam thil, zalêna taka a phuahna a nih avângin 'Ka hla chuam' tiin a sawi nghe nghe a ni. Kristian hla țhenhatte hi chu Râlte țawnga phuah hmasak, Mizo țawnga a lehlin lehte a ni bawk.

Kristian hla a phuah vâng lai tak hian a rilru kaihruaitu ber pakhat chu a phuah hun laia kan Mizo Kristian Hla Bu leh Sankey Bu kan tih (Sacred Songs

1. Rev. Liangkhiaia, *Hla Thu* : M.Z.P. Chanchin Bu June 1973 phek 8-na.

and Solos, compiled by Ira D. Sankey) te hi niin a lang. Ama kut ziakah phei chuan a hla phuahte rēng rēng hi Sap tawngin a thu tlāngpui (title) a dah vek zēl a. Tunah erawh hi chuan tunlaia kan rilru rem ang zāwng leh chin dan dung zuuin a hla thar hmasa ber zēlte hi a hla tlāngpuiah dahin, a thu tlāngpui Sap tawng a lo hman thin hi chu a hnuaih kan dah ta zēl zāwk a ni. A kut chhuak kan han ena thil pakhat a hman uar êm êm thin kan hmuu chu hawrawp pui a ni. Thil engpawh, van lam thil emaw, Pathian laka chhuak, Pathian nihna leh a ze pui emaw sawi lan nân hian hawrawp pui hi hman tūlin a hre tlat thin niin a lang.

*Bel nang Siamtu Laldāng sirah,
Kan awi dawn A rūn nuamah.
Ka dawnin a ngaiin ka tap,
Lung duh zawngte an kimna;
An nghâk rauthla lêng an kim tur,
Aw, nun thing a zâr hnuaih.*

Hla rēng rēng hi a lo chhuahna bul chu lāwmna emaw, lungngaihna emaw a ni châwk thin a; lāwmna ai mahin lungngaihna emaw, khawharna emaw hian hla hi a tichhuak tam zāwk fo thin. English poet Shelley a pawhin, "Kan hla sak tui ber berte chu lungngaihna lam hlate a ni thin," tiin a sawi a¹. Kamlala hlate pawh hi chutiang bawk chu a ni. A tan chuan a khawvel nun chhung chu lungngaihna hlir, lungngaihna hlir a ni a, "Ani chu lungngaihnate nei mi leh natna hre mi a ni"² tih thu hi a nunah hian bel theih tur a ni. English novelist pakhat Thomas Hardy-a pawhin, "Lawmna hi zawng, he khawvel, natna leh hrehawm tuarna ramah hian a châng châng lo lang ve zauh thin chauh a ni e,"³ a tih angin,

1. Shelley, P.B. *To a skylark*

2. Isaia 53:3

3. Hardy, Thomas: *The Mayor of Casterbridge* Macmillan & Co., London 1960 p. 383.

Kamlala nunah pawh hian hlaa han chantir tur, hlimna leh lâwmna a thleng khât hle a, a thlen chhun pawhin a châm rei lo hle ঁthin,

*Awmhar thinlai i hnêm,
Lâwmna, mual liam lul suh;
Kan awi ang che zai tinrêngin,
Kan vuan che - aw ding rawh.

Lâwmna, lâwmna, nang chauh,
Kan au kan au vang che*

tiin, a tân chuan auh lawm lawm a ngai ঁthin a ni. A chênnna hmun chu lâwmna ni êngin a chhun ngai loh, lungngaihna chhûm hnuai, lei hrehawm hmun reh tak a ni a;

*Leiah hmun nuam ka tan vâng nã,
Hrehawm tuara ka fahna chauh,*

a tihna hmun aṭang chuan, a hlate hi a beiseina leh inhnemna, a lungngaihna leh manganna hneh theihna túra chakna leh hmanraw neih chhun a ni. Chuvângin Kamlala hi hla phuah lo thei lo dinhmuna ding a ni. He Kamlala beiseina hi Kristante beiseina, khawvel mite han ngaiantuah dân pângngaiah mai chuan beisei tur âwm awm lo hi a ni a, mahse Abrahama anga 'khua lungphûmte nei mi, Pathian rôlbâwl leh siam chu,' rinna leh beiseinaa thlir tlat ঁhintu a ni. He Kamlala beiseina hi Rûn dung aia sei, ringtu zawng zawngina neih theih, politics leh khawvel ramri siam chawp chunga lêng a ni. He beiseina neih hi leiah hian mikhual leh châm rei mai nih inhriat phahna a lo ni bawk :

*Leiah riangin hmun nei lovin,
Thlaler hrehawm hrût vel ila;
Ka chawl ngei ang luipui kamah,
Lalpan ka tan a buatsaih e.*

Kamlala hi hla phuah thiam chauh ni lovin, Mizo җawng

pawh hmang daihzai thiam êm êm, Pathian thu ril leh thûk, a chatuan remruat, khawvel awm chhung zawng sermon thiamten an sermon sên loh tur leh sawi fiah tawk hleih theih loh tur, Genesis atanga Thupuan thleng thu laimu pawh thu tlêm te hmanga kheh chhuak thiam a ni :

*Aw, min hrilh rawh Thûkna ropui,
Ran thlêng leh thing ânchhe dawng leh
Vana lallukhum a inzawm,
Lei Eden leh Salem Thar nen.*

He hla châng hi Patea chuan a lo hriatin mak leh ropui a titħlu a ni ang, "Umm, hei hian hla zawng zawng a phuah zo ta, phuah tur kan nei ve ta lo!"¹ a ti hial a ni.

An chēnna ram leh khawtlâng boruak, an ɻawng hman leh nunphung te inthuhmun lo mah se, mihring tung-chhova kal zawng zinga hla phuah thiam, ngaihtuahna zau leh sâng ber ber nei mi, Italy rama Dante-a te, England-a John Milton-a te, Mizorama R.L. Kamlala te hi thuchah angkhat nei, an puan chhuahna ɻawng hman theuhte pawh tihausaa, mihring nun awmzia pawh hi a thara sawi chhuaktute an ni.

Dante-a chu Italy ram Florence khuaa piang, hun tha lo tak a lo thlen avâṅga hna pawirmawh tak, rorēltu a nihna atanga bân leh a qwmna khua atanga hnawhchhuah a ni a. Riltâm leh tuihâlin a pianna ram ngeiah chuan chaw khawnin a vâkvai ta a, "Ka kawng chu a va hrehawm êm! - *Come e duro calle* -" a ti thin a ni. Chutia a vahyâihna leh hrehawm tuarna atang chuan he khawvél piaha hlimna a chan tûr chu a lo hmuh chian phah ta a. Italian *literature-a poetry* ropui ber tling *Divine Comedy* tih hi a lô ziak ta a ni. Milton-a pawh mi thiam leh chhiar zau, a ngalîrpatnain vantirikohé pawh chiang taka hmua mihringte hriat thiam theih tur ang zâwngâ an dinhmun leh rilru turté pawh hiaa phuah thiam a ni. Ani pawh politics

1. *C. Chinaburra, Zoram Thupuan*, May, 1963, phék 1-na

avângin England-ah pawl leh pawl inepna leh tualchhung indona hial a lo thlen chuan a nun a chêp êm êm mai a. Chu chauh chu ni lovin kum 44 a nihin kum 1652-ah a mit a del hmiah lehnghâl a; chuti chung chuan man leh khai hlum hlau rêng rêngin a biru thin a. A middel tawh hnua a thu leh hla siamte pawh sawrkarin an hâl sak a, amah pawh man leh tântir a ni. Amaherawhchu a nun tâwp lamah leh khua a hmuu theih tawh miah loh hnuah pawh English *literature-a poetry* ropui leh ngaihsân hlawh ber berte zinga chhiar reng thin, *Paradise Lost* leh *Paradise Regained* te hi a phuah a ni.

Kamlala pawh hi a hun laia roreltute hriat thiam lohva awmin lung in hiala khung tâwk a ni a; mahse a rilru leh ngaihtuahnate chu khuakhirh emaw, tântir theih emaw pawh a nih loh avangin mi â anga ngaih leh rîlbâwl a nih laia a thu phuhchhuahte hi kan en chuan mi harhfim leh mi fing, Zofate tâna duhthusâm tûr la hre tlat a ni tih kan hmu a ni :

*Zawl khaw per pui, I thuam laiah,
Hnam tin Kulhpui lo rem chu;
Lallur-pan a rûn a sawn e.*

*Duh te'n hrailêng a awihna,
Duh te'n hrailêng a awihna.*

*'Suihlung a mawl' tihin ram tin,
Duh leh thang luai luai rawh i;
Khua lian valin an hai lêm lo.*

*Ka vui ngai lo-Lalkhum-pa,
Ka vui ngai lo-Lalkhum-pa.*

*Hremhmun Vankhua chang se, kan ti,
A riang nau fa Rêng chang rawh,
A riang nau fa Rêng chang rawh.*

Milton-an Sap ɣawng chauh ni lovin Latin ɣawng pawha hla a phuah thei ang bawkin, Kamlala hian Mizo ɣawng bâkah

Râlte jawng pawhin hla a phuah thiamte leh, mi thiam chung chuang deuhte chauhvina an khawih ngam, Sap jawng Bible atanjin *Jeremia Tah Hla* leh *Hlate Hla* Mizo jawnga a lo letling thei maite hian mi thiam leh ngaihtuahna zau tak nei mi a nihzia a tilang a. Milton-a hla ropui *Paradise Lost* leh *Paradise Regained* thu laimu pawh hi, Mizo jawnga hla châng khat a phuah,

*Awmînhriihrawh thûknaropü,
Ran thlêng leh thing ânchhe dawng leh
Vana Lallukkum a inzawm,
Lei Eden leh Salem thar nen.*

a han tihte hian a fûn khâwm hmêl hle mai. A lehkhabu (*note book*) hiui tak pakhatah pawh Mizo jawnga lehlin kan la neih loh, Martin Luther-a hla phuah “*A Mighty Fortress*” (R. Sankey, No.2) hi a Sap jawngin a châng tluanin a solfa nén a ziak chhuak vek a, a tawpah chuan Sap jawng vêkin, “*I like this song very much*” (- He hla hi ka duh ngawt mai -) tiin a ziak a. Hei pawh hian tun lai mi, lehkha thiam tam takte pawhin kan lo ngaihnat phâk loh leh hla ropui si, kan lo hriat lâr mang lohte pawh a awmze thûkzia hriain kum tam tak ral taah khân a lo tuipui phâk daih tawh a ni tih a tilang bawk a ni.

A thu ziak dang *Pialral Zawn Thu* leh *Thlarau Entlang* te hi John Bunyan-a ziak *Kristian Van Ram Kawng Zawh Thu* leh *Khawngathna Tam* (Grace Abounding) tihte nen thu inunau an ni a. Heng a thu ziak pahnih *Pialral Zawn Thu* leh *Thlarau Entlang* te hi Mizopa riiru leh dinhmun atanjin Van ram thlirna leh a kawng zawnna a ni kan ti thei ang. Sâm hla phuahtu ang bawkin Kamala hian Pathian thil siam tinréng leh a siam chhante hi mak tiin a ngaihtuah a; a thiük nei leh châng nei pangngai ang chi ni lo, “*Eng tin nge?*” tiin a phuah hian a ngaihtuahna kal thuizia a tilang a. *Kan Lal Ieuau Pa hmangathna nasatzia tihlan*

nan tehkhin thua fapa tlân bo thu a sawi, Bible-a thu lâr berte zinga chhiar tel thin, hla sak nuam tak -

*Sualin bosan mah ila,
A thatna chuai ngai lo;
Inchhîra ka zawn leh chuan
A zâr ka zo leh ang...*

ringtu tupawh, a chânga hnung tawlh leh thin, a chânga kawng dik pan leh thinten mahni nun theuhva kan inbel theih tura a han phuahte hi hla chuai thei lo tur a ni. Kan Mizo hla siamtute hi arsi ahte khian chang ta ang sela, Kamlala hian êng ber pâwl a ni ngei ang. Vaivut maia siam, a taksa phûmna, tlân khawro chu a lo chênnâ thin Bualpui khuua hmun reh takah a awm a; mahse chu chu a awm hlenna tûr a ni lo.

*Khawvelin a hliam hnute zawng,
Puan var sinin an leng ta a;
An rûmna leh hring nun a reh,
Angelte dung an thûl.*

.....

THIL NUNG PATHUM

Patea * Saihnuna * R.L. Kamlala

Kan Mizo hla siamtu pathum, Patea, Saihnuna leh R.L. Kamlala te hla hi ngun taka kan thlir chuan an nun ram leh rilru put dante hian zepui chí hrang theuh neiin kan hmu a ni.

Mizote hi Kristian kan lo nih hnua kan Mizo tawng leh hla thute ngei hmanga Pathian hla lo siam hmasa bertute zinga mi chu Patea a ni a, Khawbung khuaa sei lian a ni. A lo puitlin hnuaah Burma ramahte han pêmin, kum eng emaw zat a han awm hnuaah Mizoramah lo lêt thla lehin, Reiêkah te pawh a awm tawh a; a chên tâwpna Samthang khuaah a lo boral ta a ni.

Saihnuna hi Lêng lal a ni a; a pa Pazika, Khawhri lal, in 400 vel lai neia awm chu, Vai lianin a khua an hâlsak a an tihdarhsak avangin, hmar lam pana kalin a khuate in 60 vel nen Thiakah awm hmun an khuar a. Chuta an awm lai chuan Saihnuna hi a lo piang a. A pian hnu chuan a pa chu chhim lamah a khuate nen an lêt leh a, Khuangthingah an awm chho va; chuta tang chuan Lêng khuaah an awm hlen ta a ni.

R.L. Kamlala hi chu Kawnpuí lal Saitulera u Lützathanga fapa upa ber, Ngûrlêñ khuaa piang a ni a; a lehkha zir hum laia Mizorama zir theih sâng ber Middle English, zirtirtu hna thawk chunga pass a ni a. Pathian Thlarauva danglanna nasa tak a neih avanga zirtirna hna pawh thawk tha hlei thei lova bânsan ta a ni.

Heng kan hla siamtu pathumte hian he khawvel mihring nun an lo hman dan leh, ngaihrauatna leh beiseinaa ram lo la awm tur an thlir dan hi a inang lo theuh mai. Patea hi chuan retheih, buai leh manganna kârah a hlimawm thei ang berin

thil a thlir a. Saihnûna chuan a tuipui ber ȝhin chu a ȝahpui reng thung a, a hlate hi ȝah hla deuh hlir a ni a. R.L. Kamlala erawh hi chu, a hla atangte hian, hlimna leh lawmna chang ngai lo, hliam tuar reng a ni tih kan hmu a ni.

Patea hi amah hriat rengna lung, Samthang kawtchhuaha an phunah chuan, "Hla 55 a siam a, Mizoramah siam hmasa ber a ni," tia ziah a ni a. A hla phuah zinga a ropui ber leh thûk ber nia ngaih,

*Aw Lalpa Davida leh a thlah Arsi,
I felna ram atan nangin min buatsaih,*

tih, tlar hniih hi, a lungah chuan ziak chhuah a ni bawk. He hlaah hian a rilru put dan leh a hla phuah pum puiina puan chhuah a tum hi a phawk chhuakin a khaikhawm fel hlein a lang a, a hla laimu tih theih hial tur a ni. A hlimawm thei ang bera thil thlir mi a nih avangin, Patea hian he hlaah hian,

*Ka lawmna tuifinriat angin a liam a,
Thih lui kamah zaiin i hming ka fak ang.*

a ti thei a ni. He hla tlar hniiha thu awmte hi mihringte ngaihtuah dan chuan thu inhal leh inkalh tak, mihringte tlin phâk rual loh tih hial tur a ni. Mizo Kristian hlain a chîm sânnna lai ber a ni kan ti thei ang. Hei aia chîm sâng leh tur chuang hi hla kan la nei thei ang em le? B. Lalthangiana, Patea hla ziak chhuaktu leh 55 zinga 54 zirtu pawhin, "He hla chauh pawh hi lo phuah se, Zofate tan chuan malsawmna a tling rêng rêng a ni, ti ve ta ila kan uar lutuk a ni dawn em ni?" a ti hial a ni. He hla châng Patea rinna nun puanchhuahna (testimony) hian mi tam tak num a khawih a ni.

Patea hian lungngaihna leh thihna ramah hian a hlimawm thei ang ber zâwngin thil a thlir reng thei chauh a ni lovin, thil rêng rêng hi a hmu pâr vek emaw tih tur a ni. A hlaahte hian hmun 40-ah 'pâr' tih hi kan hmu a, chungte chu,

'Lawmna pâr' te, 'Bethlehem pâr' te, 'Kalvari pâr' te, 'Lalna ram pangpâr' te, 'Eden pangpâr mawi rim tui' te, 'Saron pâr leh Lili pâr' te, 'Zion lili pâr' te, 'Lei pangpâr' te, 'Nunna pâr mawi' te, 'Van pangpâr' te, 'Kanaan pangpâr' te, 'Kum thar pangpâr' te, 'Lal nunnêm pâr' te, 'Lal pian hun pangpâr' te, 'Zion pâr mawi' te, 'Lalna pâr mawi' leh pâr dang, chi mawi tak tak a ni a. A hla hi pangpâr huan ang a ni a, heng pâr chi hrang hrangte hi a vulin a vul chêk reng a ni. Heng pâr mawi chi hrang hrang bâkah hian thil êng mawi chi hrang hrang hmuh tur a la awm bawk a; chungte chu, 'ropuina êng zâm vél' te, 'chhûn arsi êng' te, 'hruaitu chhûm ding leh êng ropui' te, 'pialral ni êng mawi' te, 'Bethlehem arsi êng' te, 'Kalvari kawngkhar êng' te, 'Lung mawi chatuana êng reng tur' te leh 'Lunghlu kawngkhar êng' te pawh a ni a. A rilru lênnna ram chu 'chatuan thlifim lênnna' a ni bawk a, 'tlai ni tla êng' pawhin 'lenkâwl a khûm riai' a ni.

Patea hi hnuai lam emaw lei lam emaw en ngai lo va, chung lam hlir thlir thin mi a ni bawk. Chung lam a han thlir chhoh chuan 'Bethlehem tlâng vul' te, 'Israel tlâng thianghlim' te, 'Kalvari tlâng' te, 'Lung tilêng tlâng' te leh, tuma la sawi ngai loh leh hmuh ngai loh, 'lawng chawlhna tlâng thianghlim' te a han hmu a. A han thlir chhoh zela a hmuh lehte chu arsi chi hrang hrang a ni. Tichuan a hlaahte hian arsi an de chiai mai bawk a, chungte chuan hming an nei vek bawk a, 'hruaitu arsi' te, 'chatuan arsi' te, 'Jakoba arsi mawi' te, 'chatuan arsi Varparh arsi êng mawi' te, 'Lal Davida Thlah arsi' te, 'van arsi' te a ni, Hnai deuh leh hla taka thil awmte pawh hmuh theihna thlarau entlang a nei a, 'arsi piah ram' te pawh a hmu thei bawk; a châng chuan,

*Thai tha ônga ka Lal hnel leh
Rauhla wong khua a lang*

tüm, a thil hmuh chu minh leh a ni. Patea hla anga uai lo va

pangpârte an vul rengna leh êng mawi chi hrang hrang leh arsi tamna hi, tu hlaah mah, eng hlaah mah, kan hmu lo vang. A hla hian a hmuh anga chianga hmu ve thei tak tak lote rilru leh nun pawh a tihlimin a tinung a; a hla boruak rimbui kan han hîp þan phat hian ram zau tak leh mawi takah kan lêng vel nghal thei a, mihring nun hi kan theihngihilh nghal thei a ni.

A hlaa kan hmuh danin Patea hi buaina leh lungngaihnain a hual vel châng pawh a awm ve ngei. Mi tin chunga lo thleng þin, taksa bawrhsâwmna te, mangan leh buaina te pawhin a chîm buai châng a awm þin. He khawvelah hian a thlâ a ngam theih loh thu pawh kan hmu a ni. Tahna pawh kan hmu bawk, mahse chîk taka a hla zawng zawnge hi kan en chuan a tahna chhan hi chu buainain a Lal hmêl a hliah avanga a pawi tih leh lungchhiatna, pangchang taka a Lalpa a kohna a ni. A hlaa ‘tahna’ a lannaah pawh hian ‘thawh lehna ni ropui’ leh ‘Pialral ni êng mawi’ a kohnate kan la hmu fan a; kawng thim leh buai leh lungngaihna thu a awm pawhin chawplehchilha a hnehma thu leh, amah leh amah a inhinemna thu hi kan hmu nghal zel þin a ni.

*Tûnah lungngaih tah leh buaina hi,
Ka lawmna pangparah a la vul ngei ang.*

*Ka tah chang nite tam mah se aw Lal Isu,
Lungduhte nena len za hun tur
Chuan ka tahna a tireh.*

*Lungngaih buainaten min nang,
Mahse Zion ka ngaihtuahin
Lawmna Lal hmaah ka ding þin.*

*Lungngaihna khur thimah hian
Mala ka awm laiin
Van lama hla thlamuantu ka hmu ta.*

Khawhar hla a phuahte zingah hian inhnemna thuin a pawlh miah loh chu hla pahnih pathum emaw chauh a awm a. Khawhar nu leh paten an phuahtirte pawh a awm tih kan hriat avangin, heng inhnemna thu pawlh loh lusunna hla fir deuh te hi chu mi dangten an phuahtir a nih a rinawm. Patea hi rinna ng het tak nei mi a ni a, buaina leh lungngaihna a hneh zel theihna pawh hi a rinna a ni. A thlarau ram pawh 'thlaler atangin ka hmu, rinin' tiin min hrilh a, 'hrehawmah pawh, Daniala angin thingthi talin ka thlir ang' ti theitu a ni bawk.

Kan hla siamtu ḥenkhatte anga Pathian hla bāka khawvel lam hla phuah nei dēm dūm mi pawh a ni ve lo. Duhin a rilru pe ni sela, khawvel mawina leh mihrinna hla pawh tha tak tak a phuh chhuak thei ang. Mahse, a duhthlan lam chu rēl felin chu mi lam chu rilru ding takin a zawl a, chuvangin a hlate pawh hi a takin a ḫeng bik a ni. Hla phuahtu pakhat Handela chuan Lal Isua lo pian tur, zawlneite hrilhawkna atanga thlürin, a pian thu te, a tuarna leh a hnehna thu te chu hlaah a siam a; chung chu a vaia khaikhawm nan *The Messiah*, tiin hla pakhat angin, a tārlang a. Patea hlate pawh hi chutiang chu a ni a, then hran theih loh hla hlāwm khat a ni a; a nihna takah chuan Patea hian *Rinna hla hlāwm khat* a phuah a ni. Patea hi thil nung pakhat chu a ni.

Saihnūna hlaa kan chēn erawh chuan lunglēngin kan tap kan tap thin. Tah hi mihring zepui pakhat, kan palh theih hauh loh leh, bānsan theih loh a ni. Mihring nun hi tahiñ kan hmang tan a, kan nun tiewpna pawh tahi hun bawk a ni a; a inkār hun chhungah pawh hian kan pp kan tap thin a ni. Kan tahiñ chhan hi hmangkhañ avang emaw thiil thiakhlel kan neih vang te emaw a ni thin. Aw chhuah meuhva kan tahiñ theih loh pawhin kan rilru talin kan tapin kan rūm thin a ni.

Saihnūna hla phuah, a fapa Lalchuanga'n a ziak chhuah zawng zawng chu 77 a ni a; heng zinga 18-te hi chu khawvel

lam thil ho deuh, thil chi hrang hrang a phuahna a nih avangin a hla zepui hre tura kan en tur leh zir tur chu 59 te hi a ni. Heng zingah pawh hian hla engemaw zât chu ama rilru leh nun puan chhuahna ni lo, mi dangten an lungkham zâwng leh an lusûna phuah ni mah se, a 'hla' a nih chiah lohna lai te pawh a awm a ni. Chung mi dangte tana a hla phuahte chu han en hian hla tha tak anga lang si, mahse lâr chhuak rih mang lote a ni nual hlawm.

Saihnûna hla 59-ahte hian 'tah' thu hi 42 kan hmu a, mi pakhat hla phuaha 'tahna' thu tamna ber a ni ang. Patea hlaa 'pâr' tih 40 kan hmu leh Saihnûna hlaa 'tahna' kan hmuh zâtte han khaikhin hian an nun ram hi a inang lo hle tih kan hre nghal thei a ni. Saihnûna nun ram boruak chu :

*Aw thisen ropui zarah,
Tapin i hming kan ko.*

*He lei hi chatuan ram a tling lo,
Lungngaia tahna a ni maw Lalpa?*

*Min hruai ve la aw min kai rawh,
Tah lai min hnem rawh.*

*Ka tap ang a lênnna ngaiin,
Ka lâm ang Lal zûn lêng awiin.*

*Nun hlui ram ka han thlir ang a,
Ka tahna rêng ka ngai lo vang.*

*Eden thim hnuaih nau angin kan tap,
Nghilh ni a awm dawn lo kan tap,
Lalpa i ram ngaiin.*

*Tap lo thet ka ni lo aw ka latnate kha
Hnutiang lam sôl ang an hawi tawh lo ve.*

*Ka tah nan khua a sei lua e Lalpa,
Tual an lênnna hmuh ka nuam an hmel nen.*

Saihnūna hi hmangaihna pianpui nei mi, chhangchhe tak leh thawnawh êm êm chhungkuua chēng reng, mahse mahni mi mal nawmna zawnga inla hrang leh inthiarfihlim mai lo mi, nau awm taima tak angin a hlaahte hian kan hmu a ni. Chuvangin a hlaa tahnā kan hmuhte pawh hi ama mi mal tahnā hlir a ni hauh-lo va, a mihringpui, a vēngte a tahnūna, an lungngaihna leh rūmna a chanpuina a ni. Mihring chhungkaw chhangchhe tak zinga khawsa reng e ti lovin mi lunglēng thei tak a ni bawk. Khawtlāng lunglēn leh, mita hmuh theih loh thlarau khawvel a ngaih avanga a lunglēnna hi a hlaah te hian a kal kawp reng a, then hran theih lohvin hruihrual angin a inherh kawp chiat reng a ni. Khawmpui tīak dāwn zan rei tawh lamah phei chuan thalai zaikhawmnaah '*Tlāng a dang lung a lēng êm mai*' tihte hi tui tak maia sak a awl duh hle; a chāng tawp ber sak lai phei hi chuan vān lam nge kan ngaih, khawvel thiante tīh hi ngaihtuah tham tak a ni:

*Hun chuan min dang lo ni sela,
Lal hlun chhung chēnna ralmuangah;
Kan ngaih tlāng tina lēngte nen,
Min tlantu zaiin kan awi tur.*

Saihnūna hlaahte hian pangparte vulin, romeite pawh zāmin, ngirtling leh leltē pawh an kiu ve ngei a; thāl khaw êng leh favang ni êng leh sava hrām mawite pawh a awm ve ngei mai. Mahse rilru tibarhtu leh tiblimtu angin an lang lo va, mihring hlimna leh lāwmna hian a daih rei lohzia entirma leh lung tilēngtu mai angin an lang zawk a ni :

*Kan tlāng ram thing ri-hnūm lērah lelte a kiu,
Thāl favang tlae ni a tia êng rikat hāan;
Ka nghah Pialrāl raw mawi min ngaihtir.*

Chung kam sāng tak thir lovin, Saihnūn hi chu, Mizo nun hluite ngaihtuah chhuah chāng neiin, a hawi vel thin a. A chēnna ram bornak leh a chhehvela thil awm a hmuah thinte

chuan a lung an tileng thin a ni. Chu chauh ni lovin thil rēng rēng mai hi a lunglēnthlak zâwngin a thlir a, tichuan a hlaahte hian lungngaihna aiin lunglēnna thu kan hmu tam zawk a ni. Khawtlâng lunglén leh Van ram a ngaihna thu hi a hlaahte hian a kal kawp reng chauh ni lovin, sakhow hlui leh thar pawh a lang kawp bawk a ni. Kan hnuchhawn lam ram ni tawh mah se, kan pi pute chênnâ khawvel, Rih dîl ram hi, Kristian sakhua leh a kaihhruai thil chi hrang hrangin min chîm nasat hle tawh hnu pawh hian, kan rilru leh ngaihuatnaah hian a la lang ve reng a. Saihnûna'n a hlaa Rih dîl piah ram mitthlaa min hmuhtir chung si a, Jordan lui râl ram lam min thlirtir thei tlat si hi a mak hle a ni. He ram pahnih, la inhre ngai hauh lo leh inlaichinna pawh nei hauh lo, rem tak maia a sawi kawp thei hi, a hla hlutna tak pakhat chu a ni. Saihnûna avang hian uain thar chu savun peng hluiah kan dah thei a ni :

*Hrinhniang an liamna thlasam khua chu e,
Ka thlir ngam lo hawilo par thliak a,
Lungloh tui an dawn tur ka ngai ngam lo ve.*

*Hrinhniang lungduhte an lênnâ ram chu e,
Zion vang khua lal lai rûn rem;
Van hnuai mi sêlah an lêng ta e.*

*Pialral Rihsâng an kai zo ta maw?
Kir an rêl tawh lo ve.*

A nih leh R.L. Kamlala hlaahte hian eng ang boruak nge lêng ve le? A! ani hlaah hi chuan chhûm zing mup mup leh buaina hlir kan hmu thung a. Lungngaihna leh buaina chhûm, a tuamtû hi a chhah êm avangin, Kâmlala tân chuan Saihnûna anga han tâhna chi pawh a ni lo va; vanduainate lah hi a tân chuan a sôrîn a sôr a ni si a, a sepui ruah tuar tlawk tlawk mai a ni.

Kâmlala hlate hi amah pawhin a sawi angin, chi hnihad

then a ni a; Kristian hla 61 leh mihrinnna hla, khawvel lam thi chi hrang a phuahna 9 te a ni. (*R.L. Kamlala Kut Chhuak edited by Siamkima 1980*). Amah hmuh fiah tuma túna kan ente erawh hi chu hla hiâwm khat 61-te hi a ni.

Hla rēng rēng hi a lo chhuahna bul chu lâwmna emaw, lungngaihna emaw a ni châwk ñin; lâwmna ai mahin lungngaihna leh lunglênnna, khawharna te hian hla hi a tichhuak tam zawk fo. Shelley-a pawhin, “*Kan hla sak tui ber berte chu lungngaihna lam hlate a ni ñin*,” a ti a. Kâmlala hlate pawh hi chutiang bawk chu a ni. A tân chuan a khawvel nun ram hi lungngaihna hlir, lungngaihna hlir a ni a, ‘Ani chu lungngaihnate nei mi leh natnate hre mi a ni’ tih thu hi a nunah bel theih a ni. Thomas Hardy pawhin, “*Lawmna hi zawng he khawvel natna leh hrehawm tuarna ramah hian a chânga lo lang ve zauh ñin chauh a ni e*,” a lo ti a. Kâmlala nunah pawh hian hlaah han chantir tur hlimna leh lâwmna a thleng khât hle, a ban phâka a lo lan châng pawhin a ding rei lo hle ñin :

*Awmhar thin lai i hnêm,
Lâwmna, mual liam lul suh;
Kan awi ang che zai tinrêngin
Kan vuan che-aw ding rawh.*

*Lâwmna, lâwmna, nang chauh
Kan au kan au ang che.*

tîn, a tan chuan auk lawm lawm a ngai ñin a ni. A chênnna ram hi lâwmna ni êngin a chhun ngai loh, lungngaih chhûm hnuai, lei firehawin leh himui reh tak a ni a; a hla 61 kan enah hian lungngaih thu hi 38 kan himu a, chhûm 15 kan himu a, þaline 27 kan himu a, thim sawina 25 kan himu bawk a ni. A chênnna ram hi, amia þawngkam ngel atangte hian eng ang nge a nih kan ngaihruat thei ang :

*Lei hrehawm hmun reh takah hian,
Lungngaih chhûm hnuaih ka awm.*

*Leiah hian tap leh thlaphângin,
Lungngai na tuarin ka rûm.*

*Lungngaihna leh hrehawmnain min bawm,
Buainaten tui lian angin min lèn.*

*Leiah hmun nuam ka tan vâng nã,
Hrehawm tuara ka tahnâ chauh.*

*Sual thlipuiin min nuai a,
Lungngaih a kiang ngai lo.*

*Lei hi rûmnain a nghawr vel,
Buaina râl a lian.*

*Aw vân thli, ka ngai êm che lo lêng rawh,
Ka thinlunga chhûmpui zing chhêm kiangan.*

*Rûmnain khawvel a khat,
Hnam ze tinréng tan.*

Kamlala hlaah hian ‘êng’ leh ‘pâr’ sawinate pawh kan hmu ve ngei mai; ‘êng’ a sawina 37 kan hmu a, mahse chung zinga a tam ber chu hla taka awm angin a lang a, a ram ngaih em em chanchin a sawina emaw, a beiseina thil a sawina emaw deuh hlir a ni. A châng chuan heng êng a sawite hi a ko lawm lawm thin a, a châng chuan hla deuhva awm a hmuh thu a sawina mai a ni bawk. Tin, Kamlala hlaa ‘pâr’ kan hmuhte pawh hi, Patea hlaa mi ang a ni lo bawk, a vul lai sawi awm lovin, a chuai lam hlir kan hmu a ni. Saihnûna hlaah pangpârte chu lung tilêngtu angin kan hmu a, Kamlala hlaah erawh chuan ‘pâr’ leh thil mawite chu lei hlimna leh mihring nun daih rei lohzia entirna ang chauhvin kan hmu thung a, rilru tihlimtu angin an lang hman thin lo a ni :

*Pangpârte an lo vuai a,
Hunte a kiam zel si.*

*Pâr ang kan lâwm lai nite zawng,
Kâwl an liam zêl a.*

*Lei pangpâr a vulte zawng an lo chuai,
An lâwm hla leh an ri mawi pawh a reh.*

*Kan lâwmna ropui ber,
Pâr ang a chuai ta e.*

*Lâwmna ni êng a lo chuai,
Khua a vâr thei lo.*

*Kan lâwm lai pârte hi,
Chuaiin mual an liam ñhin.*

Kâmlala hlaa kan chén hian, ‘En teh mah u, ka chunga thleng, ka lungngaihna anga lungngaihna a awm em ni?’ tiin, Jeremia angin, min zâwtin kan hre ñhin a ni. Hêng a hla 61 kan ente zinga pahnihte hian a fanu Lalthangdêli leh Lalkhûmi thi a súnna a ni a; he mi a mitthi súnna hi a hlate zinga a lâr pâwl ni lo mah se, a hla zepui leh a nun ram boruak tilang chiangtu a ni.

John Miltona'n a ñhan Edward King-a thi a súnna hla *Lycidas*-a kan hmuñ ang chi, thu inkhing (contrasted ideas) hi Kâmlala hlaakte hian kan hmu bawk. He lei, lâwmna pangpâr a chui thiana leh a chui tawh lohna tur, ram pahnihte hi a hlaakte hian an lang kawp reng a; a chui ñhinna ram hian a vul rengna tur ram chu thien a tichâkwm zuai a. Thim leh êng te, lungngaih leh lâwmna te, chui leh pâr te, tah leh nuih te, hrchawmna leh nausma te, chhûm leh chhûm ding te, rûmna leh hlimna te, thlalé leh nusna tui luan dêl dêina te, inhemna ram leh ñhen lohna ramte kaa hmu a. A pum pui thuin a beiseina thu hian a hrchawm tuerna leh lungngaihna thu hi a bûk deuh zâwk a ni. A beiseina vävr tâwp chu,

*Lungngaihna rama rûmna zawng hi
Kan Lalpa hmaah lâwmna hla tur,*

a tih hi, a ni thei ang. Hetiang hi a nun ram leh chênnna boruak a nih avangin, a hlate hi a beiseina leh inhinemna, a lungngaih leh manganna hneh theihna tura a âwmphaw, a chakna leh hmanraw neih chhun a ni a. Chuvangin Kâmlala hi hla phuah lo thei lo dinhmuna ding a ni.

Kâmlala beiseina hi Kristiante beiseina, khawvel mite han ngaihtuah dan leh chhût dan mai chuan beisei tur âwm awm hauh lo hi a ni a. Mahse, Abrahama anga khua, lungphûmte nei mi, Pathian rôl bâwl leh siam chu beiseinaa thlir tlat  intu a ni. He Kâmlala beiseina hi Rûn dung aia sei, ringtu zawng zawngin neih theih, he khawvel ramri siam chawp chunga lêng a ni. Hemi beiseina neih hi leiah hian mikhual leh châm rei mai nih inhriat phahna a lo ni bawk :

*Leiah riangin hmun nei lovin,
Thlalér hrehawm hrût vel ila;
Ka chawl ngei ang luipui kamah,
Lalpan ka tân a buatsaih e.*

Kâmlala hi hla phuah thiam chauh ni lovin Mizo  awng pawh hmang daihzai thiam êm êm, Pathian thu ril leh thûk, a chatuan remruat, khawvel awm chhung sermon thiamte pawhin an sermon sên loh tur leh sawi fiah hleih theih loh tur, Genesis atanga Thupuan thleng thu laimu pawh  awngkam tlêmtêa khel chhuak thiam a ni.

*Aw, mîn hrilh rawh thukna ropui,
Ran thlêng leh thing ânchhe dawng leh,
Vana Lallukhum a inzawm,
Lei Eden leh Salem thar nêñ.*

He hla châng hi Patea chuan a lo hriatin mak leh ropui a titlu a ni ang, “Umm, hei hian hla zawng zawng a phuah zo

ta, phuah tur kan nei ve ta lo,” a lo ti hial a ni. He hla chāngah hian Kāmlala hian a phawk chhah ngei mai.

Heng thil pathum, rinna te, hmangaihna te, beiseinate hi awm reng tur a ni a. Thihna lui kama Patea hla, pangpâr leh êng chi hrang hrang leh arsit en kâp de chiai reng hi rinna hnathawh a ni a. Saihnûna hla tinungtu chu tâh leh rûmna rama hmangaihna lo lang reng thei hi a ni bawk a. Kâmlala chènna khawvel leh, a hlaa lungngaihna chhûm chhah tak leh beidawn theihna boruaka mihring nun tinungtu chu beiseina a ni bawk. Tichuan heng pathum, Patea, Saihnûna leh Kâmlalate hi thil nung pathum, kan mihring nun khai dingtute an ni.

P.S. Hêng thil nung pathumte hi an tisa put lai niah, a tu-a te nen mah hian inhmuh leh inhmîl hriatna ka nei lo va, chuvangin an nilru put hmang lei nun ram ka sawite hi an hla atanga ka hmuh dan a ni. R.L. Kâmlala hi ka zir hmasak ber a ni a, a kutchhuak, a thu ziak leh hlate chu ka thian, Pu Chuauthuama hnen atangin ka dawng a, a bua chhuah theihna tur kawng dapin, kan lo chhuah puitling thei hrâm a. Ka vanneiha siamlin Mandalay University-a ka thian Pu B. Lalhangliana'n Patea hla a ziak chhuahte chu min rawn thawn a; Pu Lalchuanga, Saihnûna fapa pawhin a pa hla phuah a ziak chhuahte chu phal takin, ka lo zir theih nan, min rawn thawn bawk a, a chungah ka lâwm tak zet a ni. Anmahni avangin he ka zinna rama thil nung pathumte chanchin hi, an thu leh hla atangin ka lo zir thei a ni.

R.L. Kamla thian hi Aizawl leh Silchar inkar kawnga Bualpui khua, sipai hung chhunga awm a ni a, ka tlawh tawh thian a; ka vawi thum tlawhna August 13, 1982 ni chuan Prof. Lalruanga nen kan ni a. Kâmlala thian awmna hmuun luahluu sipai lai, sipai za hotu ala lai, an Major sap hnenah kalin mi ropul thian hmuun chu kan kawh hmuh a, tung pawh

la phun loh a nih avangin lo humhalh tha turin kan ngēn a. Ani pawhin kan rilru leh kan thu sawite chu mi hriatthiampuiin theihtawp chhuah min tiam a. Sāmthanga ka kal tuma thlānmual ka fan thu leh, an khua chu thlān lung ziak thiam ka tihzia ka han sawi chuan Prof. Lalruanga chuan, "Khami thlānmualah khan Patea thlān pawh a awm asin i hmu lo zu nia," a han tih chuan, "A va pawi tak êm! A awm tih hriat a, han zawn hmuh ngei tur hi," ka ti a.

Hemi hnu lawk hian September 8, 1982 chawhma lam dar 11 velah, ka hnathawhna hmuna ka lo awm laiin mi pakhat, ka hrmei hriat loh hi a lo kal a, ani chuan, "Ka pu, nimin tliai khan Kāmlala fapa Lallūra kha Kawnpuia anmahni inah a boral a, vawiin hian an vui dawn a ni àwm e; an beisei ngam chiah lo che a, mahse hrilh hmasak ber tur zingah i tel asin," tia min han hrilh chuan, ka han hawi chho va, Kāmlala thlalak intar chu ka han en a. A fapa Lallūra nen hian vawi hnih lai inhmu tawh kan nih avangin a thihi thuina min han den chuan ka rilru a khawih hle mai a, "E, chuti a nimaw, a lo damlo thin tawh rēng em ni le?" ka ti a. Min hrilhtu chuan, "Damlo deuh rēng a ni àwm e," tiin min chhāng a. Tawng tur engmah hre lo va hrilhhai taka kan inen deuh rēng hnu chuan a kal ta a.

Chumi zān Kāmlala thu leh hla zira ka bûr rēng lai chuan ka thiannuin, "Vawiinah Kāmlala fapa Lallūra thihi thu Chaltingah min lo hrilh a, in pa hrilh tur a ni, tiin min lo hrilh asin," a han tih chuan, "Ka hre daih tawh," tiin, bung deuhvin ka chhāng a, thihi lam thu chu ngaihtuah pawh ka ngaihtuah thui duh tawh lo va. Ka rilru chhungril takah erawh chuan, "Amah Kāmlala hi la dam ta sela chuan hengte hi a nun ram titthim zualtu tur a nih hi; hla erawh chu kan neih belh mahna," ka ti a. A pa beisei ramah hian a fapa pawh hi a chāwi ngei ang a. Keini pawh kan la chāwi ve ang chu.

MI HRÂNG CHHURA

*Khua tin hraichawi thnlai thâwngtu
Taunu tâwnsam vuan e*

- Chhuana

Mizo thawnthuah hian mi pahnih inkawp, lâr tak an awm a, a pakhata hming lam chuan a pakhat zâwka hming pawh kan rilruah a lo lang ve nghal ñin a ni. He mite hi Chhûra leh Nâhaia an ni a, an chanchin hi Isua zirtirte chanchin ai mahin Mizo rilruah hiana bet nghet zâwk a, Mizo rilru lung phêkah hian reh thei lo va ziak thla a ni.

Tûn hmáa Serkawn sikul zirtirtu lo ni ñin Pu Chhuana hia pakhat *Chhura leh Naa* tih aßang hian Mizo rilru, duhthusâm leh ngaihsân zawng (social values) kan hmu thei a. Ngaihtuah chiang lo tan chuan hla mâwl tak leh ho tak emaw tih mai tur leh sak liam mai tur hi a ni a, mahse he hlaah hian thu rîl leh thu awmze nei tam tak a inbeng muk a. Chûngte chu hai chhuah kan tum dawn a ni.

He hlaah hian Chhûra leh Nâa hi lo nei mi niin, buhseng dawn hnâlh chuan an lovah sava vêng ve vein kan hmu a. Nâhalan saya hnâwñh dahr turna a han vawmina chuan vaua Phûngpuinu leh a fate awmhmun khuarna chu a Zuk dêng a. Chutah Phûngpuinu thimrim a rawn inhrosa nasa ta mai a, tichuan tlâwm leh zah pawh dâwn lovín Nâhaia chu blauvin a tien chhe ta a. Chutia a lo chu a vén ngam tak loh avang chuan Nâhaia chuan Chhûra chu lo inven thiengpui ah a tahawh ta a; amî'n a lo hnial lo va. Nâhaian a hrilh angin Phûngpuinu chu a rawn inhrosa leh a. Mahse Chhûra chu þawngka maia

vau zâm chi nih ahnêkin Phûngpuinu cho ngam khawpa huaisen a lo ni a. Thlâmah pipui a suih a, Phûngpuinu a lo kal hunah a uai lai chu man tumin a lo châng ta a.

Mi tinin kan hlauh êm êm, Phûngpuinu chu a pipu uai lai a samah a man bet ta a. Khuah naupangte hmuuh atan leh an ennawma lâmtir atân hawn zai a rôl ta mai a. Mihring chênnâa khuâa luu chu Phûngpuinu chuan a ngam hlawl loh avângin a thil neih hlu tak sekibuhchhuakin Chhûra hnêñ aþang chuan a intlan chhuak ta a ni.

Khawvel hnam fing hmasa Greek mi te, Rom mite leh English mite pawhin an ngaihsân ber þin chu huaisenna hi a ni. Greek hla phuahtu zinga ropui ber Homer-a chuan Odysseus, an thawnthua mi huaisen leh an thil tih ropuite chu chawimawi nân hla ropui tak a phuah a, tûn thlengin khawvela literature ropui berte zinga chhiar tel a la ni. Greek ho phei chuan mi huaisen, an dam laia thil þa tite chu thih hnuah pawh awmna nuam leh þa bik *Elysium* an tiyah chuan awmin an ring a. English *literature*-ah pawh Anglo-Saxon hun lai aþangin mi huaisen, ram leh hnam tân þangkaite chu chawimawiin kan hmu þin bawk a, chu chu English mite rilru a ni. Hindu-ho thawnthuah pawh mi huaisen *Rama*'n hmelma *Ravana* kut aþanga *Sita*-i a chhanchhuah thute kan hmu a, chung phuahna hlate chu Hindu *literature*-a a ropui ber a ni hial a ni.

Kan Mizo thawnthuah pawh Chhûra'ñ mihring hmêlma, thimna chunga rorêltu Phûngpuinu a hneh thu kan hmu a, chu chu Pu Chhuana'ñ thiam tak leh tawi kim takin hlain a rawn sawi chhuak ta a ni. Hnam fing hmasa zâwkte ang bawkin Mizote pawh hi kan pi leh pute aþanga mi huaisen ngaisâng leh chawimawi þin, "huai no" nei hnam kan ni a. Chutiang bawkin Chhûra pawh hi hnam dang thawnthua mi hrâng leh chak, Hercules-a te, Ulysses-a te, Anglo-Saxon literature-a dragon hlauhawm Grendel-a hnehtu Beowulf-a te, Hector-a

te, Achilles-a te, Promutheus-a te leh Hindu literature-a thlarau sual hotupa ber Mohisasur hnehtu Durga te ai hian engti kawng mahin a hniām bik lo; heng mite hi inzāwl khat niin, mihringin nih phâk kan duh thin leh ngaihsân ber nun neitute an ni. Chhûra hi Greek mi lo ni ta sela, Greek-ho chuan a thi hūn chuan Elysium-a awm pha ve turah an dah ngei ang.

Pi pu chena kan ngaihsân ber, huaisenna·hi Chhûra nunah a awm a. Mizo hla phuah thiam Pu Chhuana hian hnam fing hmasa zawk hla phuah thiamte tih dan ang bawkin a hlaah hian Chhûra huaisenna chu a târlan chian theih nan Nâhaia nun min hmu hmasaktir a, Nâhaia dâwihzepna chuan Chhûra huaisenna chu a tih ngaihsânawm lehzual theih nân. Literatur-ah hian thu inkhing leh inkah (contrasted ideas) hi dah tlan a ni fo - thim leh ēng te, huatna leh hmangaihna te, lei leh van te, thatna leh sualna te, rinna leh rinhlelhna te, beiseina leh beidawnna te, fin vervékna leh thatna zik tluak te a ni. Chhûra leh Nâhaia pawh. Thu pakhat chuan a khingpui thu awmzia chu a hrilhfiah thin a ni.

*Khua tin hraichawi thinlai thawngtu
Taunu fawnsam vuan e.*

tih, hla tlar hniha thu awmte hian Mizo rilru a khawih dân leh hneh dân hi tu'n nge sawi chhuak thiam zo vang? Hnam dang thawnthu (mythology) leh literature-ah pawh ramhuai chhungkaw zinga tel ve, hetiang man thu hi kan hmu ngai lo hie. English literature-ah chuan hmân laiin thlarau sual leh nînhleiten hmeichhie an tibthlabârte chhan tura pasal̥ha (knights) an tîrh chhuah thin thu kan hmu a; amaherawhchu ramhuai chhungkaw zinga tel, phung man beh thu leh intlanhhuahfir leh thu hi kan hmu ngai lo. Chhûra'n Phungpuint a sama a man bet lai lem hi Renaissance hun laia lemziak thiam hningthang Leonardo da Vinci emaw, Michelangelo-a emaw khati lianpui maiin han ziak ta sela hmuh a châkawm ngei mäi. Jordan lui, Mizoram a lo luan

luh hmaa tapchhak zâwlah pawh sakei huai ai maha kan hlauh zâwk, Phûngpuinu chu Chhûra'n a sama a man bet hian mihring rilru huaisennain thil a tih theihzia a entir a. Hla tlar hnih kan tarlan tâka thu awmte leh,

*Zatlâng rôl thang chu dâwn lêk lo hian,
Nâhaia tlânchhia e.*

tih, hla tlar hniha thu awmte hi, hla tlar hnih ve vea thu awm zawng zawngah chuan a la inpersan berin ka hria, chhim tâwp leh hmâr tâwp, lei leh van ang a ni.

He thawnthu, Chhûra'n Phûngpuinu a man thu hi ka fapa naupang ber, a piin thlim mut tuma zâna a hrilh chuan naupang tê chuan a pi hnenah, "Chu, ka pi, Chhûra chuan Phûngpuinu chu ngamin a man bet tak taka maw?" tiin, a zâwt tha leh a. A pi chuan, "Man bet e a, a ngam vek alâwm," tia a han chhân chuan, naupang mutchhuak chuan a kut zungpui a hmuam a, ngaih thain a muhil riai riai thei ta a ni. Mizo naupang zawng zawng pawh Chhûra hnehnaah hian an lâwm a, an ngaih a tha a ni.

Chhûra hian Nâhaia'n a hlauh êm êm, thlabâra a tlânchhiatna khawpa a harsatna a sut kiansak ropuizia hi i ngaihtuah teh ang - a lo, amah leh an chhungkaw intunnunna tur ber a vân ngam loh chuan tâm mai loh chu hmabâk an nei lo. Amaherawhchu a vaua awmhmun khuar, a hlauh ber Phûngpuinu a hnehsak tâk hnu chuan Nâhaia tân chuan hnâra hlit phawi ang huai a lo ni ta a. Buh hlâwk kum a nih phei chuan Nâhaia leh a nupui fanaute chuan an bâr lian thei hle ta ve ang. Hetiang Chhûra inpêk zawkna nun hi a ni, tûn hnuah Pu Rokunga pawhin hlaa a lo puan chhuah chu ni :

*Kan pi leh pu mi huaite,
Dan tha kha mawi kan ti;
Thian chhan thih an ngam fo thin,
An hming a thang bawk si.*

A rēng rēng thuah lova sava invêñ thleng emaw, invêñ thlengpuia insâwm emaw te hi kan Mizo pi pute khân an lo chîng rēng em ni le?

A enga pawh chu lo ni ta sela, Nâhaia hian lo invêñ thlengpuian Chhûra hi a sâwm satliah mai ni lo vin, naupang thil ngen takin, patling zetin a ngên a (*Nau ang a ngén mi hrâng Chhûra/Sawmsang ven thlengpui an*). Chuti na nâ nâ chu tiin, Chhûra, Nâhaia aia mi taima leh, mahni thlawhhma ngaihtuah mi chuan, Nâhaia nêna lo invêñ thleng chu a lo remti thei a. Nâhaia mizia hre tak siin a lo a kuta a kawltir phal te hi, mi harsatna hriat thiampuina leh tlawmngaihna nun nei tih dan a ni. Mahni ta mai en lovin mi dang ta pawh Chhûra hian a enpui thei a ni.

A dawt lehah chuan Chhûra finzia he hlaah hian kan hmu bawk. Finna hi ‘a ngaihna hriatna’ a ni, kan ti thei ang. Chhûra hian huaisenna a nei a, chu chu a tâwk lo va; harsatna a lo thlenin ‘a tihngaihna’ a hriat a ngai a ni. Tichuan Phûngpuinu man theih dân kawng a ngaihtuah chhuak a, a man ta a; chu chauh ni lovin Phûngpuinu finna pawh a lehkhah bawk a ni. Chhûra’n khuaah naupangte ennawma lâmtir atan hawn a tum thu tiel ɣawng deuhva a han hrilh chuan Phûngpuinu chu a zâm chhe dêr mai a. Mihring awmna khua han luh a, mihring hmel êng han hmuu chu a zuam thei ngang lo va. Chu bâkah vaua a fateho khawhar leh riltama an han awm tur chu a ngai ngam lo va, tu nu mahin an ngai ngam lovang. Metah hian Phûngpuinu pawh keimahni mihring zia leh rilru pu argin kan hmu a; a lungngaihna leh manganna hian filru a khawih thei hle a ni. A thlaphâng leh mangang hmél hi Mizo müñ ló hmu ta sela, “A tâwk tawh e, Chhûrpui, Phûngpuinu chu chhuah tawh teh mai, a fate khawhar leh riltama awm tur chu ka ngaihtuah ngam lo ve,” a lo ti hman hial ang.

Phûngpuinu chuan Chhûra hnенâh infan chhuah

a dîl a. Pu Chhuana'n a hlaa a sawi tel loh, thawnthua kan sawi dânin, tuthlawh hlo thlo theia intlan a dîl phawt a, a dawtah hreipui khuai tu theia intlan. Mahse Chhûra chu mi fing, thil chhût mi leh thil chik mi a ni a, tuthlawh chu amaha hlo thlo thei a nih leh nih loh leh, hreipui pawh chu amah khuai tu thei a nih leh nih loh a zâwt hmasa a. "Tha chu tel ve bawk e," tia Phûngpuinu'n a chhân chuan, "Chutiang chu kei paw'n ka nei ve vek," tiin, a pawmsak duh ta lo a ni.

A tâwpah chuan Phûngpuinu chuan a fate then chu a hlauh êm avang leh, intlanna tur thil dang han sawi tur tha a neih si loh avangin, a thil neih zinga a roh êm êm sekibuhchhuak, Chhûra pawhin a pawm theih chu intlan nan a hlân ta a ni. Sekibuhchhuak hi lo nei lo ta ang sela Chhûra hian Phûngpuinu hi engtin nge a tih ang tih hi ngaihtuah tham tak a ni ang.

Pu Chhuana hlaa Chhûra nun leh thil tih ropui tak kan hmuhi a anpui, hnam dang literature-ah pawh, mihring nuna entir nei chi kan hmu a; chûng zingah chuan English literature-a *Morality Plays* te hi a anpui lâr tak chu a ni. Chhûra hi he khawvel kan zinna ramah hian mi narân pakhat anga zin ve angin kan hmu a; mi tam ber dinhmun leh harsatna chi hrang hrangte a taka a hriatpui avangin a nun leh thiltihah hian entir nei thil tam tak kan hmu a. He hla pâwnah leh thawnthuah pawh a chânga mi â, a chânga mi dâwihzep, a châng leh pa remhre lo ber angte pawhin kan hmu ñin. A châng leh mi huaisen, fing leh tlawmngai leh mi tha zik tluak a nih theih bawk avangin, mi tinrêng nun nei thei leh phur chhuak thei nun nei mi a ni. Amah ang bawk hi English literature-a *Morality Plays* zinga lâr ber, Everyman (Latin tawnga Hanuman Genus) an tihah chuan kan hmu a ni.

Khawvel hi thim leh êng indona, mi tha leh tha lo inchén pawlhna hmun a ni a; a lem leh a tak pawh awm dun zelna leh thiliar hran harna ram a ni. Thil dik lo leh tha lo tihbo nan leh

hneh nan thil tha tam tak sén a ngai thin a. A chângin thatna leh dikna chuan chawp leh chilhin hnehma chu chang lo mah se, a tawpah chuan hnehtu ah a ḥang nge nge thin. Hei hi khawvel literature leh sakhaw hrang hrangte pawhin puan chhuah an tum ber chu a ni. Chu lo lehah chuan literature hian tihlan a tum fo chu 'thatna lâwmman chu thatna bawk a ni,' tih hi a ni bawk.

Pu Chhuana hlaah hian mi pathum inang lo tak tak, Chhûra leh Nâhaia leh Phûngpuinu kan hmu a. Tûn lai ṭawng takin sawi ta ila, Chhûra hi a changtupa ber (hero) a ni a, a dang pahnih te hi chu Chhûra hi mi eng ang nge a nih tilang chiangtu mai angin an lang a ni. An pathum erawh hi chuan nun entir (allegorical significance) an nei theuh. Chhûra hian huaisenna leh tlâwmngaihna, finna tel, thatna zîktluak nun a entir a. Nâhaia hian thih hlauhna, dâwihzep leh vervêkna nun. Chhura'n vaua Phûngpuinu awmna lai chu zuk dêng ngei se tib a duh pawhin Nâhaia hian dâwt thu hmangin, chu lai chu sava tawmna angin a sawi duh mai a ni (*Siahthing tlai bung ritva lawina/Deng la, sir an belh thing*). Hlauva tlanchhia a nih phoi chuan nuihza siam nan hman a lo tum ru reng mai thei a ni.

Phûngpuinu hi chu Nâhaia leh Chhûra inan loh dan lantirtu leh tehna a ni. Ani hi awm ta lo sela chuan Nâhaia nun emaw, Chhûra nuri emaw hi kan hmu chiang thei lo vang. Chu bâkah a pipu uai hla hian mihring nuna thil thleng thin, thu dik a târlang bawk. Kan dam reng dawn emaw kan tih laim kan thi that a; kan thil hriat chian ber nia kan ngaih te pawh kan hriat chian loh ber thil a lo ni thin leh, kan rikrûk loh lam zâwngta thil lo thleng thin (irony of life) hi, Phûngpuinu'n 'Chhûra awm ta lo ve' a tih lai là lâe man bêha a awm bian a entir a ni.

Tichuan a changtupa ber Chhûra nun a ḥang hian 'thatna lâwmman chu hambatna bawk a ni' tih hi a

dikzia kan hmu a. Nâhaia hian lo invêñ thleng a duhna chhan pawh a sawi chiang lo náin Chhûra rilru þhatna chuan a lo remtihpui thei a. A huaisen leh tlâwmngaihna luang kawp avangin Nâhaia vau aþang chuan, a hmaa beisei tina a tin miah loh, sekibuhchhuak a lo chhar ta a ni. Mizo thawnthuah hian thil hlu tak tak leh duhawm tak tak, bahhnuktê te, belte phai thei lo te, Maurawkêla khuang te, Lalruanga dawibûr te, sekibuh-chhuakte hi kan hmu a; a hnuhnûng bera kan sawi hi a dangte ai hian a duhawm lo chuang bik hauh lo a ni. Mi þa pangngai, huaisenna leh mahni inrin tâwkna neia mi tana nun nei tan chuan, sawi lâwk loh hamþhatna chi hrang hrang hi tiamsak a ni tih hi kan Mizo thawnthute hian an tilang þin. Chhûra nun pawhin hei hi a sawi a ni. Thatna lâwmman chu hamþhatna bawk a ni.

Heng thil pathum, huaisenna, tlawmngaihna leh a ngaihna hriatnate hi mihring nun tinuamtu leh tivengtu, mihring nih tinuamtu, mihring tung chhova kal zawng zawngte hian kan ngaihsân (human values) te chu a ni a. Heng hi Chhûra nuna awm vek a ni a, Chhûra nun chu nun tam a ni.

He Pu Chhuana hla *Chhûra leh Nâa* hian mak bîkna leh that bîkna riau a nei. Mizo hla thu awm sa, rem tak maia hmangin Mizo nun leh ei-zawnna, kan rilru tichêp þhintute nêñ pawha kan inlaichin dânte a tiilan avâng hian Mizo chênnâ khawvel boruak chu he hlaah hian a lang iar mai a. A hla châng khatna, tlar hnih emaw lek han chhiar aþang pawhin, hnam dang pawlh loh, Mizo chênnâ khawvelah kan lêng nghal a; *Fâng tlân ritva vêng e* tih han chhiar te hian sava chiar nak nak rite pawh ngaihruatna beng hian a hre thei a ni. Nâhaia vau ngaw khâwk rum ruma Phûngpuinu thinrim inhrosa thâwmte pawh, chutiang bawkin kan hre thei bawk a; a þawng chiah chiah lâk chhâwn (verbatim) rem tak maia a tel te hian a hla hi a tieluin a tak tak rawng a kaitir a. Nâhaia tlanchhe dâr dâr laite pawh, mitthla theihin, he hlaah hian kan hmu a

ni. Chhûra thinrim hmêl, to thli anga dur te, Phûngpuinu pipu uai duai duai lai Chhûra'n a sama a man bet laite hi lem ziak (pictorial quality) anga chiangin ngaihruatna mitin a hmuah theih a. A thawnthu leh a hla phuahna tawng a inhmeh avâng te leh, a bul tanna leh a tâwpnate hi a induh êm avangte hian hla tha pum pial, vawn awl leh vawn nuam tak a ni bawk. He hla aia tha zâwk leh ropui zâwk hi Mizo (secular) literature-ah hian hmuah tûr a awm lo.

C. Thuamluaia chuan Mizote hi literature lama kan pachhiaztzia sawiin, a duhthawhzia tihsan nan, "Aw, Pu Chhûr, i huat thu ni suh sela, min va thlah lungmâwl tak êm?" tiin a chham a. (*Thu leh Hla*, March, 1981 p. 13). Amaherawhchu i ngaihtuah chiang teh ang. Literature lama kan pachhiatnaah hian Chhûra hi demna tur leh mawhchhiatna tur a awm em ni? A thlah lungmâwl em ni kan nih? Eng vanga mâwl nge kan nih?

Heng zawnate hi engtia chhân tur nge tih hi ngaihtuah tham tak a ni ang.

.....

ZAWLPALA THLAN TLANG

Zawlpala Thlan Tlang hi eng ang lam hawi nge tih hriat theih nghâl maina turin a ziaktu hian “Christain Love Story” tiin, a bu hming ziaknaah a tilang nghal a. A bu hming aṭang mai pawh hian thawnthu chhiar châkawm tak a ni nghâl a ni. Kan Mizo thawnthua “*love story*” ropui ber Tualvungi leh Zâwlpa thawnthu lo hre ḥinté phei chu *Zâwlpa Thlan Tlang* tih hian, he “Christian Love Story” hi a hlimawm zâwnga tâwp chi nge ni ang a, a lungchhiatthlâk zâwng leh a lunglênthlâk zâwnga tâwp chi ni ang tiin, ngaihtuahna thui tak min neihtir nghal a ni. A khât tâwka Zâwlpa thlân awmna tlâng sawi lan a han ni leh ḥin te hian, a chhiartute rilru hi a khawihin, mi a inngaihtuah lunglêngtir ḥin a. Inhmangaihna thawnthu hlui chu rilrua hre reng chungin, inhmangaihna thawnthu thar chu eng ang nge ni ve tiin, a tâwp dâñ hriat châk leh ngaihnawm ti takin kan chhiar lo thei lo a ni.

Khâwlkungi thawnthuah pawh hian Zâwlpa thlân tlâng hi hmangaihna tlâng sânnna lai ber leh hmangaihna ram thlir theihna a ni a. Hrehawmna leh buaina pêlte chawlhna, kan Mizo hla siamtu Patea’n “lawngchawlhna tlâng thianghlim” tia a sawi ang kha a ni. He thawnthua langsâr ber Vanlalremi hian khawhar tak maia Phûlpui khua a chhuahsan hian a pa thlân awmna, Zâwlpa thlân tlâng a tlawh lehna hmasa berah chuan kalpui Biakkungi, ḥian rinawm êm êm a nei phawt a. A tlawh vawi hninhnaah phei chuan baihvai tak leh khawhar taka a lo awm ḥinna hmunah chuan, a nungchang ḥat leh rinawm avanga pasal tha tak neiin, a pa thlân lung pawh ropui tak leh mawi takin an lo phun ta a. Tichuan he thawnthu ziaktu hian Remi leh a pasal Malsawma chu Zâwlpa thlân tlâng,

hmangaihna tlâng chhipa a dintir lai tak hian an inh mangaihna thu hi a titawp a. He tlâng piaha an nun ram la awm zel erawh chu a chhiartute ngaihuat zui atân a dah ta a ni.

He thawnthuah hian chan tha chang tura ruat lâwk leh hum sual dai tura ruat lâwk tih theih turin, Vanlalremi leh Lalkhawthangi, nula hmêl tha tak ve ve, dinhmun inthat hleih taka ding kan hmu a. Chutiang bawkin Malsawma chan leh Vanthanga chan pawh hi a inpersan a. A ziaktu hian Lalkhawthangi bi a tikhawngaihthlâk lutuk deuhvin, Vanlalremi hi a duhsak lutuk lam deuh elo maw aw tih tur a ni.

Vanlalremi tan chuan kawng tluang leh chênnna in nuam a siamsak zêl a; harsatna a tawh lahin a pumpelhna a siamsak zel bawk a. A chângin Pastor fanu, nula nun tha tak Biakkungi ang te thiannah chhâr tirin, amah duhsaktu a siamsak a. Remi pa Pu Liana chu Phûlpui Kohhran Upa a ni a; a lo thih hnuin Remi chu Reiekah, a nu nuña, Pu Kawla hnенah a awm a, amah pawh chu kohhran upa tho a ni a. A thiannu Biakkungi nen Phûlpua an kal phei chuan a ni pasal, Pu Rochhingga chu tlawhin chhandamna thu an hrilh a, Bible-te chhiarin an tawngtai a. An riiru chuan he lai hmun tlawh tur hian Pathianin a tir a nih te an ring hial a ni. Chu bâkah Khawlungi hian he a thawnthua a changtunu ber leh tihlâr a tum ber, Vanlalremi hi, a hun laia Mizoten kan lo ngaihsân leh zah êm êm, Zosap inahte hmun siamsakin, pasal pawh Zosap in atang hialin a neitir a, a chan sântir kher mai. A ziaktu tawngkam takin, Mizo hrmeichhia, "Zosap in atanga pasal nei ngat hi an vân êm avângin, Remi a duhsakzia hi chu a lang chiang hle a ni," tih loh ruâl a ni lo. Remi pasal atâna a thlansak Malsawma lah hi tlengval sâng thlerh thlawrh, hmel tha si, sam kir deuh chhap a ni a; nulaho ngaihsan a hiawh bâkah, kohhran lamah a chailang hle a. Sikul lamah a sikul naupangte a kaihhruai dâñ leh a zirtir dansh pawh lal leh a khaw miuite fak pawh a hlawh bewk a. Remi tan chuan duhtiusâm a ni.

Heng aṭangte hian a ziaktuin chawimawi leh chawisan a tum chu kan hre thei a; Vanlalremi leh Malsawma-te nun leh inh mangaihna ang chi hi he thawnthu hian tihlān leh zirtir a tum, chu chu a ziaktu pawhin, “Christian Love Story” a tih chu a ni.

Heng a mi chawisan duhzâwngte nun hi duhawm taka a lan leh zual theih nan Kristian nun dan tur anga nung lote nun min hmuhtir a. Heng zinga a langsâr ber, Vanlalremi nen khaikhin tura a duh chu, Lalkhawthangi hi a ni. Ani hian pasala neih tumin Malsawma pawh hi a kherh nasa hle a; mahsela a kherh duhna rilru hi amah aṭanga chhuak vek chu a ni lo. A u Lalngura-te nupain mākpa kāmding neih an châk avangin, anmahni hriatpuina leh rem tihpuaa Malsawma hi kherh a ni a. An beiseina a lo puitlin tâk loh avang mai hian Lalkhawthangi leh Lalngurate hi hmusit leh dem theih pawh a ni bîk lo. An māwl a, a ngaihna hriatna tlachhamin, an duhna lamah an rilruin a hruai vak a, mualphona leh chhiatna an thleng a. A chhan bulpui ber chu Malsawma rilru hre hmasa hlei lova an duhna lam an bawh vak vang leh fin loh vang a ni. Lalkhawthangi hian thil ṭha pawh a hre ve na meuh mai, Vanlalremin Malsawma a hmangaihna a lantir hma hauhvin ani chuan a duhzia a lo lantir hmas& zawk nghe nghe a. Mahse, Malsawma hi Vanlalremi pasal atan ruat lâwk a ni miau va, chuvangin Lalkhawthangi hi heta a lan dan aia duhawm deuh zâwk hian lo awm ta pawh ni sela, Vanlalremin Biaktluanga, tlengval ṭha pangngai tak a hnu fêa a hnial thla ang hian, Malsawma pawhin Lali hi chu a hnial thla tho tho vang.

Amaherawhchu Lali tih fuh lohna ber chu Malsawma a thei lo tih a inhriat chian veleh, a thinrim hi a ni. Chutih lai tak chuan sipai chhuṭi lai, nula duh tak, Vanthanga'n thing phurh puiah a va sâwm ta si a; Lali chuan Malsawma elsên a duh ve rēng avangin, angel-te pawhin an dai ngam loh ram chu a dai phah ta a ni.

Remi leh Malsawma hi hlim tak leh induh thiam taka Kohhran dâna innei tura ruat lâwk an ni ang bawk hian, Lalkhawthangi hi nulât tiangvâl kawnga che sual tur leh, rethei taka awm tura ruat lâwk a ni a. A u Lalngura-te nupain an khaw sikul Headmaster Malsawma, a rilru pawh an hriat chian hleih loh, an kherhpui chiam maite hi, ani tleirâwl â tan phei chuan, riþru khâlh ngiltu leh zilhtu nei si lo, beiseina neih sâñ ve âwm rêng a ni. Hmeichhe beidawng a nih a, thinrim hrík thiâk nân Vanthanga ram a dai bawrh bawrh mai pawh hi eng emaw chenah chuan a thiamawm thei. Chu lovah Lali hi, Remi te, Biakkungi te, Lalchhungite ang hian rilru sawi chhuak ve mai tura thu sawi theihna pêk a ni ve lo. A nau pai pawh Vanthanga fa a ni e, tiin thu dik tak sawi mai sela chuan a dinhmun pawh a ziaawm deuh tur hi a ni a. Mahse, a ziaktu pawh hian, "A eng kherin nge maw lo mawlh a, a aikaih lo zawk an han puh tâk mai le aw," tiin, mihringte hi kan hriat phâk lohva thil awm, kan nun khua min râlsaktu râl anga awm mai angin, Lali hi a lantir a. Hei bâk hi chu dinhmun buaithlâk takah Lali a lo awm tâk dâñ hi hrilhfiah ngaihna a hre bik lo a ni. Lali hian a naupaiah hian tumah a puh duh lo nghal chawt mai a. Hei hian Lalngura-te chhungkua leh Lali tan mualphona zakhua a lo thlen ta a ni. Hetiang hian mihringte hi, a then chu mi mawluh a awm thin avangin, duh angin kan awm thei lo fo va. Lali pawhin, engati nge amah hmangaihtu awm chhun, Vanthanga kha a puh ngam tlat loh ni? tiin, a inngaihtuah ve hial a ni. A ziaktuin, "Hmeichhe lérh leh Pathian pawh hlau lo leh pawisa ngai lo a nihna chuan a tâwpah mualphona a rawn thlen a," tia a dem zui mai hi chu, Lali chungah hian a mun râwang lu deuh a ni.

Khawlikungi hian, mi tam beria a tak taka kan phâk loh, Kristian nun phurcchuak nun nei, nula leh tiangval inngaihzawn dan tûn leh khim taka inneih dâñ tarlan a tum a. Nula-ah chuan, a retheih leh fahrah lam chu tiem lohvin,

Vanlalremi ang hi Kristian hmeichhe awm dan tur, Malsawma ang hi Kristian tlangval awm dan tur niin a târlang a. Chuvangin a chawimawi ve ve a ni.

“Heti taka Remi rilru ɬhatna hi, Malsawma ngaih dan chuan, a sakhaw mi êm avang ni berin a hria a, a pasal lakah hian a rinawmin a fel si! Engpawh ti dawn sela, a pasal a râwn phawt a; a pasal a râwn hmain, Pathian a râwn hmasa ber phawt ɬthin a, Pathian râwn lo vin thil a ti mai mai ngai lo. Ni tin Bible chhiar hun a nei a, Bible hi a nun kaihruaitu berah a hmang lo ngai lo a ni,” tih te, “Malsawmate nupa chuan fapa duhawm tak mai an nei ta a; a nu leh pa ɬhatna lai lai a rawn chhun fu hlauh mai lehngthal a, a lo pian chhuah phat aṭangin a hmel a tha êm êm mai a ni,” tih te, “Malsawmate nupa hi zawng, Pathian malsawmna an dawnah hian an inhmangaihna a zual tial tial zawk a,” tihte leh, Remi, sikul pawh lût ngai si lo, Shillong-ah rei lo tê an awm chhûngin Vai ɬawng leh Sap ɬawng zira a lo thiam ta êm êm maite leh, a pasal awmloh laia telephone-a miin an rawn biakte pawh, “Thiam tak maiin anmahni ɬawng ang chiah chuan a lo chhang ve zêl mai,” tihte hi, thil dang ni lovin, duhthusâm sawina vek a ni a. Literature hi thil ni tak tak leh dik thei tak tak chauh sawina ni lo vin, duhthusâm puan chhuahna pawh a ni ve rêng a ni.

Lalin Malsawma elsên nan Vanthanga thing a phurhpui angin, Vanthanga'n Lali run luih nan Kangmun khuaa Lalite ɬhenawm nula Lalchhungi a han nei lui ve ngat te hi mi tawrawt thil tih a ni a. A nihna takah chuan thil sual tihte hi a nghawng tur hriat lâwk loh vânga tih, fin tawk loh vang a ni; tuarna leh brehawmna thlen thei, thil sual tih rah seng chu mi ang pangngai tan chuan duh chi a ni bawk lo. Vanthanga pawh hian a nupui chu a ngaihzâwn leh duh êm êm vânga nei a ni hauh lo va, chuvangin a ngaihsak teh chiam lo bawk a, nupa hlim tak pawh an ni ngai lo vang.

Malsawma u Vanlalbelä, tlangval tha leh invawng fel tak anga lang si, Aizawl dawkai hausa fanu Rinpuii'n a lo luhkhung

te, Phûlpui khua Rochhinga fanu nula Tluangi vai kal haw lam, Maubuang khaw tlangvalin a lo ru daih mai te, Tluangi laizawn Rosangi pawh, a pain laiphir a neih theih nan Lalmuana, zu in mi a neih luihtirte leh, Reiék khuaa Lalkhawthangi te thenawm Chalmawii sâwn pawm thu te hian Remi leh Malsawma nun duhawmzia hi a tifiah lehzual a. Kohhran mi, Upa Liana leh Upa Kawlate ang chhungkaw boruaka sei lian leh, saklaw ngaihsak vak ngai lo Rochhinga te, Vandailovate leh Lalngurate ang chhungkaw boruaka lo sei liante nunchan inan lohzia leh inpersan dan hi a ziaktu hian tihlan a tum bulpui ber a ni rêng a. Chu chauh ni lovin, Upa Liana thihsan bawngpui Remi'n a ni Thuamite ina a luhpui pawh hi, a neitute chhung tiphusuitu leh an mamawh phuhrûktu a lo ni leh zel te hian entir chu a nei ngei mai.

Khawlungi hian a thawnthuin a huam hun lai kum, Indopui pahnihna lai vela Mizo khawtlang nun leh rilru put hmangte kha a sawi chiang thiam hle a. Nula leh tlangval nun a sawite hi tun thlengin, ni tin a dikzia a takin kan la hmu reng a; amaherawhchu Remi leh Malsawma te ang kher hi chu hmuh tur an van hmêl hle thung. Remi pa lungphunah hian a hming leh kum te, a thih ni angte ziah tel a ni lo hian a tak a anna a ti bo deuh bawk.

A khât mawi tawka Mizoram mawizia leh boruak nawmzia, Vankhama te, Rokungate leh Liandalaten hlaa an chawi, pár mawi tinreng leh ri mawi tinreng, a hun takah inhme tak maia a han sawi tel leh zauh thinte hi, puan zeh mawi tak ang a ni a. A ziaktu hian mita hnuha thil mawi leh benga ri mawi (beautiful sights and sounds) hriat theihna a neih thatzia leh, a chhiartuten an ngaihruat theih tur leh mitthlâa an hmu theih tura a sawifiah thiamzia te hi ropui tak a ni.

... "Thal khaw êng leh ngirtlingte pawhin thing lenbuang zâr zai an han rem chu, Remi chuan a ngaithla reng a. Zâwipala thlân tiengah chuan khus a han hawi vel a, farluah te chu a pár vul châk mai si a. Meikhu sea phôt mai kârah chuan lunglêng

êm êmin hla taka tlâng dum pâwl ruih mai lo langte chu a thlir vang vang a” ...

... “Amah leh amah chu a inkhawngaihin, lungchhe takin a ɔ̄p chhuak ta phawng mai a. Nipui-thereng te lam pawh chuan a lungchhiatna chu an lo ɔ̄awmpui ve a ni ang e tih mai turin farṭuah zārah chuan an awrâwl theihtawp chhuahin an lo ɔ̄ahpui ve a, Chépchêp tak ngial pawh a bâng bik lo,” ...

... “Zotlâng ngaw karah chuan ngîrtling te, rengchalte leh Zobawlawlte chuan thing lenbuangah zaiin an lo awi bawk a. Furpui hnuua inher chhuaka mawi lovin ni êngte chu a mawiin, vân rântu tur chhûm pakhat mah awm lovin khua a thiang vûk mai a” ...

... “Vâu lenbuang zârah lungdi ɔ̄agnêm hrût chung zêla favâng ni êng mawizia hrilh ni âwm taka Mimsirikut pa hrâm kârh kârh, huihchhuk thli nem diai maiin a han chhêm her liai liai te” ...

... “Thlasik khaw thiang tih takah zân khaw thiang vul vul maia thla a han êngte chu a mawi êm êm mai a. Tân lui kam aṭang chuan Reiék tlâng ep chiah, Chhawrpial tlâng kham ruih mai te chu a lang chiang êm êm a. Buh kûng kâra chhawhchhi kung ɔ̄awi lii liaite leh tumthang pâr vul chêk maite chu zan thla êngah chuan a lang chiang êm êm a. Tân lui dungte chu a lui kawi ang angin thla chuan a chhun de sût a, hmuhnawm thamin a mawi a ni...”

He khawvel hi mi ze chi hrang hrang chênnna a ni a : kan tlâkna lei lung, seilenna chhungkaw boruak leh thian pâwlté azirin, a ɔ̄ha lam kawng zawha hum sualte pawh dai thei kan nihzia he thawnthu aṭang hian kan hmu thei a. A thu lai mu, a ziaktuin tihlan leh uar a tum ber erawh chu, “Pathian hmangaihtu, amaha ruat anga a kohvate tân chuan an thatna turin engkimin a thawsak ɔ̄hin” tih hian a khaikhawm fel hmêl khawp mai.

PI PU CHHUAHTLANG

*Pi pu chhuahtlang hlui a mawi mang e,
 Thar khaw chhuahtlângah dawnlung an rem;
 Se hran sa hrâng lu a tlar bung e,
 Than lai siamtu mi hrâng lêng fam awihna.*

Liandala avang hian “Pi pu Chhuahtlang” hi Mizo rilru leh ngaiantuahnaah hian hlui thei lovin a thar reng dawn a ni. He hla hi Serkawn sikul 1941 concert hla a ni a, Serkawn chanchin bu *Tlawmngaihna*, November 1941-ah chhuah a ni nghan a, chu chu a hmêl kan hmuh hmasak berna a ni.

Mizo rilruah a thar reng dawn a ni kan tih hian Liandala ‘Pi pu Chhuahtlang hlui’ hi kan din thar leh dawn tihna erawh chu a ni lo. Din thar leh ahnêkin kan Mizo khawsak dan leh nunphung inthlak danglam zel hian ‘Pi pu Chhuahtlang hlui’ hi kan hlat tial tial zâwk dawn niin a lang a. Amaherawhchu kan nun changkâng zel hian a hlat deuh deuh emaw kan tih lai hian, kan ngaihsak zual deuh deuhvin kan rilruah hian a lang fiah tawlîh tawlîh dawn si a ni. A chhan chu hnam dang finna leh literature-te kan zira kan hriat hnu hian kan hmabâk leh tihmâkmawh chu mahni inhriat chian leh inen chian hi a nih vâng a ni. A lettingin mi tam tak kan kal a, mahni pawh inbre chiang lovin hnam dang nun, rilru leh tih dante chu khawr takin kan zir hmasa a. Tûnah hian kan harh chhuak ïan mëk a ni. Mahatma Gandhi meuh pawhin English gentleman tih dante lain an thawmhñaw hâk ang chite a han inbel chhin tih kan hria; mahse a rilrua a bei theih lohzia leh nuam a tih theih lohzia a inhmu chhuak thuâi a, a pian leh mûrna munphung ken tel silhfen inbel chu hahdamthlâk leh engthâwlthlâk a tih

zâwkzia ama ziak ngei kan chhiar a ni.

A nih leh, Pi pu Chhuahlang hluiah chuan engte nge kan hmuu tia kan inzawh chuan, hengte hi kan thil hmuu thenkhatte chu a ni :

*Sehran sa hrâng lu a tlar bung e,
Than lai siamtu mi hrâng lêng sam awihna.*

*Thingte talhkhuang chawm iang an khawng ri,
Kulva mei chang sei bel lian an tar,
Mangpuan an zar dawnlung tlaitlânah,
Zawhzaw zo pa than lai puan diar tial nen.*

Kan hla siamtu Liandala ngei hian hmun dang ah pawh hetianga a ziak hi kan hmu : "Hman lai kan pi leh pute kawtchhuahah chuan pasal̄ha leh thangchhuah te hriat rengna lungdawh a awm thin a. Khaw thar kai hlim pawhin lung an dawh hman zel thin a ni. Lungdawhah chuan se lu leh ram salu tam tak an târ tlar a, lungdawh thlang lam bante chu sei deuhvin a kua an tilawr a, tah chuan chhuar angin thing pum an tâwn kham phei a, tah chuan an târ phei tuar thin. Puan hlap thar hlak bêl mang, insathahhnehna anga hnawih han nuau an zâr bawk a. Diar tial an zam a, thangchhuah puante pawh; tin, a lai banah zu bêl a lettingin a mawng do pawhtirin an târ a, vakul chang, tawn atâna siam, an ropui nia an tawn chu an târ tel bawk a. Lungdawh chu leikapui ang thing pum thîl phah khah a ni a, a chhuat laiah chuan talhkhuang pathum lai (thing, ui pum tiat aia tê, vawk thlêng anga ker, khuang anga vuak rîk) a vuak fung nen an dah a, mitthi khuang atan tih a ni. Kawng chhak lamah lung phun eng eng emaw ziakin an phun tlar bawk a. Lungdawh chu kawng thlang lamah kawng ânin dawh a ni. Kût hian chhâwng an hnawt a, mitthi chhûngten lungdawhah buh lum leh sa fawngah an hûng a, chu chu bâr khat lek lekin an thâm a, sa nêñ an inbarh a, chu chu nula leh tlangval chin an ni

ber...Pahote chuan zû an in a, an chai bawk a. Khuaa mi zawng zawngin in lamah sa ei tur an nei vek a, kût ni vâng thla chu Mizo hlim ber ni a ni. (Liandala : *Thu leh Hla*, December, 1978 p. 18-19.)

Tichuan, pi pu chhuahlanga kan thil hmuhte hi, thil dang ni lo vin, kan Mizo hnam pian leh mûrna, Rih dîl ram nunphung leh finnain a ngaihtuah phâk sâng ber leh ngaihsân ber thilte a ni a. Khawvel hnam fing hmasate ramah chuan a tlukpui (cultural equivalent) kan hriatte chu London-a Westminster Abbey leh St. Paul's Cathedral te, Italy ram Florence khuaa Santa Groce te, Rome khawpuia St. Peter's Square-te hi a ni, kan ti thei ang. British nunphung, rilru leh finna hmuh turnin England-ah kal ta ila, hmun pakhat thlan râlah chuan, khawn khâwm chawp ni lo, a tak tak thil hmuh kim theihna ber chu Westminster Abbey a ni. Lord Nelson-a pawhin kum 1798-ah Nile lui kama indona a hruai dâwn chuan, "Westminster Abbey-a phum ka hlawh tawh ngei ang," a ti hial a; mahse he thu a sawi hnu kum sarihmaah Trafalgar indonaa a lo thih tâk chuan England-a biak in ropui ber St. Paul's Cathedral-a hmun langsâr leh laili ber a lo hlawh ta zâwk a ni. Europe ram hnam finna leh kawng hrang hranga thil tha leh thil mawi an ngaihtuah chhuah thiamzia leh an hnam puitlinzia kan hmuh theihna chu Florence-a Santa Groce leh Rome-a St. Peter's Square-te hi a ni bawk. Héng Italy-a hmun pahnihte hi Renaissance avanga khawvel thim lo chhun êng hmasatute an ni.

Chutiang bawkin Galili dîl tui, Jordan lui, Rih dîl rama a lo luan luh hmaa Mizo rilru leh nunphung hriat famkim theihna ber chu, hmun pakhat thlan râlah chuan, Liandala 'Pi pu Chhuahlang' hi a ni. Hemi hmun aṭang hian thil a lang tamín a lang thui thei êm êm mai a; hnam dang la pawlh dal miah loh, Mizo chênnâ khua pawh a lang iar mai a. Chu chauh ni lovin feh kawng te, ran vulh te, kut

ni vâng thla hman dânte pawh a hmuh theihvek a ni. Thlân thlen hma zawnga kan pi pute nun zepui leh duhthusâm chauh ni lo vin, thlân piah ram khawvel an hriat dân pawh a chhui chhuah theih vek bawk a. He tlâng hi Mizo lunglênnna, mihring nun ram chuan theihna leh, mihring nun piah ram pawh ngaihruatnaa thlir theihna tlâng a ni.

Hla siamtú pakhat emaw ziaktú pakhat emaw phênah hian hnam pakhat leh nunphung (culture) pakhat a awm zel a. Literature kan buaipui êm êmna chhan leh ngaih pawimawh êm êmna chhan pawh hi, eng vang dang mah ni lo vin, mita kan chhiar theih, thu ziak phêna awm, nunphung chu hmuh fiah kan duh vang a ni. Heti a nih avang hian thu leh hla siamtute hi hnam darthlalang tia sawi an ni thin.

Hman lai Greek leh Rome culture leh an hnam finnate chu, a hun laia an literature aṭangin kan la hre thei reng a. Leirawhchan leh lung chang chher lian pui pui, sâng tak taka an tiante leh, sailungvar ban lian pui pui an phunte chu a lo chim a, a lo tliah sawm vek tawh hnu pawhin, an chanchin chu an literature chuan a la sawi reng a ni. Hemi khawvel kal phung, mi dang zawng aia sawi fiah thiam, Shakespeare-a pawh hian, a thu ziakte daih rei turzia, ṭawngkam tlem têin, hetiang hian a lo sawi chhuak zeuh niin kan hmu :

*Not more, nor the gilded monuments
Of princes, shall outlive this pow'rful rhyme.*

Sonnet No. LV

Dr. Samuel Jason-a chuan *Prefaces to Shakespeare*-ah, Shakespeare-a thu ziak aṭang ngawt pawhin a hun laia an khawtlang nun leh sawrkar inawp dan, an economics dinhmun zawng zawng chenin kan hre fai vek thei a ni, tih a sawi a. Chutiang bawkin he kan hla ngaantuah lai, *Pi pu Chhuahlang aṭang hian kan thlahtute khawtlang nun leh*

inkaihhruai dan, an economics dinhmunte nen kan hre reng thei dawn a ni.

America mi thiam, mihring rilru kahmgang taka chhui leh zir mi, Carl G. Jung-a chuan, a thu ziak *Archetypes of Collective Unconscious*-ah chuan, mihringte hian kan thlahtute khawsak dan leh nunphung kan kalsan a, eng ang tluk pawha nun sânga kan nun hnu pawh hian, kan inhriat miah loh hian kan thlahtute nun chu a hnam pum hian kan la keng tel zel a ni tih a sawi a. Keini Mizote pawh hian kan inen chian leh thin chuan, Carl G. Jung-a sawi hi a dikzia kan hmu a ni.

Hebrai Bible chuan mihring hmasa ber chu taksa leh rilru puitling saa siam niin min hrilh a. Amaherawhchu kawng danga kan hriat leh dän chuan, tün lai khawvela hnam fing ber berte pawh hi, nun dan leh khawsak dan mâwl tak aṭangin zawi zawia lo changkâng chho zel an ni a. Heng hnam fing anga kan ngaihte rilruah pawh hian an thlahtute nun leh rilru chu a la bet tlat reng a ni. An hnam rilru leh zepui hre chiang tur chuan an pian leh mûrma chhui a ngai a, a lér aṭanga thuai mai chi a ni lo.

Mihring nun hi a lo than a, a lo changkân deuh deuh hian thil hriat thar leh nuna lâk huh thar neih belh zel a lo ni a; nun dan hlui chu ennawnin thlit fîm nawn a ni fo thin a. A hlui thenkhat chu a tharin a luahlân thin bawk a ni. Hnam dang nun leh rilru kan zira kan nuna kan lo lâk huh rual rual hian thil tha leh tha lo leh, thiang leh thiang lo tehnate pawh kan thlák nghâl bawk thin. Tichuan kan nun chhungril hi a pâwnlângah incheina hawh khâwmte hian a tuam bo ta vek thin a. Mahse kan nun mu tak chu kheh chhuaha pâih theih tak tak a ni lo. Chutiang bawkin pi pu chhuatiang hlui a kan thil hmuh, vawiina kan tehna hmanruaa kan teh chuan kan hnam ât laia kan lo inkhualtelema tih mai tur thilte hi, theilinghîh phâl emaw, hmuhsit chi emaw pawh a ni lo. A chhan chur heng tel lo hi chuan Mizo nûn

hi a kim thei rēng rēng lo a ni.

Hebrai Bible-te hi Mizo ɬawnga letling ᲁha lehin, chhiar chhiar ᲁthin mah ila, mihring hmasa ber hmeichhia leh mipa nun a sawite leh Mizo nun hi a inhlat êm avang leh, inzawmna rēng a awm loh avangin, Eden huanah te hian lunglēnna rēng kan nei thei tak tak lo a ni. Khaw thlang mi ngoho thu leh hla leh an thil tum rik chhepccher chi hrang hrangte hi hawhkhāwmin an lem changa kan hmanhlelh êm êm tâk hnu pawh hian Mizo lungkuaitu leh lunglēnna tak chu C. Thuamluiaia'n Zoram Nipui-a a sawi, romei kâra muang taka khuangpui ri chhut chhut kâra seki inkhawng ri buk buk, ngaihrautna benga kan la hriat theihte hi a ni zawk a. Hnam dang hmêl lan ve lohna, kan pi pute chênnra ram pawh kan mitthlaah hian a la lang fiah kiau reng a ni.

*Lêngin chhāwng an hnawt chûn hrailêng nen,
Sa leh buh changrum bawhartui nen;
Zua tin an hlim vângkhawpui an lâwm,
Tlai ni nêm duai lênkâwl thiang kârah hian.*

*Tlai ni tla sen siar sûl lo an hmuak,
Hrai tin an ngîr e dai lungrâwnah;
Chûn an haw, zua haw, zalêng an haw,
Sûl tum chalngêng hnutianga'n sûl a haw.*

Liandâla “Pi pu Chhuahtlang”-ah hian thil dang chhinchhiah tur kan la nei. Romantic literature-in a ngaih pawimawh leh uar ber chu, mihring inan tlânnâ leh mi narân nun târlan te, kan tlâkna leilung, hnîm hrîng leh thlaite nena kan inlaichinna nghehzia puan chhuaht te hi a ni. Hêng hi he hlaah pawh hian kan hmuh vek avangin kan hnam nunphung leh zia-râng chham chhuahna, kan Mizo literature-a hla kumhlun leh pawimawh - *Jocus classicus* - a ni reng dâwn a ni.

Mihring duhâmnâ leh mahni hmasialna hi a lo lian deuh

deuh va, sum leh pai ngaihtuahna leh khawvel thila intlânsiakna hian kan nun leh rilru a ei chhiat mêt lai hian rilru mawl, thianghlim leh hahdam tak neih leh theihna tur chu kan nun hlui mawl leh tha, kan chênnna hlui thlir lêt leh thin hi a ni tih he hla hian min hriat nawntir leh thin.

*Pi pu chhuahlang hlui hi thlir ve u,
Thuvate lailén tluang lam zawhna;
Changsial an ngîr dai phullêng an mawi,
Sâwmsâng láwr tûr tuan rôl an her liamna.*

tihte hian, Wordworth-a nature poetry rawng a kai hliah hliahin, han chhiar hian kan rilru ngui tawh hnu pawh a tihar sawng sawng a; kan naupan laia kan inselemchaihna leh dai vahna hmunte kha ngaihruatnaa fang lehin, sava chiar nak nak rite pawh kan han hre nawn leh a; chu chuan min tihlim a, kan tân khawvel hi siam tharin a lo awm leh thin a ni. Matthew Arnold-a'n *Memorial Verses*-ah Wordsworth-a nature poetry-in rilru la tihharh theih dan leh nun thar min pêk theih dan a sawi kan hmu a; Liandâla hlaah pawh hian chu chu a dikna kan hmu thei a ni.

*He laid us we lay at birth
On the cool flowery lap of earth,
Smiles broke from us, and we had ease;
The hills were round us, and the breeze
Went o'er the sun-lit field again;
Our foreheads felt the wind and rain
Our youth return'd; for there was shed
On spirits that had long been dead,
Spirits dried up and closely furl'd,
The freshness of the early world.*

- Arnold's Memorial Verses



HUN HI

*At last he rose, and twitched his mantle blue;
Tomorrow to fresh woods, and pastures new*

- Milton's *Lycidas.*

Hun hi thil awm ngei, mahse mita hmuuh theih loh leh kuta khawih theih loh, thâwm emaw rim emaw pawh chhui tur leh hriat tur nei hauh si lo hi a ni a; a lo awm ṭanna leh tâwpna tur pawh hi mihringte zingah hian hria leh chhui thiam kan awm lo vang.

Kum khat chhung hian December thla hi hun chungchâng thu sawi leh ngaihtuahna hun a ni fo. Kum khat hun kan lo hman tâwpa kum thar kan han chhiar ṭan chiah phei chuan rilru phâwk'lékna leh hlimna, mi tam tak tan thil kal tawh hnu leh thil awm tawh lo thlir lêtna hun a ni fo ḡhin. China-ho chuan kum tâwp dawna nau piang leh kum tir lama nau piangte pawh, an kum chhiar danin, ang khat veka upaah an ngai a. Tichuan December thla a lo ral hi chuan khawvel mihring hmun thuma ṭhena hmun khat vel hi chu kum khatin kan lo upa ta ti ila kan sawi sual tampui lo vang.

Mihringin a chhui lêt phâk theih tâwp aṭang leh, thu leh hla hi mihringin a lo siam ṭan aṭang tawhin, vawiin thleng hian 'hun' hian mihring rilrua ngaihtuahna thûk ber hi a luah fo va. Chuvangin hun awmzia leh mihring nun hi a inlaichin dan chhuina leh ngaihtuahna aṭang hian mi tam tak chu mi thil chik mi leh fing tia sawi turin an lo awm phah fo ḡhin a ni. Amaherawhchu hun kal hmang leh sawi dan leh puh dan a inang lo thei hle a ni. Kan Mizo hla siamtu pakhat chuan hun kal taa thil mawi leh duhawm a lo hmuh ḡhin, awm tawh

lo leh ral hlen ta te chu ui êm êmin,

Hun lâwmawm a kiam zel, aw, mi tam tak,

Kan nun pâr mawi a lo chuai,

Hnam tin hian hun kal hnu,

Ngaih nâ kan ti êm e

tiin, a ngaihtuahna a sawi chhuak a. Chu mai pawh chu duh tawk lovin, hun tha leh lâwmawm a lo hman tawte chu a ngaihzia a lungchhiatthlâk thei ang bera chhamin,

Nun hlui ngaih kan hêr,

Hmân lai kan ti vawng vawng

a ti hial a. Hei hi a beisei bo zâwng leh a lungchhiatthlâk ang ber zâwnga hun thlir dan pakhat chu a ni ngei mai. Amaherawhchu hei hi thlir dan kawng khat chauh a ni ang bawkin, thlir dan dik famkim a ni hauh lo bawk. Hei aia hun thlir dan duhawm zawk chu,

Nun hlui ngaih a sâwt lo,

Kan hma lam i thlir ang.

Hnam tin tan hun mawi tak,

Lênkâwl ni a lo chhuak.

tih hi a ni. He bla phuahtu leh “Thil hluite chu a ral ta, ngai teh u, a lo thar ta!” titu hi thlir dan inunau tak nei mi an ni ang tih a rinawm. Hetianga thlir dan hi, thlir dan duhawm zawk a ni chauh pawh ni lo vin, ‘hun’ kan thlir dan tur pawh a ni rêng a ni.

Heta kan sawi tâk leh tawng hman dan atangte hian, hun hi thil che reng ang leh, mihring nun leh khawsak dan te pawh hi khawih danglam thei tura thiltihtheihna nei anga ngaihraut a mi thin tih kan hmu a. Mihring nun leh sawrkar leh hnam roptuna te pawh hi hun hian liampui ta luah luah ang tein kan sawi thin bewki. Hun’nen hian intaichinna eng emaw tak neie mihriatma hi kan neih avangin, a chang chuan,

"Hun ka nei lo, ka neih hunah kan inkâwm dawn nia," ti tein kan inthlah thin a; a châng chuan, "Hun leh tui lianin tumah a nghâk lo," kan ti bawk thin. A châng leh mihringte hi hun hman tur engemaw chen chu pêk ni theuh angin kan insawi thin bawk.

Amaherawhchu a nihna takah chuan, hun hi ral ve lovin a awm ngaiin a awm reng a; mihring leh kan vela thil awmte hi kan ral thin a ni zawk. Chuvangin mihringte hian 'hun ka nei' kan tih pawh hian, a nihna takah chuan, kan neih theih tak tak emaw, khék theih emaw, khâwl theih emaw pawh a ni lo; khawhral theih emaw, siam theih emaw, tihtawi theih emaw, pawh sei theih emaw pawh a ni lo. Tihthianghlim theih emaw, tihbawlhhlawh theih emaw pawh a ni lo. Ral thei leh kiam thei anga ngaihna lo awm thin hi, mihringte chak lohna leh tlin lohna vâng, hun tehna tura kan thil hman te pawh a tlo thin loh leh kum hlun tak tak loh vâng a ni. Hun hi thil nghet, a awm pangngai renga awm, kiam chuang lo leh kâm chuang lo, mihring leh ram sa chhiar sen lohnen hmang leh khawhral nasa hle tawha kan inhriat hnu pawha a tam lam leh a nih dan la ngai reng a ni. Mihring nun nghet lo, daih rei lo leh kiam thei leh ral reng thin hi hun awm danah kan bel thin zawk a ni.

Mita kan hmuh theih, ni leh thla leh arsi kan thlir dan atang te, sava hrâm kan hriat leh thing hnah tla kawlh leh chawr no kan hmuh atanget hian mihringte hian hun bi kan chhiar a, a hmingte pawh kan vuahin kan then hrang thliah bawk a. Heng thil, a lan dan inthlâk danglam reng kan hmuh thin te hi tam tak chu a ngai hlir kha lo lang nawn leh mai anga sawi theih a ni nain, a thar hlir hmu leh hria angin kan insawi thin zâwk a ni. Kan awmna lei hi a inher rengna atanget hian, thil tam tak chu inher liam leh inher chhuak angin a lo awm phah a; a thente chu science thil anga kan zir thin te, a then chu geography anga zir chi te, a then chu history anga zir tel reng te pawh a ni a. Kan vêla thil awm, kan hmuh theih leh

hmuh theih loh, mihring nun leh ram sa nun, thing leh thlai nunna leh awm dan te pawh hi a inbânlet reng a ni.

Tichuan khawvel ram tam takah chuan 'tlai lam' kan tih hian 'ni a tla' kan ti a; mahse ram thenkhatah chuan 'ni a chhuak' an lo tih hun a ni tlat thung. Zan a rei ta e kan tiyah kan mu a, darkar sarih emaw, darkar riat emaw vel hnuah kan han thangharh chuan ni êng kan lo hmuh tawh fo ñhin kha, la hmuh ngai miah loh, ni thar hmuhin kan hmu leh ñhin a ni. Amaherawhchu Eskimo ramah leh chhim tâwp leh hmâr tâwp ramahte chuan ni thar kan chhiar zât leh hmuh zât hi chhiar tur leh hmuh tur a awm ve lo; thla tam fe fe chhung inzawn zata ni a lan reng theih avangin a hlui leh a thar tia han sawi hran vakna tur a awm lo. Tichuan, 'nun hlui' leh 'hun thar' tia kan han inchham lunglên emaw, inngaihtuah lungchhiat emaw te hian, kan rilru hlim leh hlim loh leh, kan hrisel leh hrisel loh azir tein, thil leh khuate hi kan hmu êngin kan hmu thim ñhin mai a ni.

Kan kum chhiar dan pangngaia kum khat chhunga ni hnuhnung ber, December ni 31-na pawh hi, ni dang ang bawkin a lo thleng ñhin a; a tûk January ni hmasa ber, kum thar ni kan tih pawh hi ni dang ang bawk thovin a lo thleng ñhin. Hetah pawh hian hnâm thenkhatte chuan hun leh kum chhiarna an lo nei hrang nuk mai bawk. Kum hlui leh kum thar tia kan chhiar ñhin dan hi Pathian hnâm thlan Juda-hote chuan kan pawm ang hian an pawm lo va, kum chhiar dan hrang an nei a; India ramah pawh hian hman lai ata tawh, vawiin thleng hian, kum chhiar dän hrang kan la nei reng a ni.

Tûna kan hman dan tlangpui berah hi chuan December ni 31' zan lai dar 12 pelh veleh 'kum a thar ta' kan ti a. Hei pawh hi kan awmna hmun leh sana en azirin kum thar hun hi a inang lo nuk a ni.

India ramah hi chuan a chhunga mi chêng zawng

zawngten kan hun hman hi a inthuhmun vek avangin, kan sana kan herh mil vek theih chuan, kum thar hi a rualin kan hmang ɔ̄an thei a ni. Amaherawhchu America ramah chuan chutiang a ni ve lo. An ram chhungah hun hrang pali an siam avangin, ram khat chhunga chēng mah ni se, an kum thar hun a inthuhmun kim thei lo. December ni 31 zan lai dar 12 a han pelh chiah hian, New York-a mite chu kum thar lawmin an sahāwk nasa hle a, mahse hetih lai vēk hian a ram laili leh California lamah te chuan kum thar lawm nan ei leh in tur an la ngaihtuah dawn chauh a ni.

New York-a miten kum thar chu darkar thum an hman hnuah California-a mite chuan an hmang ɔ̄an ve dawn chauh a ni a; thlawhna chak takin zin thei ta ang ila, America ramah mai pawh vawi hniih vawi thum lai kum thar lawmnaah kan tel thei dawn a ni. Hetianga han chhūt hian thil hlui leh thil thar tam tak, hunin liampui leh her chhuahpui anga kan sawite hi, mihringte hian kan liamtir leh her chhuahfir mai zawk niin a lang.

Zirtirtu hna lâkna tur a awm a, a diltu zinga pakhat chu a inlanna tur hun ruatah chuan a lo lang thei lo va, ani pawhin a inlan hun tur chu a hre reng a ni. A lo theih tâk loh avangin 'a hun' chu liam taa sawi theih a ni. Amaherawhchu thuneitu chuan a hnuhnung berah ko lut ve leh ta ang sela, hun chu an chelh dinsak emaw, an koh kirsak emaw, tihna a ni lo. Hna diltu, beidawng taka haw mai tur an kohkir lehnaah chuan hun kan ngaihruat ɔ̄thin dan hi a bet tel ve a; hun dang nei leh ang emaw leh, hun pēk leh ni ang emaw tein kan sawi ɔ̄thin a ni. Thuneitute chuan hna diltu hnenah chuan hun pe theiah an inngai a ni thei e; mahse damlo hnuk chat lai mēk hnenah chuan thuchah sawi nan emaw, thu zawh chian nan emaw hun pēk tum ta ang sela chu chuan awmzia a nei thei ang em le?

He khawvel kan chēnna hi hun khawvel a ni a, hetah hian mihring hi lem chang angin kan inlan chhāwk a; kan chanpual kan tih theuh lai leh rilu put hmangte azirin hun awmzia nia kan hriat pawh hi a inthlāk reng a ni.

A tāwpah chuan, kan thil tih leh nun azirin hun te hi ngaihhlutawm lo, ngaihawm leh ngaihawm lo thei a ni. Thil zahthlāk leh tha lo nia kan hriatte kan lo ti ḡhin a nih chuan chumi kan tih lai hun chu han thlir kirin ngaihawm lovin kan hre ḡhin. Hun kha a tha lo a ni lo va, kan thil tih a kha a tha lo a ni zawk. Thil tha lo kan tih lai khan mi tam takin thil tha an lo ti thei tho a ni. Chuvangin thil tha leh thil duhawm kan tih pawhin a huna kha a that hrarpa vang ni lovin, kan thil tih khan hun chu a chawimawi avang zawkin duhawm angin a lang mai a ni. A hun lova thil tih nia kan sawite pawh hi kan tih loh tur zawk kan tih sawina a ni.

Hun hian tumah, kristian pawh, kristian lo pawh, duhsak bik emaw, tan bik emaw pawh a nei lo va; mi hāng leh mi ngo pawh a thliar hrang hek lo, mi lian leh mi tē, mi hausa leh mi rethei pawh. He khawvel, khel mual zau tak maia kan inkhelh lai hian, hun hi a hāntu, tan lam leh tan lam nei lo angin a awm reng a, a hmaah hian kan inlan chhāwk reng a ni.

Mihringin hun bi chhiarna leh tehna kan siam anga hun a lo inthlāk kual ḡhin hian beiseina leh tum ruhna thar, huaisenna nei chunga kan hmabaka thil tih tur kan neihte hi kan tih zel theih a tha ber a. Chutianga beiseina rilu put theih chu taksa hriselna leh nun hlimna, hlawhtlinna leh hun tha nei renga inchhāl theihna a ni.



KRISMAS HLA

*Sebawng ina a piang ta,
Ran chaw thlenga an mut tira,
Beram vengtute'n an bia a,
Mi fingte'n an lo be bok a.*

Hla Bu (1899) No. 14 ch. 2-na.

Hun bik nei hla kan neih zingah hian kan Krismas hlate hi, a phuah chhan nena inphû rēngin, a ropui ber a tling a ni. Amaherawhchu a chunga târlan, kan Krismas hla hmasa ber hi chu a hria pawh kan awm tawh mang lo a ni.

Hman lai ata vawiin thleng hian Isua pian thu hian hla siamtute rilru leh ngaihtuahna hi a hîp reng thin a, Kristian leh Kristian lote beng pawha hla mawi leh ri mawi chuai thei lo kan neih phah thin a ni. Krismas hla thenkhat chu Isua pian thu thlûrna ni lêm lo, Krismas hun bâwr vela mihring rilru leh nunphung phuahna a ni a. Thenkhat chu Krismas hun lai vêla kan chênnâ khawvela kan thil hmuh thinte'n lung an tihlén dân phuahnate a ni bawk a. A tam zâwk erawh chu Isua pian thu Bible-a kan hmuh hlaa *sermon* sawina a ni. Khawvel sakhaw hrang hrang hmuchhuaktute pian thu hi kan chhiar fo thin a. Amaherawhchu Isua'n a pian ni lawm a hlawn ang tluka nasa hi sakhaw dang hmuchhuaktute zingah, pian ni lawm hlawn nei an awm kan la hre lo. Chu lo lehah chuan Isua pian thu hian Mizo rilruah chiah phei chuan a lung tilêng zâwngin hna a thawk a; Krismas hun hi him hun a ni bawk nân, lunglênnâ hun, chhungte thi tawh ngaihtuah chhuahna hun leh hmun hranga awm thiante hriat vawng vawngna hun a ni bawk. Hun kal tawh leh nun hlui thlir kira lunglênnâ hun a ni.

Kristian sakhaw boruaka piang, seilian leh chêng ve reng, Shakespeare-a (1564-1616) hian Isua pian lam thu rēng rēng hi hlaah a phuah miyah lo va. Hla thlûk nei, a saka sak chi phuah a neih awm pawh kan hre bawk lo. A sakhaw mi vak loh vâng emaw, a hun lai hian Kohhran hravuitute leh Pathian thu rawngbâwtute chauh lo chuan zalêñ takâ Pathian hla hi phuah an lo chin loh vâng emaw pawh a ni thei e. Hetih hun lai hian England-ah pawh Latin tawng hi Pathian biak nân an la chelek hle tih kan hria a. A tuina leh lunglênnna lam chu ni sela chuan, a thlûk siam thiam lo a nih pawhin, a thu phuahin mi dang a thlûk siam thiamte siamtir tûr chu a haihchham loh hmêl hle si a ni. Shakespeare-a hun lai hian England-ah pawh Krismas-te chu an uar êm êm a, a drama ziakte pawh Krismas lai velte hian Lalber hmuah an chhuah thin a ni. Amah-crawhchu Krismas chungchângah hi chuan a ngawi hlen ta a ni. Chuvangin hla phuah thiam hmingthang e ti lovin, Krismas hun, hla mawi leh ropui boruaka a lén vél lai hian, Shakespeare-a hla ngaihthlak tur a awm ve lo a ni.

English literature-a hming lang dang, Shakespeare-a dawtuu nia mi tam takin kan ngaih, Milton-a (1608-1674) crawh chuan Isua pian thu hi hlain a phuah a, (*On the Morning of Christ's Nativity*) mahse a thlûk nei lo leh sak theih loh chi a ni.

G.F. Handel (1685-1759) Sepho zinga ri mawi tum chi phoah thiam bera ngaih chuan Isua chanchin bik sawina Zâwina; Isai lekhhabu atanga Thupuan thlengin, a chêng duh zâwng zâwng a thian chhuahte chu a thlûk a siam a. Chung hlate chu a hlâwmia a hmingah *The Messiah* tiin a vuah a. Isua pian hla a phuahte chu khawvel hla mawi barté zinga ckhar tel a la ni reng a ni.

Khawthlang ramah chuan Krismas dawn vel hian hmun tem takah hla tem inkhwimma buutsaihin *The Messiah* bu chhunga hla zawng zawngte hi a bull spring a tiawp thlengin

zaipâwlin ri mawi tum remin an sa chhuak thin a. Tun thlengin Sapho chuan *The Messiah* hi ri mawi rem chi-ah chuan a ropui bera an neih a la ni reng a ni. Pathian Fapa mihringa lo piang hi a ropui ang bawkin, finna sâng bêr tawngtu Mi ngo hnam zinga ri mawi phuah thiam ber rilruah pawh hmun a lo chang hi Krismas ropuizia tilangtu a ni.

Zo tlâng sânga chêngte hnenah hian Chanchin Tha a lo luh hlimchhâwnga kan hla bu neih hmasak ber, hla 18 chuanna, kum 1899-a chhutah chuan, kan hla neih hmasak ber, Sap Upa leh Pu Buangaten Mizo hnena Isua chanchin an hrilhna -

*Isua vanah a om a,
Khawvelah zuk lo kal a;
Mihring angin a lo om.*

tih lai chângte hian Krismas rawng a kai viai viai chauh va. Isua pian hla tak tak, kan Krismas hla hmasa ber erawh chu pakhat (No. 14-naah) kan hmu a, hetiang hi a ni :

*Sebawng ina a piang ta,
Ran chaw thlenga an muttir a,
Beram vengtute'n an bia a,
Mi fingte'n an lo be bok a.*

Tichuan Krismas hla hian kan hla bu neih hmasak berah pawh hmun a lo nei ṭan tih kan hmu a ni. Amaherawhchu kan Mizo pi pute'n mumang lam pawha an lo la man ngai loh, sakhaw thar danglam tak, kan rama rawn put luh a lo nih khan, a lo dawngsawngtu, kan mi hmasate khan, a rawn pu lüttu leh a neitu chan chang Zosapte mitmei kha hun eng emawti chhung chu an vân avangin, kan hla thiamte pawhin kan hla thu dik tak hmangin Krismas hlate hi an lo phuah ngam lawk lo a ni. Hun a lo kal zel hnu chuan Sap hla kan ṭawnga lehlin chawpte chauh chu hlaah ngaih theih loh hun a lo thleng ta a. Isua pian thute pawh Mizo chuan hlaah a lo chantir thei na meuh mai

rēng a, R.L. Kamlala pawhin, "Saphote phuahtirtu Pathian bawk kha a ni, Mizote phuahtirtu pawh hi," tia tun hnu a sawi chu a dikzia kan hmu ta zel a ni.

Tichuan, Patea (1894-1950) Kristian hla kan Mizo hla thu hmanga phuah hmasa ber zinga tel chuan Krismas hla a rawn phuah ḥan ta kau mai a. Chuta chin chu Mizote tan Patea tel lova Krismas hman tih hi a awm thei ta lo a ni. Patea hian hla 55 a phuah a, chung zinga 4 chu Krismas hla a ni a. Krismas hla, Mizo hla thua phuah hmasa ber chauh ni lo vin, Mizo rilru hawl kim leh phawk chhuak veka Krismas hla phuahtu a ni bawk. Thekte tiāng chhak lama Lurh tiāng lama tlaizawng pâr vul chuk mai chu a han hmuhiin -

*Lal pian hun pangpar a vul leh ta,
Thinlai mu hnu lunglēn a kai tho ve,*

tiin, a han chham ta mai a. Hei hi Krismas hlaa tlaizawng pâr lan hmasak berna leh, Mizo rilrua tlaizawng pâr leh Krismas a lan kawp ḥanna a lo ni ta a ni. Thlarau mita a thil ente chu a hmu chiang hle niin a lang.

*Bawng in tlawmah ka Lal riangvai tak saw,
A chūn riang Marin a chawi e,*

tiin, min hrilh a ni. Patea hi a hlimawm zāwnga thil thlir mi a nih avangia, a hla pawh hi, 'pâr' leh 'ēng'-in a kâp de chiai reng a. A Krismas hla 4-ab pawh hian 'pâr' pasarib leh 'ēng' panga sawina kan hmu a ni. Isua pian hun lai velah rilru hlim tak leh lunglēng tak maia a han hawi vēl chuan tiāngte pawh a hmu mawi zo vek a. Zo tiāng sāng atang hian Judai ram tiāng a ngaihzie leh agaihruatna mita a hmuh dante pawh min hrilh ngabal a ni :

*Ngaih a nuul e, Bethlehem tlangpui,
Tsei ni na ḫeng Mrukawl a kham riae e.
Krismas hian, boruak leh ni engin Mizo rilru a khawih*

theihzia bâkah, Isua lo pian chhan leh mihringte tan a hlutzia Patea hlate hian a sawi fiah tha tâwk hle a ni. 'Boralna rama lêng tawh hnu kha, Vân khua min chantir a' tihte hi Thuthlung Thar thu laimu nen a inzâwn a. Hei aia sawi ropui lehzual ngaihna hi mihring ṭawngah chuan a awm tawh lo. Krismas hi Mizote hriat phâk lohva lo la awm chu ni ta se, Patea pawh hi Rih dîl ram lam thlir ve ḡhin tur a ni. Amaherawhchu a hun laiah pawh Mizote tân "Bethlehem tlâng a lo vul" tâk avangin, Krismas lo thlen avanga Mizote nihlawhzia leh chan ḡhat tâkzia hi hlaa chawiin,

*Hmanah pi leh pute'n an hmuh phâk loh,
Saron pâr tlânin kan lêng e.*

tiin, a au chhuak a. Hei aia sawi nawm lehzual ngaihna hi mihring ṭawngah chuan a awm tawh lo. Hei hi kan Mizo Krismas hlain a chîm sânnâ lai ber a ni bawk.

Sap hla lâr tak *White Christmas* tih phuahtu ngaihruatna hian America khawmualpui pawh a pêl lo va; December thla Krismas hun, thlasik vûr tlâk laia mihring nun leh khawsak dân bâk engmah sawi pawh a nei hek lo va; *Jingle Bell* pawhin Bethlehem a thleng pha lo va, panpui pawh min tum hek lo. Zo pa erawh hi chuan Krismas hmanna túra hmun duhawm ber pan turin min sâwm a ni :

*Aw túnah hian i kal ang u,
Hmun khawhar lam chu i pan zel ang.*

Amah B. Lalthangiana tih dan takin, "Patea hian hla dang phuah nei lo vin, Krismas hla pali chauh pawh hi lo phuah ta ni se, Mizote tân chuan malsawmna a tling tham rēng rēng a ni" ti ve ta ila, kan uar lutuk a ni lo vang. Sap hla lehlin *Hla Buu* mite tih loh chu Krismas hla nei lo va kan awm laia hetianga a lo phuah thei hi eng vâng dang mah a ni lo va; Kamlala'n min hrilh angin, Saphote phuahtirtu bawk Pathian khan a phuahtir vâng chauh a ni. Patea Krismas hlate

hian, a phuah hlim atangin, vawiin thlengin Biak Inah leh lēnkhawmna inah an lât a, Krismas lēnkhawm tlaivar tiawlsantu leh tinuamtu an ni reng. A in mite chuan uain chu a rei apiang an duh thin; a rei chu a tha zawk an ti si a, Patea hlate pawh hi chutiang reng tur chu a ni.

Thalai Hla Bu No. 122-naa “*Ngai teh an ri a va mawi ēm!*” tih hi Patea phuah anga tārlan a ni nain B. Lalthangliana’n Patea hla a khawn khāwmah chuan a tel ve lo. Hetah pawh hian chhiar tel a ni lo.

C.Z. Huala (1902-) Mizo hla thu hmanga hla phuah hmasa pawla tel hi chuan Vān ram ngaih hla deuh hlir a phuah a, Krismas lam emaw, Bethlehem lam hawi emawa hla phuah a nei lo.

R.L. Kamlala (1902-1965) kan Mizo hla thu hmanga hla phuahtu hmasa zinga tel erawh hi chuan Krismas hla pakhat chiah min hauatchhiah a ni. Kamlala hi chu a dam chhūng zawng hrehawmna leh natna tuar reng, hlim ni hmel hmu ngai rēng rēng lo a ni a. A hla te pawh hi lungngaih, buai leh rūmna thu hlir a ni a; a tiāngkawmna leh khaikhāwmna chu beiseina a ni chauh mai. Chutiangin a hlate hi, lungngaih chhām, tahna leh thim chhah takten bāwm khat tlat mah se, chumi kārah chuan a beiseina chu ni êng angin hmu hūrin a awm thei reng si a ni. Chutiang dinhmuna a awm reng lai chuan Isua lo pian thu hian a rilru lungngaihna chu chhāwk zāngin hlimna a rawn thlen a, tichuan.

Hlimna ni ropui chu a êng.

Zantiang hi kāwirāwnah a liam.

tih, hla pakhat chuai thei lo hi, a rawn chham chhuak thei hrem a ni. Chhāmdante lo piang chu a ropui thei ang bera chawmawma hian a dukt a, “*Thinking a lamah hawnlla, Ro thil dang a ngai tanh love*” tih hi, a tangkawmna chu a ni.

Kristian Hla thar Buah *Khawvelah hian lal tam tak an lo piang ta a* tih, Kamlala phuah anga tarlan hi, amah Kamlala'n a hla phuah a ziak khawmnaah a tel ve loh avangin a phuah a nih a rinawm lo va; *Ngaiteh an ri a va mawi êm* tih pawh, Patea phuah emaw Kamlala phuah emaw ni tura târlan hi, Kamlala kut chhuak zingah a tel lo bawk.

Lêng Lal Saihnuna (1896-1949) hian C.Z. Huala angin, Krismas lam hla emaw Bethlehem lam hawi zâwngin emawa hla phuah a nei hauh lo bawk. Saihnuna hlate hi nun hlui ngaih leh lunglènna avanga ɻahna hla deuh hlir a ni a. Mihring mihrinna rilruin Isua tuarna leh lungngaihna te pawh hi hlain a chham bawk ɻhin a. Amaherawhchu a Krismas hman hun tur leh hman dan tûr ve thung chu -

*Rangkachak tuallai ka thlen chuan
Bethlehem Lal nau ka awi ang*

tiin, a sawi hla dahi mai a; hei bâk hi eng mah dang Krismas lam sawi a nei lo.

Hrawva (1893-1956) Mizo hla thu hmanga hla phuahtu hmasate zinga mi kut chhuakah Krismas hla pahnih kan hmu a, pakhat chu *Ngai teh vawiin Van Lal Fa pa* (a thlûk R. Sankey No. 24) a ni a, pakhat leh chu, Hla Thar Bu (1978)-a a lan danin, a lehlin - *Aw van lêng rual zai thiamte u* tih a ni. He Hrawva hla lehlinah hian,

*Ram loh tui thiang cham del chungah
Berampu tuannaah*

tih kan hmu a; hla lehlinnaah pawh hla thu hmang thiam hmasa berte zinga mi a ni nghal bawk.

Lahlira (1897-1949) Mizo hla thu hmanga Krismas hla lâr tak tak letfingtu kut chhuakte hi sawi tel loh theih a ni lo. Sap ɻawnga *Silent Night* tih Mizo ɻawnga a han letling te hi Mizo tân Krismas hla ropui a tling hliah hliah a. A nihna takah

chuan a letling ni lovin, a Sap ɻawng hi enin a phuah a ni zawk. Chuvāngin, a chāng khatna,

*Zân thiang reh lai takin
Ênna a lo thleng ta;
Hraitê rawn chawi chûn nunnêmín,
Nau thianghlim ngilnei leh zaidam,
Remna Lal Fa chu*

tih te hian *Silent Night* tih chāng khatna ai hian Zo pa, Sap ɻawng pawh hre ve tho rilru hi a khawih nasa zawk daih a ni. England leh America ram hriat lama chēngte chuan Krismas hun lai hian zan khaw thiang an nei ve ngai mang lo. Zo tlâng sânga chēngte tan chuan zân khaw thiang tak leh thla êngah he hla hi han sak phei chuan, a boruak hrim hrim leh a hla thu inremnate hian lung a kuaiin rilru a hneh thei lehzual hle a ni. Hetiang hi a ni, hla kan tih ber ñhin hi.

Krismas hla dang Lalhlira lehlin, *Davida khawpuiah chuanin* tihte pawh hi a Mizo hla reih mai a, naupang zaipawlin an han sak te hian a mawi duh hle a,

*Chûn nunnêm Mari lo nin,
A hrai chawi Lal Isua*

tih te hian, rilru a khawih thei hle a; lehlin tih hriat loh khawpin a Mizo a, Mizo rilrua Isua piantirtu pakhat a ni reng a ni.

Kristian Hla Thar Bu buatsaihtute hian ngaihtuahna nei takin, Krismas lam hlate hi a hmasa lamah an lo dah ɻhap mai a. Chung zingah chuan kan hriat lâr leh sak lâr tak tak, Zasiama phuah *Leiah a lo piang, van Lalbera chu tih leh Vawiinah Lal Davida khua* tih te, Suakliana phuah, *Hossana ti zelin aw Halehulia. Amen* tih leh Raingama phuah, *Lal pian hun lawmaum tak kan thleng leh ta* tihte kan hmu a ni. Heng hlate hi Krismas hun apiangin Biak Israh leh lénkhawmpnaah tui taka kan sak rengte a ni.

Kan Mizo Krismas hla phuahtute hian an phuah chhan leh châng thlante hi an hmu chiang hle hlawm bawk. Hnam dang Krismas hla, kan hriat phâk leh lâr deuh deuhte nen pawha han khaikhin hian, kan Krismas hlate hi a duai bik lo hle a ni. Krismas hla hmingthang *Silent Night* phuahtu hian Bethlehem dâi vêl hi ralkhat hnai deuh aṭanga thlirin a phuah niin a lang a; *O Come, All ye faithful* (Ringtu zawng zawnge u) tih phuahtu hi chuan Bethlehem lam pan tur leh Lal Fapa piang chu ena fak bawk turin mi koh khâwm a tum a. Zo pa ngaihtuahna erawh chuan, Sâppui mi ngo ngaihtuahna a lehkhah emaw tih mai turin, Bethlehem thlen chu sawi loh, a dai bul vêlte pawh fang vêlin,

*Aw, angelte chu lo zai nawn leh se,
Bethlehem dai hmun khawhara ka awm lai hian*
tiin a lo awm reng hman a ni.

Vankhama (1906-1970), kan hla phuahtu lâr pâwlte zingah chuan, Pathian lam hla phuah nei mang lo ber pawh hian, Krismas hla hi phuah loh theih niin a hre lo va. Biak In leh lênhawmnaa lüt ngai lo, Krismas hla pathum emaw a phuah a. Chûng zinga lâr ber, Krismas carol pawha sak hlawh ber chu *Kum sul lo vei puan ang a thar leh ta* tih hi a ni. He hlaah hian Isua, mihringa a lo pian chhan leh a pianna hmun tlâwm takah khaw chhak mi fingte leh beramputen chibai an bûk thute chu hla thu ril tak hlir hmanga a sawi hnuin, phûr taka sak ngei turin a tlangkawmna heti hian a han ti ta a ni :

*Keini pawhin kan chibai lênc'hâwm zai nen,
Perhkhuang tingtang leh lemawi rem chungin;
Ri thei zawng zawng nen hlim zai vawr chung zelin,
Nilênen tlai khua pawh i var za ang.*

Rokunga (1914-1969) hi Mizo hla phuahtu zingah chuan Krismas hla phuah tam ber a ni. Krismas hla 16 a phuah a,

amaherawhchu chûng chu mimir sak turin, Biak Inah leh lenkhawmna inah a lüt thei ngai meuh lo va, 'Krismas khawlai hla' tih mai turin, thalaite inpwâlkhamna leh carol-naa sak a la ni deuh ber thin. Hla thiûk mawi leh sak nuam tak tak deuh vek a nih avangin, Rokunga hlate hi Mizoramah chuan Krismas ur lâwk atanga a hun tak lo thlen tlengin, hla ri thang vel nasa ber a ni thin. Krismas leh Rokunga hi an intilâr tawn ve ve bawk. Krismas hlate avang hian Rokunga hi a lâr phah lehzual a; Krismas pawh hi Rokunga hlate avang hian thalaiten an uar phah nasa lehzual a ni.

Rokunga hian Krismas hla 16 a phuah tih kan sawi tawh a. Heng bakah hian hla pathum thiûk, mi dang phuah a siam remsa a awm bawk a, chungte chu *Khawvelah hian Lal tam tak an lo piang ta a*, tih te, *Leiah a lo piang, van Lalbera chu* tih leh *Ngai teh, an ri a va mawi êm!* tih te hi a ni. Krismas hla, mi sak lâr kai vek si, amah tluka phuah tam hi an awm lo vang. Hei hi a ropui bikna pakhat chu a ni.

Rokunga hian a Krismas blaah te hian Isua lo pian thu, Chanchin Tha atanga kan hriat ang zawng zawng tih mai tur hi a lâwr kim hle a; mihring anga a lo pian chhan te, a pianna hmun tlâwmzia te, Ván angelte'n Pathian an fakna hlate leh, a pian lai huna Judai ram boruak leh khawvel roretute rilru put hmangte pawh a hlaahte hian kan hmu a. A hla atang ringawt pawh hian, Bible thu chhiar hauh lo pawhin, Isua pian hun lai chanchin hi chhui theihin a hriat chian theih hle a ni. A hla satuten ataka chantir theuh atan a duhthusam chu helai châng hian a khaikhawm thei ang :

*Ka thinlung ram Kaisar lainnah hian,
Bethlehem tlangpui rawn din la;
I tan ran tleng rawn tung leh la,
Tah chuan lo cheng ang che.*

A thu hrimah Rokunga hi Mizo thalaite hla petu, mi

malah chuan a hla bu siam Thalai Hla bu avanga thalaite lungruual taka zai tamtirtu ber a ni bawk. Hla sak nuam tihna hian phuah ve châkna a hrîng a; tichuan thalaite zingah pawh hla phuah tum an lo pung nasa ta hle a, hlaa sawi tling mang lo pawh tam tak kan lo neih phah ta a ni. Hunin a thlîtfim kan nghâk ang a, a êkchhia paiha a tak chauh kan lâk hun a lo thleng chhawm zel ang. Thu atana ziak nazawng hi thu a tling zo lo va, hla atana phuah nazawng pawh hi hla a tling zo bawk lo a ni.

.....

BETHLEHEM DAI

*Bethlehem dai a nghawr vel e,
An lawm hla ri zam vel te chuan,*

Dâi zawng zawnga dâi hmingthang ber leh ropui ber chu Bethlehem dâi a ni, ti ila kan sawi sual lo vang. December thla a lo nih a, Krismas te a lo hnaih phei chuan kan thinlung mitthlain Bethlehem dâi chu kan thlirin kan hmu theuh thin awm e. Kristian, ngaihtuahna nei mi tawh phawt chuan, khawpui lian ber ber leh mi tamna ber ber hmuna chêng pawh ni se, Judai rama khaw tê tak tê Bethlehem dâi hi vawi khat tal chu ngaihtuah chhuahna nei lovin December thla hi an hmang ral mai mai lo vang.

Khaw tin leh tlâng tina chêngte hian Bethlehem khua leh dâi vêl te hi kan ngaihruat dan a inang vek kher lo vang. Ka naupan lai chuan Bethlehem leh a dâi bul te chu kan khua leh kan khaw dâi bul vêl ang deuh ni turin ka ngaihruat thin a. Kum 1977 January thla tir têah ka mit ngeia ka hmu a, ka ke ngeia ka han fan chuan, Mizorama eng khaw dâi nen mah hian inanna nei turin ka hmu lo a ni.

Bethlehem hì tun thleng pawhin khaw tê tak tê a la ni a; Jerusalem khawpui aṭanga mel 5-a awm, khawpui dâifêma awm tih mai tur a ni. Chumi akâra a khaw dâi hmun reh lehchhâwng tawh lehnghal chu, Isua pian kum B.C. 5 velah te kha chuan, mi tam takin an ngaihtuah kher lo vang. Tûnah erawh chuan, kum rei tak ata tawh, hla mawi tam tak sak nin theih leh tur, *Zan thiang reh lai takin tih te, Chu beram ven zan laiah chuan tih te, Beramputen beram venga...tih te leh, hla dang tam tak lo chhuahna hmun a lo ni ta a ni*. Vawi tam

tak chu keini Mizote pawh hi rilru leh thlarauvin Bethlehem dâi reh hi fang thin leh, châm khaw muangin kan awm ve thin a; a chang chuan mahni awmna hmun theuh leh zaihona hmunte pawh hi Bethlehem dâiah chantirin,

*Aw, angelte chu lo zai nawn leh se,
Bethlehem dai hmun khawhara ka awm lai hian,*

kan ti thin a ni.

Bethlehem hi a khaw têta en ang a ni lo, khawvela khaw hlun berte zinga tel pha a ni. A chanchin kan hmuyna hmasa ber chu Bible-a Genesis Bung 35-ah a ni. Jerusalem-te hi chu Mosia lehkhabu panga Genesis, Exodus, Leviticus, Numbers leh Deuteronomy-ah te pawh la lang lovin, Israel fate Aigupta sal atanga an chhuah a, Kanaan ram an luh dawn thu sawina, Josua lehkhabu atang chauhvin a lang tan a ni. Chungnungbera chuan khawvel Chhandamtu pian nan Bethlehem a rawn thlang pawh hi, zawlnei Mika a lo sawi lâwtir chu thu khat, han chhût lêt hian, Bethlehem leh a bul vêl hi a duhzawng ti mite chênn a lo ni fo tawh thin rêng a ni.

Genesis-in min hrilh danin Bethlehem dâi, kawng lakah hian Benjamina, Jakoba fa naupang ber chu Rakili'n a hring a. Isua pian hma kum 1100 vela Bethlehem khuaa lo chêng thin, Boaza chuan Bethlehem dâi velah hian lo a nei bawk a. Naomi monu, Moab hmeichhia Ruthi chuan a pasal a sûn hnuin he khuaah hian Naomi nêñ an hmeithai a. Boaza lovah buh lâk hmaih zawngin Ruthi chu a kal thin a; tichuan Boaza hruih zâwlah Ruthi leh Boaza chu an inhmu a, an innei ta a. Fapa an lo neih chuan an thenawm hmeichhiate chuan a hmingah Obeda an sa a. Obeda chuan Jesaia a hring a, Jesaia chuan Davida a hring leh a; Davida chu Isua thlahtu ziding a lo ni ta a. Tichuan mihring tako han chhui pawhin, Isua chu Israel lal zawng zinga lal ropui ber Davida thlah a lo ni.

Bethlehem dai velah hian Davida chuan a tleirawl laiin

beram a vêng thin a; a chang chuan a pi leh pu Boaza leh Ruthi-te lo hlui, a khaw chhim chhak lama mual pharh thla raih lamahte pawh hian a beramte chu a hruai thin ngei ang. Bethlehemah ngei hian Davida chu a tieirawl lain Israel lal ni turin Zawinei Samuela'n hriak a lo thih a. Mahse lal a nih a, ro a rel hnuah Bethlehemah hian a awm kan hre lo. Amaherawhchu Bethlehem hi "Lal Davida Khawpui" tiin hlaah phuah a ni thin a. Chuti ni se Davida khan a lal lain Bethlehem hi khawpuiah a hmang rēng em ni, tiin kan zawt thin mai thei, Isua pian thu leh pianna hmun sawi chiang ber Luka chuan Josepha leh Mari chu, "Judai rama Davida khua Bethlehem an tiyah" kalin a sawi a. Hemi awmzia hi Bethlehem chu Israel lal lo ni tawh Davida seilenna leh a lo chênnha khua a tihna emaw, Davida chu Bethlehem khaw chhuak tia a sawina niin a lang. Davida chu ro a rel hnuin Jerusalem khuaah a awm a; Jerusalem hi vawi engemaw zat tihchhiat leh tun din leh thin a nih tawh avangin, Lal Davida'n ro a rel laia a awmtia lai hmunte chu tunah mi thiamten an zawng reng a; a hun lai thil ni wmte pawh lai chhuakin an insawi thin.

Engkimtithei Pathian, Pharos rilu pawh tinêma tikhauh thei, lei leh van leh mihring siamtu tan chuan, a fapa chu mihring anga Bethlehemna a lo pianna turin, a paitu Mari, Nazareth nula chu Bethlehemna a kaltir dan tur kawng remchang han siam chu thil harsa tehchiam a ni lo vang. Nazareth angin Bethlehem hi mel 93 vela hla a ni. Kaisara Awgusta chiu mi zawng zawng an hming ziak turin mahni thiabitute khua theuhvah kai tur tih thupék a chhuautir ta mai a. A hui laia a nghawng buai turate tan chuan thupék thlak tak leh zwintze nef lo tak a ni ngei ang. Juda-te hi matini thiabitu buai chinii fet thui thei tak hinam pawh an lo nih hi - Mari leh a pasai hoai, Josepha hian Bethlehem kai fur an ni tih an inhre thei la ni.

Títiah chuan Bethlehema Isua pianna hmun tak, ran in awmna lai pawh hi Davida pi leh pu, Boaza leh Ruthi-te in leh lo awmna kha niin an sawi a. Isua pian zana thil ropui tak lo thlenna - Bethlehem dái hmun ruam, berampute beram venga phûla an riahna hmun ruam pawh hi, Isua thlahtute Boaza leh Ruthi inhmuh hmasak berna hmun kha niin an sawi bawk. Helai hmun hi Pathian chuan a ropuina lantir nan leh puanchhuah nan a lo thlang ta nghe nghe a. Hemi hmuna berampu "*lung mawl*" riak khawmte pawh chu Chanchin Tha hrilhna dawng hmasa ber an lo ni nghe nghe a ni. Lalpa vantirkoh an kiangah a lo ding a, Lalpa ropuinain an vêl a rawn chhun êng a. Chu chauh ni lo vin, vantirkoh hnenah chuan vana mipui an lo chhuk thla ūeuh mai a, Pathian fakin,

*Chungnung berah Pathian ropui takin awm rawh se,
Lei chunga a lawm êm êm mihringte hnenah
Rem thu lêng rawh se.*

tiin hla an rawn sa ta a ni. Helai Bethlehem dái hmun ruama van mipui lo chhuk hi eng zat nge ni ang tih hriat a ni lo va, an tam tawk thawkhat bawk ang tih erawh chu a rinawm. Eng tawngin nge he hla ropui hi an sak ang aw, ti leh ta zel ila, berampute'n a awmzia an hriat theih, Aramaic tawng emaw a nih ngei a rinawm hle a ni.

Thil pawimawh, awmze nei leh entir nei tak tak thil hi pawnlamah tih a awm fo mai. Israel fate thlalera an awm lai khan Pathian biakna puan in chu an riahna hmun lailiah Mosia'n a dah thin a; mahse an bawhchhiat hnu kha chuan an awmna khaw pawn lamah a sawn ta daih a. Ran, a thisen Puithiam lalberin Hmun Thianghlima sual tâna hlana a luhpui thinna ruangte pawh daipawn lamah hâl a lo ni tawh thin a. Chutiang bawkin Isua pawhin ama thisen ngeia mite chu a tihtianghlim theihna turin, kuh kawngkhâr pawnah chuan a lo tuar ta bawk a. Tichuan, Hebrai lehkhathawn ziaktu phei chuan, "Dái pâwnah a hnen lamah i kal chhuak ang u" a lo ti nghe nghe a ni. Chu vang chuan Krismas lai leh a dawn lai

v l hi chuan hmun khawhar lam kan ngaihtuah ve fo  thin a ni. H ng a ang hian thil pawimawh berin hmun tha ber leh laili ber chan ph k loh ch ng a lo nei thei fo dawn a ni  wm mang e tih hi, a thiam tan phei chuan sermona sawi fo tham a ni thei ang. Tun lai khawvelah erawh hi chuan, ram hrang hrang a angin, kum tin helai hmun khawharah hian Krismas hmang turin mi tam tak an kal  thin a ni.

Bible-ah hian khaw hming tam tak leh an chanchin ziaknate kan hmu  thin; Thuthlung Hluiah chuan Sodom leh Gomora te, Ninevi-te kan hmu a. Thuthlung Tharah pawh khaw l r tak takte chu an chhiatna tur thu sawi a awm: Jerusalem chu Zawlineho (amah Isua ngei pawh) thattu, a chhungah tihchim loh tura lung intiang r ng r ng a awm lohna tur; Isua thil mak tih tamna ber khua te, Korazin leh Bethsaida te chu an chung a pik turzia te, a rawngbawl hnua a ch n tamna ber Kapernaum khua pawh chu van thlenga chawimawi ahn kin, mitthi khaw thlenga zuk kal zawk tur a nihna thute kan hmu a ni.

Bethlehem erawh hi chu a chhe z wngin a chanchin hi sawi a awm kan hre ngai awm lo ve; hanelma kuta tihchhiat pawh a tuar ngai lo ni pewhin a lang. Kum 1917-a British sipaiten General Allenby hova an l k tun pawh kh n thisen chhushna a awm lo. Tunah hian Israel ramah chuan a khaw mihring tam leh tlem dana enin Isua ringtu, Kristian tamna ber khua a ni bial ang; mihring 40,000 vel zet an awm a, a tam berte chu Arab mi, Kristian an ni.

Thiesik khaw vawt leh thiang tak mai, January ni 4, 1977-ah keimah chaukvin khawhar tak , Bethlehem “d i ph l l ng” ka f y n  chuan, hman lai sta t n thileng pawha beram thattir n n a la hman, van m pui punkhawmn  muai roante ch n th kink  ka han v t v l a; hman lais beranspute riabna p kakah te pawh ch n ka han hit a, a hman lawikah helai p ka Krismas dawn z nkh sawi party-ten m n a chh mnate chu ka han hmu a. Keis sor r ku a la nam n n sum hian ka hria.

THLALER RAM RO

*He who was living is now dead
We who were living are now dying
With a little patience*

- T.S. Eliot

The Waste Land

"Hot line, Hello. Can I help you?"

Khaw tinah telephone nambar ziakna bu hi han en ila, "Hot line" tih hi hmuu tur a awm. Ka awmna hmuna hot line nambar chu 384-7755 a ni.

Thlai khat chu ka lêng chhuak lo va, ka thian kawm thinte lah chu hmun dangah an zin bo vek si a, ka khua a har ta deuh va. Ka rilruin, "Khawinge, hot line an tih fo hi i han chhiah chhin teh reng ang," tiin, a namber chu ka han zawng chhuak a. A nambar chu ka han tuai vir chhuah veleha min lo chhangtuin ka aw a han hriat chuan inbiak rei deuh pawh a inhuam hle tih a tawng dan atang in a hriat theih a, kan inbe ta a.

"Hot line. Hello. Eng nge tanpui theihna che ka neih?"

Mizopa. Hei hi hot line a ni chiah maw?

Hot line. Ni e. Hei hi hot line a ni, eng nge harsatna i neih, kan sawi dun thei ang em?

Mizopa. Harsatna hrarpa chutia han sawi tur chu ka nei lo, ka rawn be mai mai che a ni e.

Hot line. Mahse i tawng ri leh thaw ri atangin eng emaw

vei nei i va ang si ve!

Mizopa. Thil vei engmah ka neih ka hre lo va, mahse tunsh hian-ka nervous deuh hlek a ni; a ch han chu tun hi hot line ka hman vawi khatna a ni a, a chanchin leh kalhmang ka la hriat loh vangin ka han biak tirh che khan thu han sawi hmasak turté ka ngaihtuah buai deuh va, ka zām deuh a ni.

Hot line. A nih tak chu. A nih leh eng nge ni kan sawi dun ang le? Engtiziaa hot line hi rawn hmang nge i nih?

Mizopa. A! Ka khua a har deuh a, tih tur ka hre lo va; han kawm leh titipui tur an awm si lo va, ka rawn bia che a ni.

Hot line. Thian i nei lo vem ni?

Mizopa. Neih chu nei e; mahse a tuate mah summer school kal awm lovin an haw darh vek a, han kawm leh koh theihin an awm lo a ni.

Hot line. University Campus-ah mi an tam a ni lawm ni? Heng zingah hian kawm tur chu an awm reng ang chu; lēng chhuak ta la, bar-ah te, restaurant-ah te kal la, titipui tur chu an awm reng dawn lawm ni?

Mizopa. A! Amerioan-ho hi in nunphung a dang êm mai a, puipunnaah pawh mahni bula mite hi biak mat ngam in ni thin si lo va, engtin nge kawm tur ka hanuh mai theih ang?

Hot line. Kan nunphung i hriat chinna tawh avang tak chuan hian kawm tur zawn dan pawh hre ewh tur é-ni. Tuqab é-ni, hmun danga

kaltate nen in inchhar ṣan dante kha han
ngaihtuah la, chutiang bawk chuan mi dang
pawh i be pawp thei mai dâwn lawm ni?

Mizopa. A ni viau mai. Mahse mihring hi kan inang lo
ēm ḫin a ni.

Hot line. I ti dik e, kan inang lo hle hlawm a ni.

Mizopa. A nih leh keini zirlai zingahte hian mi dang
khawhar thu rawn sawi an awm ve ngai em?

Hot line. Awm ngai teh rēng mai. Hot line rawn
hmang ḫin mi, hmun thuma ḫena hmun
khatte hian an khawhar thu an rawn sawi
ᬁn a; club-ab te, bar-ahte pawh mi tam
tak lām mup mup zingahte hian ḫian mumal
nei lo chu a tam zawk an ni hial ang. Hot
line rawn hmangtute zinga mi tam ber thu
rawn thlen chu a hmei a pain, khawhar thu
a ni asin.

Mizopa. Chu, America mi ngei, zirlaite pawh khawhar
an lo awm ḫin a ni maw?

Hot line. Teh rēng mai, zirlaite hi state hrang hrang aṭanga
lo kal an nih avangin, hmelihiat leh ḫian kawm
tur nei sa an ni bik lo va; an khawhar thu an
rawn thlen ḫin a ni.

Mizopa. Tu nge i hming min hrilh thei em?

Hot line. Hot line-a thawkte hian min betute hnenañ kan
hming sawi hi phal a ni tlat lo.

Mizopa. A nih leh hot line-a thawkte hi tute nge in nih?

Hot line. Mi eng zat nge kan nih ka hre lo va, a tam zawk
hi chu hemi university-a psychology zirlai kan
ni awm e; hlawh nei lo vin, zan tin hetiang hian
kan in-duty chhāwk ḫin a ni...

Ka rin aia rei mah, minutes 45 chhung lai, kan inbia a; phone ka han dah fel hnuah keimah chauhva ngawi renga ka thut lai chuan, ka zirna ram chu khawharna leh thlaler ram ro a lo ni reng mai tih ka han hre chiang ta a; tun kum za bi sawmhnhnhaa English poetry ropui bera ngaih, T.S. Eliot-a phuah *The Waste Land*, university class-a kan zir thin pawh chu a awmzia a takin ka rilruah a lo lang than ta uar uar nghe nghe a ni:

*I was neither
Living nor dead, and I know nothing,
Looking into the heart of light, the silence.
Oed' und leer das Meer* (The Waste Land 11. 39-42)*

Hot line hi America ramah sâng tam tak a awm a, hei hian eng nge ni a entir kan tih chuan thlaler ram ro leh khawharna ram a nihzia a ni ber ang.

Hmun thenkhatah chuan a thawktute chu nilêng leh zankhua zaka biak theihin an awm reng a, hot line thenkhatah chuan zan lamah chauh biak turin mi an awm bawk. A tam zawk hi chu thalaite tanpui nan ruahman a ni. Thalalte zingah harsatna chi hrang hrang nei-zu ngawi vei te, hmeichhia leh mipa impawina atanga natna inkai theih vei te, rilru hahna nei te, khawhar leh rilru buaite leh, man ningte'n an harsatna an sawina tura buatsaih a ni a; a thawktute pawh training-na tha tawk tak nei vek an ni. A thawktute hnen atangin harsatna sut kian nghalna beisei tur ni lo vin, thu rawn hmuhna tur a ni zawk.

Hot line programme langsar deuh tak pakhat chu New Jersey state-a Kean College-ah hian zirlai sing khat leh sang hnij vel an awm a, an zinga mi za vel chuan tlawnmgaih chhawkin an college hot line-ah chuan an inthawh chhawh thin-a. Thawktumei atanga Zirtawpni thlengin ni tin zing dar 9

* Wide and empty the sea... anfinriat chu a zuvin a ruak vek a ni.

aṭanga zan dar 1 thlengin, Inrinni leh Pathiannah erawh chuan, chawhnu dar 2 aṭanga zan lai thleng an inṭhut chhawk a. Hemihnaah hian Kean College chuan kum tin dollar 23,000 a sēng a, sem rualin chawlhkar khatah mi 200 vel betu nei reng ang an ni.*

Kum 1976 thlasik laiin zan khat chu Kean College-ah hot line chuan betu mi 46 a nei a, chung zinga mi 13 te chuan an khawhar thu an sawi a, 10 te chu thil hriat duh eng emaw rawn zawt an ni a; mi 9 te chuan engmah sawi lo vin phone an dah leh a, a betu zinga 4 te chuan ngaihzawng lama harsatna thu-ah tih dan tur an zāwt a; a dangte chuan nau pai theih loh dan leh V.D. enkawl dan leh nau tihthlāk dan leh thil dangte an zawt bawk.

Hot line-a thawkten buaithlāk leh rāpthlak an tih ber thin chu intihhlum tumna thu an hmuhin a ni. Kum 1976 chhungin Kean College Hot line chuan intihhlum tumna thu mi 95 hnen aṭangin an hmu a. Chutiang hunah chuan, rilru inpe zo takin, a betu chu rei tak tītīpui tura inbuatsaiah a ṭulzia an sawi ḫin. Mi pakhat intihhlum tuma silai pawh kau sa diam neia rawn betu chu darkar 3 an bia a. Chutih chhung chuan police-in a betu awmna hmun chu, phone aṭangin an chhui a. A awmnaah an va luh pawhin phone-ah chuan a lo la tawng reng a, mi rilru buai a ni tih an hmuhin enkawl turin an hruai ta a ni.

Hot line tam berte chu khaw pakhat chauh huama buatsaiah a ni a, state pakhat chhung huamte pawh tam fe a awm bawk. America ram pum huap, hot line pathum, man chawi lo va hman theih a awm bawk. Chung pathum zinga pakhat chu *National Runaway Switchboard* 800-621-4000 a ni a, Chicago aṭanga chhān a ni a, chhun zan zawmin a thawktute chu biak theih rengin an awm. Kum 1976 chhungin

* *Seventeen, August, 1977* p. 150.

mi 40,000 betu a nei, Operation Peace of Mind in mi 40,000 betu a nei, *Operation Peace of Mind* 800-231-6946 a ram pum huapa hot line chuan Texas state atangin chhûn zân zawmin a betute harsatna thu a ngaithla bawk a; kum 1976 chhungin mi 5,000 betu a nei bawk. *Operation Venus* 800-523-1885-hot line dang, ram pum huapa siam a awm bawk; zing dar 9 atanga zan dar 9 thleng, kar khatah ni 7 chhung hman theih a ni a, Pennsylvania state atanga lo ngaihthlak leh chhân a ni. *Operation Venus* hi inpâwlna atanga natna inkai theih enkawlna hmun leh a sensote zawhna a ni ber. Ni tin betu mi 40,000 velin hot line hi an hmang tih chhinchhiah a ni.¹

Ni khat chu tual zawl phaitual hlo hrung dep chungah thian zahovin ni lum aiin kan bawk zâl a. Ka bengin lei a han deh chuan thil ri mum mum hi ka hre ta a, ka thiante chu ngaithla ve turin ka râwn a. An han ngaihthlak chuan, "Hei hi khawl ri a nih hi, in tinah khawl eng emaw chi khat tal chu a awm vek avang leh, motor leh khawl lian tak tak, englai pawha a rik reng thin avang hian, mi tam takin lung lam natna leh lung phu tha lo an neih phah a ni," tiin, min hrilh ta nghe nghe a. America ram hmeichhe hla phuah thiam (poetess) zinga ropui bera ngaih, Emily Dickinson pawhin he rama nun hahthlakzia hi sawiin a rilruah mithi vui thawm a châm reng thu min hrilh nghe nghe a ni :

*I felt a Funeral, in my Brain,
And Mourners to and fro
Kept treading-treading-*²

Thi leh dam kare lêng renga inngai ni te pewhin a lang, la dam reng chung siin, a thihi hnuah thotlein a ruang chu an bâwma a, un thleng ri te pawh a kriat lâwk vek thu thleng a sawi a mi.

1. *Seventeen*, August, 1977 p. 154.

2. *The Poet in America* by Albert Gelpi 1973 p. 305.

*I heard a Fly buzz-when I died-
The stillness in the Room¹*

American poet T.S. Eliot pawhin he thlalér ram rova chéng, nula tlangvalte chuan hmeichhiat mipatna an hman dan aṭang te chuan mihring nih zahawmna pawh an hloh vek tawhzia sawiin an zalēn dan leh nun hohzia tihlen nan,

*I can connect
Nothing with nothing²*

tiin, anmahni a ḥawngtir nghe nghe a. An nun leh thiltihte leh anmahni ngei pawh “Engmah lo” an nihzia an inhre chiang niin a tarlang a ni.

“Hare Krishna...”

He thlalér ram rova au râwl pakhat, ka beng ngeia ka hriat chuan, ‘Hare Krishna...’ a ti a; kum sanghnih vel lai ral ta, Judai ram thlaléra mi pakhat au rawl nen kha chuan a inkalh hle âwm e.

America ram leilung ka rah hmasak berna, Chicago thlawhna ḥum hmun O’Hare airport chu ka zuk thlen zan chuan khua a lo thim deuh tawh bâkah ka tlângnêl lo bawk a, ka thil hmuh dan a phê deuh ruai mai a. Ni khat chu California lam panin Chicago O’Hare airport aṭang vêk hian kan kal dawn a, chhûn ên iar laiin mi che vel leh ningkhawngte chu thlirin ka ḥtian professor nen kan väk vel a. Chumi hnu chuan kan chuaima túr thlawhna lam panin building lian pui pui chhûngah htinanhrhawh takin mi kârah kan tlan hlawk hlawk a; chutih lai chuan mi pahnih hi “Hare Krishna...” tiin an lo au va. Chu thil ri danglam tak mai ka han hriat chuan ka phu deuh zawk a; kan kal pêl thuak tawh nain ka han lehhawi a, anni chuan

1. *Ibid.* p. 319
2. *Ibid.* p. 309

lehkha, a pâwna "Hare Krishna" tih ziak, an semte chu min han pe dawn a, ka thian chuan, "Lo kal mai rawh ngaihsak duh suh," min lo tih avangin, ka kalsan leh ta mai a.

University of California, Berkeley campus-ah ni khat chu ka thlen in pa, chumi university-a zirlai nen campus bul vela kan lén vahin thing buk hnuiah hian nula hmel tha deuh mai hi che hauh lovin hmui chip hmak, maimitchhing leh vanvadâkin a lo þhu a. A kut no takte chu *namaste* tih dân dik takin a tung zâwngin inthlawptirin a âwmah a dah a. A bul chiah kan thlen chuan, "He nula hian eng nge a tih?" tiin, kan thlen inpa chu ka zawt a. Ani chuan, "Hindu sakhaw be miten yoga an tih, rilru leh taksa insawizawina neih a, ngaihtuahna ding taka kaltir dan a zir ve a nih hi," tiin min hrilh a. Kan han vah kual zel chuan chutiang ti lai chu mi pahnih dang kan hmu leh a; ka thianpa chuan, "He thil hi he university campus-ah hian an chîng nasa hle asin," a ti bawk a.

University-ah ka thianpa awmna linguistics department office-a kan luh hnu chuan mi ðhenkhat, Vai hrêñ vâr kaih, kamis fual vâr tak, nghâwng nei lo ha, lu ziat kâwng vek, mi eng emaw zat an lo lut a. A ðhen chuan an chhipah sam hlâwm tiêm te sei tak an zuah a, chu chu thlikthlidfr angin an hnung lamah a uaithla ngauh va. An han þawng chuan America mi ni chiahin ka hria a; zirlai dang ang bawkin, lehkhabute pawh an keag a, an zakzeh far a. Ka rilru chuan, "Eng mi tak chu ni blâwm ang maw!" ka lo ti a; an vun te chu a ngo êm si avangin Tibet lam mi an nih te pawh ka ring deuh bawk a. Amaherawhchu an meng pâwl reih bawk si a, Tibet lam mi ni thei chuan ka hre si lo. An chhuah hnu chuan ka thianpa chu "Tûna mite kha eng mi nge an nih?" tiin ka zawt a. Ani chuan, "America mi vek an nih kha; *Hare Krishna* pawl ap ni a, nichina thing buk hnuia nula *yoga* bei lai kan hmuhte nen khan pâwl khat an ni," tiin min hrilh ta a.

Hare Krishna pawl hi humun tin mai tih tûrah an darh a,

state thenkhatah chuan hrêk tumna pawh a awm deuhva hriat a ni; Pennsylvania state park-ah chuan thuneituten Hare Krishna mi leh sate chu kal an phalsak lo va, mahse State Department chuan khap tur an ni bik lo tih thu a puang a;¹ hmun thenkhatah phei chuan dawt thua pawisa khawn ah te pawh puh an ni bawk. Argentina ramah chuan sawrkarin he pawl awm hi a khap hmiah thung.² Eng le khaw le, Hindu kulmûtten an chîn, yoga hian America ram zirlaite rilru a tuam tan nasa hle a, zung a kai nghet deuh deuh tan niin a lang, university tam takah yoga zirtirtu an awm a, zir man fee pein mi tam takin an hun âwlah an zir a, an hmuu tam ber chu rilru thlamuanna a ni. Ka zirna university building-a bangah te pawh Vai puithiam khabe hmul sei pui pui nei thlâté leh, yoga sawi mawina lehkha an târ ka hmu fo thin. India mi thenkhat chuan, America rama Hindu sakhaw zirtirna hi zirtirna dik lo, pawisa hmuu nân mi thenkhatin remchâng an tih anga an phuahchawp mai niin an sawi. Mi thenkhat chu hippies kan tih angte changin India ramah an lo kal a; tuifinriat kam hmun fianrialah ruaka lêng vel hmuu tura awmte hi he thil rawn nghawr chhuah, mi tlem tê chauh an ni. Tichuan, university class room-ahte pawh Hindu philosophy thu leh hla *Upanishad* bua mi chhiar leh chham zat zat thei an lo awm ta çeh a ni.

Setana Kohhran

Aizawl atanga lehkha min thawntu pakhat Pastor Lalthanga chuan America ramah Setana kohhran a ding tih thu mi sawi a hriat avangin a chanchin hre chiang turin min rawn chah a. Tlai khat chu Methodist kohhran Biak In-ah zanriah kan ei ho va, chu mi kohhrana awm, Professor Dr.

-
1. *Illinois Baptist*, June 29, 1977 p. 3.
 2. *Ibid* - March 23, 1977 p. 3.

Milo Kaulfmann-a chu Setana kohhran a awm leh awm loh ka zawt a. Ani chuan, "A awm asin, a dintu Anton Le Vey-a chuan Setana Bible tih pawh a ziak nghe nghe asin," tiin, a awmna chu San Fancisco niin min hrilh nghal a. California-a ka zin lai chuan San Francisco-ah te lêngin Setana kohhran chanchin chu ka zawt vel ta a.

San Francisco-a kawtthler pakhat California street an tihah chuan in hlui tak, a pâwn lam hnawih dum vek hi a ding a, chu chu "Setana Biak in" an tih chu a ni. A hmun takah kan en ta lo nain a chanchin mi sawi erawh chu chiang takin ka dawng a. He biak inah hian Anton Szandor Le Vey chu pastor hna thawkin amah chu "Setana puithiam lai" niin a inchhâl a. An pawl thil tum ber leh zirtir chu hmeichhiat mipatna kawngah a zalêñ thei ang bera inhman te, insûm miah lo va phuba lâk leh duhamna lantir te a ni. An biak in chhunga mei chhemna chungah chuan dawhkâr a awm a, chu chu "Maichâm nung" an ti a; an inkhawm lai leh Anton Le Vey-a chuan thu a sawi laiin, inkhâwm zawng zawngten chiang taka an hmuh theih turin "Maichâm nung"-ah chuan hmeichhe puithiam an tih chu ruak ngalngatin mipui lam hawiin a awm reng thin a ni.

Hetianga Setana biakna in hi Ohio State-a Toledo khuaah a awm bawk a, chuta a hruaiitu chu Herbert Arthur Sloan a ni. A zuitu pawh an pung chak sâwt hle tih an sawi. Baptist kohhran thalai hruaiitu pakhat chuan kan inkhawmin Setana kohhran chanchin a kriat dante min hrilh bawk a. Mi thenkhat Setana betu inlamette pawngka a dawn damin an inkhawminnaah ciuan hawkdak thila, va kai leh en chi pawti a nih loh thu leh riliu hmien them dan riau ar heih thu a sawi.

The Crystal Ball

Nu pakhat Florida state-a Melbourne beach-a chêng, Sybil Leek chuan khawvela ramhuai aien thiam hmingthang ber ah a inchhâl thung. America rama khawpui lian lianah thlawhnain a zinkual a, aien thiam a nih thu a tlangaupui a. Hmeichhe thian, aien thiam dik tak, mi 400 neiin a inchhâl a, khawvel pumpuia hmeichhe aien thiam awm zat chu maktaduai riat niin a puang bawk.¹ He nu hian ramhuai aien thiam ring leh rawn mi an la pun belh deuh deuh tur thu a hrilh lâwk a. “Kristian sakhaw inzirtirma leh inkaihruai dan hi mihring nunphung pangngai nen hian a inkalh tih mi tam takin an hriat avangin mihring nunphung nena inhmeh tur sakhua hi an zawng reng a ni,” a ti bawk.

He kan zinna ramah hian mi tam tak, mi thi tawh te thlarau nêñ inbiak theih dän kawng dap reng an awm bawk a; tûn lai khawvêlah hian mi maktaduai za vél laiñ mi thi tawhte hnêñ atangin thu chah dawng tawhin an insawi.² Chung zinga mi langsâr ber chu Bishop James A. Pike a ni. Bishop Pike chu, a fapa Jim, mahnia intihlum ta sünin lungngai takin a awm a. A fapa chuan amah chu biak duhna neiin a ring ta a; tichuan mitthi thlarau kohna hmunah vawi tam tak kalin a fapa nen chuan an inbe ta ngei tih a sawi a. Mi thi tawh dang a biakte chu Ena Twigg, George Daisley leh Arthur Ford te an ni.

Hetianga mi thi tawhte thlarau biaktir thintu, Kristiana inlet leh tawh, Raphael Gossen erawh chuan hetiang thil hi ramhuai hnathawh a nih thu a lehkhabu *The Challenging Counterfeit*-ah chuan a sawi. Lehkhabu dang pakhat *I Talked With Spirits* tih ziaktu Victor Ernest chuan a naupan lai chuan thlarau chhungkuah a tel thu a sawi a; a lo puitlin hnuah

1. Richard W. DeHaan, *Satan, Satanism and Witchcraft* p. 95.

2. Dehaan Page 52.

Kristian a lo ni a, pastor a lo nih hnu chuan a han thlir lêt a, a naupan laia an sakhaw vawn chu thil hlauhawm tak leh boralna kawng a nih thu a sawi bawk.

Tûn laia hmeichhe hmingthang tak pakhat chu Jeane Dixon a ni a; zawlnei ropui takah mi tam takin an ngai a ni. Jeane Dixon hian inlärna, thil mûm fim vâr tak - *The Crystal Ball*-a hmuh atanga thil lo thleng tur a hrilh lâwkte chu thleng dik a awm nual avangin mi tam takin a thu an ngaichâng a. President tur thlannaah Harry Truman-a'n a khingpui Thomas Dewey a hneh tur thu leh, Communist-in China ram an la lâk hmain an lâk tur thu te, Nikita Krushchev-a lo dinchhuah tur thu leh bân a nih tur thu te, Sputnik-in lei a vêl tur thu te chu a lo sawi lâwk dik a. Heng bâkah hian President John F. Kennedy chu Dallas-ah thah tum an awm dawn tih pawh a lo hrilh lâwk bawk a ni.

Jeane Dixon hian inlärna a hmuh hmasak ber, July 14, 1952-a mi chu a sawi dân chuan, khuma a mut laiin rûl lian pui mai hian a khum chu a rawn pan a; tichuan zawi zawiin chu rûl chuan a taksa chu a zem chhuak ta vek a. Jeane Dixon chuan rûl mit chu a han en chuan hmangaihna, jhatna leh thil hriat theihna nei hmel puin a hmu a, tichuan thlamuanna thûk tak maiin a taksa chu a fan chhuak ta nghal tih a sawi a. Amaberawhchu chutiang rûl chu Pathian zawlnei a ni thei ang em le?

Kum 1960-a President tur thlannaah Richard M. Nixon-an a khingpui John F. Kennedy chu a hneh ang a tih leh, kum 1964-ah Walker Reuther-a chuan President tur thlannaah a chuh ang tia a hrilh lâwk te chu a thleng dik lo va. Vietnam bawina chu kum 1965-ah a reb ang tia a sawi lâwk te, President Johnson-a fannu, Lynda Bird Johnson leh filmstar George Hamilton innei tura a hrilh lâwk te pawh a thleng dik lo bawk. January ni 1, 1968-ah pawh Jacqueline Kennedy chuan pasal a neih lawk rih dâwn loh tûr thu a hril lawk a. Hemî kum vêk

1968 October ni 20-ah a thu hrilh lâwk þenkhat, chhuah tura tih diam tawh te chu hmanhmawh takin an hnûk kir a. A chhan chu, "Kum thar nia ka hrilh lâwk ang chiah kha a la ni; Jackie pasal neih hun tur a la hnai lo," tiin, amah Jeane Dixon chuan a sawi vâng a ni. Mahse chumi ni ngei, October ni 20, 1968 chu Jacquiline Kennedy-in a pasal pahnihna, Aristotle Onassis a neih ni a ni.

Jeane Dixon hian February ni 3, 1962 khân inlârma dang hmuin a insawi a; hemi ni tak hian arsi kal dan chhuitute chuan, ni kal hualtu arsite khi inkawp anga an hmuh avangin, thil eng emaw awmze nei tak lo thleng tur awmin an ring a.

Jeane Dixon sawi danin a in chhûnga êng chu a phe zeuh zeuh va; a chângin a fiah lo va, a chângin a êng êm êm a. Zâna a mu chu ni chhuah hmain a tho va, tukverhah ni chhuahna lam hawia a han dah chhuah chuan Aigupta lal Pharoa leh a nupui Nefertiti chu ni zungah a hnen lam pana lo kal a hmu a. Pharoa leh a nupui chu ropui takin an inthuam a, mahse lalnu chuan nausêñ, puan chhe taka tuam hi a pawm a. Jeane Dixon chuan nausêñ mit chu a han en chuan finnaa khat niin a hmu a. A han thlir rei deuh chuan nausêñ chu mipa puitlingah a lo þhang a; a lþ chunga kraws tê tak tê boruaka awm chu a lo lian tial tial a, lei vâng dâpin a lo awm ta a. Khawvel ram tina mi zawng zawngte chuan chu nausêñ lo þhang lian ta chu an rawn pan a, a hmaah þingþiin chibai an rawn bûk ta a ni.

Jeane Dixon hrilhfiah dan chuan Kristian kohhran-ah hrusaitu ropui tak a lo chhuak ang a, amah chu kohhran pawl hrang hrangten an la zui ang. February ni 5, 1962 zing lam dar 7 (Eastern Standard Time)-ah Middle East ram pakhata nausen piang chu khawvel beisei innghahna a ni a, amah chu Kristian sakhaw thar þha famkim dintu a la ni dawn tiin a hrilhfiahna chu a puang nghal a ni.

Amaherawhchu Bible chuan Kristian sakhua hi rawn din thar leh turin Krista pahnihna a lo kal tur thu rēng a sawi hauh lo. Jeane Dixon hi eng hmanrua nge a nih ang a, a thu hrilh lāwk dik famkim thin lote hi tu puantir nge ni ang le? Pathian hmanrua a ni thei ang em? Jeane Dixon chanchin nu pakhat Ruth Montgomery-in a ziak chu mi maktaduai eng emaw zat, khawvel ram tina miten an lei a, Billy Graham lehkhabu ziak leitu aiin an tlêm zawk bik hauh lo vang.

“Pathian a awm lo....”

He ka zinna rama nu pakhat au rāwl chuan, “*Hare Krishna*” ti lovin, “*Pathian a awm lo....*” a ti ve thung.

Nu pakhat a hming, Mandalyn Murray O’Hair chuan, “Pathian awm ring lo pawl” dinin amah chu President-ah a invuah nghal a; America rama mihring hmun lia thena hmun khat (25%) te chu Pathian awm ring lo niin a sawi.¹ Mrs. O’Hair hian Pathian awm ring lo tān Ningani hi Chawlhn-Sabbath-ah a puang a, sawrkar hna thawk, Pathian awm ring loten he ni hi an serh theih nan thil remchang ngaihtuah turin sawrkar chu a ngiat bawk. He nu hi kum 1978 khān kum 59. a upa a ni.

America mi van sanga han thlawnk thin thenkatten Bible an chhiar a, an tawngtai thin chu a ngaih theih zāwng a nih loh avangin Mrs. O’Hair chuan khap turin thuneitute (NASA) hnenali kum eng emaw zat ral taah khan lehkha a theh lut a. A lehkha theh luh thlawptu chu mi 27,000 at awm bawk a, chungte chuan an hming pawh an pe lut ve nghe nghe a ni. Amaherawhchu a lungawi tawka

1. *Illinois Baptist*, Sept. 15, 1976 p. 8. Gullup Poll chhut dan chuan America mi 100 zet 64 te chhuan thin hñuah nunna la swimin an ring. Ibid. Oct. 15, 1976. McCall Magazine Survey hñuah dan chhuan Amerika hñuachhia za zet 90% te Pathian an ring a, za zet 20-ka takas thin hñuah nunna thlarau awmin an ring. Ibid. May 17, 1978.

thil tih engmah a awm chuan loh avangin Mrs. O'Hair chuan court-ah a pu lut ta a; mahse court chuan kum 1971 khan a thu chu an pahi th a tho a ni. A pasal Richard O'Hair, March 1978-ah kum 64 mi nia thi ta chuan, kum eng emaw zât ral taah khan, Supreme Court-ah sawrkar sikul-a sakhuana lam thil lâk luh an lo chîn thin chu a hnial kahnna thu a theh lut a. A thu theh luh avang chuan Supreme Court chuan America ram chhunga sawrkar sikulah Bible chhiar leh tawngtai khapna thu a chhuah phah ta a ni.¹ Richard O'Hair chu a thih hma kum 2 velah a inlamlêt a, a nupui nen pawh an inthen a; Pathian awm rin lohna thu zirtir chu dovin Methodist Kohhran a zawn ta bawk nia hriat a ni.

Kum 1974 December thlaah mi pahnih Jeremy D. Lansman leh Lorenzo W. Milam-te chuan boruaka thu puan lam chungchanga thuneitu (FCC) hnenah sakhaw lam thu chauh puanna tur radio leh television station din tumte chu din phalna pe lo turin lehkha an theh lut a. Chu thu chu mi tam takin an hriat sual a, Mrs. O'Hair-in radio-a Pathian thu sawi khapna tur thu a theh lut emaw an ti a. A ngaihtuahtute chuan thla khat chhung maiin hnial kahnna lehkha 81,000 an hmu a; chutiang thil engmah Mrs. O'Hair-in tih a nei lo tia hriattirna an siam chu mi tam takin an lo hmuh loh avangin, boruaka thu puan chungchanga thuneitu pawl-Federal Communications Commission chuan kum 1977 April thla thlenga lehkathawn an hmuh zat chu maktaduai 5 lai a tling a; lehkha a hranga thawn kher lo, hnial kalhtu anga hming pe lut zat chu mi maktaduai 30 dawn lai niin an hria.²

Mrs. O'Hair, President of American Atheists - Pathian awm ring lo pawl President-chuan America sawrkar khinna thu dang a theh lüt leh a.

America ram pawisaa thu ziak, "In God We Trust"-

1. *Illinois Baptist*, June 9, 1976 p.3.

2. *Illinois Baptist*, April 20, 1977 p. 3.

Pathian kan ring-tih hi tih bo ni tawh rawh se tiin, U.S. District Court for Western Dist. of Texas (Austin)-ah September ni 1, 1977 khan lehkha a theh lüt a. "Pathian hming ziakna thil kan ipteah tihluihnaa min ahtir hi Constitution kalh a ni," tiin, sawrkar lakah rinawmna thutiam chham tur ziak a, "Pathian kaihhruaina hnuaiah," tih thu te pawh chu thai chhiat ni rawh se, a ti tel bawk.¹

November ni 11, 1977-ah sawrkar ukil chuan hēng thu hi America ram pawisaah chuantir a nih avang hian Mrs. O'Hair mi mal nun chuan a chhiat phah hrarpa loh avang leh, a nun himna thuah pawh thil hlauhthāwnawm engmah awm thei tura a lan loh avangin, tihbona tur chhan tha tawk a ziak lo bawk a, a thu chu tihtawp ni rawh se, tiin court chu a ngēn a. Court chuan Mrs. O'Hair chu January ni 5, 1978 tleng sawrkar ukil thu thehluh chu chhānna hun a pe a. Mrs. O'Hair chuan ukil bran a ruai a, sawrkar ukil thu thehluh chu chhāngin a khinna thu pawh a ziak belh a. Sawrkar ukil chuan a khinna thu ziak belhte chu chhāngin chu thubuai chu titawp turin court chu a ngen leh a; June, 1978-ah court chuan thu a pawt chat ta a. Mrs. Madalyn Murray O'Hair, President of American Atheists-in America ram pawisaah, "In God We Trust" Pathian kan ring- tih thu ziak chu tihbo ni rawh se tia sawrkar a khinna chu a haéwl ta nge nge a ni.

"Mihring nih hi ka peih lo"

Ka zinna rama thalai tam takte au rāwl ve thung chuan, "Mihring nih hi ka peih lo ve," tiin, tam tak chuan intihhlum an turn a, mi tam tak chu an intihhlum tak tak rēng a ni.

World Health Organization puan danin America rama thalaite thihsa chhan tam ber dawitu chu mahnia intihhlumna

1. *Chicago Sun Times*, Aug. 8, 1977.
2. *Illinois Baptist*, April 26, 1978.

a ni.² Cornell Medical School-a thalai kum 15 leh 24 inkâr mahnia intihlum an pung chak sâwt êm êm a, a chhan chu an rilrua an la inpeih tak tak hmain mawhphurhna rit tak an lâk avang te, nupa inþhenna a lo tam tâk avang te, awm hmun insawn fona avang leh dam chhan tur hriat loh vangte niin a sawi. Tlangval zingah aiin nula zingah intihhlum tum an tam zawk nain, tlangval intihlum an tam zawk a; an hmanraw hman tam ber chu silai ni bawkin a sawi.¹ Silai hi duh duha lei theih leh mahni inven nana kawl a ni ber nân, mahni chhungte leh þhiante kah nana hman chu, hmelma leh rûkru kah nana hman aiin, a lêt ruk velin a tam nia hriat a ni. Kum 1963 aþanga chhiarin kum 1973 thlenga America mi an ram chhunga thil puak thei hmanga tihhlm zât chu mi 84,644 an ni a; hemi kum 10 chhung vêk hian America mi Vietnam indonaa thi zat chu 46,121 an ni a; heng an ram chhunga thi zat sawite zinga za zela 80 te chu silaia kah hlum an ni.²

“Mihring hi chhang chauhvin an nung lo vang,”³ tih thu dikzia hi he ka zinna rama mite nunah hian a taka hmuh tur sawi sên a ni lo vang. Ei leh in tur lamah lungngaih ahnêkin chi hrang hrang ei sên rual loh awmna, silhfen inbel sên loh khawpa tam awmna ramah hian khawharna leh lunglênnua tuar nasa berte chu upa lam leh tarte an ni. Ohio State-a nu pakhat khawhar êm êm mai chuan kum 1969 December thla khan Nashville khuaa postmaster hnemah lehkha a thawn a, milem lu pakhat a thun tel a; a lehkha thawnah chuan, “Mi pakhat tal Krismas card mi rawn thawn thei a awm lawm ni?” tiin a ziak a ni. Mihring khawharna hi zawng mihring vêk chauhvin hnem theih a lo ni a; TV leh radio leh ri mawi tum rik maite hi chuan a lo hnem zo tak tak lo a ni. Khawlaiah ka len vah thinin nu tar ka hmuh þhenkhatte chu boruakah pipu ang

1. *Illinois Baptist*, April 26, 1978.

2. *Ibid*

3. Luka 4: 4

deuhva siam ɻhutna khai kānah ɻhuin khawhar takin mi veivâkte thlirin an inthēn an inthēn a. Nu tar leh pa tar inþhenawm hnaia awm si inkâwm khâwm ka hmuh tâk ngai pawh ka hre lo. Hna thawk nasa hnam an nih avangin, an tu leh fa, ɻhalaite ngaihsak hman hlawh lovin, nursing homes-ah tarho chu an awm khawm ɻeuh va; tukverh aþangin ralkhata mi che velte chu an mit fiah tawh lo takte chuan an thlir a, an vânglai hun, duh duha nuam an chen theih laite ngaiin, an thiit hun an nghâk a ni.

Hun bik nei Krismas leh Thanksgiving Day ang tea anmahni tlawh ɻhintute chu kohhran rawngbawltute leh pastorte an ni ber. An dinhmun han hmuh chian chuan thlaler ram ro leh khawharna ramah an dam chhûng hun tawp lam chu an hmang tak meuh meuh a ni. Rilru natna vei tamna leh rilru daktawr tamna ram, science leh khawl siamna lama hmasawnna avanga mihring nun chêpna leh, mihring nun hlutna pawh a bo tial tialna ram a ni. He ram bawk hi a ni, muthilh damdawi ei leh hman tamna ber ram chu ni.

“....Nice Guy....”

Ram dang mi lehkha zira kal ɻhenkhatte tan pawh khawharna leh beidawnna ram a ni.

Ni khat chu favâng lai hi a ni a, ka awmna bul lawka hostel lian pui mai, post-graduate zirlai awmna, Daniel's Hall room no. 109 aþang chuan meikhu a lo chhuak ta nguah nguah mai a; thil puak ring tak hriat a ni bawk. Chutah America mi leh ram dang mi zirlai, chumi hostel-a awmte chuan “Eng nge ni ta?” tiia fil awnzia en turin an fuan khawm a; a then an nui a, a then ngawi reagin pindan pawnah chuan an ding khâwm laih a. Chu chu zing dar 9:45 a ni. Kawngkhâr chu chhung lamah kah a nih avangin hawn mai theih a ni lo.

University police an lo kal a, harsa taka kawngkhar chu an hawn hnu chuan chu pindan luant, India mi Ph.D. Mechanical Engineering zirlai chu thir khadiatin a ke lehlam khum banah thlun chungin a lo kang ût veletawh hi an hmu.a; a bulah chuan petrol ïn ruak a awm bawk a. Kum 28 mi, a hming chu Alphons Indiana, Andhra Pradesh State aṭanga lo kal, Switzerland-a M.Sc. zir zo hlim lo lut thar a ni. ~~MT~~ thar deuh a la nih avangin India ram aṭanga kal zirlai dangte pawhin kan lo la hre chiang vak hman lo va. A chanchin sawi thei deuh ber chu a awmna pindan dawt chiaha awm, China mi pa tê deuh Ph.D. zirlai bawk a ni a, a hming chu Yeeyeen Chu a ni. Ani chuan heti hian a ti - "Thawhlehni zan khan a þul hle a nih dawn hi tih turin khawl a chhu zankhua a; mi þawng tam êm êm lo, hlim hmel pu deuh reng, mi tha tak a ni- "*"He smiled a lot...He was a nice guy..."*

He khawvel hi mi tam tak, hlim hmêl pu reng si, mahse hlim tak tak si lohna ram, mi tha takte pawhin mahni kut ngeia intillum an duhna ram a ni. Alphons Indiana pawh chu amah leh amah a intillum ni ngeia rin a ni. Mahse engtiziaa chutiang tih duhna rilru chu lo nei ta mai nge ni ang tih rilrua thu zawhna tam tak lo chhuak chu a chhâna hria kan awm lo. A zima department-a office secretary nu chu, a thih thu an han hrilh chuan, ani pawhin, "A va mak ngai ve! Chutiang thil han tih duhna khawp hial turin a rilruah eng nge lo awm ta ni ang le?" tiin, mittui nen a thih thu chu a lo ngaithla bawk a ni.

Alphons Indiana chu pa nei tawh lo a ni a, a ruang chu engtia tih tur nge ni ang tih a nu leh a unaute chu biak hlatnain kan zawi a. Anmahni chu khaw tê tak tê, Visakapatnam aṭanga mel 100 pawn lama awm an ni a; telephone pawh an neih a rinawm loh avangin, Visakapatnam-a telephone exchange-a mite chu biain thil awmzia chu kan hrilh a; telephone exchange aṭanga thu an rawn sawi theih nan Alphons-a chhungte ko turin kan chah a. An rawn biakna man tur pawh keimahni lam

pék vek tur a ni tihte hrilh nghal an ni. India mi zirlai mi 150 velin a chhungte ḥapui nan kan pawisa thawh khawm chu India pawisa chuan Rs. 10,000 a tling thelh bawk. Tichuan Alphons-a chhungte chuan an duh dan chu an rawn sawi ta a; Kristian an ni nain a ruang chu hal ral a, a vāp chu an hnenah thawn an rawn ngēn a. Chutiang chuan tih a ni ta a; Ph.D. zirlai chu meivapah changin a chhungte hnenah a haw ta a ni.

A thihi aṭanga chawlhfār khat vēlah chuan a inkhawmna thin, Roman Catholic kohhran, St. John's Chapel-ah amah sūnna leh hriat rengna inkhawm kohhran chuan a buatsaih a. Vaiho mi tlem tē nen biak in awmna chu zawng chhuakin kan va inkhawm a, a lunglēnthalākin a khawharthlāk ngei mai. Biak in lian takah hian chhun dar 1 velah mi eng emaw zat Catholic mi deuh hlir an rawn inkhawm a; university campus chhung a ni bawk a, zirlai vek an ni. Tlar hnung lam deuhvah ka Vai thiante chu ka thutpui a; Kristian biak ina an inkhawm vawi khatna te pawh a ni nawk ang chu. Mitthi thlahna music ni ȧwm tak hi a ri ruai ruai a; turma awm lohna ang maiin, biak in chhung chu a reb ḥhuap mai a. Puithiam pa lian deuh tak kawr fual vār ha a lo din chhuah chuan music chu a tawp'a; puithiam chuan urhsún êm êm mai hrnel pu leh, aw ring tek hian Isua thu sawi, "Kei hi thawhlehnna leh nunna chukha ni; tupawh mi ring chu thi mah se la, a nung reng ang,"¹ tih hi a han chhier a.

A cħħiar zawħħah chuan Alphons Indiana-a thlarau tān leh a nu ish a unsute tam a tawngħaisak a. Chumi zawħħah chuan chħang them tam fe hi dár thlēnġin a rawn chawi chhuak a; a duh apiangte chu a hnenah va kala va ei turin a sawm nghal a. Miingo, kan xiskiposte chu, a hmei a pain, an thuthmum stang chuan thawn nej Jovin an tho sunq sunq a, an intar phei a. Vaiho, a ngaiha luu to chuan, "Kan ei ve ang em?" tiin, ka

beng bulah min rawn zâwt a. Kei chuan, "Ti khan lo þhu rawh u, keiman ka va ei ang e," tih leh thawh ka rual a, a hnuhnung ber pawlah chuan ka va ding a.

Muang têin hma lamah kan kal phei zêl a, a ei hmasate chu an þutna hmunah an lêt leh zel a; ka hun a lo thlen chuan chhang them tlang khat chu la túra dar thiêng ka han ban chhoh veleh puithiam mitmeng fîm tak chuan min lo en a, "Kristian i ni em?" tiin zawi têin min zawt a. "Ni e," tiin, ka chhâng a. Chhang them tlang khat chu ka la ta a, chu chu Catholic kohhran pawm dân chuan puithiamin Isua taksaah a chantir fel diam tawh a ni; ka kâah ka han dah chuan kâr lovah a zawp ral a, ka lem ta nghâl a. A entir chu thu dang ni se, chu chhang pawh chu - ngai teh, chhang dang ang bawk tho a ni.

*Who is the third who walks always besides you?
When I count, there are only you and I together!*

.....

1. T.S. Eliot, *The West Wind*

BOOK REVIEW

Thu leh Hla-a Book Review ngun taka lo chhiar ḥintu pakhat Lalhmuaka chuan, “Pu Sangliana hi i duh ang takin *Sangi Rinawmna* hi han ching teh in ti chu a ni êm lo vang a,” tiin, Pu Sanga’n Khawlungi thawnthu ziak *Sangi Rinawmna* a review (June, 1979)-a a lo chhiar aṭangin rawtna a siam phah a, “A review puma hmun thuma thena hmun hniih chu a tha lam pang sawina ni thei ngei se tha zawkin kei chuan ka ring tlat rih a ni,” a ti a. A chhan chu, “Zofate hian literature tihpun zei hi kan hmabâk a ni a, thiam tawk kan la tlem êm êm a, chuvangin ziak thei/ngam an awm chuan tihpürna lam hi uar zawk a tha ngei ang,” tih a rin vang a ni. Lalhmuaka hi Lunglei Govt. High School Headmaster pension ta kha a ni.

James Dokhuma pawhin a thawnthu ziak *Thlahleinga Zan* Prof. Lianhleia’n a review chu a lo chhiarin, “Manilomaha ka lo insita ka zir sān loh avanga lo zak rilru ngawih ngawih thin, khatia kan mi thiam berte zinga miin min han vuak tâkah phei kha chuan keini ang rual tan chuan mahni thiam ang tawk tawk a dang ziak leh tur pawhin min tiphûr (encourage) lo hle mai,” a ti bawk a. A thu tlangkawmnaah Dokhuma chuan, “Mizo zingah hian ziaktu dang an awm loh thuah mi thiarn zawkte cho chhuah nan ka’n ziak ve chauh a ni a. Mahse cho chhuah a hnêkin kan mi thiamte hlei hlei chuan min lo ngainēp ta si em ni? tih tura ṭawngkam an han neih zauh phei hi chuan keini ang rual zawngin tih leh ngam chi a ni lo vang,” a lo ti ta hial a ni. (*Thu leh Hla* Sept. ‘79 p. 32).

Book review ziak turin editor hian ti thei leh thiam a riñte sāwmin a hñuté pawh a ful chuān a pe thin a. Prof.

Lianhleia'n *Thlahleinga Zan* a review-a a ɻawngkam hman chu, "Zirna nei sâng vak lo thawnthu ziak hmasa berah chuan iaiawm tak chu a ni lo va, mahse college-a Mizo ɻawng leh literature zirna sâng ber B.A. zir atan êm chuan a iaiawm lo thei lo; a thlâk thuaitu tur, a aia tha neih thuai a duhawm deuh a ni," tih a ni. (*Thu leh Hla* March '78 p. 14). Hei hi a lo chhiarin Lalzuia Colney chuan, "Pu James Dokhuma, a mimal nihna a ûmzui thui deuh tih loh ah chuan....Pu Lianhleia'n a sawi hi âwm ka ti ve nual a. Mahse college zir atan hian iaiawm se, iaiawm lo chu khawiah nge? Pu Lianhleia hian a book review hi rawn bei tha leh sela ka duh ngawt mai," tiin Dokhuma thlavâng a rawn hauh va. (*Thu leh Hla* April, '78 p. 14). Mahse Prof. Lianhleia chuan, "Ka review kha ka review zo tawh," a ti deuh emaw ni, a beih that leh thu kan la hre rih ta lo.

R. Vanlawma'n *Mizo chanchin Hrangthiauva* leh Lalchungnunga ziak a review chuan, "A bu ziaktu hmingah hian Lalchungnunga (DIS thin kha) an ti tel ve mai nâ a, han en han en hian Pu Hrangthiauva ir-âwm aṭanga lo chhuak vek ni âwmin a rin theih a, he lehkhabu hi a tlâng tlâk theihna zâwk tura a hming an leisak mai niin rin theih a ni bawk," a tih bâkah, "He lehkhabu ziaktu ni âwma rin Pu Hrangthiauva hi" ti tein a review chu a ḫan chho va (*Thu leh Hla* April, '79 p. 13). Hemi thuah hian Hrangthiauva fapa C. Chhuanvawra chuan, "A bu ziaktu hminga Pu Lalchungnunga a tel hi he lehkhabu hi a tlâng tlâk theihna tura a hming leisak anga a han sawi kha Pu R. Vanlawma khan thil a hriat chian loh pawh rin thua thu ngam tako sawi mai mai chi a nihzia a tilang nghâl hie," a rawn ti ta khauh mai a. He lehkhabu chhunga thu awnte hi a khawn khawmtu leh a bua chhuah a nih theihna tura thil buatsaih a lo nih dan chu Thuhmaah pawh amah Lalchungnunga ngei pawhin a ziak tih sawiin, Chhuanvawra chuan chu chu, "Chhiar hmah loh atan a that tehlul nen!"

Khatiang ɻawngkam leikuai tak kha chu ram hruaitu ni ve si tân chuan hman loh atân a tha hle mai," a ti nghal bawk a. (*Thu leh Hla Aug.*, '79 p. 12). Heta 'ɻawngkam leikuai tak' a tih hi R. Vanlawma'n "He lehkhabu hi a tlâng tlâk theihna zawk tura a (Lalchungnunga B.A. B.T.) hming an leisak mai niin rin theih a ni bawk," a tih hi a ni ber ang.

Book review Mizo ɻawnga ziak kan chîn tâk hi *Mizo Zirlai Pawl Chanchin Bu* Editor ka nih lai, kum 1973 aṭanga ka tih ṣan a ni a; R. Vanlawma lehkhabu *Ka Ram leh Kei* tih review article ka ziak MZP Chanchin Bu, January, 1973-a ka chhuah chu, ka hriat sual loh chuan, Mizo ɻawnga book review ziak hmasa ber a ni. Ka ziakna chhan ber leh, tûn hnuah *Thu leh Hla* chanchin bua ka chhunzawm duhna chhan pawh kan ɻawnga literary criticism tihchhuah ka duh vang leh, literature lamah hmasawnna a nih ka beisei vang a ni a; mi lehkhabu ziak a that lohna lai zawna a tui tla lo thei ang ber zâwnga sawi tumna a ni lo. (see *Thu leh Hla* March, '78 p. 11). *Didakhe*-in book review a lo tih ṣan ve tâk khan lehkhabu thar zawrhna leh sawi mawina ang deuh maiin an ziak thin a; mahse tûn hnuah Parliana ziak *Khawvel hun tawng Ropui Ber* tih Rev. Chhuanliana'n a review te kha chu a standard a hniam lo hle; lehkhabu a nihna thlir mai bâkah kha review kha 'Pathian thua rin dan inang lote inhnialna' tih theih hial tur a ni. Hemi *Didakhe*-ah bawk hian kum (1979) chhunga Presbyterian kohhran Sunday School zirlai bu Rev. Rongzinga ziak *An Sulnu* tih chu Rev. Zalawma'n a review kha han chhiar chuan ngaihtuahna zau zawk min neihtiria fimkhurna tur thil tam tak pawh kan hriat phah a ni.

Amaherawhchu, "Unau thawnthu sawi pawh a dang," tih thin sang hians, kohhran khata awm theuh theuh Pastor te pawh hi, an zirus hantun inang reng ni siin, an Bible thu hellihfiat dan leh sermon duh dan erawhchu a inang vek lo va;

school/college khata lut, zirtirtu thuhmun nei te chu sawi loh, lehkha zir lote pawh hi an ngaih dan a inthuhmun chuang bawk bik lo va. Chutiang bawkin R. Vanlawma leh Hrangthiauva te, Liangkhaia leh Vanchhunga te leh Zatluanga te Mizo history ziak pawh inang vek thei rual a ni lo va, hriat dan te hi a inan loh mai avanga indeusawh mai tur pawh a ni lo. Kan thu ziakna ṭawngkam leh ziak dan kalhmang te pawh hi inang vek thei rual a ni bawk lo.

Chutih avang chuan zirtirtu Remkunga ziak *Mizo Pi Pu te Khawsak Dan* tih chu, zirtirtu ve bawk Ngurchhawna'n a lo review chuan amah Remkunga chu thil uluk tak leh duhtui taka ti mi a nih a ring a ni ngei ang, mahse a beisei ang a lo nih tâk loh avangin Ngurchhawna chuan, "A ziaktu hre lovin chhiar chhuak ta ila, Pu Rema ziak a nih i ring em? tiin, min zâwt ta sela, ka rin loh chhan point eng emaw zât sawi tur ka nei mai thei," a ti hial a. (*Thu leh Hla* July, '78 p. 28). Remkunga hi ṭawng zir mi *Mizo Grammar* bu te pawh ziaktu a ni a, mahse a lehkhabu review-a punctuation te a han en hian grammarian kut chhuak ni theiin Ngurchhawna chuan a hmu lo ni tur a ni.

Book review hian a tum ber chu lehkhabu a tlâng tlâk theihna tura vawrh lâr (advertise) mai ni lo vin, belh chian a dâwl leh dâwl loh te, a bu chhung thute chu thil dang thlir leh tehna zel atan te pawh hman ngam tur a nih leh nih loh, a ziak dan kal hmang a fel leh fel loh te leh a ṭawngkam hmante en chian a ni. Chuvangin zirlaibu (text book) meuhva kan hmante phei hi chu entawn tlâk leh zir tlâk a nihna tur ngeia ngun taka ziak leh uluk taka chhut a ni ngei tur rêng a ni. Democracy hun a lo ni ang bawk hian, a that lohna lai leh siam that fulna lai hriaa rawtna nei te chuan, ram pum zirna nghawng thei thil a nih avangin, an sawi chhuak ngei tur a ni. America ramah phei chuan sikul leh college-ah pawh text book ngai reng hi, kan rama kan chin ang hian, an

hmang ngai lo va, subject tin deuhthawah semester tin hian text book tha zawk leh ziak dan fel zawk thlang chhuakin a thar emaw ziak dang emaw hmangin an thlak kual reng thin a ni.

Lehkhabu tha leh tha lo hriat theih nan hnam fing zawk leh literature nei tha êm êm, Sap-ho te hian literary criticism leh book review ziak hi an lo uar nasa hle a, an literature pawhin hma a sâwn phahna chhan pakhat a ni rêng a; English-ho aiin German leh French-hoten an uar zawk nghe nghe a ni.

Amaherawhchu mi dang thu ziak lo thlir dik thiam hi thil awlai a ni lo va; Sapho zingah ngei pawh a thatna lai tlangaupuina aw aiin an duh loh zâwng leh rîlrem loh lai tlangaupuina aw hi a ring zawk fo tih kan hria. Wordsworth-a pawhin, critic chuan a duh loh zâwng thil a hmuuh chuan a lawm êm êm thin a, chutiang hmuuh chu thiamnaah a ngai a ni, tiin a sawi. (*Preface to the Lyrical Ballads*, 1798).

Review ziaktu chuan a lehkhabu chhiar chu ngaihnawm ti tak leh tui taka chhiar zêlin, a chhunga thil sawite pawh chu mitthlain a hmu thei hial a; a thu inpêk chhoh dan pawh a indawt tha a, sawisel tur vak pawh a hre mang lo va. Mahse phêk tam fe a chhiar hnu chuan a duh loh zâwng leh thil ni thei lo va a hriat, a han hmuuh chuan rangkachak them chhar ta ang hrim leh lâwm êm êmin, "Hei le! hlauh mai a," tiin, "Eng ang jawngkam hmangin nge hei hi ka han tarlan ang?" tihna rilru a lo nei ta a; jawngkam mei nei deuh leh dengkhâwng deuh tak han rawlh châkna pawh a nei nghai thim. Chutianga jawngkam han rawlh chu 'mi thiam

"mu fing" nihnaah pawh a lo ngai deuh hial a ni. A hma zawnha chhiar nuam leh bengvarthiak a tih êm êmna leh ngaihnawm a tih chungchângah te kha chuan, sawi ngai vak pown aymin a hre dat lo thung. Hetiang hi kan chin dan a nih casen book review chi, "A tiin lohna leh that lohna lai zawnha leh a zawnghum chutiang chu a hmuuh chuan tlangaupuina,"

tih ang lek a lo ni ang.

Tlin lohna leh that lohna lai tih pawh hian ngaih dan leh duh dan inan lohna khawvelah kan chēn avangin Bible thu pawh kohhran pawl hrang hrangah an duh ang theuhvin an zirtir a, thlarau hruaina pawh neein an inchhâl theuh bawk a ni. Entir nan- *Ka Zinna Ram* tih ziak lo chhiartu zinga Pastor pakhat chuan, "Ram Thianghlim i tlawh thu i ziakah khan Bible châng sei deuh deuh i lâk chhuah chhiar ai khan tûn laia a ram awm dan i ziak lai kha ka ngaihnawm tih lai ber a ni," tiin, min hrilh a. Mahse kei chuan taksa ngeia ka zinna a nih bâkah Kristiante hmun thianghlim han fan chuan, hmun thianghlim a lo nihna chhan ngaihtuah chhuakin rilrua ka zinna a lo nihna chhan ngaihtuah chhuakin rilrua ka zinna (reflection) ram pawh a ni nghâl miau va, chûng hmun ka tlawh laia ka rilrua thil lo lang chu sawi lo thei niin ka inhre lo va. Pathian thu hre hle tawhte tân tul vak lo vah min ngaihsak pawhin kei chuan thingtlanga nu mâwl zâwk leh pa mawl zâwk bêl chiang mang loten ngaihnawm an tih theih tur ang zâwng nia ka rin leh, an ngaihruatna kaihruaia an hriatna tipung thei a nih beiseia ziak ka ni a. Mi tam tak lei duh chhan pawh a lo ni tih ka hriatin chhut hnighnaah pawh ka tidanglam duh chuang lo a ni.

English literature chungchang thu ka ziah chuan a chhiartu turte chu chutiang lam ngaihven mi an nih ka beisei avangin tîm miah lo vin English poetry pawh la chhuakin ngaihruatnaa ka zinna ram chanchin chu ka ziak bawk tho va; miin lo sawisel dâwn ta ang sela chuan, "Ngaihruatna zinna ram leh hmun ñhenkhat ka tlawh laia ka rilrua thil langte (reflections) a ni miau si a ni," ka lo ti tlat dawn a ni.

Thu ziak review chungchangah hian Sapho zingah pawh a dengkhawng zâwngin leh a ziaktu rilru tina zâwnga ziak hi an chin hun a lo awm ngei tih kan hria, John Keats-a chuan, a hla phuah *Endymion* chu *Blackwood Magazine* leh *Quarterly*

Review ten an lo dêusawhzia a lo hmuhin a rilru a natzia a thiān lehkha thawnah a sawi lang hial a. (*Keats' letter to Hessey*, October 9, 1818). Mi thil chik mi thenkhat chuan Keats-a hriselna pawhin a chhiat phah lehzualin a thih hma phah hial niin an sawi. Mahse Keats-a chuan mahni inrin tawkna a neih tlat avangin, rilru na tak chungin, "Ka thih hunah chuan English Poet zingah chhiar tel ve ka nih tho ka ring a ni," a la ti fan a. (*Keats' letter to Georgiana* October, 15, 1818). English poet zingah chhiar tel zawng a lo ni na meuh mai. Keats-a hi, kum 26 mi lek niin, Rom khuaah a thi a ni.

Coleridge-a hla phuah zinga a ropui ber nia ngaih *The Rime of the Ancient Mariner* chu Robert Southey-an a review chuan, "Hla engmah vak mang hlei lo phuah nan, thiamna chungchuang neiin, a tha leh zung a khawhral mai a ni e," tiin a ziak a. (*The Critical Review*, October, 1798). Mahse a hun lai ata vawiin thleng hian Southey-a ngaih dan hi tawmpuitu English literature zir mite zingah hian kan tam lo kher ang, "Southey-a hian a aia talent nei tha zawk daih thu ziak engtiziaa hetia lo ti mai ngam nge maw a nih le!" kan ti rilru thin zawk a ni.

R. Vanlawma'n *Ka Zinna Ram* a review-naah chuan "rawn châwl" tih aiah "lo châwl" tih ni zawk se ti mai lovin, a ziaktu hi "A.I.R.-a kan nula Sap tawng thiam 'announcer'-hote ang lek leh Wild Western lam cowboy chanchin Mizo tawnga letlingtute ang lekah a insiam a ni tih mai loh chu han vuah tur dang rēng a awm lo," tiin a khak kual tam thei ang ber zâwngin, thu a la vung a; chu mai pawh chu la duhtawk lovin, "Tarmiit vuah tih turaki te hian tarmiit bun a ti zei ang em aw?" tiin a zâidin nghai a. (*Thu leh Hla May*, 1978 p. 18-19). Mizo zinga a tam zâwkte hian Mars khi Sikeisen kan ti a, kan chanchin bule pawh hian an sawi dan kumkhua a ni a; Pu Buengs Dictionary-a a lan dän pawhin Mars chu Sikeisen a ni. Chantang chu kan sawi dan a nih avangin kei pawhin Mars

chu Sikeisen tiin *Ka Zinna Ram* tih buah chuan ka ziak a. Chu chu R. Vanlawma chuan, "A ziaktu hi thil hre zau tâwk tak nia ka lo ngaih a nih vei nê...Mars chu Sikeisen niin a sawi tlat mai a. Mizo chuan Si-aia kan ti zâwk reng si a" tiin a aw kî a tisâng a. Mars khi Si-aia titu awm chhun ka hriat Pastor Liangkhaia'n *Arsi Chanchin* (1975) -ah a ziak a, hei hi R. Vanlawma thu lâkna (authority) ni maiin ka ring nghe nghe a. Mahse Liangkhaia ziak hian Mizote hi, "Mars khi Si-aia min la tihtir ta chuang lo va, Sikeisen tiin kan la sawi reng zawk a; chuvangin second edition-ah pawh ka tidanglam duh chuang lo va; foot note-ah zawng Mars hi Si-aia a ni zâwk ti pawh an awm tih erawh chu ka ziak tel ve a. Mary Winchester kha Sailam aṭangin nge lâk lêt leh a nih, Kawlri aṭangin tih sawi chian a lo ngai ta ang hian, Mizote hian kan lo sawi ḥhin dan leh lehkhabuah te pawh ziaka kan lo neih ḥhin Mars hi Sikeisen a ni tih hi nge dik, Si-aia tih hi tih thuah pawh hian thu tlûkna kan siam hran a ngai em tih hi ngaihtuah tur pakhat a la ni mai thei. Chuti ni lova ngaih dan him tâwk leh innghahna fel leh dik awm si lova mahni ngaih dan thu ngam taka tlangaupui hi a chhiartute rilru hneh theihna pawh a ni fo chuang lo a ni.

Thu leh Hla September, 1979 phêk 4-naah chuan R. Vanlawma vêkin, "Siamkima chuan...ṭawng dik a awm chuang lo a tih pawh kha..." tiin a ziak a. Mahse ka thu ziak a sawi *Siboleth* leh *Shiboleth*-ah chuan, "Ṭawng dik a awm chuang lo," tiin khawiah mah ka ziak hmuh tur a awm lo va, "Ti tluk a ni e," tih tûr pawhin ka sawi hek lo. Chumi ka thu ziak, Vanlawma'n a sawiah chuan ka sawi ber chu hnam dang ṭawng hi puitlin tawh hnu chuan thiam leh lam dik a harzia leh ṭawng khat hmang zingah rau rau pawh hian hman duh dan a inthuhmun vek theih loh thu a ni.

Heng aṭangte hian mi thu sawi dik taka sawi chhâwn

leh mi lehkhabu ziak lo review a, an thu sawi laimu kheh chhuah thiam hi a har hle tih kan hre thei ang. Chu bâkah chuan review ziaktu tân, mi tam takin an lo chhiar bel hle tawh leh duh êm êm lehkhabu chungchâng te pawh mi tam tak rilru kalh zâwnga lo ziak vak hi thil awm thei a ni bawk. Entir nan - *The Normal Christian Life* by Watchman Nee, Upa Lalrongênga'n *Christian Nun Tluang* tia a lehlin chu upa vêk, C. Sangzuala'n a review chuan, a hmâwr bâwk nân, "Thil nasa tak ti tura koh, Kohhranho tân chuan he lehkhabu hi thawhmawh inzirtirna tha fê tur zawng a ni...." tiin a sawi hnâwm a. (*Didakhe*, Sept.-Oct. 1979). Mahse he lehkhabu hi lo ngaina êm êmtute leh Mizo jawnga lehlin hlân lo nghakhlel thinte tân ve thung chuan, "Engtiziaa he Kohhran upa hian a chan phâk loh, thlarau lam thil, Watchman Nee-an a testimony a sawi hi hetianga lo review mai ngam nge maw a nih chu le!" lo tihna tur a ni thei ang. He lehkhabu hian ngaihsan a hlawh hle sizia chu, Aizawl Mission Veng kohhran phei chuan Sunday School kal that lawmmannah bu tam tak kum 2 emaw chhung chu an lo sem tawh nghe nghe a ni.

Thu ziak leh a review lo ziak te hi kan zir tlâng vek a, atuate mah innuihzat tur chuang kan awm lo va, engmah ziak (published work) la nei si lo, thiam duhna rilru neih ringawt hi kan tum tur a ni lo vang. Kan book review ziak þintute leh article ziak þintute hian, thiam ve dang tam takte tih peih loh leh tih hman loh an lo ti thin zawk a ni a; anni hian peih ve ta lo pehi sela chuan lehkhabu chhiar tur leh thuchhuah turte hi kan nei dawa lo a ni. Hnam changkang zawkte chanchin bu enisawitute angin hlawh itawn tham hmuh tur chu sawi loh, article thi leina tur neih hun pawh kan la hiat mai thei a; a latute lah hian a man tak ngial pawh kan pe tha thei si lo va; mi tlawmangaite leh thahneenngaite peizawnin kan chanchin

bute hi a la kal thei hram hram zâwk a ni a, a infuih zâwng leh a intiphûr zâwnga kan kal zêl a tûl a ni.

James Dokhuma sawi angin, tuna kan țawnga thu ziak awmte hi mi thiam zawkte cho chhuah zel nan a ni e, tiin ngai thei ila; cho chhuah an la awm hma si hi chuan, kan neih chhunte hi kan hnam ro hlu leh thil țha tia sawi loh theih a ni lo. Chuvangin, book review ziaktute pawh hian, "Ka Hla Duhzâwng," tih ziaktute leh radio-a hla thlang țhinte rilru ang hi puin, "Ka Lehkha Duhzâwng," tihna rilru nei tel ta zâwk sela, a chhiar pawh a nuam deuh ang. *Thu leh Hla* September 1979-a Dr. F.K. Lehmana'n *History of the Mizo in Burma* tih B. Lalthangliana ziak, English version, English vêka a han review te pawh kha critical appreciation a ni ber a. R. Vanlawma'n "Hla review" (*A Âwm lo Em Mai* by Jerry Zirkunga Hnamte) a ziak pawh khân lehkhabu a review-na rilru chu "Hla review" ti mah se, a hla duhzâwng leh a duhna chhan (critical appreciation) sawina lamah a her ta thung a, fak pawh a fak thiam kher mai; *Thu leh Hla* March, 1978-a James Dokhuma lehkhabu ziak, *Ni leh Thla Kara Leng* a review a, "Sanghar âr rawh an tih ang lekin, a ti thiak thuak chauh a ni," a tih te ai kha chuan, chhiar nuam kan lo ti theuhvin ka ring.

.....

HRAWVA (1893-1956)

KHUANU LENG CHAWI

Father of Mizo Poetry

*Sheksipiara khuanu leng chawi an ti e;
Kei lo liama khuanu leng chawi,
Chun chawi loh val tlei lian hi.*

Mizo literature-a Hrawva hmun luah tûr hi “Father of Mizo Poetry” a ni a. Hemi awmzia hi kan Mizo hla thu hmanga poetry taktak ziak hmasa bertu leh kawng sâttu tihna a ni.

Mizo tawng leh literature bul tanna tûr lunghphûm min lo phûm saktute chu Sap Upa leh Pu Buanga (Rev. F.W. Savidge leh Rev. J.H. Lorain) an ni ang bawkin, kan hla thu hmanga hla phuah dan tur min lo kawhhmuhtu hmasa ber chu Hrawva hi a ni. Chuvangin a hlate hian entir leh awmze thûk tak neiin pawimawhna bik an nei a ni. Hrawva hi Sap Upa leh Pu Buanga te kutchhuak, an hun laia Mizo rama zirna sikul tha ber, Baptist Mission Sikul, Serkawna lo zir chhuak a ni bawk.

Hrawva hi kan tawng leh hla thu hmanga hla phuah theih dan kawng min kawhhmuhtu a ni kan tih hian Lianchiari te, Laltheri te, Darpawngi te, Saikuti te leh Awithangpa te hla phuahho hi kan mangnghilh ta mai tihna a ni lo. Amaherawhchu heng Hrawva hmaa mite hla phuah leh Hrawva hlate kan literature-a an hmun luah hi a in pawimawh hleih chauh ni lovin, mihring nun ram min thlirtir pawh a inpersan daih a. Hrawva hmaa mite ‘hla’ hi chu kan Mizo mun-hlai, zawi zawia lo ralta mai awihna kha a ni a; Hrawva hlate crewh hi chu nun thar leh duhthusam thar, Mizo nun leh

rilua awm hlen turte zawnna leh piān chhuapa a ni thung a. Tichuan a dinhmun hi English literature-a Geoffrey Chaucer-a (1340?-1400) dinhmun nen pawh ian na deub neim kan hmū a ni. A hun hmain hla phuahtu engemaw zāt an lo awm pawh nain Chaucer-a chu "Father of English poetry" tih niip tihma tur chhan pawh a awm ngei a. Chutiang dinhmun hawk chū Hrawva hian Mizo literature-ah hian a luah ve a ni.

Hrawva pianna khua a nih avang chauhva hriat reng hlawh tur, Khawthir khuaah Hrawva hi kum 1893-ah a lo piang a. A pian hlima a hming an sak chu Rolala a ni a, Khawthir khua hi Lunglei atanga khaw chhak lam mel 20 vela awma ni a, Khawthir atangin Baichi khuaah an insawn a; Hrawva ram lova an neih avangin kan hla phuahtu hian 'Hrawva' tih hi, a hming pakhat angah puin, miten koh nan an lo hmang a. A hming tak aiin miten an koh lärna zāwk a nih avangin sikulah pawh hemi hming hian a inziak lüt a, a lo pu hlen ta a ni.

Kan hla phuahtu Hrawva naupan lai chanchin hi hre chiang lo vin mi tam takin an sawi thin a. Hetiang hi a ni : A pianna khua chu Lunglei chhak lam Khawthir khua a ni tih kan sawi tawh a. A pa hming chu Thanthulha a ni a, a nu hming chu Dolaii a ni.

A pa hian Dolaii a neih hmain, a nupui hmasa Hmaipēri lakah fapa Makthanga a nei a; Makthanga nu chu a then hnuin a nupui pahnihna Dolaii lakah Hrawva hi a lo hring leh a. Tichuan, Hrawva leh Makthanga chu unau, pa hmun nu hrang an ni a, Makthanga chu Hrawva aiin kum 7 velin a upa zawk a. Tin, Makthanga hringtu Hmaipēri chuan a pasal pahnihna Darmaka lakah Zotlang lal Thanghuta leh Pukpui lal Taikhuma a hring a; Makthanga unau, nu hmun pa hrang an ni ve thung.

Hrawva hi naupang chumchiap a nih laiin a nu chuan a thihsan a; a nu thih atanga rei lo tēah a pa chuan a lo boralsan

leh a. A nu leh a pa dam lai zawng hi chuan a u Makthanga te nen hmun khatah an awm a. An pa chuan a thihi dawn chuan Hrawva chu a pami, a unau pianpui, Saritawma hnena lo awm tur leh, Makthanga chu a nute hnen lama lo awm turin a chah a. Tichuan Hrawva chu a pa unau Saritawma te hnenah chuan kum 3 chhung vel a awm a. A pa Saritawma nupui Uiliani chuan a tirethei êm êm mai a; a nu leh a pain an thihsan aṭanga a lo retheih dan leh, a pa Saritawma nupuiin a tihduhdan dante chu a hlaah pawh kan hmu a ni. A u Makthanga, a nute hnen lama awm ta chuan a nau chu a ngaihtuah êm êm thin a. Nakinah chuan an pa Saritawma thu pawh chu hnial thla ngamin, a phal lo chungin, kan hla phuahtu tur chu a u chuan Serkawn sikulah lehkha zir turin a hruai ta a. Chuta a zir zagh chuan Shillong-ah high skul a zir zo leh a; chuta ṭang chuan Calcutta-a St. Paul's College-ah zir turin a kal a. Kum 1924 khan B.A. a pass a; amah ruala B.A. pass, Lianhnuna leh Hrawva hi Mizo zinga B.A. pass hmasa ber an ni.

Hrawva hi a nu thihi hnuah a pain nupui dang nei ang leh, a nuhrawn chuan tiduhdah hle ta angin C.Z. Hualā, Hrawva hla khawnkhawmtu leh mi dangte pawhin an sawi thin a. Hei hi thu dik lo a ni. A lo puitlin hnuah Hrawva khan a nu leh a pa chu a ruala thi ti hialin a sawi thin a. Amaherawhchu a hla aṭangte hian a rual tak taka thi ni chuan an lang lo va, an thihi hun inkār hlat zāwng erawh chu thla tiêm tē, kum khat tling lo pawh a ni thei e.

Makthanga hi Serkawn sikula zir hmasa ber pawla tel a ni a; a lo puitlin hnuah Mizoram Bawrhsap pisaah babu lian hna kum rei tak a thawh hnuin Aizawl lal ah a thu ta a. A nupui Dorchhungi nen fa nei lo vin, kum 1942 khan an boral ta a ni.

Hrawva chuan kum 1926-ah Aizawl Melthum khuaa tieirawī hnei tha tak Lalluui (16) chu nupuiah a nei a. Kum

1927 aṭanga 1945 thleng Aizawl Boys' M.E. School-ah Headmaster hna a thawk a. Chu mi hnuah a u Makthanga hmun luahin Aizawl lalah a thu a. Kum 1956 April 28 tlai them dawn velah kum 63 mi niin Durtlang damdawi inah a lo boral ta a ni.

Hrawva hlate hi ama ziaka mi C.Z. Huala'n la khâwmin *Pu Hrawva Hla* tiin, kum 1970 khân a buin a chhuah a; telh kim loh pahnih khat emaw chu awma hriat a ni nân Hrawva hla kalhmang leh zepui kan hmuh theihna leh zir theihna pawimawh tak a ni.

Hrawva hla la khawmtu C.Z. Huala hian a hlate hi Calcutta-ah College-a a awm laia a phuah deuh vek niin a sawi a. Chutia a lehkha zir lai hun chu kum 1920-24 vel kha a ni a. Hetih hun lai hian Awithangpa chu tuilairapin khawvel hlui leh thar nun kâr tawnin a lo awm hman tawh a. A lunglênnna tak zâwk chu nun hlui ral ta riai riai lamah a nih avangin ngawih lam a chuh a, ama rilru puakchhuaka Kristian nun hla phuah pawh a nei lo. C.Z. Huala vêk hian, "Kristian hla thar phuah rêng rêng hi, ka hriat dan a dik chuan kum 1922 vela kan chin ḥan hi a ni," tiin a sawi a, (*MZP Chanchin Bu* July, 1965). Hetih hun lai bawk hi Patea te, amah C.Z. Huala te leh R.L. Kamlala ten Mizo Kristian (lêñkhâwm) hla an phuah ḥan lai a ni a. Lêng lal Saihnuna hi chu a hnung hret a, kum 1921-ah Kristiana lût nghetin 1924-ah baptisma a chang a; kum 1926 aṭanga hla rawn phuah ḥan a ni. Tichuan kan Mizo lehkha thiam puitling hmasa ber Hrawva hla phuah hun lai hi ngaihtuahin hmahruiatu leh kawng sâttu a nihzia kan hmu a ni.

Chu mai pawh chu a la ni lo. A hla phuah dan kalhmang leh a thu thlûr hrang hrangte hi chik taka kan en chuan mihring nun darthlalang tha tak a tling a ni. Amaherawhchu Hrawva hian hla a phuah tam lo hle si a ni. C.Z. Huala'n a hla phuah a lâk khâwm zât chu 13 a ni a, kan sawi tawh angin pahnih khat

telh hmiah a lo awm pawhin hla phuah tama sawi tur chu a ni lo. Hemi kawngah hian English poet Thomas Gray leh kan Hrawva hi inanna tak an nei. Thomas Gray, *Elegy Written in a Country Churchyard* phuahtu hi, a hla phuah thiamzia hemi hla atang hian kan hmu a. Mahse, hla a phuah tiem hle si a ni. Amaherawhchu he *Elegy* hi hla tha leh hmingthang berte zinga chhiar tel a ni reng a; he hla pakhat mai avang pawh hian English literature-ah hmun ng het leh sang tak a neih phah a ni. Hrawva pawh hi a hla tiem te hian, kan Mizo hla phuahtu dangte nen tekhin theih loh tur chu, dinhmun pawimawh bik an luahtir ve a ni.

Hrawva hlate hi mihring nun dârthlalang a ni tih kan sawi tawh a, dârthlalang keh thei lo leh chhe thei lo ang chi hi a ni. Hrawva hlate hian a puan chhuah chu - hmangaihna nun, mihring leh mihring inzawmna leh inlaichinna nghehzia leh inthianna nun te a ni. Chuvangin Hrawva nun ramah chuan "Hmêl inhmuh loh chu intheiknghilh" tih thu hi a awm ve lo. Chu bâkah chuan Hrawva hlate hi rin thu emaw, duhthusâmna emaw mai ni lovin a tak taka pal tlang tawh nun puan chhuahna hla (poetry of experience) a ni bawk. Hetiang hi mihring nun hriat zauna leh finna hla (poetry of wisdom) a ni a. Heng avangte hian a ni, literature hi khawvel hian a ngaihsan a, kan zir thin hi ni.

Tin, Hrawva hla kan zira kan chhinchhiah tur pakhat chu a phuah hun hma deuh atanga Mizorama lâr êm êm, a hun lai pawha la lâr zai, Tlanglâm Zai, Pûma Zai atanga inzawm chho, hla châng kal hmang (verse form) dung zuia hla a lo phuah tan hi a ni. Hetiang hla hi tlâr thum zai kan lo tih thin, khawvel zai tih nen thuhmun penga ngaih a ni a. Chutiang hla châng dung zuia hla a lo phuah tan tlât mai hian a mizia (personality) leh rikru put hmang pawh a târlang tel a ni. Hetiang mi huijen, mahnia inrin tawkna nei mi a nihzia

a entir a. Pûma Zai leh Tlânglam Zai te chu kohhranin nasa takin a do va; mahse kan mithiam puitling hmasa Hrawva chuan Mizo zai kalphung awm sa (traditional verse form) chu hla phuah nana hman a thlang phawt a; a talent neih chuan savun peng hlui chu rawng thar a hnawih a, a uain thar dah nan rem takin a lo hmang ta a ni. Hei hi Hrawva ropuina leh a hla hlut bikna chu a ni. A hlaah hian nun hlui leh nun thar inzawmna leh inpawhna kan hmu bawk a ni. Khawvel hnam tin zingah hian kawng hrangah, mite la tih ngai loh, thil thar ngaihtuah leh siam chhuaktu (innovators) te chu huaisenna leh thiamna nei mite an ni ḫin. Hrawva pawh hi chutiang mi chu a ni.

A hla phuah zinga ropui ber *Rairahtea* tiyah hian hmangaihna hlutzia puan chhuahna kan hmu a. He hla hi tlar thum zelin chang 58 a ni a, hla châng khat tlar 4 neiin a tlâng a kâwm a. A naupan têt laia a retheihna chu hla thu tluang tak veikin a chham a; khawvel mihringa lo piang, naupang tam berten an dawn ḫin, nu leh pa hmangaihna dawng ve lo vin, baihvai taka a lo sei len dan leh nu leh pa a awhzia te kan hmu a. He hlaa a thunawn pawh *chûn leh zua* a ni : *chûn* tih 53 leh *zua* tih 33 kan hmu a, a châng ḫenkhatah phei chuan tlar tinah a nu a lamna kan hmu hial a ni.

*Chûn tawng lovin rûn in chhungan a vai e,
A chûn zâlna laikhum chûlin,
“Khaw’nge ka chûn?” a ti e.*

*Zân khua rei e, a chûn lêng a haw lo ve,
“Khaw’nge ka ni, ka chûn?” a ti,
“I chûn lêng a haw thuai ang.”*

*Tah lai bang i ka zua, nangin min awm la,
Ka ngai lo vang ka chûni nu,
Zingzin a lo haw thuai ang.*

*Chūn leh zua siang lawi nān tlai ni lo tla e,
Rairah chūn zua siang an lawi lo,
Zingzin an chām rei mang e.*

Tin, he hlaah hian nu leh pa neih loh chu naupan lai chuan retheihna tāwpkhāwk a nihzia kan hmu bawk; chuvangin rairah riang te tih 30 leh rairah tih 19 kan hmu a. Sum leh pai jama harsatna thu emaw, silh leh fēn lama rual awhna emaw, ei leh bar tlākchham thu emaw lam a awm lo. Hetiang dinhmuna a awm laia a inhnemna awm chhun chu a u Makthanga, hmun danga awm chu a ni a, he hlaah hian a u a lamna hi 13 kan hmu bawk.

*Tap tap tā'ng e, chan tawk Khuanu'n min rel chu,
Engin nge thinlai riangtē min hnem?
Lal lai dil ka u lo chu.*

*Eng dangin nge rairah riang thinlai hnem le,
Khuarei u seilen dāwn changin,
Thinlai tui ang dam thin e.*

*Kumtluang hei chen rairah riangtē ka vai e,
Chan tawk riang khuanu'n han rel rawh,
Ka u khua rei dam turin.*

*Thlang Sappui lal lai zarzo a u chawiin,
Chūn zua ngai lo rairah riangtē,
Lal lai dil rūn sangah e.*

*Chūn leh zua chawi duhten tual an leng liai e,
Chan tawk riangtē a u sirah,
Tawn par chhāwn ang a thlē e.*

Heng mihring nun a phuahna hlaahte hian thil awm tawh lo sūnna leh ngaih êm êmna thu kan hmu phawt a, chu chuan rilru leh nun a khawīh dan leh a nghawng dan chipchiar taka sawina kan hmu leh a; mahse a tawpna leh tiāngkawmna chu inhnemna leh thlamuanna thū a ni. Hetiang hi English literature-ah pawh, Milton-a kutchhuak *Lycidas*-ah te, Shelley-a

hla *Adonais*-ah te, Tennyson-a hla *In Memoriam*-ah te kan hmu a. Hrawva pawhin a hlate hi a nu leh pate a chânnna leh a retheih thu sawinain a titâwp mai lo; a tlângkawmna leh a hmâwr bâwkna chu hei hi a ni :

*Biak lai chung Pathian vuan zel rawh,
Kumtluang hrui ang hruai tur che.*

A hla dang, Baichi khaw hlui tawh thu pawh hi kan enin, a nu aia dam rei deuh zâwk, a pa a ngaihzia leh a lunglenzia hlir kan hmu a; a nu a lamna a awm ve loh avangin a pa a ngaihna hla tih theih a ni. Baichi khaw hlui a han fan leh chuan a pa thi tawh chu a rilruah a lo lang ber a; he hlaah hian châng 14 a awm a, tah chuan a khawharzia leh retheihzia sawina *riang* leh *rairah* tih hi 9 kan hmu a, *zua* tih hi 11 kan hmu bawk. A tlângkawmna erawh chu thlamuanna leh inhnemna thu a ni. Heng hla pasarih *Rairahtea* tih te, *Baichi khaw hlui tlawh thu te*, a ɻhan Thangluia a phuahna te, a lehkha zirpui pakhat a u-in a boralsan tân a phuahsak te, a ɻhan dang pakhat thirhru hmuu thu te, a ɻhante Thangluiaia, Kapɻhiangi leh Kaikhami a ɻhenna hla leh *Khuanu lêng chawi* te hi kan enin a tlângkawmna leh thuchah chu thlamuanna leh inhnemna thu vek a ni tih kan hmu.

*Biak lai Chung Pathian vuan zel rawh,
Kumtluang khuarel hruai tur che.*

*Rairah zua ngai khuarei chang hnu dawn lo la,
Ngai teh, thlangah Sappui valin,
Rairah lung muan a hlân hi.*

*Hrui ang vuan zel ang che kan biak lai Liana,
A zai ngaitu khawtlang naufa,
Phunbûng ang an her lian ang.*

*Kan chan tawkah Chung Khuanu'n a rel tawh hnu,
Awmhar nun hlui, ka ɻhan dawn lo vang che,
Rairah chan nun thar a siam lian ang.*

*Ka hril thiam lo sakhming kai vel lung muantu,
Mi zawngin riangval Lal hmachhuan,
Thliah loh par ang an thle chu.*

*Min hnemtu dang reng a awm lo ve,
Ka hlān dawn e, biak lai hmaah,
Awmhar tānga min vuantu.*

*Khuarei chang hnu tinkim ka dawn thin a,
Rairah hnēmtu rēng a awm lo,
Biak lai Chung Pathian lo chu.*

Hēng a thiante tān hla a phuahsakahte leh a thiante thenna hlaahte pawh hian, a hlaa rawng chi hrang hrang zinga lār ber, *rairah riang* leh *chūn* leh *zua* tih hi kan hmu zēl a. Tichuan Hrawva hlaah hian a vaiin *chūn* tih 75 leh *zua* tih 52 kan hmu a; mi dang hla phuah rēng rēngah hetiang tluka nu leh pa lam tamna hi kan hmu lo vang. Tin, *riang* leh *rairah riangte* tih 48 leh *rairah* tih 32 kan hmu bawk a; mi pakhat hla phuahah hetiang tluka retheih thu chham nasatna hi hnam dang literature-ah pawh tu hlaah mah, hmuuh tur a awm lo vang. Chuti chung chuan, a hla pasarihte tlāngkawmna theuh kan tārlanna thu kente hi kan en hian, Hrawva hla thu laimu, a hla zawng zawng khaikhāwmna chu thu mal pathum chauh, “Khuanu lēng chawi” tih hi a ni.

Lei leh van leh mihringte siama kan awm dan tur min rēlsaktu hi Hrawva hian a lamna - *biak lai* tih te, *Chung Pathian* tih te, *Khuanu* leh *Khuanu lēng* tih te hi a hlaahte hian 17 kan hmu a. Amah chawi liantu chu hai rual lohvin min hrilh chiang a ni. Chuvangin a nun puan chhuahna hlate hian kan mihring nunah hian entir thūk tak leh ropui tak neiin, thu tam tak a sawi a. Retheih-fahrah thu chhamna a ni nain, a innghahna leh a hming a lam thin “*Khuanu lēng*” zarah, a tlāngkawmnaah chuan hnēhna hla a lo ni zawk a ni.

Baichi khaw Rairahtea chu Zo fate zinga lekhka thiam

putling, B.A. hmasa ber a lo ni a; chu chauh ni lovin Aizawl lalah a lo þhu ta bawk a. Tin, fanu leh fapa 13 a hring a, kan mi ril Zikpuii pa pawh hi chung zinga pakhat chu a ni. Hrawva nun leh he khawvela a zinna ram hi nasa taka sermon tham a ni. Kan Mizo hla siamtu dang R.L. Kamlala'n tûn hnu deuhvah, "*A riang naufa réng chang rawh,*" tia a duh thusâm a lo sawite hi, Hrawva pal tlang tawh nun a ni a; chu chauh ni lovin he nun puanchhuahna hla hi Rokunga hlaah pawh a thangkhâwk ri kan la hre reng bawk :

*Chûn lo hian i thlâ a lêng em ni?
Chung Khuanu'n a hual zêl ang che;
Thil tha pawm la, kawng dik zawh la,
A siam lian ngei ang che rual khûmin.*

Kristian sakhaw boruakin Mizo nun hi a tuam hnu a mihrinna lam rawng kai hla phuah kawngah Hrawva hian kawng a lo sah dan kan chhui ta a. Hemi bâkah hian hmahruaitu a nihna sawi tur dang a la awm. Hei hi Mizo hla thu hmanga Kristian hla phuah kawngah a ni.

Mizo Zirlai Pawl Chanchin Bu Editor ka nih laiin Mizo hla thu hman dan chungchang ziak tura Pastor Liangkhaia ka sawm chuan hetiang hian a ziak a ni : "Kan Kristian hla hi a siam hmasatu missionary-te khan Mizovin hla thu bik an nei ti hre lovin thu ziak pangngai (prose) mai mai hi a thiûk remin hla angin an ziak a, kan sa ta mai mai a. Tûna keini upaho, Mizo hmasate lah khan, Pathian lam hla chu heti tur réng hi emaw kan ti a, kan hla thu pangngai chu khawvel zai emaw kan ti ta a.

*Chutah romeia kai vel a,
Vanho thianghlimte zai vawrna chu*

tihte pawh kha kan sa hreh hle mai a; chu chu kan lo dik lo a ni ti hre tûnah chuan kan hre tawh hlawm awm e," (Rev. Liangkhaia : *Hla Thu*, MZP Chanchin Bu June 1973 p. 8 ed.

Siamkima).

Mizo hla thu hmanga Kristian hla pakhat Hrawva phuah, Pastor Liangkhaia'n tûn hmaa a lo ngaihthiam theih loh, mahse a hnua a ngaihsan êm êm leh si, a sawi chhuah fo thin chu hei hi a ni :

*Khawvel ruat hma, thangvan siam hma pawhin,
Tûrni, chhawrthla, siâr an len hma khian;
Chung Pathian Sal Thum rorelte chuan,
Thiam chang lo hnu chhandamna tur an rel.*

*Hmasang tuipui a awm hma rêng pawhin,
Krista thatna a tling khawm, tuipui ang;
A dâwn thiam e, kan tana malsawmna,
Luipui iangin khawvelah a luang chhuak.*

*Tlanna a kim, Kalvari tlang chungah,
Chanchin Thain lawi ang a rawn thlen e;
Lei tinrêngin fak se, hrênga chhuahna,
Thisen chhuakin a fam, thing lenbuangah.*

Pastor Liangkhaia khan he hla hi "A Mizo thu lutuk e" tiin a sawisel thin a, a ngaihmawh deuh ber lai chu *thing lenbuangah* tih hi a ni a, *thing kraws chungah* tia thlak a duh a ni. Amaherawhchu Mizo hla thu ngeia Kristian hla phuah hi a lo ngaihthiam tak hnu chuan Pastor chuan a ngaihdan a sawhsawn a. "Kan hla thu, kan hla jawng tlum tak mai khan Kalvari te phuah ila, Lal Isua leh a hmangaihna te phuah ila, kan hla chu a tha zawk êm êm ang tih a rinawm ta a ni... hla jawngte hi Pathian lamah pawh hman theih, hman thiang a ni a, thu ziak pangngai (prose) hlaa sak ngawt ai chuan a tha zawk daih dawn a ni. Engah nge kan Zo jawng mawi ber leh tlum berin Lal Isua kan fak lôh vang? Ngaihtuah tham a ni," a te ti hind a ni. (*Ibid*).

Kan hla han tar chhuah takah hiän Hrawva hian Mizo

hla thu hmangin Pathian thu a phawm chhak tha cher mai, a châng tawp ber phei hi chuan sawi a hnawn hle a ni. Hetiang thu hi R.L. Kamlala hla châng pakhatan pawh kan himu a mahse ani erawh chuan hla thu (poetical words) a hnawih ka nêp deuh mah a ni :

*Aw, min hrilh rawh, Thûkna ropui,
Ran thleng leh thing ânchhe dawng leh
Vana Lallukhum a inzawm,
Lei Eden leh Salem thar nen.*

Hrawva'n Joseph Addison-a thawnthu ziak *The Vision of Mirzah* tih a chhiar atanga Vanram a phuahnate hi han en hian a Mizo thu chauh pawh ni lovin Van ram chu Mizoram nena inri ang maiin, a Mizo reih mai a, Mizo tân pawh tlangnêlna ngei ngei tur ni hian a lang a ni :

*Hma loh ram lêntupui cham del,
Thing tin par mawi vulna,
Thlir teh romei kai hnuaiah sawn,
Van miten zai an rem;
An au rual khuangpui darlawi nen,
An Lal ropui fakin.*

Isua pian thu a phuahnate pawh hi han en hian Mizoramah pawh, Baichi khaw bâwng ina lo piang emaw tih hial turin a Zo khua reih mai bawk a ni.

*A ngûr lo piang par ang an lawm,
Lal lai tlang sël rûn lianah,
A tan hliaptu bawng in tlawm zar,
Laikhum zâlna ran thlengah;
A rawn lawmtu chhingkhuala mi,
A chawitu chûn riang Mari.*

Mizo hla thu hmanga hla phuahah kawng sâttu leh hmahruaitu a ni ang bawkin Sap hla lehlinah pawh hla thu hman dan min kawhhmuhtu a ni bawk. Krismas hla pakhat

Aw van lenruual zai thiamte u tih a lehlinah pawh,

*Ram loh tui thiang cham del chungah,
Berampu tuannaah*

tih kan hmu a. Sap hla bial pakhat Mizo hlaa a lehlin pawh hi han en hian lehlin tih hriat miah loh khawpin a Mizo thu a ni :

*With the Spring time comes the Robin
Singing his cheerful refrain
Sing away you happy songster
Bring us Spring time once again
Hark! hark! hark! hark! his cheerful voice refrain.*

*Khua lo thalin sirvatéin
Hlim takin zai rawn sa e,
Zai hla rem thiam-tê lo zai la,
Khua thal min rawn thlen leh rawh;
Chu! chu! chu! ngai rawh a hla mawi sak chu!*

Hetiang khawpa hla phuah thiam mi ni si, Hrawva hian English poet Thomas Gray ang deuhvin, hla a siam chhuak tam lo hle si a ni. A hla kan hriatte hi College-a a zir laia a phuah deuh vek a ni a; B.A. a pass hnu kum 2 velah nupui a nei a; a nupui chuan an inneih hnuah hla a phuah âwm rēng a hre ta lo a ni. Hei hi eng vang nge ni ang tih hi ngaihtuah tham tak a ni. An fate an hloh va, lusûn leh lunglêng êm éma an awm laiin tum khat chu Hrawva chuan hla han phuah leh a tum a, mahse a phuah thei ta lo a ni. “A hrehawm êm mai, ka ti thei hlawl lo; ka ɔap nasa lutuk dawn,” tiin a pâmtûl der thu a thiannu Lalluui chuan a sawi.

Amaherawhchu khawvelah hian thil tam takah a tam lam (quantity) aia kan ngaihtuah fo zawk tur chu awmze neia a thatna teh hlutna lam (quality) a ni. Literature ngaihtuah tute pawh hi hla kan hriat reng thin a ni. Chuvang chu a ni, Hrawva pawh hian, a hla tiémte avang hian, kan Mizo literature-ah hmun pawimawh bik a luahna chhan chu.

A hnu a kan Mizo hla phuahtute zawng zawng hian, an hriat loh hlânin, Hrawva kawng sah sa hi an zawk a, an la zawk thiam tha mang lo deuh vek zâwk mah a ni. Zirna leh thiamna lamah hmahruiatu leh zirtirtu a lo ni a; kan mi thiam Pastor Liangkhaia te meuh pawhin an lo ngaihtuah phâk loh, kan hla thu hmanga Kristian hla phuah theihna tura zalênnna kawng hawngtu a lo ni bawk a. Heng avang hian kan Mizo literature-a Hrawva hmun luah tur hi '**Father of Mizo Poetry**' tiin ka sawi a ni.

Retheih-fahrah thu heti êma chham nasa hi hla siamtu dang kan hre lo va; mahse hei hian entir a nei. A retheihna hla hian a hming a lam thin, 'a chawitu' chu a rinawmzia târlangin thil dang zawng aiin a chawimawi ta ber zâwk a. Nupui tha tak leh fanu, fapa duhawm tak tak a lo pêk tâk hnu phei chuan, a chawi seiliantu leh a hla phuahte lo thâwkkhumsak thintru, 'Khuanu lêng' chuan, "A tawk tawh e," tiin, a ngaihtuahna a tihtawpsak a; an fate sûnna hla pawh phuah a phalsak ta lo a ni.

A tawp berah chuan, kan sawi tawh angin, Hrawva hla zawng zawng khaikhawmna thu chu, "**Khuanu lêng chawi**" tihi a ni a. Chu chu mi zawng zawng-fahrah tân pawh, fahrah lo tân pawh, hmeichhe tân pawh, mipa tân pawh, mi hâng tân pawh, mi ngo tân pawh, mi lian leh mi tê-te tân pawh chanvo duhawm ber a ni. He khawvel piah, ram lo la awm tura "**Khuanu lêng chawi**" te chan tur a sawina hla chângte hian mi hungngai leh lusûnte a hnêm thin a; he ka zinna ram kawng chhuk chhova ka vah ka vah velnaah, Baichi khaw hlui chhak lam ni hnih kal, khaw pakhata nula thlân lungah pawh an ziak ka hmu a. Chu chu ka rilruah a awm reng thin. Chu chu Hrawva hla a ni a, chu chu Mizo Kristian poetry a ni.

*Ram hmun hring cham chunga lêngin,
Nunna tui thiang karah;
Hmanah tuarna, lungchhiat mittui,
Lalpan a hru fai ang.*

References :

1. Arnold, Matthew : *Essays in Criticism* (Second Series) Macmillan & Co., Ltd. 1964
2. Huala, C.Z. (Ed) : *Pu Hrawva Hla* (First Edition) Zoram Printing Press, 1970.
3. Huala, C.Z. : *Hla phuah thiam Pu R.L. Kamlala*, M.Z.P. Chanchin Bu, July, 1965 (Edited by J. Malsawma)
4. Lalchuanga (Ed) : *Lêng lal Sainuna Hla Bu* (First Edition) 1982.
5. Lalluui (Mrs. Hrawva): Personal Communication.
6. Liangkhaia, Rev. : *Hla Thu*, M.Z.P. Chanchin Bu, June, 1973 (Edited by Prof. Siamkima)
7. Siamkima (Ed) : *R.L. Kamlala Kut Chhuak*, Tlangveng Press.
8. Vanlawma, R. : *Awithangpa Chanchin* (unpublished typescript)
9. Zawla, K. : *Lalawithangpa* (First Edition) Khuma Printing Press. 1971.
.....

POETS' CORNER

Westminster Abbey

*Non merita nome di creator, se non Iddio
ed ol poeta - Tasso*

Poets are unacknowledge legislators of the world.
- Shelley

English Literature zir mite tân London hmun tlawh manhla ber tih theih hial tur chu Wesminster Abbey-a Poet's Corner a ni. Westminster Abbey hi British Lalber lallukhum khumna hmun leh an thih huna an inphûmna a ni a, biak in a ni bawk. A chhung kan han luha kan han fan ṣan hnu lawk pawh chuan a nghâktu bik ni âwm tak puithiam chuan a chhûng fangtute zawng zawng hriat tur hian aw ring takin, "Tûnah hemi hmuna mi pawimawh tam tak muhil tate hi rilrua hre rengin rei lo te chhung hun serh i lo hmang ang u," a ti a, tichuan mahni awmna hmun theuhvah che lovin ngawi rengin kan ding a. Puithiam chuan ṭawngtaina thu tlêm a chham zawh chuan hun serh chu kan hmang zo a ni nghâl mai.

Tûna Westminster Abbey dinna hmun chiahah hian tûn hmain England-a Kristian lal hmasa ber Sebert-an biak in a lo sa tawh a. Helai hmunah bawk hian A.D. 785 vêl khan sakhuana avânga inla hrang pâwl chênnna in (monstery) an lo sa tawh bawka sawi a ni.

Westminster Abbey hi tûna a awm dân anga a lo inṭanna chu Edward the Confessor-a hun lai aṭangin a ni. Edward-a chuan hemi hmunah hian biak in a sa a, kum 1065-ah a hawnna an siam a. Mahse chu biak in chu kum 1245-ah Henry III chuan a thiāt vek a, tûna Abbey hi sak ṣan a lo ni ta a ni.

Kum tam tak hnuah sak belh leh cheibawl belh zel a ni a, St. Paul's Cathedral satu Christopher Wren te, Nicholas Hawkmoor leh John James te kut hnu pawh Westminster Abbey-ah hian a awm. He biak in hi a pawn a tehin a dung lam ft. 531, a vâng lam a zauna lai berah ft. 203, a sân zawng chu ft. 225 a ni bawk.

Edward V leh Edward VIII tih loh chu British Lal zawng zawng, William the Congqueror aṭanga Queen Elizabeth II thlengin Westminster Abbey-ah hian lallukhum khumtir vek an ni. Lallukhum an khuma an ḥutna (coronation chair) chu Edward I lal laia mi tawh a ni a; hemi ḥutna hnuiah hian lung hmingthang tak phûm a awm. He lung hi "*the stone of Scone*" an ti a; tun hma chuan Scotland Lalten lallukhum an khuma an ḥutna hnuiah an dah nia sawi a ni. Tītia an sawi dan chuan he lung hi Jacob-a lung lukham, Genesis 28:11-a a chanchin kan hmuh hi a ni e, an ti bawk. Westminster Abbey-ah hian British Lal tam tak an phûm hnuhnung ber George II chu kum 1760 khan an phûm a; chuta chin chu British Lal thite chu Winsor-ah hlir an phûm ta a ni.

Westminster Abbey-ah hian British Lalte chauh ni lovin British mi, kawng chi hrang hranga ropui bikte leh thu leh hla ziak lama mi ropui leh langsar zual deuh deuhte pawhin phûm an hlawh bawk.

Bristish-ho Lal hming lâr tak leh mi ropui dang tam tak, history-a an chanchin kan zir thin, Queen Elizabeth I thlân te, Mary, Queen of Scots thlânte leh mi dang thlânte chu fangin a lung ziakte pawh kan chhiar zel a, a tawp lamah chuan kan kal chhan ber Poets' Corner, Sap hla phuah thiamte leh ziaktu hmingthang tam tak thlân leh anmahni briatengna lung ziak an dahna hmun chu kan thleng ta a.

Geoffrey Chaucer (1343-1400) hla phuah thiam leh sawrkara hna sâng tak cheih bawk chu a lo thi hin, sawrkar

hna lian thawk a nihna avangin Westminster Abbey-ah hian phum a lo hlawh ve a. He mi Westminster Abbey bul lawka awm, a thiha in atanga Abbey luhna kawngka hnai berah zawn lutin kawngka bul chetah an phum a. Chaucer-a hi hla phuah thiam a nih avangin amah an phumna hmun lai chu miten "the Poets' Corner" tiin an sawi ta fo va. Hun eng emawti hnuah hla phuah thiam dang pawh an phum tak zel hnu chuan, "Poets' Corner" an lo ti ta zawk a ni. Chaucer-a hi "the father of English poetry" tih a ni a, amah an phum kum chu 1400 a ni. Ka tlawh laia hla phuah thiam phum hnuhnun ber W.H. Auden chu kum 1973 khân hetah hian vui a ni bawk. Chaucer-a hi hla thu vek hmanga thawnthu sawi thiam a ni a, chung zinga lar deuhte chu *The Canterbury Tales* te, *The Parlement of Fouls* te, *The Legend of Good women* leh *Troilus and Criseyde* te a ni. Heng zingah hian *The Canterbury Tales* hi ropui bera ngaih a ni; amaherawhchu a zir mite tan lo chuan chhiar a harsa deuh hlek âwm e :

In Southwerk at the Tabard as I lay
 Redy do wenden on my pilgrymage
 To Caunterbury with ful devout corage,
 At nyght were come into that hostelrye,
 Wel nyne-and twenty in a campaignye
 Of sondry folk, by adventure y-falle
 In felaweshippe, and pilgrimes were they alle,
 That toward Caunterbury wolben ryde.¹

Edmund Spenser (1553-1599) - "Our sage and serious poet Spencer"² chu kum 1599-ah Westminster hmunah hian a thi a; a thiha hmain Chaucer-a bul ngeia phum a duh thu a sawi a. A duh ang ngei chuan Chaucer-a ruang zawn luhna kawngkaah bawk zawn lütin *The Ferie Queene* tih ziaktu Spenser-a chu Chaucer-a bulah an lo phum

1. Chaucer's *The Prologue. II. 20 - 27*

2. Milton's *Areopagitica*

ta bawk a ni. Spencer-a hriat rengna leh a lim hi Anne Clifford, Countess of Dorset chuan kum 1620-a a siamtir a ni.

Poets' Corner pâwna bangah chuan William Caxton-a (1422-1491) hriat rengna sailungvâr phêka ziak chu an târ a. Caxton-a hi England-a khâwl chhutna (printing press) la lut hmasa bertu a ni a. Helai Westminster hmun, Poets' Corner bulah hian England-a khawl chhutna hmasa ber chu kum 1476 khân a bun a, chu chuan literature lamah hmasawnna nasa tak a thlen a ni. Hetih hun lai hian England-ah chuan ɣawng (dialect) chi hrang eng emaw zât a awm a; thu leh hla ziaktute pawhin an awmna hmun theuhvah ɣawng chu an hmang lo thei lo va. Mahse, Caxton-an East Midland ɣawnga thu ziak chu a chhut tâk fo avangin chu ɣawng chu a lo lâr fâl ta a; túna Standard English kan tih hi a lo chhuah ɣanna bul a ni ta a ni. East Midland ɣawng hi Chaucer-a ɣawng hman bawk kha a ni a, Caxton-a khâwlchhutna hmangin theh darh leh ɣawng tuallênga pawm a lo ni ta tial tial a. Tichuan Caxton-a chu hêng hla phuah thiamte ɣawng hman tûr lo tiphuisui hmasa bertu a nih avângin, Poets' Corner pâwn banga amah hriat rengna sailungvâr phêk an dah pawh hi thil tih âwm tak a ni rêng a ni.

William Shakespeare (1564-1616) - "Sweetest Shakespeare, fancy's child"¹ erawh chu a pianna khua Stratford-upon-Avon-ah kura 1616-ah a lo thihin Stratford khuua biak in, The Holy Trinity Church chhungah an phûm a. A ruang chu Westminster Abbey-a Poet's Corner-ah hian dah ni se tia rawtna pawh a awm thin a, mahse tih loh a ni hlen ta a ni. Stratford khuua mite chuan Shakespeare-a ruang chu London-a miten an rawn phawrh mai an hlauh avangin a thiân pawh ft. 17 laia thûkin an lai niin an sawi.

Poets' Corner-ah hian Shakespeare-a chua lehkhabu pathum inchherchhuan chungah a kiu ding lam nghatin âwn deuhva a

ding lai lim, sailungvâra siam chu an dah a. A kiu nghahchhan sailungvâr ban kil liahte chuan Queen Elizabeth I leh Henry V leh Richard III, Lal pathumte âwm chin chung lam an siam bawk a. A limah chuan Shakespeare-a chuan a kut vei lamin lehkha phêk a keng a, ama ziak ngei hêng thu hi lehkha phêkah chuan an ziak bawk.

The cloud capp'd tow'rs, the gorgeour palaces,
 The solemn temples, the great globe itself,
 Yes, all which it inherit, shall dissolve,
 And like this insubstantial pageant faded
 Leave not a rack behind¹

Michael Drayton-a (1563-1631) hriat reng nân a lim Westminster Abbey-a dah atân hian Anne Clifford, Countess of Dorset chuan a pe bawk a; Drayton-a hi *Polyolbion* leh *Ballad of Agincourt* tih a phuah avangin hriat reng hlawh tur a ni. Shakespeare-a dam rualpui leh thian, Ben Jonson-a (1574-1637) hriat rengna chu siamin a lim pawh bangah an dah a. Ben Jonson-a hi *Volpone* leh *The Alchemist* tih a ziakte avângin tun thlengin drama ziaktu ropui berte zingah chhiar tel a la ni. A limah chuan "O rare Ben Jonson" tih ziak a ni. Ben Jonson-a bulah Samuel Butler-a (1612-1680) hriat rengna kum 1721-a an siam chu a awm a. A dawtah chuan *Paradise Lost* ziaktu John Milton (1608-1674)-inventor of harmonies, God-gifted organ voice of England² theihngihilh phal rual loh tûra chu, a lim langsâr takah an dah bawk a. Milton-a hi mihring ngaihtuahna pawhin a thlen phâk zen zen loh, lei leh vân inkâr boruak zau taka inchêntir thei, ngaihruatnain vân leh hremmun chanchin pawh hla thu ropui tak tak leh chipchiar taka phuah thei khawpa ngaihtuahna chak leh zau nei mi a ni. *Paradise Lost* zir leh chhiar thin te chuan a ngaihruatna khawvel zauzia hi hriatpui tak tak phâk pawh a

1. *The Tempest* IV i. 152 -156

2. Tennyson's *Sonnet on Milton*.

nih lohzia kan hre âwm e. Hla phuah thiamte hi arsi ni ta sela Milton-a hi a êng ber pâwl a ni ngei ang.

Milton-a thih ni chiah hi hre chiang an awm lo va, 1674 November 8-10 vêl niin an sawi a, an phûmna tak chu St. Giles, Cripplegate-ah a ni. Thu leh hla a ziakte zinga a ropui deuh deuhte chu *Paradise Lost* (1667) *Paradise Regained* leh *Samson Agonites* (1671) te a ni a. Kum 1652 February thla tâwp vêl atan gin a mit a del hmiah a; hêng a hla phuah ropui ber berte hi a mit del hnua a phuah a ni a; a fanuten an ziaksak þin a ni. Milton-a hi mihring zalênnna sualtu ropui berte zinga chhiar a ni fo; a thu ziak þenkhattle chu British sawrkar lawm loh zâwng a nih avangin a midtel tawh hnuah pawh a lehkhabu þenkhatt chu hâlsakin amah ngei pawh an man a, an tantir nghe nghe a ni.

Tûnah erawh chuan a thu ziakte chu Sâpho hnam ro hlu berte zingah chhiar tel a lo ni ta a, a lim pawh hi Poets' Corner mawitu ber pakhat a ni; a lim hnuaih pawh hetiang hian ziak a ni :

**In the year of Our Lord Christ
 One thousand seven hundred thirty and seven
 This Bust
 of the Author of PARADISE LOST
 was placed here by William Benson Esquire
 One of the two Auditors of the Imprests
 to his Majesty King George the second
 formerly
 Surveyor General of the Works
 to his Majesty King George the first.
Ryfbrack
 was the Statuary who cut it.**

Milton-a buiah Thomas Shadwell (1642-1692) leh Matthew Prior (1664-1721) hriat reng nân an lim an dah bawk a.

Heng mi pahnihte hi an dam kim laia an lâr nasat ang huin tûnah hi chuan hriat an hlawh ta mang lo hle.

Thomas Gray (1716-1771) “*Elegy Written in a Country Churchyard*” tih phuahtu hming chu Milton-a ɬutna hnuai chiahah an dah a. Gray-a hi an phûmna tak chu Stoke Pages, *Elegy* a lo phuah chhan hmun kha a ni. Oliver Godsmith (1728-1774) *The Deserted Villages* leh *The Vicar of Wakefield* tih ziaktu te, Robert Burns (1759-1796), Scotland hla phuah thiam langşâr ber, *Auld Lang Syne* tih hla phuahtu hriat rengna tura a lim - a thihi hnu kum 89-a an dah te, John Dryden (1631-1700) *Absalom and Achitophel* tih ziaktu chuan hmun an chang bawk a. Pathian fakna hla ropui, *The Messiah* tih phuahtu George Frederick Handel (1685-1753) pawhin hmun zau tak a chang. *The Messiah* tih hla bua kan hla hriat lâr ber chu “**Hallelujah Chorus**” tih hi a ni âwm e. Handel-a hian hemi Westminster Abbey-ah ngei hian hla kûtpui siamin ama hla phuah ngei satu zaipawlte chu a lo hruai tawh nghe nghe a. Chutia a hruai lai lim chu bangah an târ bawk. George Handel-a lim hnuai chiahah chuan *The Messiah* tih hla te an rem apianga hmeichhia mal zai ɬin, zai thiam hmingthang Jenny Lid Godschnidt (1820-1887) hriat rengna an siam bawk a. He hmeichhe zai thiam hi a nghâwng chin chung lam zawng sailungvâra a lim an siam chu a hla sak lâr ber, “*I know that my Redeemer liveth*” tih thu ziakin an hualtir a, chu chu bangah an târ bawk. Jenny hi “the Swedish Nightingale” tia sawi ɬin a ni.

Joseph Addison (1672-1719) chu kum 1719-ah Westminister Abbey-ah hian an phûm a, mahse kum 1809-ah lung chu ziak a ni chauh. Samuel Johnson (1709-1784) *Lives of the Poets* tih ziak avanga hriat reng tura chu a lim Shakespeare-a vei lamah an dah a. Dr. Johnson-a ding lamah William Wordsworth (1770-1850) - “Preface to the Second Edition of Lyrical Ballads” leh *The Prelude* tih ziaktu chu an ɬuttir a, han en ngawt pawhin engemaw ngaihtuah lai nei reng hmêl

puin a lim chu an siam a, a rilruin,

To me the meanest flower that blows can give
Thoughts that do often lie too deep for tears¹

a la ti reng emaw tih tur a ni. Wordsworth-a hi kum 1850-ah kum 80 mi niin a thi a, a lo chênnä ñhin Grasmere-a biak in bulah phûm a ni. Wordsworth-a ding lamah Thomas Campbell-a (1774-1844) lim an dintir luah bawk. Dr. Johnson-a hnuai chiaha bangah chuan Jane Austen (1775-1817) hming an ziak a, *Pride and Prejudice* ziaktu a nih avangin hriat reng hlawn ve tur a ni.

Robert Southey (1774-1843) chu Dr. Johnson-a chung zâwna bangah an þuttir a, Southey hi an phûmna tak chu Crosthwaite a ni; a ding lamah chuan Samuel Taylor Coleridge (1772-1834) “*The Rime of the Ancient Mariner*” tih phuahtu chu an þuttir bawk. Mi danglam bik leh hriathiam harsa tak, mi à emaw tih mai awl tak ñhin, William Blake (1757-1827) *Songs of Innocent and songs of experience* tih phuahtu lim chu mi dangte ep zâwngin chhuat atangin sâng fêah a fâlin an hûng a; a lim hi dâr (bronze)-a siam a ni a, kum 1957 khân a pian champha kum 200-na lawm nân an dah a ni. Blake-a hla phuah pakhat “*The Tiger*” chu khawvela poem lär ber te zinga chhiar tel a ni. Tûn lai hian America ram university zirlaite zingah Blake-a thu leh hla zirah tuina thar a awm a. Ka zirna University of Illinois-ah pawh English Literature zirtuten English poet an ngainat ber 10 an thlan chhuah zingah Blake-a hi a tel pha a ni. Ama tawngkam “fearful symmetry” tih hi a lima a hmel lan dân ni ta sela a inhmeh thei âwm hlein ka hria.

Percey Bysshe Shelley (1792-1822) mi thâwm na tak “*Ode to the West Wind*” tih phuahtu leh John Keats (1795-1821) “*A thing of beauty is a joy forever*” titu chuan hum rei tak an nghiah hinuin kum 1954 khân Poets’ Corner-ah an hming lâk

luh a lo ni ve ta bawk.

Keats-a, a dam chhung hun rei lo tê natna khirh tak tak tuar nana lo hmang zo leh, a nula ngaihzâwng êm êm Fanie Brawnie pawh nei thei ta lova thi ta hi hmun pek âwm rêng a ni bawk. Keats-a hi kum 1821 February thlaah Rome khuaah a thi a; a hla phuah ațangte pawhin a dam rei dawn lo tih a inhre sa niin a lang. Amaherawhchu a thih hnuah chuan English poets zingah chhiar tel a la nih ve a beisei thu a țhian Georiana-i leh George-a a hrilh chuan, "I think I shall be among the English Poets after my death," tiin a ziak a.¹

He a thu ziak hian Matthew Arnold-a rilru a khawih hle niin a lang. English poet zinga chhiar tel a ni na meuh mai tih sawiin, a dah sânzia tihlan nân Arnold-a chuan... "He is; he is with Shakespeare,"² a lo ti hial a ni. Rome khuaah an phûmna hmuna a thlân lung ziak chuan mi tam tak rilru a khawih thei hle thin :

This Grave
 contains all that was moral,
 of a
 YOUNG ENGLISH POET
 who
 on his Death Bed
 in the Bitterness of Heart
 at the malicious power of his Examiner
 Desired
 these words to be engraved on his Tomb stone
 "Here lies One
 Whose Name was writ in water"
 Feb. 24th 1821.

Shelley-a pawh hi a dam rei loh tehlul nêñ thu pawimawh tak tak ziak a lo nei hman a, "A Defence of Poetry," tih a ziak

1. Keat's letter dated October 15, 1818.

2. *Essay in Criticism*, Second Series, Macmillan, 1964 p. 71.

manah ngawt pawh Poets' Corner-ah hian hmun pêk âwm rêng a ni. Italy ramah tufinriat kamte hrût velin lawnga an lén vélnaah Shelley-a chu a chesual a, tuiah a tla a; a ruang chu ni rei fê hnuah a lo läng chhuak a. A thiante pathum Byron-a leh Leigh Hunt-a leh Trelawney-a te chuan a ruang chu an hâl a, a vâp chu thli an len darhtir nia sawi a ni. A thin crâwh chu an la a, Rome khuaa English Cemetery-ah Keats-a thlân bulah an phûm a, a thlânah chuan *Cor Cordium* tih an ziak.

Shelley-a leh Keats-a hming hi Poets' Corner-ah hian Shakespeare-a lu chunga bangah an ziak a. A hrang ve vein inhlat lova an hming ziakna lung phêk bial an dahte chu Keats-Shelley Memorial Association-in an siam a ni.

Lord Byron (1788-1824) English mite rilru tina zâwng leh an nunphung kahz zâwng ngar ngara che thin pawh hun leh kum a lo ral tam hnuin ama mite ngeiin chawimawina pein, Poets' Corner-ah hian a hming an lo la lût ve ta bawk. Hei hian English miten ngaihdamna an neih thûkzia a tilang hle âwm e. Amaherawhchu Byron-a hi *Childe Harold's Pilgrimage* leh *Don Juan* tih ziaktu a lo ni miau va, ngaihthah hlen theih tur zawng a ni lo. Byron-a hi April 19, 1824-ah kum 36 mi niin Missolonghi, Greece-ah a thi a. A thih atanga kum 145-naah, 1959 May thla khan a hming ziakna lung phêk chu Poets' Corner-ah hian an lo dah ta a ni. Italy-a a awm laiin Florence leh Pisa khaw inkâra a kal laia a hla phuah tawi tê chuan Byron-a nun leh rilru a sawi lang ber âwm e :

Oh Fame! - if I e'er took delight in thy praises,
 'Twas less for the sake of thy high-sounding phrases,
 Than to see the bright eyes of the dear one discover
 She thought that I was not unworthy to love her.¹

Alfred, Lord Tennyson (1809-1882) "The Charge of the

1. *Byron's All for Love*

Light Brigade" leh *In Memoriam* tih phuahtu chu hmun langṣār tak chantirin, an dintir a. Tennyson-a hi Victorian hun laia mite rilru a chiai lai leh rinhlelhna leh hlauhnain an rilru a tuam laia rinna ngħet leh kawng ēng zawh tur mite kawħħmuha an rilru hruijt a ni. Queen Victoria pawhin a pasal Prince Albert-a a thihin a khawhar hnēmtu atān *In Memoriam* chu a chhiar thin a ni. Kum 1882-ah Tennyson-an Queen Victoria a tlawh tum pawhin Lalnu chuan, lusûn hmel la pu tak leh aw hniam zawi raih hian, Tennyson-a hnēnah chuan "Bible dawtah ka thlamuanpui ber chu *In Memoriam* a ni," tiin a lo hrilh a ni. Hemi *In Memoriam* a phuah hi Queen Victoria pasal Prince Albert-a chuan tha a tih ēm avangin Poet Laureate atān an lo thlan phah nghe nghe a ni.¹ Tennyson-a hian a hun laia mite rilru luauhtu leh buaipui ber thil pali-**hmangaihna, thihna, rinna** leh **science** chungchang thu *In Memoriam*-ah hian tār langin, a hun laia mite nunphung leh rilru chu a sawi chiang hle a. Chu bākah a hla phuah dang *Ulysses*-ah chuan a hun laia mite rilru, duhthusām leh ngaihtuahna te pawh a sawi lang chiang hle bawk :

Death closes all : but something ere the end,
Some work of noble note, may yet be done.

Robert Browning (1812-1889) Tennyson-a dam rualpui "The Ring and the Book" tih phuahtu pawh Poets' Corner-ah hian phûm a ni a, chhuat zawlah a ruang awmna chung zâwnah a hming ziak a ni. Tennyson-a leh Browning-a hi Victoria hun laia hla phuah thiam langṣār fâl bikte an ni. Browning-a hian hla phuah thiam Elizabeth Barrett chu kum 1846-ah nupuiah a nei a. An pahnih hian a nupui thih kum 1861 tlengin Italy-ah an awm a; amah Browning-a pawh chu December 12, 1889-ah Venice-ah a thi a, a ruang chu Westminster Abbey-a phûm atān an la a, Poets' Corner-ah hian an dah ta a ni.

1. Introduction to *In Memerium* ed. by Michael Davis, Macmillan & Co., London, 1964.

A nupui Elizabeth Browning erawh chu Florence-ah phûm a ni tih Browning-a thlân lung ziakah an sawi lang bawk. Browning-a hi a hun lai, mi rilru a buai êm êm lai leh beidawnna boruak a chhah êm êm lai pawhin,

God's in his heaven-
All's right with the world!¹

ti tlat theitu a ni. Tennyson-a nen khaikhinin Browning-a dinhmun hi English Literature-ah a sâng zawk fo vang tia ngai pâwl an tam a ni. Browning-a nupui Elizabeth Barrett Browning (1806-1861) chu a pasal neih hma pawhin Tennyson-a leh Browning-a ai maha lâr nia sawi a ni. Kum 1846-ah Browning-a'n Elizabeth-i chu a lo tlânpui theih tâk aṭangin a lo lâr phah ta chauh zâwk niin an sawi. An inneih hnu kum rei tak chhung chu Browning-a chuan hla phuah thiam hmingthang Elizabeth-i netu a nih avangin a hmingthan phah hle a ni. Wordsworth-a, Poet Laureate a thih pawhin Tennyson-a nge Poet Laureate-a dah tur Elizabeth-i hi tiin an bûk nasa hle a ni. Elizabeth Browning pawh hi Sap ṣawnga hla ngaihnobei berte zinga chhiar theih tur, "love sonnets" a ziakte avang hian hriat reng a ni ang, a chhan chu khawvela thil ropui leh mak ber, hmangaihna thu hi a châng thlan thin avângin :

How do I love thee? Let me count the ways
 I love thee to the depth and breadth and height
 My soul can reach, when feeling out to sight
 For the ends of Being and ideal Grace.
 I love thee to the level of everyday's
 Most quiet need, by sun and candle light.
 I love thee freely, as men strive for Right;
 I love thee purely, as they turn from Praise:
 I love thee with the passion put to use
 In my old griefs, and with my childhood's faith;

1. Browning's Pipa Passes

POETS' CORNER

203

I love thee with a love I seem to lose
With my lost saints,- I love thee with the breath,
Smiles, tears of all my life!-and if God choose,
I shall but love thee better after death.

Henry Wadsworth Longfellow (1807-1882) American poet, "Hiawatha" tih ziaktu chu British mi amah ngaisângtuten sailungvarin a lim an siam a, kum 1884 khan Poets' Corner ah hian an dah bawk a. Longfellow hi a dam lai chuan America ramah leh England-ah a lâr êm êm mai a. A hla phuah pakhat "*A Psalm of Life*" chuan tûn thlengin India ram school-a English Text book-ah pawh hmun a la chang. Amaherawhchu a hla phuahah hian mi zirtir tumna thu a tam lutuk avangin tûn lai America ram thalaite chhiar peih zâwng a ni lo va, school leh college-ah pawh an sawi lâr ta lo hle. Adam Lindsay Gordon (1833-1870) Australian poet pawhin Tennyson-a bulah hmun a chang ve bawk. Thomas Babington Macaulay (1800-1859) chu Joseph Addison-a lim dahna bulah an phûm a; Lord Macaulay hi mi rilru chak tak *Paradise Lost* te, *The Pilgrim's Progress* bu chhung thute pawh sei tak tak en lo va sawi thei, M.P. pawh lo ni thin leh Parliament-ah pawh a hun lai chuan thu sawi thei ber pawl a ni bawk. Macaulay hi India rama sikul leh college-ah inzirtir nân English hman ni rawh se, tia rawtna siam hmasa bertu a ni; a rawtna ang chuan English hi India ramah school subject pawimawh ber anga zirtir lo ni tain, tûn thlengin sawrkar tawng tualleng a lo ni ta zel a ni.

Novel ziaktute zingah chuan Walter Scott (1771-1832) *The Waverly Novels* ziaktute, William Makepeace Thackeray (1811-1863) *The Vanity Fair* ziaktu te, Charles Dickens (1812-1870) *David Copperfield* ziaktu leh *The Pickwick Papers* ziaktute chuan hmun an chang bawk a. The Brontë Sisters pawhin hming ziak an hlawn tawh a, kum 1947 July thlaah The Brontë Society chuan James Thompson (1834-1882) Vic-

torian poet thutna hnuia bangah an hming ziakna sailungvar phêk chu an dah a. Brontes Sisters pathumte Charlotte Bronte (1816-1855) *Jane Eyre* ziaktu leh Emily Bronte (1818-1848) *Wuthering Heights* tih ziaktu leh an laizawn dang pakhat Anne Bronte (1820-1849) hming chu ziak tlar a ni. John Keble Oxford Movement hruiatu zinga mi chu a lim an siam bawk a, Oxford-a Keble College-ah pawh a lim chu an dah bawk.

Matthew Arnold (1822-1888) chu a âwm chin chung lam lim an siamsak a, bangah sâng deuh takah an dah a. An dahna lai tak hre lo leh a awm ve tih pawh hre sa lo tân phei chuan hmuh hár tak a ni. Tukverh bula dah a nih avangin tukverh atanga êng lo lût chuan mit a ên khalh a, a hming ziak pawh a hmuh chian theih loh. Amaherawhchu mi tam tak hmun la pêk lohte pawh an awm tih ngaihtuahin tûna a hmun chan bâk hi chu beiseisak theih a ni lo vang, hmun a lo chang hlauh hi a vannei hle zawk a ni. John Ruskin (1819-1900) *Unto This Last* tih ziaktu chu Sir Walter Scott-a awmna chungah hmun neiin a awm bawk a, a nghâwng chin chung lam lim dâr (bronze)-a siam chu bangah an târ a. Thomas Hardy (1840-1928) chu a thihin a ruang chu an hâl a, a vâp chu Poets' Corner-ah hian Charles Dickens-a bulah an phûm a; a thin erawh chuan a chhângte phûmna hmun Stinsford Churchyard-ah an phûm thung. A vâp phûmna hmun kianga ka din lai chuan Thomas Hardy-a hla phuah pakhat college-a kan zir, a thih hnush miten a chanchin an rawn ngaihtuah lêt dân tur a lo suangtuah lâwkna thu ka han hre chhuak a, ka lung pawh a tilêng hle mai :

If, when hearing that I have been stilled at last they
 stand at the door,
 Watching the full starred heavens that winter sees,
 Will this thought rise on those who will meet my
 face no more,
 He was one who had an eye for such mysteries?¹

1. Hardy's *Afterwards*

Rudyard Kipling (1865-1936) chu Hardy-a vâp phûmna bulah phûm a ni bawk. Kipling-a deuh chauh hi English poet zingah chuan British sawrkar ropuizia leh a rorel dan pawh þha tia tlangaupuitu, a chakna hmanga ram dang a awp beh þhinte pawh a dik a ni tihpui zeltu a ni a, Byron-a leh Shelley-a te nen chuan an ngaihdan a inpersan hle a ni. Rinawm taka a rawng a lo bâwlsak þhin British sawrkar pawh a tilawm hle a ni âwm e; a lo thiha Poets' Corner-ah hian an phûm dâwn pawhin a ruang zâwtute zingah Prime Minister Stanley Baldwin-a meuh pawh a tel a ni. Kipling-a hian keini Mizote pawh hi min lo hre ve riau ruai a ni âwm e, a hla phuahah pawh min lo sawi tel ve zauh va, amah chauh hi English poet ho zingah hian Mizo hming lam tel a ni âwm e. Hetah pawh hian British sawrkar chakna a chhuanzia leh a chapopuizia, a lehlamah chuan keini Mizote leh Naga-te hi Kumpinu sawrkâr tân hmêlma beih huphurhawm tak, min lo awp bet thei tate pawh kha thil ropui tak angin a tilang tel nghal âwm e :

We've chivvied the Naga and Looshai,
We have given the Afriad man Fits.¹

T.S. Eliot (1889-1965) leh John Masefield (1878-1967) leh W.H. Auden (1907-1973) te chu Byron-a thlân lung bulah inhnaih tê têin phûm an ni a, an hming ziakna lung phêk pawh chu chhuat nêna inzâwlin an phah a; W.H. Auden hi English poet phum hnuhnûn ber, 1973-a phûm a ni a; a lung ziak erawh chu October 2, 1974 khân hawn a ni.

Poets' Corner an siam dan hi ngaihtuah chiang lo va han thlir mai chuan, "A ruahmantute hian rem an va hre lo êm!" tih mai awl tak tur hi a ni. Ruahmanna fel tak awm theiin mumal nei deuh zawka rem þhat theih ni se a duhawm mang e, tih hi a entu mi tam berte rilru a ni ngei ang. Milim siamte chu a inlen hleihin lung ziakte pawh a intam hleih a. Chu

1. Rudyard Kipling, 1890.

bâkah hla phuahtu ȝhenkhat, an dam lai leh thih ni pawh lian pui puia siam lo hlawte chuan, hun leh ni a lo liam tam tâk hnu chuan mi ngaihsân leh hriat an hlawh ta mang lo va; chûngho lim leh an lung ziakte chu han hmuh chuan, "He pa hi eng nge maw a lo nih ve ȝhina hetia hmun zau tak an chantir ve hi le!" tih tur hi a awm nual a ni.

Thu leh hla phuah leh ziaktute hi an dam lai mai chuan an rilru leh ngaihtuahna hriat thiam a har fo rêng a. Sawrkara thuneihna chelhtu leh roreltu ȝhenkhat zingah an phu loh pui fakna leh chawimawina beisei mi an lo awm thin a; chutiang bawkin hla phuahtu ȝhenkhat zingah chutiang mi chu fak thei hauh lo, fak ahnêkin an awm dan leh tih dan dodâlna hlaah phuah ngam zawk hial an lo awm thin a. Thenkhat erawh chuan an dam laia thuneitu lal leh roreltute lawm zâwng sawiin chawimawina nasa tak an dawng lêt bawk a. Chutiang chu thil awm dân a lo nih avangin hun leh kum hian a ngaihsânawm tak takate leh a ropui tak takate chu a rawn tilang fo zawk thin a ni. Hei hi Milton-a te, Shelley-a te, Byron-ate leh Keats-a thuah te pawh kan hmu a ni. Chutiang bawkin an hun laia lâr êm êm leh nasa taka chawimawi lo hlawh thin, Matthew Prior-a te, Thomas Shadwell-a te leh Thomas Campbell-a te, hmun langsar ber ber chantir a, an lim pawh ropui taka an siamsaka te chuan tûn lai mi ngaihsân leh hriat an hlawh ta lo hle a ni.

Thangthar lo kal zelten thu leh hla phuahtute hi kan lo hmuh dân a lo inan loh theih hle dâwn avangin Poets' Corner-a thiân siam thuah pawh hian hmanhmawh taka thil tih chi niin a lang lo rêng a ni. Hetiang Poets' Corner hi Santa Croce, Florence, Italy-ah pawh a awm a; chutah pawh chuan ruahmanna fel tak leh mumal nei takin an rem hlei thei bik lo a ni. Heta ȝang hian Poets' Corner atan pawh ruahmanna fel tak leh tih dan tur rel a harsatzia kan ngaihuat thei ang.

Poets' Corner-a phûm si, an hming ziakna lung emaw, an

lim emaw pawh la siam loh a awm nual a, chûng zinga a lar zual deuhute chu Shakespeare-a hun laia mi tawh, drama ziak thiam mi pahnih Sir John Beaumont (1583-1627) leh a unaupa Francis Beaumont (1584-1616) te, Abraham Cowley (1618-1667) te, Richard Brinsley Sheridan (1751-1816) te, Charles Dickens (1812-1870) te, Thomas Hardy (1840-1928) leh Rudyard Kipling (1865-1936) te an ni.

Thu leh hla siamtu, thih tawh hnu pawha thu la sawi thei fo, mi langsâr tak tak engemaw zât phûm loh, anmahni hriat rengna tur pawh engmah siam la hlawh lo an awm bawk. Chung zingah chuan Ben Johnson-a dam rualpui, "metaphysical poets" an tih, John Donne, Andrew Marvell, George Herbert leh Henry Vaughan te an tel a. Novel ziak hmasatu Daniel Defoe (1661-1731) *Robinson Crusoe* tih ziaktu te, Henry Fielding (1707-1754) *Tom Jones* tih ziaktu leh Victorian novelist Anthony Trollope (1815-1882) leh George Elliot (1819-1880) tân pawh engmah siam a la awm lo. Jonathan Swift (1667-1745) English artist ropui, *The Tale of a Tub* ziaktu leh Alexander Pope (1688-1744) *An Essay on Man* tih ziaktu, *Heroic couplet*-a thu leh hla phuah thiam tân te pawh engmah siam a la awm lo bawk.

Hêng bakah hian English-a essay ziaktu hmingthang Francis Bacon (1561-1626) te, Charles Lamb (1775-1834) *Essays of Elia* leh *Stories from Shakespeare* ziaktu te, thu sawi thiam hmingthang Edmund Burke (1729-1797) te, Thomas Carlyle (1795-1881) te hmêl leh hming ziak pawh a la awm lo va. Puritan hun laia ziaktu langsâr tâk, thih tawh hnuah mi rilrua thu sawi nasa thei berte zinga chhiar tel tur, thuhrltu hmingthang leh VÂN ram kawng zawhtu, John Bunyan-a (1628-1688) tân pawh engmah siam a awm lo. John Bunyan-a lehkhabu ziak *The Holy War* (1665) leh *The Pilgrim's Progress* (1678) te chu Mizo ɻawng pawha lehlin a ni a; *The Pilgrim's Progress* phei chu Bible tih loh vah chuan

khawvēla lehkhabu chhiar tam ber a ni.¹

Tun hnai deuhva thu leh hla ziaktu langsâr zual deuh thi tawh zingah Poets' Corner-a hmun la chang lote chu D.H. Lawrence te, Joseph Conrad te, Janet Joyce te, Virginia Woolf te, Oscar Wilde te, G.M. Hopkins te, Rupert Brooke te, William Butler Yeats-a te leh George Bernard Shaw te an ni. Engtikah emaw chuan annmahni ngaisângtute intiam rual hun a la awm ngei ang a, chutih hunah chuan an phû ve rēng hmun chu Poets' Corner-ah hian an la luah ve na chêk ang.

Westminster Abbey, British larle leh mi ropui bikte phûmna leh an hriat rengna lung ziak an dahna hmunah Poets' Corner an lo siam hian Saphovin an thu leh hla siamtute chu an chawisânzia leh ngaihpawimawhzia a tilang chiang hle. Matthew Arnold-an, "England hi a thu leh hla neihte hian a tiropui ang tluka tiropuitu thil engmah a awm lo,"² a lo tih pawh hian hmân lai ata tûn thlenga an hnam rilru leh ngaihtuahna a sawi chhuak ngei ang tih a rinawm hle a ni. Hêng thu leh hla siamtu, Poets' Corner-a phûmte leh an hming an ziakate hi lo piang lovin emaw, awm ta lo sela chuan, England hian tûna ngaihsân a hlawh ang hian ngaihsan a hlawh a rinawm loh hle a ni.

Engtikah emaw chuan kan hnam nun tihiimtu leh tiropuitu, kan thu leh hla siamtute hriat rengna hi a hrampa ngatin Mizo hnam hian a siam theih ve hun pawh a lo la thleng ngei ang.

Poets' Corner-ah hian an mi lim siam leh thu ziakte chu chik takâ thlirin ka American than London University-a zirlai nen chawhma zet kan awm a. Chutia han vah kual vêl leh hla phuahtute lim han fan chu mahni hmêl hriat leh thiante thlân

1. Long, *English Literature*, Ginn. & Co; 1945 pp. 219 & 225.

2. Arnold.... "by nothing is England so glorious as by her poetry." *Essay in Criticism (Second Series)* edited by S.R. Littlewood, Macmillan & Co., London 1964 p. 96

fan ang niin ka hria.

An thlân chunga kan dina an limte kan en reng lai chuan an thu sawi leh ṭawngkam ka lo vawn reng ḫin ṭhenkhatte chu ka rilruah a lo lang a, a châng chuan ka ṭhianpa hriat turte pawhin ka han sawichhuak hial ḫin nghe nghe a ni. Kan mihring nun leh a awmzia sawi chhuak ḫintu hla phuahtute hi hriat tawh fo ḫin, “Poets are unacknowledged legislators of the world” a tih awmzia pawh hi ka rilruah a tharin a lo lang a ni.

Kan chhuah dawnah chuan tûn kum zabi sawm hnighna chhungah English Literature-a poetry ropui ber nia mi tam takin an ngaih, University of Illinois-ah kei ngei pawhin ka lo zir tawh, *The waste Land* tih phuahtu T.S. Eliot thlân chungah ka ding a. Ama thu châng ngei *The Four Quartets* aṭanga lâk chhuah a thlân lunga ziak chu ka han chhiar chuan hla phuahtute hian an dam lai ai mahin an thi hnu hian mi rilruah thu an sawi nasa thei zâwk tak tak âwm mang e tih ngaihtuhna min neihtir a; hei hi mi tam tak rilru pawh a nih ve ka ring.

THOMAS
STEARNS
ELIOT
O.M.

BORN 26 SEPTEMBER 1888
DIED 4 JANUARY 1965

‘the communication
of the dead is tongued with fire beyond
the language of the living.’

.....

STRATFORT-UPON-AVON

what's to do?

Shall we go see the reliques of this town?'

England-a ka hmun tlawh duh ber leh kal chhan ber pakhat chu Shakespeare-a pianna leh a thlân awmna Stratfort-Upon-Avon a ni a; he khua hi London atanga hmâr thlang lam mêl 90 vêla hla a ni. Ka American thiian Mark-a leh a thiannu London University zirlai, Portugese mi Joanna chu Stratford-a kalpui ah ka sâwm a; anni pawh chuan an la tlawh ngai bik loh avang leh hmuh an duh ve tho avangin kal ho chu kan tum ta a, zing dar 9-ah London khawpui chhunga rôl chawlh hmun pakhat Paddington-a inhmuh ah kan ti a.

London-a ka châm hun lai hi Krismas leh kum thar inkâr, thlasik vawh lai a ni jan tawh a, vûr pawh a tla vâr uar thin a; chhûnah pawh ni a lan ngai loh avângin khua hi a dul ruih reng mai a ni. Ka thlen in pa chuan zing feah min kai tho va, chhang leh artui kan min eitir a; ka ei lai chuan Paddington rôl chawlh hmun pan dân tur te min hrilh a, ngun takin ka ngaithla a.

Kan thlen in chhak lawkah chuan khawpui chhûnga tlân rôl kawng hi a kal a, zing khaw väwt takah chuta tang chuan rôl chu manin, harsa lo takin Paddington rôl chawlh hmun chu ka va thleng a.

Ka kalpui túrte hmêl âwm chu mipui zingah chuan ka han mitmei deuh va, mahse a vâng hle mai a, ka nghák ta zel a. Rôl kal hun dang a lo thlenah pawh an lo la lan tâk loh fo avangin ka kalsan ta a. Chutia mahnia ka han kal ta chu ka khua a har viau mai a; hmêl hriat han biak tur pakhat mah an

awm loh avangin, kâ nei lo ang maiin ka ngawi reng mai a; hmêl hriat loh Sâpho ka chuanpuite rêng rêng pawh chuan khawhar hmêl hi pu deuh vek leh ngui nghiai hmel hi puin ka hmu a. Mahni bula ɣhute nen inbia leh hlim hmel pu deuhva titî rêng rêng pawh an awm lo va, kan ngawi ɣhap reng mai a ni.

Rei fê kan kal hnu chuan rêl station pakhat kan thleng a, signboard ka han en chuan, “Oxford” tih ziak hi a lo ni reng mai a. Ka rilru chuan Oxford chu India ramah pawh a hming kan lam rîk zin ve zia te, a university a ɣhat bîkzia te pawh hriat ang tawk tawk leh rin thu thlengin ha hîpa kan sawi ɣhin dante pawh ka han hrechhuak a.

Oxford University hi lehkha zirna hmun anga a lo inçanna chu kum 1133 a ni a, university anga rêlbâwl a lo nih ɣanna erawh chu kum 1163 a ni. Hemi university hnuiaia college din hmasak berte chu University College, kum 1249-a din te, Balliol College, kum 1263-a din te, Merton College, kum 1264-a din te a ni, college dang pawh tam tak hemi university hnuiaiah hian a awm. Oxford University hi mi ropui leh hmingthang tam tak lo awm tawhna a ni a, English poet pakhat, Lionel Johnson-a pawhin a hla puah “Oxford” tiyah chuan heti hian a sawi :

There, Shelley his whire Platonic dreams;
 There, classic Landor throve on Roman thought;
 There, Addison pursued his quiet themes;
 There, smiled Erasmus, and there, Colet taught.

Oxford aṭanga rei vak lo kan kal leh hnu chuan Lemington rêl station kan thleng a, chutah chuan Stratford-a kal tlang tur rêl dang nghâkin dârkár khat ka awm a. Chutia rêl ka lo nghah lai chuan ka ɣhian ka kalpui turte kha an lo thleng ve hlawl mai a; thawh an hai avâṅga rêl rawn man hman ta lo an nih thu te min hrilh a. Mahse kan inhmuh leh tâk tho avang chuan kan hlim hle a, kan kal tlâng ta a; tichuan chawhnu dar 2

vélah chuan literature lamah khawvela ka mi ngaihsân ber Shakespeare-a pianna leh a thlân awmna khua chu kan thleng ta a.

Hemi Shakespeare-a pianna khua Stratford hi Avon lui kama awm a nih avangin a hmingpui khaw dangte nêngaihsân ber a nih loh nan Stratford-Upon-Avon an ti kher ñhin a ni. Kum 691 vél te pawh khan a hming hi sawi lanna a lo awm tawh ñhin. Stratford rôl station aṭang chuan kan kal duhna hmun chu kea kal thlen theih vek a nih avangin kein kan kal zel a. Ruah a sûr seng seng a, vawh pawh a vawt viau a. Stratford hi khaw tê tak tê a ni a, a kawtthlér kawngte pawh chu zim tê tê, a khua nena inphu tâwk tak si a ni. A khaw chhung kan han luh tîrh phat chuan ka han hawi vél a, mihring hmôl leh an che vélte ka han hmuh chuan ka la chén ngai lohna a ni nain lunglênlhâk hle hian ka hria a. Kan kal chhan ber, literature lama kan thlahtu bul tih theih hial tur Shakespeare-a pianna in awmna chu mi kan han zâwt a; harsa lo takin Henley Street-ah chuan kan va hmu ta a.

A in han hmuha a chhûnga kan luh dâwn lai chuan amah Shakespeare-a ḥawngkam thenhatte pawh ka rilruah a lo lang uar uar a :

Come, good Sir, will you show me to this house?¹

There's his chamber, his house, his castle, his standing-bed
and trukle-bed...Go, knock and call...²

Hemi Shakespeare-a pianna in hi kum tin ram hrang hrang 80 lai aṭangin mi nuai thum aia tamin an tlawh ñhin a. A chhûngah chuan lehkhabu chhah deuh mai an dah a, chutah chuan a in entute chuan mahni hming leh address ziak theuh tur a ni a; kei pawhin hawrawp puiin ka hming chu ka han ziak ve a, tichuan a chhungte chu kan fang ta nghal a.

1. *The Merchant of Venice*, IV, ii. 19.

2. *The Merry Wives of Windsor*, IV. v. 6 - 8.

He in hi a zatve thingphela sak a ni a, a chhe lai hmun tam takah siam that a ni tawh nāin atira a awm dān leh hmēl chu a la bo lo nia sawi a ni. A bang ḫenkhatah leh a ceiling thenkhatah pawh thingphel hman a ni a, mei chhēmna (thuk) siam nan chuan leirawhchan leh lung chher hman pawlh a ni. He in hi chhāwng hnuai zāwka inkawm khawmin pindan chung zāwn chiahah chuan Shakespeare-a pindan an tih chu a awm a. He pindanah hian Shakespeare-a chu April 23, 1564-ah a lo piang a, a pian hun laia an khum hman ang chi te pawh chu an la dah reng a. Hemi a pianna pindan chunga ceiling hi chu hniam tē a ni a, a ḫen laiah phei chuan a inhniām hleih hle a, mei chhēmna (thuk) pawh a awm bawk. A tukverhah chuan Sir Walter Scott, Thomas Carlyle leh Isaac Watts-a te hming ziak (signature) a awm; Isaac Watts-a chu "*Juda maichām chungah ran thisen luang tawh chuan*," tih phuahtu a ni a. Thomas Carlyle-a chu Shakespeare-a ngaisāng êm êmtu leh ziaktu hmingthang tak, India ram pum pui ai pawhin Shakespeare-a chu English mite tān chuan a thlanawm zawk, Shakespeare-a tel lo va an awm theih tawh dawn lohzia thiam tak leh uar taka tlāngauputu a ni.¹

Hemi inah hian Shakespeare-a chanchin ziakna lehkhabu te, a lem mi hrang hrangin an ziakte leh, Stratford Grammar School-a mi dawhkan pakhat, a naupan laia a lo hman tawh nia an sawite pawh an dah a. Shakespeare-a pa John Shakespeare-a chu mi awm thei tak a ni a, a hun laia inchhūng bungrua leh hmanrua (furniture) chi hrang hrang mi awm thei deuh pawlten an hman ang chi pawh hemi inah hian hmuh tur a awm bawk :

The house is respected house; next this is a respected fellow;
and his instress is a respected woman.²

-
1. Thomas Carlyle, *On Heroes and Heroworship: The Hero as Poet: Lecture III delivered at Edinburgh University, Tuesday 12th May, 1840 para 48.*
 2. *Measure for Measure II i. 162 - 164.*

Shakespeare-a luhna sikul Stratford Grammar School hi kum 1269-ah Gild of the Holy Cross-in an din a ni a; Shakespeare-a te naupan lai chuan nipui laiin zing dar 6-ah sikul thlen tur a ni a, thlasik lai chuan zing dar 7-ah thlen tur a ni. Helai Henley Street aṭang hian Shakespeare-a chu a naupan laiin zing khaw vawh zual châng phei chuan hreh êm êm leh vial ngalh ngalh chungin sikul lam chu panin a kal tawh thin ngei ang, a puitlin hnuah pawh ngaihtuah chhuah châng a nei thin ni ngeiin a lang :

...the whining schollboy, with
his satchel
And shining morning face
creeping like snail
Unwillingly to school.¹

He a pianna hi mi hrang hrang kutah kum rei tak chhung a awm hnuin kum 1847 khân mipui thawhlâwmin an lei a, Shakespeare-a Birthplace Trust kutah an dah ta a ni.

Shakespeare-a nupui pawh chu Stratford khua bawk a ni a, a in pawh chu kum 1822-ah mipui thawhlâwmin an lei bawk. Kum 1582-ah Shakespeare-a chu kum 18 mi a ni a; an khaw nula pakhat a lo kawm fo thin Anne Hathway, kum 26 mi chuan a fa a lo pai ta tlat mai a, hmanhmawh takin inneih an buatsaih ta a. November 21, 1582-ah inneih phalna chu an la a; a kum leh May 26, 1583-ah an fa tir Susanna chu Stratford khua The Holy Trinity Church-ah baptisma chantir a ni. A nupui chēnna, Anne Hathaway Cottage an tih tâk chu han tlawh nghal kan duh hle a, mahse hun kan neih tlêm avangin kan tlawh hman ta lo a ni. Kal hman ila chuan Shakespeare-a pianna in aṭanga pan dān pawh amah Shakespeare-a thu ziak aṭang bawkin a chhui zawn theih a, zawn hmuh a harsa lo vang;

1. *As You Like it, II. vii. 145 - 147*

West of this place, down in the neighbour bottom;
 The rank of osier, by the murmuring stream
 Left in your right hand, brings you to the place.¹

Shakespeare-a pianna in aṭang chuan a thlân en turin kan kal ta a. A hun laia an chin ḫin angin Shakespeare-a chu biak in chhûnga phûm a ni a, tichuan a thlân awmna biak in, The Holy Trinity Church awmna chu mi kan zâwt chawp a, harsa lo takin kan va hmu a. Chu biak in chu kum 1187 vêla sak a ni a, tun thlengin biak in hman dan pangngai hian an la hmang reng a ni. Inkhâwm loh lai pawhin ni tin a nghâktute an awm reng a; Shakespeare-a thlân en duh an awm reng ḫin tih an hriat avangin an khâr mai bik lo a ni. A entute zingah ḫanpuina pe theite an awm tâkin thawhlâwm bâwm an hûng bawk a, thawhlâwm tling khawm chu chumi biak in siam ḫhat zêl nan hman tur a ni.

Biak in chu a kawngka pui berah kan lût a, a kawngkhar chu thingphel chhah pui mai hi a ni. Nu pakhat a chhunga lo nghâktu chuan Shakespeare-a thlân awmna lai chu min lo kawhhmu a; han luha vei lamah Pathian biak inkhawmna hmun sirah chuan Shakespeare-a thlân chu kan va hmu ta a. Biak in chhûng chu a êng vak lo va, mahse hla phuah thiam thlân awmna laiah chuan electric êng hi a awm a. Chutia Shakespeare-a thlân han hmuha a chunga han din chu a kaw tâwp thleng ta ang deuh hi niin ka inhria a, sawi tur pawh ka hre tiêm hle. Kan thiam puipa chu thlamuang takin a châwl ta a, mahse a thu ziak awmziate chu hriat fiah tumin mi thiam tam tak an hmanhlel reng ta zâwk a ni.

A thlân chung chhuat zâwlah chuan a lung ziak fiah tawh vak lo hi a awm a, chu chu electric êngah chuan kan han chhiar a.

*Good frend for Isvs sake forbear,
 To digg the dvst encloased heare:
 Bless be ye man yt spares thes stones,
 And cvrst he be yt moves my bones.*

Hemi a thlân thu ziak hi amah Shakespeare-a phuah nia rin a ni. A thlân bul chiahah hian a nupui Anne Hathaway leh a fanu a rin ber Susanna leh a pasal Dr. John Hall te thlân a awm bawk. Hêng an thlânte hi biak in chhuat aṭanga zuk laih a ni a, an chhilh hnu pawhin biak in chhuat nena inzâwl chiahin a chung chu rem a ni. Shakespeare-a nupui Anne Hathaway chu kum 67 mi niin a pasal thih aṭanga kum 8-naah August 6, 1623-ah a thi a. Amah chu an hun laia hmeichhe tam takte angin lehkhâ ziak leh chhiar a thiam lo nia sawi a ni a; Shakespeare-a pawhin a thih dawnah chuan a ngaiantuah viau ang tih a rinawm. A fanu Susanna-i chu a ro tam tak a khâwmtir a, a pasal nén ani chu lo enkawl tûrin a chah ngei ang tih rin a ni.¹ Anne Hathaway leh a fanu Susanna leh a pasal Dr. John Hall te pawh an lo thih chuan an pa ber Shakespeare-a zâr chu zovin hemi biak in chhûngah hian a bula phûm an lo hlawh ve a, an thlân chung theuhvah pawh an hming chu ziak a ni bawk. Anni palite chauh hi hemi biak in chhûnga phûm an ni âwm e.

A thlân bula bangah chuan a lim lian pui an dah bawk a, heta a lim hi amah Shakespeare-a hmîl anna deuh ber nia sawi a ni.

Hemi liamah hian Shakespeare-a chu a thu a, a hmîl chu a âwm chin chung lam chauh an tilang a; âr chang pakhat sei deuh, lekhka ziak nan, a hun laia miten an hman ang chi chu a kut ding lamin a keng a, a kut vei lam chuan lekhka phek a dawm reng a. Hemi a limah bawk hian Shakespear-a chu mi zahawm tak nia lantir a ni. Kawrchung dum fual bân nei lo, silk-a siam hi a ha a, a hma lam chu chilh lovin a inhawng thla vek a; a hnuaiah chuan kawr bân tluan a nghâwng thlenga chilh chhoh vek hi a ha bawk a, a âwm chho vel chu thui mawi niin a lang a, koki do pâwnna nei chi a ni bawk. A kawr

1. Parker, Wm. Shakespeare and Trafford - Upon - Avon,
1975 p. 14.

nghâwng chu a bial a ni nân a hma lamah a kak hlek a, a hatu nghâwng rêk vak lo tura þui niin a lang.

Hemi a lima kawr nghâwng thâwl deuh an hâktir hian Shakespeare-a chu lem chan tur thu ziak thiam mi a lo ni tawh tih a entir a, a kawrchung dum fual hâk hian amah chu Stratford khaw mi pawimawh a ni tih a entir bawk a ni.¹ Shakespeare-a te hun laiah chuan lem chang mite chuan thawmhnaw man tam tak leh rawng lâr tak tak chi hâk an chîng a. Hemi a lima kawr an hâktir ang chi hi a dam lai pawha a lo hâk ang chi ngei, man tam tak leh mawi an tih zâwng tak a nih ngei a rinawm. Amah Shakespeare-a ȝawngkam aþang ngei pawhin hei hi thil ni thei a nihzia a lang :

Costly thy habit as thy purse can buy,
But not express'd in fancy, rich, not gaudy,
For the apparel oft proclaim the man²

Hemi Shakespeare-a lim hi a thlân entute chuan ngun takin en ve ngei se tih an duhzia tihlan nân a siamtute chuan a lim hnuai chiahah chuan hetiang hian thu chah pawh an ziak nghâl bawk a ni.

IDVICCO PYLIVM GENIO SOCRATEM ARTE MARONEM
TERRA TEGIT POPVLVS MAERET OEVYMPVS HABET
STAY PASSENGER, WHY GOES THOV BY SO FAST
READ IF THOV CANST WHOM ENVIOS DEATH HATH PLAST
WITH IN THIS MONVMENT SHAKESPEARE WITH WHOME
OVICK NATVRE DIDE WHOSE NAME DOTH DECK Y TOMDE
FAR MORE TEN COST SIETH ALL Y HE HATH WRITT
LEAVES LIVING ART BUT PAGE TO SERVE HIS WITT.

ORBIT ONO DO 1616
AETATIS DIE 23 AP

1. Nevinson, *Shakespeare Quarterly*, New York, Vol. XVII Spring, No. 2 P. 103.
2. *Hamlet*, I. iii. 70 - 73

Hemi biak inah hian Shakespeare-a chu a pian atanga ni thumna, April 26, 1564-ah baptisma an chantir a; heta an phûm thu hi biak in lehkhabu pawimawhah April 25, 1616 khan ziak luh a lo ni bawk. An hun lai chuan nausente chu an pian atanga ni 3 velah baptisma an chantir þin avangin Shakespeare-a chu April 23, 1564-ah a piang nia rin a ni a; a pian ni bawk April 23, 1616 chu a thih ni niin a lim hnuaiâ thu ziakah chuan a lang a ni.

Hemi biak inah hian baptisma a chan thu leh an phûm thu an ziakna lehkha copy pawh a thiâñ tlawhtute hmuh atân biak in chhûngâ dawkânah pawh an dah chhuak reng bawk a ni.

Shakespeare-a hian Stratford-a in tha ber pawl- “a praty howse of brike and tymber”- New Place an tih chu kum 1597- ah a lei a. Hemi inah hian a thih kum 1616 thlengin a awm a. A thih hnuah chuan mi tam takin a chênnâ in chu hmuh an duh êm êm mai a. Chumi a in neitupa chuan chutia miten an in an rawn en fo ta mai chu a ning ta êm êm mai a, a thinrim hrik thlák nan kum 1759-ah a thiat ta vek a ni an ti. Mahse tûn thlengin hemi in hmunah hian in dang sak awm lovin hmun ruakin a la awm reng a; pangpar huan an siam a, amah Shakespeare-an pangpar chi hrang hrang a sawi þinte kha an chîng a, chung chu ngun tak leh uluk takin an chei reng a, a pâr vul chûk reng a ni:

This garden has a world of pleasure in it.

What flower is this?¹

..... emerald tufts, flowers puple, blue and white;

Like sapphire, pearl rich embroidery.²

There's rosemary, that's for remembrance; pray you,

Love, remember. And there is pansies, that for thoughts.³

1. *The Two Noble Kinsmen*, II ii. 117 - 118.

2. *The Merry Wives of Windsor*, V. v. 70 - 71

3. *Hamlet*, IV. v. 751 - 771.

Stratford hi khaw tê tak tê, khaw mawi tak a ni a, a khawlaite pawh a fai êm êm mai a. A khawlai-a luang tlang Avon luiah chuan hman lai lei Hugh Clopton-a dawh chu a awm a; lui kam pakhatah chuan hlobet hring dep leh thing buk tê tak tê Gardens a awm bawk a. Chu lai hmun chu hla deuh aṭanga han thlir chuan a mawi ngei mai; tui te chu a lang dum pâwl reih a, a then laiah chuan niin a chhun êng ser bawk a, thlifimin tuite chu a rawn chhêm chêt chuan laiking bêl rawh ang deuh hian boruakah thil eng emaw phe neuh neuh awm ang hian a lang a. Hla takah chuan ram ngaw dur deuh, hman lai ata an sa pêlna hmunte pawh a lang ruih bawk. Chûng thil zawng zawng leh Stratford khua hrim hrim pawh a ngaihnobei thei zâwng bera min hmuhtirtu chu Shakespeare-a vek ni hian ka hria.

The genius who presides
within the place and spreads
his elevating influence over
the glad country round¹

Shakespeare-a chanchin hi kimchang taka hriat a awm lo va, mahse tîtî leh thawnthu anga sawi chu a tam hle. A dam lai pawhin a hming a thangin a lâr tâwk hle tih a dam rualpui hla phuah thiamte thu ziakah kan hmu a ni. Tûn thleng pawh hian a chanchin chhuitu an la awm zel a, thil thar hriat belh an la beisei reng a ni.

Kum 1976 pawh khân Bishop pakhat Mark A. Hodson-a chuan King James Bible letlingtute khan English Bible-ah hian arûka Shakespeare-a hriat rengna an lo thun tel nia a hriat thu *London Times* chanchin buah chuan chhuah a ni. King James Bible hi English-in 1610 khân an letling zo va, 1611-ah an chhuah a. An lehlin zawk kum 1610 chuan Shakespeare-a chu kum 46-na a ni a, chumi hriat rengna chu Sam

46-naah hian an lo zep a ni, tiin Bishop Hodson-a chuan a sawi.

King James Bible-a Sam 46-na hi a bul aṭanga thu mal zawng zawng chhiarin, thu mal 46-naah “shake” tih a lo awm a; a tāwp lam aṭangin Sam 46-na hi thu mal zawng zawng, a tāwpa *Selah* tih hi tiam lovin, a lēt zāwnga chhiarin thu mal 46-naah bawk “spear” tih a lo awm bawk a. Tichuan English Bible (KJV) letlingtute khān Shakespeare-a kum 46 a tlin kum hriat reng nân Sam 46-naah hian a hming an lo dah ru khaia a ni tiin, Bishop Mark Hudson-a chuan a sawi.

Stratford aṭanga London lama kan hâwn dâwn chuan Shakespeare-a pianna inah kan lüt leh a, tah chuan a thlalâk lei tûr a awm leh awm loh ka zâwt a. Chuta thawk nu pakhat chuan Shakespeare-a thu ziak zawng zawng bu khata an chhuah hmasak bera an chuantir, a thlalâk copy lian pui mai hi a rawn phawrh a. A thlalâk en aṭang mai chuan pa ngainatawm tak hmêl pawh puin ka hmu lo va, mahse a dam rualpui leh ḡhian, amah hre chiang êm êmtu Ben Jonson-a thuchah chu pawm mai tur a ni :

Reader, looke
Not on his Picture, but his Booke.¹

1. Ben Jonson, *To the Reader*, on the opening page of the Shakespeare First Folio (16230)

SIBOLETH LEH SHIBOLETH

"Shiboleth han ti teh," an lo ti a; ani chuan "siboleth" a lo ti zâwk thin a, a lam fiah ve thiam si thin lo va... Jordan lui kaiah te chuan an lo that zel a; chumi tum chuan Ephraim-ho chu singli leh sang hnih an that a ni.¹

Ephraim-hovin thu mal pakhat *shiboleth* an lam fiah thiam loh avanga ȳum khata mi 42,000 laiin an thih phah aṭang hian, mihring leh mihring daidangtu ber pakhat chu ṭawng inan lohna hi a ni ngei tih a lang. Ephraim-hote hi thu mal pakhat lam fiah thiam loh avanga thih phah nasa ber hnam pawh an ni hial ang. Amaherawhchu mi singli leh sang hnih lai zingah chuan *Shiboleth* tih chu lam fiah thiam ve ngeia inhria pawh mi engemaw zat chu an awm a rinawm hle a ni.

"Nang pawh an zinga mi i ni ngei mai, i ṭawng ah a hriat alawm,"² Petera hnena titute pawhin, ṭawng thuhmun hmang mah ni se, Jerusalema chêngte chuan Galili ram mite chu an ṭawng dan aṭang mai pawhin an hre nghal thei ni awm tak a ni. Hma khawsang ata tawh vawiin tleng hian kan ṭawng kan awphawi emaw, thu mal hman emawte hi kan pianna leh seilenna, kan zirna hmun leh hnathawh leh nihna tilang theit u a la ni fo. Chuvangin a lo chîktu leh a zir mi tan chuan Sap ṭawng pawhin mi lo ṭawng ta sela, 'America mi a ni ngei mai,' emaw 'British mi a ni ngei mai' emaw, 'Welsh mi a ni ngei mai,' a lam dan leh awphawiah a hriat alawm," tih theih tur a ni.

Juda ni lo hnam dang, ṭawng hrang hrangte nen an inchên pawlh reng avangin Galili rama Judate chu an ṭawng hman dan leh lam rik dan pawh a lo dang deuh va; Jerusalem

1. Roreltute 12 : 6

2. Matthaiia 26 " 73

Puithiam Lalber in kawt zawla mite chuan Petera pawh chu a tawng dan (speech)¹ emaw, a awphawi (accent)² emaw atang mai pawhin Galili mi a ni tih an hre thei mai ni tur a ni. Hetih hun lai hian Aramaic chu Palestine ramah chuan tawng tualleng ber a ni a, Judai rama mi awm thei deuh te, lehkha thiam deuhte chuan Galili rama mite tawng dan chu nuihzatin fiamthu thawh nan pawh an hmang fo thin a; grammar lama an tihsual fo thinna leh thu mal an lam dik thin lohna te chu an mawlia tilangtuah an sawi fo thin a ni.³ Dan narânin khawpuia tawng hman dan leh khawpui hlat deuhva hman dan hi a inang lo fo va. Chuvangin Mizoramah pawh Duhlian tawng⁴ hmang inti theuh theuh site hian, "Chhim lam chhuak a ni ngei ang - emaw, hmar lam chhuak a ni ngei ang, a tawngah pawh a hriat alawm," kan inti mîk thin rêng a ni.

Chicago thlawhna tumhmuna customs officer min lo be hmasa bertu khan *shiboleth* min lo tihtir ta ang sela, an tih ang chiahin fiah tak leh pai hauh lo va ti thiam lo chu thah nghal zel tur ni bawk ta sela chuan he thu ziak tur pawh hian ka dam a rin awm loh hle a ni.

University-ah class ka kai jan hmain English-a ziak leh chhiar ka thiam leh thiam loh min exam-naah te chuan tha tawk taka tlingah min dah tak nân tawng lam - *shiboleth* tih lamah chuan harsatna a la awm fo a ni. A harsatna ber chu thu mal lam dan (pronunciation) ai mahin ka awphawi (accent) a dik loh avangin ka thianten ka thusawi hriat harsa an ti deuh thin a ni. Hetiang lamah hian India rama Sap sikul kan tih tea

1. *Ibid*, KJV.

2. *Ibid*, RSV LB MLB

3. H.V. Morton, *In the Steps of the Master*, N.Y., 1936. 203.

4. J.H.Lorrain, *Dictionary of the Lushai Language*, Reprinted, 1975, p. 118. Duhlian tawng hi thil awm lo leh Mizo tawng sawina dik lowah ami thenkhatin an ngai tih hre reng chungin hetah hian, ka hmang lui a, Mizo tawng tih nan Pu Buangan a lo hman angin ka han hmang ve a ni.

zir chhuakte pawh an dang chuang êm êm lo. Thu malte hi a mal mala han lam chuan lam dan dika lam thei leh thiam chu kan tam a ni. Han ɣawng pawh hian mahni ngaihthatna tâwk leh mahni nâl nâl chuan kan nâl tlâng ve viau ɻhin âwm e. Mahse a tihhniam tur laiah tihniam lovin a tihsân tur laiah kan tisang lo leh a, tihhniam tur lai leh tihsânnâ tur lai hi kan hriat bawk loh avangin puam fe fea kan ɣawngte pawh hi a pai êm êm tho va; pianpui ɣawnga lo hmangte tan chuan hriat a lo har viau ɻhin a ni

Hemi chungchângah hian professor pakhat¹ English zirtir dân chungchâng thua India rama lo kal tawh chuan hetiang hian class-ah a sawi ka hre reng ɻhin. India rama zir chhuak lehkha thiamte Sap ɣawng chu America mi tan leh British mi tan chuan hriat har tak a ni, thiam leh nâl viauva inhriate ɣawng pawh hriat a har êm êm tho, a chhan chu an duh hun hunah an tisangin an tihniam a; an ɣawng a pai nasat avang leh an ɣawng ran bawk si avangin an thusawi hre vek tur phei chuan ngun taka ngaihthlak leh an ɣawng dan hriat than hle a ngai a ni,” tiin.

Hemi ka zirna university-ah ngei pawh hian India rama English ɣawng zirna hmun pawimawh ber tih hial tur, Central Institute of English and Foreign Languages, Hyderabad-a Director thawk lai Dr. Romesh Mohan chu ka awm lai ngeiin Visiting Professor-ah semester khat chhung atan a lo kal a. India ram leh S.E. Asia-a English zirtir dan kalmang *Teaching of English in India and S.E. Asia* - tih course a zirtir a, chu chu kei pawhin ka lo zir ve a. A tirah chuan a class-a mi 22 emaw kan inziak lut a, a zatve vel chu America mi an ni a, China mi pawh 2 an tel ve a. Mahse, America mi leh China mite chuan Dr. Mohan-a Sap ɣawng leh thu sawi chu an hriat that theih loh avangin a class chu an chhuahsan thuai a. Ameri-

1. Lawrence Bouton, Director, Division of English as a Second Language, University of Illinois, Urbana.

can zirlai 2 leh India mi zirlai 8 chauhvin Dr. Mohan-a lecture mut tichhuak duh tak mai chu ngaithlain a course zirtir chu tlawmngaih chhuahin kan la tluan chhuak hrâm a ni.

Ka thlen thlâk hlimchhâwngah university class-a ka luh hmasak ber ni chuan mi an lo thu khat ɬhap tawh mai a; zirtirtu chu a lo luh pawhin tuman an hmel leh awm dan an tidanglam hranin ka hmu lo va. Chumi ka class kai hmasak bera kan zir chu John Milton-a poetry a ni a. Professor chu ɬawng fiah hlein ka hria a, a Sap ɬawng thu mal lamte pawh chiang takin ka hre thei a. India rama professor ɬawng ai daihin ngaihnawm leh hriat nuam zawkin ka hria. Amaherawhchu ka pâwlpuiten thu an han zawh sap sap chuan an ɬawng rang hlawm bawk a, eng nge an zawh chiah tih ka hre thei mang lo thung a; Professor chhâンna aংtangin eng thu nge an zawh tih lo hriat ka tum châng a awm fo ɬhin. Ka awm tirh aংtangin rei fe chhung chu ka zirpuite nen kan inkawm ɬhinin keiin an ɬawng hriat har ka tihna aiin annin ka ɬawng hriat har an tihna chu a nasa zawk ɬhin niin ka hre bawk.

Mi tam tak chuan Sap rama kum hniih kum thum awm tawhte chu an ɬawng pawh pai tawh mang lo tur ah kan ngai mai a ni âwm e; mahse hei hi ngaih dan dik lo a ni. Zosap kan rama kum 20 aia tam mah awm tawhte pawh Mizo ɬawnga an ɬawng chuan an ɬawng a la pai nasa êm êm tho tih kan hria a, Sap ɬawnga kan ɬawng pawhin hetiang tho hi a ni ve. Puitlin hnuah chuan eng chen pawh hnam dang ɬawng hi zirin hmang mah ila, a pai tho tho va, a pai dan erawh chu pianpui ɬawnga hmangte zingah awm rei hnu chuan a nep tial tial thei chauh a ni. Zan khat chu CBS television programme-a fiamthu thawhna lemchan hi ka thlir a; chutih lai chu India ramah chuan emergency puan tai a ni a, Amercian hmeichhe pakhat hi Indira Gandhi lemah a chang a. Hmeichhe dangte chuan emergency a puan chhante an zawh chuan Indira Gandhi lema changtunu chuan Indira Gandhi ɬawng dan a zira a tihlen uar

ber chu Sap ɻawng lam dan leh a ɻawng pai dante a ni.

Tawng kalhmang hi hriat vek theih rual-a ni lo. Puitling aiin naupangin hnam dang ɻawng pai hauh lo va an thiam theihna chhante pawh hi ɻawng lama mi thiamte pawhin an hre tak tak thei lo va; naupang duh duha ɻawng thei chin lu-ah hian grammar hi zirtir lohvin a lo awm tih erawh hi chu an hria. Tawng kan han tih hian thil ri, awmze nei, inbiak nana hman theih eng chi pawh hi a huam a; lehkhaa ziak hi chu thil hmuu theih hmanraw chi hrang hrang hmanga ɻawng emaw, thu sawi emaw chhinchhiahna mai chauh a ni. Mi tam tak a ɻawng lam thiam, a ziak erawh chu thiam lo; a ziak lam thiam viau si, a ɻawng lamah chuan rual pawl mang lo, hnam tin zingah an awm a; a pahniha thiam kawp hle te pawh an awm bawk. Tawng thiamna leh ziak thiamna inlaichin dan chiah pawh hi ngaihtuah leh chhui fē tham a ni.

Hnam dang ɻawng han zir hian, mahni pianpui ɻawng azirin thu mal lam fiah theih leh theih loh chi pawh a awm thei bawk a. Entir nan, French mite tan Sap ɻawng thu mal, a bul lama *th* awmna hi lam dik thiam a har duh viau va; French zirlai pakhat pawhin *I think that* tih hi, *I sing det* ti hlira a lam rīk ka hria. Japan-hote tan I leh *r* lam dan hi thliar hran a har ve hle bawk. *William Blake* tih te hi *Wirriam Brake* tiin an lam duh hle a, *Henry* tih hi *Henly* tiin an lam duh hle bawk a ni. Tawng hrang hrang hmangte zingah pawh hetiang hian hnam dang ɻawnga thu mal ɻhenkhat lam rīk harsa tih deuh bik hi a awm tih hriat a ni.

Tun lai mi thiam ɻawng kalhmang zir mite (linguists) thliar dan chuan Sap ɻawngah hian hman dān hrang (dialect) tam tak a awm a, a dik ber tia han sawi tur chuang a awm lo. Mi tam takin BBC English leh Oxford English te chu Sap ɻawng dik ber leh mawi berah an sawi dawn mai ɻhin a, mahse ɻawng lama mi thiamte thliar dan chuan hman dan leh style, dialect chi hrang an ni mai chauh a ni. Hetianga an thliar dan

hian America ram pumah English hman dan leh lam dan chi hrang 6 a awm a, England-ah chuan chi hrang 30 lai a awm thung. Chuvangin England chu a ram zimzia ngaihtuahin Sap ɻawng hman dan leh lam dan inrual lohna leh inan lohna ber ram a ni tlat thung a ni. Hei hi George Bernard Shaw pawhin a drama ziak *Pygmalion*-ah chiang takin a tarlang a, London khawpui khawtthler tin deuh thawa mi chēngte Sap ɻawng lam dan chu in ang alawi a awm loh thu *Pygmalion*-ah chuan a sawi a ni. Keini ral khat aṭanga lo zirtute erawh hi chu Sap ɻawng lam dan leh hman dan dik ber hriat inchuhin kan lo inhnial fo thung a ni âwm e.

George Bernard Shaw bawk chuan tûn hmaa BBC thu puangtuin Sap ɻawng a lam dan chu Sapho zingah pawh tu pianpui ɻawng mah ni lo, a puangtu aw phawi leh lam dante chu tu hman dan mah ni tak tak ngai rēng rēng lo leh, a puangtu ngei pawhin a puān lai chauhva a hman thu sawiin, tih dān dik a nih lohzia a sawi nasa hle thin a. Chutiang lam dan chu phuahchawp liau liau nia a hriat avangin inzirtir tam tlâkah pawh a ngai lo a ni.

BBC din ḥan tirhah phei chuan a thu puangtute Sap ɻawng lam dan chu ngai thei lo leh duh lo an tam hle mai a. England hmar lama chengte leh Scotland leh Ireland-a chēngte chuan an sawisel nasa zual a. An duh lohzia an tihlan nasat tâk êm avangin BBC chuan kum 1926 khan Advisory Committee a din ta hial a, a hotu ber atan chutih hun laia hla phuah thiam hmingthang Poet Laureate, Robert Bridges-a chu ruat a ni a; member-te chu George Bernard Shaw te, Lord David Cecil te, Lady Cynthia Asquith te, Lascelles Abercrombie te, H.C.K. Wyld te, I.A. Richards leh thianna lama mi rin kai deuh hlir an ni a. Member thenkhat chuan England chhim lama chengte Sap ɻawng lam dan BBC thu puangtuin a lo hman deuh bik ḫin chu an sawi mawi a, mahse Robert Bridges leh Bernard Shaw

chuan an lo duh lo nasa mai si a; tichuan BBC thu puangtuin Sap ṭawng a lam dan tur thuah chuan inremnate siamin tihdanglamte pawh an nei ta nual a ni.

BBC English hi Oxford English zula kal a ni a, Robert Bridges-a leh Bernard Shaw chu Oxford English duh lotu leh sawiseltu langsar ber an ni reng thin a. Robert Bridges-a phei chuan a thu ziak pakahtah phei chuan Oxford English chu “ṭawng tla hniam” tiin a sawi nghe nghe a ni.¹ Thu mal ḫenkhhat tawpa r lam rik loh an ching chu a huat chhan bulpui ber a ni bawk. Bernard Shaw pawhin Oxford English a sawiselna chu chanchin buah a ziak fo ḫin a.² British mi dang zingah pawh duh lo leh sawiseltu tun thleng pawhin an tam a, BBC English lam dan pawh hre chamchi si, mahse chutiang lam dan chu la ve duh hauh lo an tam tih kan hriat aṭang hian dik bera pawm mai bîk tur a ni lo tih a lang a ni.

Tûn laia Sap ṭawng dik tuallēng, *Standard English* kan tih pawh hi thil awm tak tak a ni em tih hi mi tam takin an chhui a, thil awma ngaih tur a nih pawhin pianpui ṭawnga hmangte zinga lehkha thiam tam berten ṭawngah leh ziaka an hman dan apiang chu a hun lai zel atan Standard English ni mai turah tûn lai mi thiam ṭawng zir mite chuan an ngai a ni. Chuti ni se BBC English leh Oxford-a English lam dan leh hman dan chu Sap ṭawng pianpuia hrnang lehkha thiam berte hman dan a lo nih loh chuan Standard English-a ngaih theih a ni bik dawn lo a ni.

Tawng hian a hman danah pianpui ṭawnga hmangtute nun phung leh ngaihtuahna nen inzawmna a nei tlat a, a hmangtute nun dan leh rilru put dan pawh a zui zel bawk a, incheina nen inanna an neih dan sawi a ni fo ḫin. He khawvel mihring tungchhova kal zawng zawng zinga a tam zawk hian

1. *A Tract on the Present State of English Pronunciation*, Oxford, 1913.

2. For example in the *London Times*, Jan. 25, 1934.

mahni ታawng dan ፲heuh hi dik thawkhatah kan ngai vek a, ታawng hman insawiselsak pawh hi kan lâwm zâwng a ni vak lo fo bawk.

ታawng hman dan thuah hian mi tin zawn atan dân siam chi a ni lo va amaherawhchu a hun laia mi thiam deuhte thu ziak leh mu thiltithei leh thuneitute ታawng hman dan chuan mi rilru a hneh theiin mi pawh a kaihuai thei deuh ber nge nge thin. British sawrkar chu sawrkar ropui tak, ram ni tla seng lova reoreltu a lo nih avangin British mi lehkha thiamte Sap ታawng hman dan chu ram dang mi Sap ታawng lo zir ḥintee chuan dik ber tur ah ngaih a lo ni thin a; Oxford pawh khawvela university hmasa ber a nih avangin he university-a ታawng hman dan hi ngaihsan leh ngaih ropui a lo ni thin a ni; mahse kan sawi tawh angin, hman lai ata tawh tûn thlengin Oxford Sap ታawng hman dan leh lam dan hre reng si, tha ti lo leh hmang duh lo England-ah an tamzia leh Oxford Sap ታawng lam dan hmangtute chu mi tlernte chauh an ni tih hriat chian a ni si a ni.

Bristih sawrkar thil tihtheihna chuan kuai thlâk lam a lo pan tial tial tâk hnu hian American Sap ታawng ziak dan leh hman dan chuan khawvel a tuam chhah tan ve deuh deuh va. Thuhrlitu hmingthang Billy Graham-ate leh mi dang dangte thu ziak leh sermon te, Hollywood aṭanga cinema film tha ber berte leh khawvela chanchin bu darh zau leh lâr ber ber, *Time* leh *News Week* te leh *New York Times* chanchin bute chuan mi rilru a kaihuai thei nasa ta êm êm a. London-ah ngei pawh nula leh tiangvalte chuan America ታawng lêrte pawh hman an lo intihhmuh nasa ta êm êm a, sawrkar chakna leh ropuina chuan an ታawng hman dan pawh duhawm leh thain ram danga mite hmuh ah a lantir ta zel a, an hman dan thiam ve nih chu rual pawlnaah leh thil hria nihnaah mi tam takin an lo ngai tan ta bawk a ni.

Professor Eugene Henderson, University of London-a mi pawhin American ታawng lêrte guy tih hi London-ah chuan

kum 1963 vel aṭang chiah khan ṭawngkam pângngaiah pawm a lo nih thu leh khawiah pawh i-hê lovin miten an lo hman tawh thu a sawi a; *O.K* tih America rama hman lâr ṭan pawh hian khawvel a fan chhuak a, ṭawng lêrh deuh angin America ramah an lo la hman fo laite chuan British pa infâwp fip tak tak ṭhin zawkte chuan thupui fe sawi châng pawhin urhsûn sakin “O.K.” tiin an lo bu nghut nghut ṭhin ta bawk a ni.

Tawng hman dan hi zawi zawiin eng lai pawhin a inthlâk reng a; a hmangtute hman dan thar an chherchhuah leh hman tlânglawn ang apiang chu dictionary siamtuten an lo chhinchhiah zel a, ṭawng lêr anga hmante pawh zawi zawiin dictionary-ah lâk luh a lo ni ṭhin a ni.

Mizo ṭawng hmangtute zingah hian ṭawng hman dan khalh ngil tum tlat leh tun hmaa lo hman dan ḫhenkhatte chu dik bîka ngaiin tuallêntir reng tum tlat kan awm niin a lang. Mahse incheina anga a hmangtute rilru leh nun nena inzawm zel a nih avangin, ṭawng hman dan lo dang zel leh inthlâk zel hi dan chi a ni lo. Ṭawng hman dan lo inthlâk ṭhin dan lo tum hi thil tih theih loh leh thil âtthlak a nihzia Dr. Samuel Johnson, *English Dictionary* (1755) siamtu leh ṭawng hman dan tur bik siam tumtu chuan a hlawhchhamzia chu kum 200 vel kal taah khan atakin a lo hmu tlang tawh a, thil tih chi ah a ngai ta lo a ni. Chuvangin, ‘nakzanah’ tih aiin ‘naktûk zanah’ ti ṭhintu thangtharte zinga lehkha thiam tam berte ṭawng dan leh ziak dan chu a hun lai zel atan chuan ṭawng dik tuallêng a lo ni mai dawn a ni. Thangthar lo kal zel turte chu an ṭawng hman dan tur keinin kan relsak thei lo va, relsak pawh tum ila thil sâwt chi a ni lo.

Lehkhabua kan thu hmante hi dân narânin ngun taka ngaihtuah hnuah dah rem leh siam rem (edited language) an ni ṭhin a; inbiak nan leh tîti sawi nana kan ṭawngkam hman te, kan thinrim thutah ngaihtuahna pawh hmang êm êm lova kan rilrua lo chhuak ang ang kan phuhchhuahte hi, a nihna takah

chuan kan pianpui (native) ɣawng tak a ni zawk a ni. Hei hi a dikzia kan ni tin ɣawngah pawh a lang fo a ni.

Mizo ɣawnga thu ziak taima tak leh ɣawng hman pawh duh uluk tak Pu R. Vanlawma nen zan rei tak thlengin Mizo ɣawng chungchang hi kan sawi dun ɻhinin ani chuan, "Ziah tih hi a dik lo a ni, ziak tih tur a ni," tiin ɣan a khawh ɻhin a; mahse titi danga kan pakai hnu chuan a invêng sêng lo a ni ber âwm e, a hriat loh hlânah ziah tih hi vawi hnih emaw, vawi thum emaw lai a han hmang ɣan kau mai a. A pianpui ɣawng dik tak ni zawk âwm chu ziah a lo ni reng mai a; mahse lehkhabua hman atan chuan a pianpui ɣawng chu tidanglam leh siam remin ziak tih hi a hmang lui leh hrâm ɻhin zawk niin a lang.

Khawpuia piang leh sei liante tân khaw tê zâwk emaw thingtlang khaw thenkhat emawa mi chêngte ɣawng-kau-chheh hi mak lo tih leh rilrua lo nuihzat mai a awl viau a; mahse khawpuia chêngte ɣawng-kau-chheh hi thingtlanga mite ngaihin ɣawng hman dan dik ber a ni chuang hauh lo. Thingtlanga mite aiin khawpuia chêngte chu in leh lo nei tha zawk leh haus a zawk, incheina nei zawk leh inchei thiam zawk an nih hi hai rual a ni lo nain, radio-a thu puanna ɣawng-kau-chheh te, khawpui chanchin bua ɣawng hman tam takah te hian khaw tê zawka chêngte tan dik leh tha zawka lo pawm theih loh tur tam tak a awm tho a ni.

Naupan lai atangin khaw tinah ɣawng hman dan bik kan nei a; lehkha kan lo zir sän zel hnuah leh khaw hrang hranga mite chu kan han inhmuh khawm hnu chuan naupan laia kan ɣawng hman thenkhatte chu kan hmang khât deuh va. Mahse naupan laia thiante nena inhmuh nikhuaah erawh chuan kan lo thanlenpui ɣawng-kau-chheh chu mi tam tak chuan hman nawn leh nuam kan ti a, mi thenkhat erawh chuan an zahpui deuh thung. Abraham Lincoln-a chu ukil thiam tak leh langsâr

ta, mi tam tak ngaih danin vawiin thleng pawh hian ɻawng hmang thiam tak a ni a. Mahse President a lo nih hnuah pawh a ɻhian hluite nen an inkawm chuan tûn hmaa a lo chênnâ khuaa an ɻawng-kau-chheh chu hmangin a lo tîtipui ɻhin a, a nuam tih zâwng tak a ni ɻhin.

Mizoram chhim lama mi chêng ɻhenkhat “Min lo lêng rawh,” ti ɻhinte chuan “Lo lêng rawh,” tih pawh an thiam tho a ni, mahse an hman ɻhan dan chu nuam an tih zâwng leh duh dan a ni mai zawk a ni. Kei ngei pawhin ka naupan lai aṭanga ka lo hman ɻhin “tluklehdinâwn” tih hi tun thlengin ka la hmang duh zawk a. Mizo ɻawng dictionary siam hmasa bertu Pu Buanga pawhin a Dictionary-a a lo ziak luh dan a ni,¹ mahse “tluklehdingâwn” tih hmang duh zawktute pawh an awm tho tih ka hria a. ɻawng hian kal dan bik (logic) eng ang chia hin nge a neih tih pawh hi hriat tak tak theih a ni lo va, a hman dan leh awmzia inlaichin dan pawh hrilhfiah sen a ni lo bawk. “Ka ɻhianin vawk min talh,” ti ila, a sawitu chu vawk ka ni tihna a ni hauh si lo, mahse kan hman dan chu a ni tlat a ni.

ɻawng leh hnam nunphung (culture) hian inzawmna a neih vek avangin, ɻawng kalhmang leh awmzia hre chiang tur chuan a zawmpui leh a lo chhuahna hnam nunphung chu hriat a ngai a. Sapho fiamthu ɻhenkhat lehkhabua ziak kan chhiar ɻhina kan nuih a zat vak ɻhin lohna chhan pawh hi an nunphung leh kan nunphung a inan loh vang a ni a, an fiamthu thawnha ɻawngkam chuan ka rilruah thu a sawi ve lo a ni. Mizo fiamthuah pawh Sapho lo nuih vena tur a awm lo fo bawk. Hnam nunphung leh rilru hi grammar leh dictionary aṭang mai chuan zir thiam sên a ni lo. ɻawng ri bâkah kan thu sawi laia kan hmêl lan dân, kan mit men dan te, kan hmui siam danglam dan te, kan lu leh koki tihchêt dan leh bân vai dante pawh hi entir tam tak nei

1. J.H. Lorrain, *Dictionary of the Lushai Language* (Reprinted 1975)
p.516

thei, chetziaa thu sawina (non-verbal expression) a ni a, tawng zir mite chuan an ngai pawimawh êm êm a ni. Miin hnam dang tawng a zirin pianpui tawnga hmangtute hnam nunphung hriatna lamah hma a sâwn chak dan ang zelin chu hnam tawng chu a thiam chak ve zel dawn a ni tih hi tawng zir chungchâng thua mi thiamte ngaihdan a ni. Hnam nunphung leh rilru put dan hriatna nei si lova hnam dang tawng miin a lo hman chuan, Rousseau-an a sawi angin, mi pakhatin French tawng ringawt pawh hi tawng hrang paruk lai ah a chantir thei mai dawn a lo ni.¹

Mizo tawng hmangtu thenkhat hian kan tawnga thu mal thenkhat *tlawmnngaihna* tih ang te hi Sap tawngah pawh a awm ve lo ve tih changchawiin Mizo tawng hi hausa ta luaah kan ngai a ni mai thei. Tawng tinah hian hnam dang tawnga lehlin fiah that theih loh thu tam tak a awm vek a ni. Sap tawng thu mal tam tak, Mizo tawnga lehlin ngaihna kan hriat loh avanga kan tawng ang maia kan hman tam tawhziate hi ngaihtuahin kan tawng hi Sap tawng aiin a hausak zawk a rinawm lo hle a ni. Mizo zinga mi thiam hmasa pawl Pastor Liangkhaian Mizote hi hla thua kan hausakzia a sawinaah, “Mizo hian hla thu bik (poetical words) kan nei nasa êm êm mai a, Saphote ai chuan kan ngah daih âwm e,”² a lo tih te pawh hi a fiahna âwm ang kan la hmuh loh avangin, a ngial a ngana pawm mai a har a ni.

Mizo tawngah hian thu mal eng zat vel nge awm tih hriat a har hle a. Pu Buanga dictionary-ah pawh hian kan tawnga thu mal awm zawng zawng a chuang kim lo va, amah Pu Buanga ngei pawhin a thuhmahreriaah a thu mal lawr khawm sa ziakna lehkha eng emaw zat chu sazuin a lo pu

1. Grace de Laguna, Perception and Language, *Reading About Language* ed. Laird & Correll, 1971 P. 160.

2. Rev. Liangkhaia, *Hla shu*; M.Z.P. Chanchin Bu, ed. Prof. Siamkima, June, 1973 P. 8. *A kut ziak pawh vawn shat a la ni.*

darh a, chûng thu mal put bote chu a chhui chhuah mai theih tâk loh avanga pawi a tih thu a sawi nghe nghe a ni.¹ Chu lo rēngah pawh he dictionary chhuah hmasak ber hun 1940 kum vel aṭang khan ṭawng hman dan leh thu mal thar tam tak a piang tawh a, chungte chu lâk luh a la nih loh avangin a kim lohna chu hriat a awl lehzual hle a ni. He dictionary-ah hian thu mal thenkhat a hman dan hrang hrang tihlanna tura ziak nawn a tam êm avangin thu mal hrang ngat eng zat nge awm tih chhiar a har phah bawk a. Amaherawhchu eng ṭawngah pawh dictionary kim bera an ngaihahte pawh thu mal zawng zawng ziak luh theih a ni ngai lo.

Webster Dictionary siam chhuaktu Noah Webster chuan kum 1806-ah English dictionary a siamah chuan thu mal 28,000 a ziak lut a, chutih lai chuan thu mal ziak khawm tam ber a ni a; mahse kum 1828-ah a ziak belh leh chuan a thu mal lawr khawm chu 70,000 lai a lo tling ta a. A hnathawh chhunzawm zeltute chuan *Webster's Third New International Dictionary* (1961) an chhuahah chuan thu mal 450,000 aia tam mah an lo ziak lut ta a ni. Sap ṭawng dictionary-a thu mal awm tamna ber *The Century Dictionary*-ah chuan thu mal 530,000 zet a awm a, *The Standard Dictionary*-ah pawh thu mal 455,000 a awm a, kum tam tak chhung rin pui bera lo neih thin kum 1888 aṭanga 1928 chhunga buatsaih, *Oxford English Dictionary*-ah chuan thu mal 414,825 a awm bawk. Heng hi thu mal inbelhbawm, thu mal hrang anga hmante pawh huam veka chhiar a ni. *Oxford English Dictionary* siamtute pawh hian an buatsaih ṭan tirh aṭanga an zawh hun chu kum 40 lai a lo nih avangin chumi chhung chuan thu mal thar tam tak a lo chhuak hman tih an hriat a, mahse vawi khatah dah iuh kim theih rual nia an hriat loh avangin a khât tawkin a belhchhahna (supplement) an chhuah ta mai a ni.

Robert L. Ramsay-a chhiar danin thu mal hrang ngat

1. J.H. Lorrain, *Dictionary of Lushai Language : Introduction* xii - xiii

Sap ɻawnga awm zat chu 250,000 vel a ni a, chung zinga 50,000 vel chu ɻawng hlui hman tawh ngai mang loh a ni. German ɻawng dictionary kim berah chuan thu mal 71,750 a awm a; thu mal belhbawm 112,954 nen chhiarin a vaiin thu mal 184,704 a awm a. ɻawng danga thu mal awm zat chu hetiang hi niin an sawi :- French 93,032; Spanish 70,683; Italian 69,642; Latin 51,686; Ancient Greek 96,438; Sap ɻawng hlui, Anglo-Saxon 41,142. Heng hi lehkhabua thu mal hmante a chhiar aṭanga a hriat dan a ni a, ziaka hman loh ɻawnga kan hman si tam tak a la awm tih Ramsay-a chuan a sawi bawk.¹

Mahni pianpui theuh ɻawngah hian thu mal engzât nge kan hriata kan hman thin tih hi hriat a awlai lo hle bawk a. Sap ɻawng zirtirtu E.A. Kirkpatrick-a sawi dan chuan pianpui ɻawnga hmang sikul naupang pawl 2 zirlai chuan thu mal 4,480 vel a hria a, pawl 6 zirlaiin 8,700 vel, pawl 9 zirlaiin 13,400 vel, pawl 12 zirlaiin thu mal 20,120 vel a hre hman bawk.² ɻawng lam zirtirtu hmeichhe pahnih, Mildred C. Templin (Menneapolis, 1957) leh Ruth G. Strickland, (Bloomington, Ind. 1962) te hmuh dan chuan naupang kum 8 miin thu mal 30,000 lai a lo hre hman tawh a, sentence har fe fe pawh a lo hmang thei tawh a'ni. Mary Jean Schulman leh Robert J. Havighurst te hmuh dan ve leh chuan naupang kum 14 mi, kut hnathawka ei zawng chhungkuaa sei lian chuan thu mal 18,000 aṭanga 60,000 a hria a, chhûngkaw nuamsa deuh leh neinung deuhva sei lian chuan thu mal 35,000 aṭanga 57,000 lai a lo hre tawh a ni.³

ɻawng hman dan chhuitu dang E.H. Babbitt-a chuan kum 1907-a a hmuh dan a ziak chuan America ram college

1. *Taking the Census of English Words; As Vol. VIII, Feb. 1933 pp. 36 - 41.*

2. *A Vocabulary Test, Popular Science Monthly, Feb. 1907.*

3. *Size of Vocabulary, Journal of Educational Psychology, Vol. XXXVIII, 1947, p. 437.*

zirlaite chuan, kum 2 college-a an lo zir thlen chuan thu mal 50,000 aṭanga 60,000 vel an hria a, college-a zir ngai lo hmeichhia leh mipa lehkhabu chhiar ṭhinte chuan thu mal 25,000 aṭanga 35,000 vel hriain a sawi bawk. Ṭawng zir mi dang F.M. Gerlach-a ve thung chuan high school zirlaite chuan dan naranin thu mal 71,000 hriain a sawi a, college zirlaite chuan thu mal 81,000 vel hriain a sawi bawk.¹ Mi thiam dangte hmuh dan pawhin a mipui mimir hian thu mal tlem tê chauh kan hriain kan hmang ṭhin nia ngaihdan awm ṭhin hi an thlāwp lo va; hetia rin ai hian mi pakhat hian thu mal hi a lo hre tam thei hle tih hi an hmuh dan a ni.

Mi ṭhenkhat Shakespeare-a thu mal hriat zât chhuitute chuan a thu ziak an chhiar aṭangin Shakespeare-a chuan thu mal 15,000 emaw chauh hriain a sawi a, ṭhenkhat chuan thu mal 20,000 vel chu a hre ngei niin an hmuh dan an sawi bawk. Sap ṭawnga ziaktu hmingthang tak dang Milton-a chuan thu mal hrang 8,000 emaw chauh a hmang niin an hria a, mahse 8,000 aia tam chu a hriat ngei a rinawm hle si a ni. Thuthlung Hlui Sap ṭawnga letlingtu hmasa berten thu mal hrang an hman zat chu 5,642 chauh nia hriat a ni.

Hnam nun phung leh khawsak dan azirin thil eng emaw sawi nana thu mal nei tam bik riaute pawh an awm tih hriat a ni. Entir nan-Eskimo-ho chuan an nun leh vûrin inzawmna nghet tak a neih avangin vûr len zâwng, hmel lan dan leh pian hmang sawina thu mal ngawt pawh chi hrang hlir 12 lai an nei a. Chutiang bawkin Africa rama Swahili ṭawngah chuan kal tihna - tuipui kama kal tihna bik te, thil chhipchhuan chunga kal tihna te ang chi hi thu mal 12 lai a awm bawk a ni.

Ṭawng kal hmang chhui ṭhin mi thiamte chuan ṭawng hman dan a lo danglam theih dan hetiang hian an sawi. Tûnah entir nan khawpui pakhata chêng ṭawng khat hmangte zinga a

1. H.L.Mencken, *The American Language*, 4th. Ed. N.Y. 1967 p. 524.

zatve lai tur hi a hlâwmin pêm chhuak ta ang sela, khawpuia la châmbângte nen chuan inkal pawh tawn lovin an ɻawng chu hmang chhunzawm ve ve zel bawk ta ang sela, a pêm chhuakate ɻawng hman dan aiin an pêmsan khawpuia awmte hman dan chu a lêt eng emaw zatin a danglam chak zawk niin an hria a ni. Chuvangin tun lai America ram Kentucky leh Virginia State-a Appalachian tlâng rama mi chengte ɻawng hman dan leh lam rîk dan chuan tun lai London khawpuia mi chengte Sap ɻawng lam dan aiin Shakespeare-a hun laia ɻawng hman dan kha a hnaih zawkin an hria a ni.¹ Heng Appalachian tlâng rama mi chêngte hi an thlahtute chu kum 500 lai kal taa England aṭanga America rama pêm lutte an ni.

Chu lo lehah chuan chutianga khawpui pakhat aṭanga pêm chhuakte ɻawng hman dan leh an pêmsan khawpuia la awmte hman dan chhuinaa an hmuh leh chu a pêm chhuaka ten ɻawng hman dan chi khat an vawn reng laiin an pêmsan khawpuia chêngte zingah chuan hman dan chi hrang hrang a chhuak ɻeuva; mi tha leh lehkha thiamte ɻawng hman leh mi rethei leh lehkha thiam lote hman dan phei chu a inang lo nasa tial tial tih an hmu a ni. England-ah pawh Oxford leh Cambridge-a zir chhuak mi thiamte ɻawng lam dan ai chuan mi rethei leh lehkha thiam lo, khaw fê tak têa chengte lam dan chuan Shakespeare-a hun laia Sap ɻawng lam dan kha a hnaih zawk niin an sawi.²

Sapho zinga mi thiam, an ɻawng kalhmang zir mite chuan an ɻawng grammar nia an lo pawm ɻhin, sikul pawha kan lo inzirtir kumkhua ɻhin hi an han chhût chianin Latin ɻawng grammar zuia siam a lo ni tih kum rei vak lo kal ta aṭang khan an hmuchhuak a; chuvangin tûn laia India ram sikula English grammar text book, dik lo thei lo tur ang hiala

1. Paul Robert, *Speech Communities, Language* ed. Clark, Eschaholz and Rosa, F.Y. 1972 p. 336.

2. *Ibid.*

kan lo inzirtir leh pawm ɻhinte hi an paihthla ɻan tawh a ni. Chu lovah chuan grammar-in a tum ber chu ɻawng hman dan tur mi zirtir leh kawhhmuñ ni lovin, a hmangtuten an hun laia an hman tualleng ber kalhmang sawifiahna (description) a ni zawk tih hi tun lai mi thiamte ngaih dan a ni. Chuvangin, ɻawng dik ber, mawi ber, ɻha ber leh lâr ber pawh thil awm thei ah an ngai lo va. H.W. and F.G. Fowler-a ten *The King's English* (1906) an tihte pawh thil ni tak takah an pawm bawk lo a ni.

Shiboleth tih lam fiah thiam loh avanga ni khat thil thuah Ephraim mi 42,000 lai thattute ve thung kha Vairengte gate-ah lo luh chhoh tum ta ang se la, a lo kal hmasa apiang hnenah, “*Mizoram han ti teh*,” lo ti ta zel ila, Mizovin kan lam ang chiaha lam thiam lo chu thah nghal zel tur ni ta bawk sela, kan that tam thei ve hlein a rinawm. Kan ram Zosap lo awm tawh ɻhenkhatte pawh kha an zingah tel ru ve ta sela, a vanduai tawk chu an awm mai thei a ni.

Jerusalem-a Puithiam Lalber in kawt zawla nu ɻhenkhat, Peter-a chenna khua, Galili rama Kapernaum-ah zin ve thung sela, Kapernaum khaw paho chuan, “E! Nang chu Judai rama mi i ni maw? I ɻawngah pawh a hriat alawm!” an lo ti ve ngei ang. Kapernaum chu an khawpui ber rliin Jerusalem chu khaw chengker tak ni phei sela chuan Galili ram mite chuan Jerusalem lam mite ɻawng dan chu an nuihzat ve deuh ngeiin a rinawm.

Aizawl aṭanga sawi ɻhin dana Tuichâng râl kohhran upa chuan tui takin Lal Isua'n kan tan a *tawrh* nasatzia pulpit-ah a tlangaupui a, Aizawlah erawh chuan kohhran upain Lal Isua'n kan tan a *tuar* nasatzia a lo sawi thung a. Mi thil chîk Pu R. Vanlawma chuan an khua Maubuang aṭangin Aizawl a lo luh ni chu *Ningani* niin a sawi a, chumi ni bawk chu a fanu chuan *Nilaithawhṭan* niin a sawi a, kei chuan eng ni nge tih ka hre ve ve tho va. Lunglei lam mite chuan *chhimkelek* leh *laui* leh

nuhnûn an ei ɻhinte chu Aizawl lam mite chuan *tengtere* leh *lamkhuang* leh *thingfanghma* eiin an lo ei hmiah hmiah bawk a. Serkawn damdawi ina kalte chuan damdawi lâk nan *palang* an keng ɻhin a, chutiang chi tho la tura Durtlang damdawi ina kalte erawh chuan *saidawium* an keng thung a ni.

Mizo ɻawng hmang inti theuh theuhte zingah pawh, "Chhim lam chhuak a ni ngei mai - hmar lam chhuak a ni ngei mai - khaw chhak lam mi a ni ngei mai, a ɻawng ah a hriat alawm," kan ti ɻhin a; khawpui deuh zawka chêngte phei chuan an hman ngai loh anga hmangte chu nuihzatna leh hmuhsitna deuh pawh an nei lek lek ɻhin a ni âwm e.

Mahse ɻawng khat hmang zingah rau rau pawh awmna hmun azirin hman dan (usage) chi hrang hrang (local variations) a lo awm theihzia lo hre kiautu Pu Buanga chuan kum 40 lai kal taah khan a dictionary siamah chuan a lo tilang vek tih kan hmu a ni.

tuar, tawrh (p. 521); Nigani, Nilaithawhtan (p. 342); chhimkelêk (p. 80); laui, lâmkuang (p. 285, 287), nûhnûn, thingfanghma (p. 345, 465); palang, saidawiûm (p. 346, 398) kawiâm, kâwl-thei (p. 332, 235) etc. etc.

Pu Buanga hian *tengtere* tih erawh hi chu a dictionary-ah a ziak lut lo.

Sap ɻawng hmangtute zingah pawh thil thuhmun sawi nan thu mal hrang hrang a awm tih kan hria a, sawi sên a ni lo vang, entir nan chauh tlem tê lo la chhuak ila :

<i>American</i>	<i>British</i>	<i>American</i>	<i>British</i>
railroad	railway	mail	post
conductor	guard	sidewalk	pavement
movie	cinema	truck	lorry
package	parcel		

Thenkhatin tarmit an *vuah* a, thenkhat erawh chuan an *bun a*; lovah zâwng a *chhuak* thin nân, kan khawsak dan a lo inthlâk zel phei chuan, lo nghet emaw, leilet emaw neih kan chin zau hunah lovah zâwng a *luh* hun a lo la thleng ngei ang. Mizo ɻawnga Bible letlingtute chuan Daniela lehkhabuah haptâ an hmang a; an lehlin zawk hlim laite kha chuan Mizoram thingtlang khua pitar putar zingah haptâ tih awmzia hre lo an awm mai thei, chawlhkar tih erawh chu an hriat vek a rinawm. Tûnah hi chuan *chartin* leh *duitin* tihte erawh hi chu kan pianpui ɻawng angin kan hmang ta vek a ni.

Tun lai pawh hian *tiauvaidip* leh *leirawhchan* kan tih thinte chu *balu* leh *iṭa* te chuan Aizawl khawpuiah a rawn lân ṭan tawh mai a ni. Thingtlang lam mi *tiauvaidip* leh *leirawhchan* la ti rengtute chu kan nuihzat rilrûk hun a lo la thleng mai ang em?

Awmna hmun a inthuhmun loh avangin thil thuhmun sawi nan thu mal hrang hman chungchang thuah hian inhmuh hniamna leh innuihzatburna a lo awm chhan hi eng dang vang mah ni lovin, induh tâwk leh chapo vâng a ni ber. Grammar dan ṭanchhana hman dan dik sawifiah tumtute hian grammatical rules aiin hman dan (usage) hi a upa zawk tih an hre thin lo a ni. Grammar hian ɻawng hman dan (rules) sawifiah a tum eltiang thin a, mahse grammatical rules-a leng ve lo leh khung tel ve theih hauh loh, hman dan chi dangdai tak tak (exceptional cases) a lo tam si avang leh mihring nunphung te, lei te, rilrute hi a thunun theih si loh avangin a sawifiah theih loh a lo tam ta mai a ni. Chuvangin mi thiam thil hre tak takte pawh an lo ɻawng simkhur phah ta thin a. "Chu chu a dik lo," ti dawt lovin, "Chutiang chu kan hman dan tlânglawn deuh zâwk a ni em aw?" ti tein thu zawhna an siam thin a ni.

England ram zim têah Sap ɻawng hman dan chi hrang 32 emaw lai a awm a, a hmangtute theuh chuan mahni hman dan theuhte chu zahpui lovin an hmang tlang zel a, anmahni

zingah innuihzatna pawh a awm hran chuang hek lo va, ziak danah emaw lam danah emaw dik zawk leh dik lo zawk tih thuah an inhnial tam lo hle. Mi thiamte leh ziak thiam bikte kutchhuak erawh chu a dingchang zel tho.

Chu lo leh-ah chuan grammar dan (rules) vawn tam leh ḥawng upa hriat tam te, hla thu awmzia leh thu mal hriat tam ringawtte hi ḥawng hman thiamna leh ziak thiamna a ni chuang lo va, mi thiamtir thei lotu pawh a ni bawk hek lo, a hman hun leh hman dan hriat chuan heng hi thil ḥangkai tak erawh zawng a ni.

.....

Mihringte mamawh ber pakhat chu Zalênnna a ni. Chu mi nei tur chuan lu chhum bân chhum huamin an sual a, nunna hialte'n an thleng thin a ni. Chuti chung pawh chuan Zalênnna famkim neih chu harsa tak a la ni cheu. Chutiang chu thil awmdan a nih laiin Siamkima Zalênnna ramah chuan a duh apiang tan hmun a awm a, duh chen chen châm theih a ni. A ramri chu kawlkil tawp atanga kawlkil tawp lehlam thleng, Ni chhuahna atanga ni tlakna thleng a ni. Siamkima Zalênnna Ram tlawh tur hian *Passport* a ngai lo va, *Inner Line Permit* emaw, *Movement permit* emaw a ngai hek lo. I duh leh Jordan luidung zawhin, *thlafam lêng kaina* Rih Lipui i han thleng rawk thei ang a. I duh leh Bethlehem dai ~~re~~ i fang ang a; i duh leh hla phuah thiam R.L.Kamiala te, Patea te, Damhaunha te, Rokunga te leh Vankhama te pawh i kawm ang a. I duh leh thawnthu ziak thiam Khawlkungi te pawh i kawm thei ~~ang~~. Khawnge i han inti tunlai ve deuh teh ang i tih le ~~te~~ fine hmangin America ram nula leh tiangvai te pawh i ka-vm thei ang. Tin, i peih phawt chuan khawvel mi ropui lei, ngaihsan ber berte thlanmual pawh i fang thei bawk ang.

Aw le, mi pangngai, mi ei ruala ei, mi kamthuaha rusla kamthuah ve thei nih i duh chuan Siamkima Zalênnna Ram hi bel chiang teh. Zir tur a tam a, sum leh psiai lei theih loh ro bliu chi tinreng i chhar chhuak ngei ang.